



OTIVM
SINE LITERIS
MORS EST

Seneca

Ex Libris Joannis Nenning

1874



D. 1.

M. TULLII
CICERONIS
OPERA.
TOMUS SEXTUS.

HOC VOLUMINE

Continentur Orationes

POST REDITUM IN SENATU, & AD
QUIRITES.

PRO DOMO SUA.

DE ARUSPICUM RESPONSIS.

PRO P. SEXTIO.

IN VATINIUM.

PRO L. CORNELIO BALBO.

DE PROVINCIIS CONSULARIBUS.

PRO M. CÆLIO.

IN L. PISONEM.

PRO CN. PLANCIO.



M. TULLII
CICERONIS
OPERA.

Recensuit J. N. LALLEMAND.

TOMUS SEXTUS.



PARISIIS,

Apud { SAILLANT, viâ S. Joannis Bellov.
DESAIN, viâ Fœneâ.
BARBOU, viâ Mathurinensium.

M D C C L X V I I I .







POST REDITUM

IN SENATU.

ORATIO VIGESIMA SEPTIMA.

Cicero a Coss. Pisone & Gabinio proditus, a Cæsare & Pompeio derelictus, lege Clodiâ pulsus in exsilium fuerat, quod in consulatu cives indemnatos necasset. Elapsis sexdecim mensibus tandem revocatus, Romam rediit pridie Nonas Septembris, anno urbis 696. Postridie, ut ipse scribit ad Atticum libro IV, 1. senatui gratias egit hac oratione, quæ post reditum in senatu inscripta est, in qua commemorat atque amplificat ejus ordinis erga se merita: laudat coss. P. Lentulum & Q. Metellum; tribunos plebis octo, & in iis præcipuè Milonem &
Tomus VI. A

Sextium ; septem prætores , & Cn. Pompeiũ. Hanc orationem præponimus orationi ad Quirites , quæ non potuit nisi post biduum haberi , si tamen habita est : nam eam duntaxat scriptam fuisse suspicatur Manutius,

I. **S**I, Patres conscripti , pro vestris immortalibus in me , fratremque meum , liberosque nostros meritis parum vobis cumulatè gratias egero ; quæso , obtestorque , ne meæ naturæ potius , quàm magnitudini vestrorum beneficiorum id tribuendum putetis. Quæ enim tanta potest exsistere ubertas ingenii , quæ tanta dicendi copia , quod tam divinum atque incredibile genus orationis , quo quisquam possit vestra in nos universa promerita , non dicam complecti orando , sed percensere numerando ? qui mihi fratrem optatissimum , me fratri amantissimo , liberis nostris parentes , nobis liberos ; qui dignitatem , qui ordinem , qui fortunas , qui amplissimam rempublicam , qui patriam , quâ nihil potest esse jucundius , qui denique nosmetipsos nobis reddidistis.

2. Quodd si parentes carissimos habere debemus , quodd ab iis nobis vita , patri-

monium , libertas , civitas tradita est ; si deos immortales , quorum beneficio & hæc tenuimus , & ceteris rebus aucti sumus ; si populum Romanum , cujus honoribus in amplissimo consilio , & in altissimo gradu dignitatis , atque in hac omnium terrarum arce collocati sumus ; si hunc ipsum ordinem , a quo sæpe magnificentissimis decretis sumus honestati : immensum quiddam & infinitum est , quod vobis debeamus , qui vestro singulari studio atque consensu parentum beneficia , deorum immortalium munera , populi Romani honores , vestra de me multa iudicia , nobis omnia uno tempore reddidistis : ut , quum multa vobis , magna populo Romano , innumerabilia parentibus , omnia diis immortalibus debeamus , quod hæc antea singula per illos habuerimus ; nunc universa per vos recuperaverimus.

II. Itaque , Patres conscripti , quod ne optandum quidem est homini , immortalitatem quamdam per vos esse adepti videmur. Quod enim tempus erit umquam , quo vestrorum in nos beneficiorum memoria ac fama moriatur , qui illo ipso tempore , quum vi , ferro , metu , minis obsessi teneremini , non multò post discesum meum universi me revocavistis , referente L. Mummius , fortissimo atque optimo viro ? quem habuit ille pestifer an-

nus & maximè fidelem, & minimè timidum, si dimicare placuisset, defensorem salutis meæ. Postèaquam vobis potestas decernendi non est permissa per eum tribunum plebis, qui, quum per se rempublicam lacerare non posset, sub alieno scelere delevit; numquam de me siluistis, numquam meam salutem non ab his consulibus, qui vendiderant, flagitavistis.

4. Itaque vestro studio, atque auctoritate perfectum est, ut ille ipse annus, quem ego mihi, quàm patriæ, malueram esse fatalem, hos tribunos haberet, qui & promulgarent de salute mea, & ad vos sæpenumero referrent: nam consules modesti, legumque metuentes, impediabantur lege, non eâ, quæ de me, sed eâ, quæ de ipsis lata erat, quum meus inimicus promulgavit, ut, si revixissent ii, qui hæc pene delerunt, tum ego redirem: quo facto utrumque confessus est, & se illorum vitam desiderare, & magno in periculo rempublicam futuram, si aut hostes atque interfectores reipublicæ revixissent, aut ego non revertissem. Itaque illo ipso anno, quum ego cessissem; princeps autem civitatis, non legum præsidio, sed parietum, vitam suam tueretur; respublica sine consulibus esset, neque solum parentibus perpetuis, verùm etiam tutoribus annuis esset orbata; sententias di-

POST REDITUM. §

cere prohiberemini ; caput meæ proseriptionis recitaretur ; numquam dubitastis meam salutem cum communi salute conjungere.

III. Postea verò quàm singulari & præstantissimâ virtute P. Lentuli consulis, ex superioris anni caligine & tenebris lucem in republica Kalendis Januariis dispicere cœpistis : quum Q. Metelli, nobilissimi hominis, atque optimi viri, summa dignitas, quum prætorum, tribunorum plebis pene omnium virtus & fides reipublicæ subvenisset : quum virtute, gloriâ, rebus gestis Cn. Pompeius, omnium gentium, omnium seculorum, omnis memoriæ facilè princeps, tutò se in senatum venire arbitraretur : tantus vester consensus de salute mea fuit, ut corpus abesset meum, dignitas jam in patriam revertisset.

6. Quo quidem mense, quid inter me & meos inimicos interesset, existimare potuistis : ego meam salutem deserui, ne propter me civium vulneribus respublica cruentaretur ; illi meum reditum non populi Romani suffragiis, sed flumine sanguinis intercludendum putaverunt. Itaque postea nihil vos civibus, nihil sociis, nihil regibus respondistis : nihil judices sententiis, nihil populus suffragiis, nihil hic ordo auctoritate declaravit : mutum forum, elinguem curiam, tacitam & fractam civitatem videbatis.

A iij

7. Quo quidem tempore, quum is excessisset, qui cædi & flammæ vobis auctoribus restiterat; cum ferro & facibus homines totâ urbe volitantes, magistratuum tecta impugnata, deorum templa inflammata, summi viri & clarissimi consulis fascēs fractos, fortissimi atque optimi viri, tribuni plebis, sanctissimum corpus non tactum ac violatum manu, sed vulneratum ferro, confectumque vidistis. Quâ strage nonnulli permoti magistratus partim metu mortis, partim desperatione reipublicæ paulum a mea causa recesserunt: reliqui fuerunt, quos neque terror, neque vis, nec spes, nec metus, nec promissa, nec minæ, nec tela, nec faces a vestra auctoritate, a populi Romani dignitate, a mea salute depellerent.

IV. Princeps P. Lentulus, parens ac deus nostræ vitæ, fortunæ, memoriæ, nominis, hoc specimen virtutis, hoc indicium animi, hoc lumen consulatûs sui fore putavit, si me mihi, si meis, si vobis, si reipublicæ reddidisset: quî, ut est designatus, numquam dubitavit sententiam de salute mea, se & republicâ dignam, dicere. Quum a tribuno plebis vetaretur, quum præclarum caput recitaretur, *Ne quis ad vos referret, ne quis decerneret, ne disputaret, ne loqueretur, ne pedibus iret, ne scribendo adesset*; totam illam clausulam,

ut antè dixi, proscriptionem, non legem putavit, quâ civis optimè de republica meritus, nominatim, sine iudicio, unâ cum senatu, reipublicæ esset ereptus. Ut verò iniit magistratum, non dicam, quid egerit prius, sed quid omnino egit aliud, nisi ut, me conservato, vestram in posterum dignitatem auctoritatemque sanciret?

9. Dii immortales, quantum mihi beneficium dedisse videmini, quòd hoc anno P. Lentulus consul est? Quanto majus dedissetis, si superiore anno fuisset? nec enim eguissem medicinâ consulari, nisi consulari vulnere concidissem. Audieram ex sapientissimo homine, atque optimo civi & viro, Q. Catulo, non sæpe unam consulem improbum, duos verò nunquam, post Romam conditam, excepto illo Cinnano tempore, fuisse: quare meam causam semper fore firmissimam dicere solebat, dum vel unus in republica consul esset. Quod verè dixerat, si illud de duobus consulibus, quod antè in republica non fuerat, perenne ac proprium manere potuisset. Quòd si Q. Metellus illo tempore consul fuisset unicus; dubitatis, quo animo fuerit in me conservando futurus; quam in restituendo auctorem fuisse, adscriptoremque videatis?

10. Sed fuerunt duo consules, quorum mentes angustæ, humiles, pravae, opple-

tæ tenebris ac fordibus, nomen ipsum consulatûs, splendorem illius honoris, magnitudinem tanti imperii nec tueri, nec sustinere, nec capere potuerunt; non consules, sed mercatores provinciarum, ac venditores vestræ dignitatis: quorum alter a me Catilinam, amatorem suum, multis audientibus; alter Cethegum, consobrinum, reposcebat: qui me duo sceleratissimi post hominum memoriam, non consules, sed latrones, non modò deseruerunt, in causâ præsertim publica & consulari, sed prodiderunt, oppugnarunt, omni auxilio non solum suo, sed etiam vestro, ceterorumque ordinum, spoliatum esse voluerunt: quorum alter tamen neque me, neque quemquam fefellit.

V. Quis enim ullam ullius boni spem haberet in eo, cujus primum tempus ætatis palam fuisset ad omnium libidines divulgatum? qui ne a sanctissima quidem parte corporis potuisset hominum impuram intemperantiam propulsare? qui, quum suam rem non minùs strenuè, quàm postea publicam confecisset, egestatem & luxuriam domestico lenocinio sustentavit? qui nisi in aram tribunatûs confugisset, neque vim prætoris, nec multitudinem creditorum, nec bonorum proscriptionem effugere potuisset? Quo in magistratu, nisi rogationem de piratico bello tulisset, profec-

tò egestate & improbitate coactus piraticam ipse fecisset; ac minore quidem cum reipublicæ detrimento, quàm quòd intra mœnia nefarius hostis prædoque versatus est: quo inspectante ac sedente, legem tribunus plebis tulit, ne auspiciis obtemperaretur; ne obnuntiare concilio, aut comitiis; ne legi intercedere liceret; ut lex *Ælia* & *Fufia* ne valerent; quæ nostri majores certissima subsidia reipublicæ contra tribunitios furores esse voluerunt.

12. Idemque postea, quum innumerabilis multitudo bonorum de Capitolio supplex ad eum sordidata venisset, quumque adolescentes nobilissimi, cunctique equites Romani se ad lenonis impurissimi pedes abjecissent; quo vultu cincinnatus ganeo non solum civium lacrymas, verum etiam patriæ preces repudiavit? Neque eo contentus fuit, sed etiam in concionem adscendit; eaque dixit, quæ, si ejus vir *Catilina* revixisset, dicere non esset ausus: se *Nonarum Decembris*, quæ me consule fuissent, clivique *Capitolini* pœnas ab equitibus Romanis esse repetiturum: neque solum id dixit, sed quos ei commodum fuit, compellavit: *L. verò Lamiam*, equitem Romanum, præstanti dignitate hominem, & salutem meam pro familiaritate, reipublicæ pro fortunis suis, amicissimum, consul imperiosus exire urbe jussit: & quum vos

vestem mutandam censuissetis, cunctique mutassetis, atque idem omnes boni jam antè fecissent; ille unguentis oblitus, cum toga prætexta, quam omnes prætores ædilesque tum abjecerant; irrisit squalorem vestrum, & luctum gratissimæ civitatis; fecitque quod nemo umquam tyrannus, ut quò minùs occultè vestrum malum gerneretis, nihil diceret; ne apertè incommoda patriæ lugeretur, ediceret.

VI. Quum verò in Circo Flaminio; non a tribuno plebis consul in concionem, sed a latrone archipirata, productus esset; primùm processit, quâ auctoritate vir? vini, somni, stupri plenus, madenti comâ, composito capillo, gravibus oculis, fluentibus buccis, pressâ voce & temulentâ: quòd in cives indemnatos esset animadvertum, id sibi dixit, gravis auctor, vehementissimè displicere. Ubi nobis hæc auctoritas tamdiu tanta latuit? cur in lustris & helluationibus hujus calamistrati saltatoris tam eximia virtus tamdiu cessavit? Nam ille alter Cæsoninus Calventius ab adolescentia versatus est in foro, quum eum præter simulatam versutamque tristitiam, nulla res commendaret: non juris studium, non dicendi, non rei militaris, non cognoscendorum hominum, non liberalitas: quem præteriens quum incultum, horridum, mœstumque vidisses; etiam si

agrestem & inhumanum existimares, tamen libidinosum & perditum non putares.

14. Cum hoc homine, an cum stipite Æthiope si in foro constitisses, nihil crederes interesse: sine sensu, sine sapore, elinguem, tardum, inhumanum negotium, Cappadocem modò abreptum de grege venalium diceres. Idem domi quàm libidinosus? quàm impurus? quàm intemperans, non januà receptis, sed pseudoryro intromissis voluptatibus? Quum verò etiam litteris studere incipit, & helluo immanis cum Græculis philosophari, tum est Epicureus, non penitus illi disciplinæ, quæcumque est, deditus, sed captus uno verbo voluptatis.

15. Habet autem magistros non ex istis ineptis, qui dies totos de officio ac de virtute differunt: qui ad laborem, ad industriam, ad pericula pro patria subeunda adhortantur; sed eos, qui disputent, horam nullam vacuum voluptate esse debere: in omni parte corporis semper oportere aliquod gaudium, delectationemque versari. His utitur quasi præfectis libidinum suarum; hi voluptates omnes vestigant, atque odorantur; hi sunt conditores instructoresque convivii; iidem expendunt, atque æstimant voluptates, sententiamque dicunt, & judicant, quantum cuique libidini tribuendum esse videatur: horum ille

artibus eruditus, ita contempsit hanc prudentissimam civitatem, ut omnes suas libidines, omnia flagitia latere posse arbitretur, si modò vultum importunum in forum detulisset.

VII. Is me quidem minimè (cognoram enim, propter Pisonum affinitatem, quamquam longè hunc ab hoc genere cognatio materna Transalpini sanguinis abstulisset) sed vos populumque Romanum; non consilio, neque eloquentiâ, quod in multis sæpe accidit, sed rugis, supercilioque decepit. L. Piso, tunc ausus es isto oculo, non dicam isto animo; istâ fronte, non vitâ; tanto supercilio, non enim possum dicere, tantis rebus gestis, cum A. Gabinio consociare consilia pestis meæ? non te illius unguentorum odor, non vini anhelitus, non frons calamistri notata vestigiis, in eam cogitationem adducebat, ut, quum illius re similis fuisses, frontis tibi integumento ad occultanda tanta flagitia diutius uti non liceret? cum hoc coire ausus es, ut consularem dignitatem, ut reipublicæ statum, ut senatûs auctoritatem, ut civis optimè meriti fortunas provinciarum fœdere addiceres? te consule, tuis edictis & imperiis, senatui populoque Romano non est licitum, non modò sententiis atque auctoritate suâ, sed ne vultu quidem ac vestitu reipublicæ subvenire.

Capuane te putabas, in qua urbe domicilium quondam superbiæ fuit, consulem esse, sicut eras eo tempore; an Romæ, in qua civitate omnes ante vos consules senatui paruerunt?

17. Tu es ausus in Circo Flaminio productus cum tuo illo pari dicere, te semper misericordem fuisse? quo verbo senatum, atque omnes bonos tum, quum a patria pestem depulissem, crudeles demonstrabas fuisse. Tu misericors me affinem tuum, quem comitiis prærogativæ primum custodem præfeceras, quem Kalendis Januarii tertio loco sententiam rogaras, constrictum inimicis reipublicæ tradidisti: tu meum generum, propinquum tuum; tu affinem tuam, filiam meam, superbissimis & crudelissimis verbis a genibus tuis repulisti; idemque tu clementiâ ac misericordiâ singulari, quum ego unâ cum republica non tribunitio, sed consulari ictu concidissem; tanto scelere, tantâque intemperantiâ fuisti, ut ne unam quidem horam interesse paterere inter meam pestem, & tuam prædam; saltem dum conticesceret illa lamentatio, & gemitus urbis.

18. Nondum palam factum erat occidisse rempublicam, quum tibi arbitria funeris solvebantur: uno eodemque tempo-

re domus mea diripiebatur , ardebat : bona ad vicinum consulem de Palatio ; de Tusculano ad item vicinum alterum consulem deferebantur : quum , iisdem operis suffragium ferentibus , eodem gladiatore latore , vacuo non modò a bonis , sed etiam a liberis , atque inani foro , ignaro populo Romano quid ageretur , senatu verò oppresso & afflicto , duobus impiis nefariisque consulibus , ærarium , provinciæ , legiones , imperia donabantur.

VIII. Horum consulum ruinas vos consules vestrà virtute fulsistis , summâ tribunorum plebis , prætorumque fide , & diligentia sublevati. Quid ego de præstantissimo viro T. Annio , dicam ? aut quis de tali cive satis dignè umquam loquetur ? qui quum videret , sceleratum civem , aut domesticum potius hostem , si legibus utiliceret , iudicio esse frangendum : sin ipsa iudicia vis impediret ac tolleretur ; audaciam virtute , furorem fortitudine , temeritatem consilio , manum manu , vim vi esse superandam ; primò de vi postulavit : posteaquam ab eodem iudicia sublata esse vidit ; ne ille omnia vi posset efficere , curavit : qui docuit , neque tecta , neque templa , neque forum , neque curiam , sine summa virtute , ac maximis opibus & copiis ab intestino latrocinio posse defendi : qui pri-

mus , post meum discessum , metum bonis , spem audacibus , timorem huic ordini , servitutem depulit civitati.

20. Quam rationem pari virtute , animo , fide , P. Sextius secutus , pro mea salute , pro vestra auctoritate , pro statu civitatis , nullas sibi inimicitias , nullam vim , nullos impetus , nullum vitæ discrimen vitandum umquam putavit : qui causam senatûs , exagitata concionibus improborum , sic suâ diligentia multitudini commendavit , ut nihil tam popolare , quàm vestrum nomen ; nihil tam omnibus carum aliquando , quàm vestra auctoritas videretur : qui me quum omnibus rebus , quibus tribunus plebis potuit , defendit ; tum reliquis officiis , juxtâ , ac si meus frater esset , sustentavit : cujus ego clientibus , libertis , familia , copiis , litteris ita sum sustentatus , ut meæ calamitatis non adjutor solum , verum etiam socius videretur :

21. Jam ceterorum officia , studiaque vidistis : quàm cupidus mei C. Cestilius , quàm studiosus vestri , quàm non varius fuerit in causa. Quid M. Cispars ? cui ego ipsi , parenti , fratrique ejus , sentio quantum debeam : qui , quum a me voluntas eorum in privato judicio esset offensa , publici mei beneficii memoria privatam

offensionem oblitteraverunt. Jam T. Fadius, qui mihi quæstor fuit, M'. Curtius, cujus ego patri quæstor fui, studio, amore, animo, huic necessitudini non defuerunt. Multa de me C. Messius, & amicitia, & reipublicæ causâ, dixit: legem separatim initio de salute mea promulgavit. Q. Fabricius, si, quæ de me agere conatus est, ea contra vim & ferrum perficere potuisset; mense Januario nostrum statum recuperassemus: quem ad salutem meam voluntas impulit, vis retardavit, auctoritas vestra revocavit.

IX. Jam verò prætores quo animo in me fuerint, vos existimare potuistis, quum L. Cæcilius privatim me suis omnibus copiis studuerit sustentare; publicè promulgavit de mea salute cum collegis pene omnibus; direptoribus autem meorum bonorum in jus adeundi potestatem non fecerit. M. autem Calidius, statim designatus, sententiâ suâ, quàm esset cara sibi mea salus, declaravit.

23. Omnia officia C. Septimii, Q. Valerii, P. Crassi, Sex. Quintilii, C. Cornuti, summa & in me, & in rempublicam constiterunt: quæ quum libenter commemoro, tum non invitus nonnullorum in me nefariè commissa prætereo: non est mei temporis injurias meminisse; quas ego

etiam si ulcisci possem, tamen oblivisci mallet: aliò transferenda mea tota vita est, ut bene de me meritis referam gratiam; amicitias igne perspectas tinear; cum apertis hostibus bellum geram; timidis amicis ignoscam; proditores meos non indicem; dolorem profectionis meæ reditus dignitate consoler.

24. Quòd si mihi nullum aliud esset officium in omni vita reliquum, nisi ut erga duces ipsos, principes atque auctores salutis meæ, satis gratus judicaret; tamen exiguum reliquæ vitæ tempus non modò ad referendam, verum etiam ad commemorandam gratiam mihi relictum putarem. Quando enim ego huic homini, ac liberis ejus, quando omnes mei gratiam referent? quæ memoria, quæ vis ingenii, quæ magnitudo observantiæ, tot tantisque beneficiis respondere poterit? qui mihi primus afflicto & jacenti consularem fidem, dexteramque porrexit: qui me a morte ad vitam, a desperatione ad spem, ab exitio ad salutem revocavit: qui tanto amore in me, studio in rempublicam fuit, ut excogitaret quemadmodum calamitatem meam non modò levaret, sed etiam honestaret. Quid enim magnificentius, quid præclarius mihi accidere potuit, quàm quòd, illo petente, vos decrevistis, ut

cuncti ex omni Italia , qui rempublicam salvam vellent , ad me unum , hominem fractum & propè dissipatum , restituendum & defendendum venirent ? ut , quâ voce ter omnino post Romam conditam consul usus esset pro universa republica apud eos solùm , qui ejus vocem exaudire possent ; eadem voce senatus omnis omnibus agris atque oppidis , cives , totamque Italiam ad unius salutem defendendam excitaret.

X. Quid ego gloriosius meis posteris potui relinquere , quàm hoc senatum judicasse , qui civis me non defendisset , eum rempublicam salvam noluisse ? Itaque tantum vestra auctoritas , tantum eximia consulis dignitas valuit , ut dedecus & flagitium se committere putaret , si quis non veniret. Idemque consul , quum illa incredibilis multitudo Romam , & pene Italia ipsa venisset , vos frequentissimos in Capitolium convocavit : quo tempore quantam vim naturæ bonitas haberet , aut vera nobilitas , intelligere potuistis : nam Q. Metellus , & inimicus , & frater inimici , perspectâ vestrâ voluntate , omnia privata odia deposuit : quem P. Servilius , vir quum clarissimus , tum verò optimus , mihi que amicissimus , & auctoritatis & orationis suæ divinâ quadam gravitate , ad sui generis , communisque sanguinis facta

virtutesque revocavit, ut haberet in consilio & fratrem ab inferis, socium rerum mearum, & omnes Metellos, præstantissimos cives, pene ex Acheronte excitatos; in quibus Numidicum illum, cujus quondam de patria discessus, molestus omnibus sanè, ipsi ne luctuosus quidem visus est.

26. Itaque exstitit non modò salutis defensor, qui ante hoc suum beneficium fuerat inimicus, verùm etiam adscriptor dignitatis meæ. Quo quidem die quum *CCCCXVII* ex senatu essetis, magistratus autem hi omnes adessent; dissensit unus, is, qui suâ lege conjuratos etiam ab inferis excitandos putarat. Atque illo die, quo rempublicam meis consiliis conservatam gravissimis verbis & plurimis judicassetis, idem consul curavit, ut eadem a principibus civitatis in concione postero die dicerentur; quum quidem ipse egit ornatissimè causam meam, perfecitque, adstante atque audiente Italiâ totâ, ut nemo cujusquam conducti aut perditì vocem acerbam atque inimicam bonis posset audire.

XI. Ad hæc non modò adjumenta salutis, sed etiam ornamenta dignitatis meæ, reliqua vos iidem addidistis: decrevistis, ne quis ullâ ratione rem im-

pediret ; qui id impedisset , vos graviter molestéque laturos ; illum contra rempublicam , salutemque bonorum , concordiamque civium facturum ; & ut ad vos de eo statim referretur ; meque etiam , si diutius calumniarentur , redire jussistis. Quid ? ut agerentur gratiæ , qui e municipiis venissent ? quid , ut ad illam diem , res quàm redissent , rogarentur , ut pari studio convenirent ? Quid denique ille dies , quem P. Lentulus , mihi , fratrique meo , liberisque nostris natalem constituit , non modò ad nostram , verùm etiam ad sempiterni memoriam temporis ? quo die nos comitiis centuriatis , quæ maximè majores comitia juxta dici , haberique voluerunt , arcessivit in patriam ; ut eadem centuriæ , quæ me consulem fecerant , consulatum meum comprobarent.

28. Quo diè quis civis fuit , qui fas esse putaret , quacumque aut ætate , aut valetudine esset , non se de salute mea sententiam ferre ? quando tantam frequentiam in campo , tantum splendorem Italiæ totius , ordinumque omnium ? quando illa dignitate rogatores , diribitores , custodesque vidistis ? Itaque P. Lentuli beneficio excellenti atque divino , non reducti sumus in patriam , sicut nonnulli clarissimi cives , sed equis insignibus , & curru aurato reportati.

29. Possum ego satis in Cn. Pompeium umquam gratus videri, qui non solum apud vos, qui omnes idem sentiebatis, sed etiam apud universum populum salutem populi Romani & conservatam per me, & conjunctam esse cum mea dixerit? qui causam meam prudentibus commendavit, imperitos edocuerit, eodemque tempore improbos auctoritate suâ compresserit? bonos excitarit? qui populum Romanum pro me, tamquam pro fratre, aut pro parente, non solum hortatus sit, verum etiam obsecrarit? qui ipse, quum, propter metum dimicationis & sanguinis, domo se teneret, etiam a superioribus tribunis petierit, ut de salute mea & promulgarent, & ferrent? qui in colonia nuper constituta, quum ipse gereret magistratum, in qua nemo erat emptus intercessor, vim & crudelitatem privilegii, auctoritate honestissimorum hominum, & publicis litteris consignavit, princepsque Italiae totius praesidium ad meam salutem implorandum putavit? qui, quum ipse mihi semper amicissimus fuisset, etiam, ut suos necessarios mihi amicos redderet, elaboravit?

XII. Quibus autem officiis T. Annii beneficia remunerabor? cujus omnis actio, ratio, cogitatio, totus denique tribunatus,

nihil aliud fuit, nisi constans, perpetua, fortis, invicta defensio salutis meæ? Quid de P. Sextio loquar? qui suam erga me benevolentiam & fidem non solum animi dolore, sed etiam corporis vulneribus ostendit? Vobis verò, Patres conscripti, singulis & egi, & agam gratias: universis, egi ab initio, quantum potui; satis ornatè agere nullo modo possum. Et quamquam sunt in me præcipua merita multorum, quæ sileri nullo modo possunt, tamen huius temporis ac timoris mei non est conari commemorare beneficia in me singulorum: nam difficile est, non aliquem; nefas, quemquam præterire. Ego vos universos, Patres conscripti, deorum numero colere debeo: sed, ut in ipsis diis immortalibus non semper eosdem, atque aliàs alios solemus & venerari, & precari; sic in hominibus de me divinitus meritis omnis erit ætas mihi ad eorum erga me merita prædicanda, atque recolenda.

31. Hodierno autem die nominatim a me magistratibus statui gratias esse agendas, & de privatis uni, qui pro salute mea municipia, coloniasque adisset, populum Romanum supplex obsecrasset, sententiam dixisset eam, quam vos secuti, mihi dignitatem meam reddidistis. Vos me florentem semper ornastis; laborantem,

mutatione vestis, & propè luctu vestro, quoad licuit, defendistis. Nostrâ memoriâ senatores ne in suis quidem periculis mutare vestem solebant: in meo periculo senatus veste mutatâ fuit, quoad licuit per eorum edicta, qui mea pericula non modò suo præsidio, sed etiam vestrâ deprecatione nudarunt. Quibus ego rebus objectis, quum mihi privato confligendum viderem cum eodem exercitu, quem consul non armis, sed vestrâ auctoritate superaram; multa mecum ipse reputavi.

XIII. Dixerat in concione consul, se clivi Capitolini pœnas ab equitibus Romanis repetiturum: nominatim alii compellabantur, alii citabantur, alii relegabantur: aditus templorum erant non solum præsidiis & manu, verum etiam demolitione sublatis. Alterum consulem, ut me, & rempublicam non modò defereret, sed etiam hostibus reipublicæ proderet, pactionibus Clodius suorum præmiorum obligarat. Erat alius ad portas cum imperio in multos annos, magnoque exercitu; quem ego inimicum mihi fuisse non dico; tacuisse, quum diceretur esse inimicus, scio.

33. Duæ partes esse in republica quum putarentur, altera me deposcere, propter inimicitias; altera timidè defendere, propter suspicionem cædis putabatur. Qui

autem me deposcere videbantur, in hoc auxerunt dimicationis metum, quod numquam infitiando suspicionem hominum, curamque minuerunt. Quare quum viderem senatum ducibus orbatum, me a magistratibus partim oppugnatum, partim proditum, partim derelictum; servos simulatione collegiorum nominatim esse conscriptos; copias omnes Catilinæ pene iisdem ducibus, ad spem cædis & incendiorum esse revocatas; equites Romanos, proscriptionis; municipia, vastitatis; omnes, cædis metu esse permotos: potui, potui, Patres conscripti, multis auctoribus fortissimis viris, me vi, armisque defendere; nec mihi ipse ille animus idem meus, vobis non incognitus, defuit: sed videbam, si vicissem præsentem adversarium, nimium multos mihi alios esse vincendos; si victus essem, multis bonis & pro me, & mecum, etiam post me esse pereundum; tribunitique sanguinis ultores esse præsentibus; meæ mortis pœnas iudicio, & posteritati reservari.

XIV. Nolui, quum consul communem salutem sine ferro defendissem, meam privatus armis defendere; bonosque viros lugere malui meas fortunas, quam suis desperare: ac, si solus essem interfectus, mihi turpe; si cum multis, reipublicæ funestum

nestum fore videbatur. Quòd si mihi æternam esse ærumnam propositam arbitrarer; morte me ipse potius, quàm sempiterno dolore multassem: sed quum viderem, me non diutius, quàm ipsam rempublicam, ex hac urbe abfuturum: neque ego illà exterminatà mihi remanendum putayi; & illa, simul atque revocata est, me secum pariter revocavit. Mecum leges, mecum quæstiones, mecum jura magistratum, mecum senatûs auctoritas, mecum libertas, mecum etiam frugum ubertas, mecum deorum & hominum sanctitates omnes & religiones abfuerunt. Quæ si semper abessent; magis vestras fortunas lugerem, quàm desiderarem meas: sin aliquando revocarentur; intelligebam, mihi cum illis unà esse redeundum.

35. Cujus mei sensûs certissimus testis est hic idem, qui custos capitis fuit, Cn. Plancius, qui, omnibus provincialibus ornamentis commodisque depositis, totam suam quæsturam in me sustentando & conservando collocavit: qui si mihi quæstor imperatori fuisset, in filii loco fuisset: nunc certè erit in parentis, quum fuerit quæstor non imperii, sed doloris mei. Quapropter, Patres conscripti, quoniam in rempublicam sum pariter cum republica restitutus; non modò in ea defendenda

nihil imminuam de libertate mea pristina, sed etiam adaugebo.

XV. Etenim, si eam tum defendebam, quum mihi aliquid illa debebat; quid nunc me facere oportet, quum ego illi plurimum debeo? Nam quid est, quod animum meum frangere, aut debilitare possit, cujus ipsam calamitatem non modò nullius delicti, sed etiam divinorum in rempublicam beneficiorum testem esse videatis? nam & importata est, quia defenderam civitatem; & meâ voluntate suscepta est, ne a me defensa respublica, per eundem me extremum in discrimen vocaretur.

37. Pro me non, ut pro P. Popilio, nobilissimo homine, adolescentes filii, non propinquorum multitudo populum Romanum est deprecata: non, ut pro Q. Metello, summo & clarissimo viro, spectatâ jam adolescentiâ filius: non L. & C. Metelli, consulares, non eorum liberi, non Q. Metellus Nepos, qui tum consulatum petebat, non Luculli, Servilii, Scipiones, Metellarum filii, flentes ac sordidati, populo Romano supplicaverunt: sed unus frater, qui in me pietate, filius; consiliis, parens; amore, (ut erat) frater inventus est; squalore & lacrymis, & quotidianis precibus, desiderium mei nominis reno-

vari, & rerum gestarum memoriam usurpari coëgit : qui quum statuisset, nisi per vos me recuperasset, eandem subire fortunam, atque idem sibi domicilium & vitæ & mortis deposceret; tamen numquam nec magnitudinem negotii, nec solitudinem suam, nec vim inimicorum ac tela pertimuit.

38. Alter fuit propugnator mearum fortunarum, & defensor assiduus, summâ virtute & pietate, C. Piso, gener; qui minas inimicorum meorum; qui inimicitias affinis mei, propinqui sui, consulis; qui Pontum & Bithyniam quæstor pro mea salute neglexit. Nihil umquam senatus de P. Popilio decrevit; numquam in hoc ordine Q. Metelli mentio facta est. Tribunitiis sunt illi rogationibus, interfectis inimicis, denique nullâ auctoritate senatûs restituti; quum alter eorum senatui paruisset, alter vim cædemque fugisset. Nam C. quidem Marius, qui hac hominum memoriâ tertius ante me consularis, tempestate civili expulsus est, non modò a senatu non est restitutus; sed reditu suo senatum cunctum pene delevit. Nulla de illis magistratuum consensio, nulla ad rempublicam defendendam populi Romani convocatio, nullus Italiæ motus, nulla decreta municipiorum, & coloniarum exstiterunt.

28 ORATIO I. POST REDITUM.

39. Quare quum me vestra auctoritas arcessierit , populus Romanus revocarit , respublica implorarit , Italia cuncta pene suis humeris reportarit ; non committam , Patres conscripti , ut , quum ea mihi sint restituta , quæ in potestate mea non fuerunt , ea non habeam , quæ ipse præstare possim , præsertim quum illa amissa recuperarim , virtutem & fidem numquam amiserim.






POST REDITUM

AD QUIRITES.

ORATIO VIGESIMA OCTAVA.

CICERO, ut antea senatui, sic nunc populo Romano gratias agit hac oratione, quæ post reditum ad Quirites inscribitur. In hujus prima parte beneficium magnitudinem extollit, quum hæc simul omnia recuperarit, liberos, fratrem, rem familiarem, amicitias, consuetudines, vicinitates, clientelas; deinde honorem, dignitatem, locum, ordinem; postremo patriam, quâ nihil carius, nihil jucundius. In secunda parte, non modò ademptam sibi calamitatem, sed auctam etiam dignitatem ostendit: neminem enim tam honorificè, non P. Popilium, non Q. Metellum,

*non C. Marium , esse restitutos ;
quum illi , supplicante propinquo-
rum multitudine , rogationibus tan-
tùm tribunitiis , nullâ senatûs auc-
toritate , nullis Italiæ precibus , re-
dierint ; ipse autem , nemine præter
fratrem supplicante , & senatuscon-
sulto , & lege , summâ Italiæ con-
sensione , incredibili bonorum om-
nium studio , agente P. Lentulo ,
deprecante Pompeio , sit in patriam
revocatus. Summam igitur & perpe-
tuam erga populum R. pietatem ,
& quæcumque præstare officia possit ,
pro referenda gratia pollicetur.*

I.  UOD precatus a Jove Optimo
Maximo , ceterisque diis immortalibus
fum , Quirites , eo tempore , quum me ,
fortunaſque meas pro veſtra incolumitate ,
otio , concordiaque devovi , ut , ſi meas
rationes umquam veſtræ ſaluti antepoſuiſ-
ſem , ſempiternam pœnam ſuſtinerem , meâ
voluntate ſuſceptam : ſin & ea , quæ antè
geſſeram , conſervandæ civitatis cauſâ geſ-
ſiſſem , & illam miſeram proſectionem veſ-
træ ſalutis gratiâ ſuſcepiſſem , ut , quod

odium scelerati homines, & audaces in rempublicam, & in omnes bonos conceptum jamdiu continerent, id in me unum potius, quàm in optimum quemque, & in universam rempublicam defleceret: hoc si animo in vos, liberosque vestros fuisssem, ut aliquando vos, patres conscriptos, Italiamque universam, memoria mei, misericordia, desideriumque teneret: ejus devotionis me esse convictum judicio deorum immortalium, testimonio senatûs, consensu Italiæ, confessione inimicorum; beneficio divino immortalique vestro, maximè lætor, Quirites.

2. Et si homini nihil est magis optandum, quàm prospera, æquabilis, perpetuaque fortuna, secundo vitæ sine ulla offensione cursu: tamen, si mihi tranquilla & placata omnia fuissent; incredibili quadam, & pene divinâ, quâ nunc, vestro beneficio, fruor, lætitiæ voluptate caruisssem. Quid dulcius hominum generi a natura datum est, quàm sui cuique liberi? mihi verò & propter indulgentiam meam, & propter excellens eorum ingenium, vitâ sunt meâ cariores: tamen non tantâ voluptate erant suscepti, quantâ nunc sunt restituti.

3. Nihil cuiquam fuit umquam jucundius, quàm mihi meus frater: non tam id sentiebam, quum fruebar, quàm tunc, quum carebam, & posteaquam vos me

illi, & mihi eum reddidistis. Res familiaris sua quemque delectat : reliquæ meæ fortunæ recuperatæ plus mihi nunc voluptatis afferunt, quàm tunc incolumi afferebant. Amicitia, consuetudines, vicinitates, clientelæ, ludi denique & dies festi, quid haberent voluptatis, carendo magis intellexi, quàm fruendo.

4. Jam verò honos, dignitas, locus, ordo, beneficia vestra, quamquam mihi semper clarissima visa sunt, tamen ea nunc renovata, illustriora videntur, quàm si obscurata non essent. Ipsa autem patria, dii immortales ! dici vix potest, quid caritatis, quid voluptatis habet ! quæ species Italiae ! quæ celebritas oppidorum ! quæ forma regionum ! qui agri ! quæ fruges ! quæ pulchritudo urbis ! quæ humanitas civium ! quæ reipublicæ dignitas ! quæ vestra majestas ! quibus ego omnibus antea rebus sic fruebar, ut nemo magis. Sed sicut bona valetudo jucundior est eis, qui e gravi morbo recreati sunt, quàm qui numquam ægro corpore fuerunt ; sic ea omnia desiderata magis, quàm assiduè percepta, delectant.

II. Quorsum igitur hæc disputo ? quorsum ? ut intelligere possitis, neminem umquam tantâ eloquentiâ fuisse, neque tam divino atque incredibili genere dicendi, qui vestrorum magnitudinem multitu-

dinemque beneficiorum, quæ in me, fratremque meum, & liberos nostros contulistis, non modò augere, aut ornare oratione, sed enumerare, aut consequi possit. A parentibus, id quod necesse erat, parvus sum procreatus; a vobis natus sum consularis. Illi mihi fratrem incognitum, qualis futurus esset, dederunt; vos spectatum, & incredibili pietate cognitum reddidistis. Rempublicam illis accepi temporibus eam, quæ pene amissa est; a vobis eam recuperavi, quam aliquando omnes unius operâ servatam judicarunt. Dii immortales mihi liberos dederunt; vos reddidistis: multa præterea a diis immortalibus optata consecuti sumus; nisi vestra voluntas fuisset, omnibus divinis muneribus caruissemus. Vestros denique honores, quos eramus gradatim singulos assecuti, nunc a vobis universos habemus: ut, quantum antea parentibus, quantum diis immortalibus, quantum vobismetipsis, tantum hoc tempore universum cuncto populo Romano debeamus. Nam, quum in ipso beneficio vestro tanta magnitudo est, ut eam complecti oratione non possim: tum in studiis vestris tanta animorum declarata est voluntas, ut non solum calamitatem mihi detraxisse, sed etiam dignitatem auxisse videamini.

III. Non enim pro meo reditu, ut pro

P. Popilii , nobilissimi hominis , adolescentes filii , & multi præterea cognati atque affines deprecati sunt : non , ut pro Q. Metello , clarissimo viro , jam spectatâ ætate filius L. Diadematus , consularis , summâ auctoritate vir ; non Metellus censorius , non eorum liberi , non Q. Metellus Nepos , qui tum consulatum petebat , non sororum filii , Luculli , Servilii , Scipiones : permulti enim Metelli , aut Metellarum liberi pro Q. Metelli reditu vobis , ac patribus vestris supplicaverunt : quòd si ipsius dignitas , maximæque res gestæ non satis valerent ; tamen filii pietas , propinquorum preces , adolescentium squalor , majorum natu lacrymæ populum Romanum movere potuerunt.

7. Nam C. Marii , qui post illos veteres clarissimos consulares , vestrâ patrumque memoriâ , tertius ante me consularis , subiit indignissimam fortunam præstantissimâ suâ gloriâ , dissimilis fuit ratio. Non enim ille deprecatione rediit , sed in dissenso civium , exercitu se , armisque revocavit. Me autem nudum a propinquis , nullâ cognatione munitum , nullo armorum ac tumultûs metu , C. Pisonis , generi mei , divina quædam & inaudita auctoritas , atque virtus , fratrisque miserrimi atque optimi quotidianæ lacrymæ , sordisque lugubres a vobis deprecata sunt.

8. Frater erat unus , qui suo squalore vestros oculos inflecteret ; qui suo fletu desiderium mei , memoriamque renovaret ; qui statuerat , Quirites , si vos me sibi non reddidissetis , eamdem subire fortunam : tanto in me amore exstitit , ut negaret fas esse non modò domicilio , sed ne sepulcro quidem se a me esse sejunctum. Pro me præsente senatus , hominumque præterea viginti millia , vestem mutaverunt : pro me absente unius squalorem fordesque vidistis. Unus hic , qui in foro posset esse , mihi pietate filius inventus est , beneficio parens , amore idem , qui semper fuit , frater. Nam conjugis miseræ squalor & luctus , atque optimæ filiæ mœror assiduus , filique parvi desiderium mei , lacrymæque pueriles , aut itineribus necessariis , aut magnam partem tectis ac tenebris continebantur.

IV. Quare hòc majus est vestrum in nos promeritum , quòd non multitudini propinquorum , sed nobismetipsis nos reddidistis. Sed quemadmodum propinqui , quos ego parare non potui , mihi ad deprecandam calamitatem meam non affuerunt ; sic illud , quod mea virtus præstare debuit , adjutores , auctores , hortatoresque ad me restituendum ita multi fuerunt , ut longè superiores omnes hac dignitate copiamque superarem. Numquam de P. Po-

pilio , clarissimo atque fortissimo viro ; numquam de Q. Metello , nobilissimo & constantissimo cive ; numquam de C. Mario , custode civitatis atque imperii vestri , in senatu mentio facta est.

10. Tribunitiis superiores illi rogationibus , nullâ auctoritate senatûs sunt restituti : Marius verò non modò a senatu , sed etiam oppresso senatu est restitutus ; nec rerum gestarum memoria in redivitu C. Marii , sed exercitus , atque arma valuerunt. At de me ut valeret , semper senatus flagitavit : ut aliquando perficeretur , quum primùm licuit , frequentiâ , atque auctoritate perfecit. Nullus in eorum redivitu motus municipiorum , & coloniarum factus est : at me in patriam ter suis decretis Italia cuncta revocavit. Illi , inimicis interfectis , magnâ civium cæde factâ , reducti sunt : ego iis , a quibus ejectus sum , provincias obtinentibus , inimico autem optimo viro & mitissimo , altero consule referente reductus sum ; quum is inimicus qui ad meam perniciem vocem suam communibus hostibus præbuisset , spiritu duntaxat viveret , re quidem infra omnes mortuos amandatus esset.

V. Numquam de P. Popilio L. Optimius , fortissimus consul , numquam de Q. Metello non modò C. Marius , qui erat inimicus , sed ne is quidem , qui secutus

est, M. Antonius, homo eloquentissimus, cum A. Albino collega senatum aut populum est cohortatus. At pro me superiores consules semper, ut referrent, efflagitati sunt; sed veriti sunt, ne gratiæ causâ facere viderentur, quòd alter mihi affinis erat; alterius causam capitis receperam: qui provinciarum fœdere irretiti, totum illum annum querelas senatûs, luctum bonorum, Italiæ gemitum pertulerunt. Kalendis verò Januariis posteaquam orba respublica consulis fidem, tamquam legitimi tutoris, imploravit, P. Lentulus consul, parens, deus, salus nostræ vitæ, fortunæ, memoriæ, nominis, simulac de solenni religione retulit, nihil humanarum rerum sibi prius, quàm de me agendum judicavit.

12. Atque eo die confecta res esset, nisi is tribunus plebis, quem ego maximis beneficiis quæstorem consul ornaveram, quum & cunctus ordo, & multi eum summi viri orarent, & Cn. Oppius focer, optimus vir, ad pedes ejus flens jaceret; noctem sibi ad deliberandum postulasset: quæ deliberatio non in reddenda, quemadmodum nonnulli arbitrabantur; sed, ut patefactum est, in augenda mercede consumpta est. Postea res acta est in senatu alia nulla; & quum variis rationibus impediretur, voluntate tamen perfecta senatûs,

causa ad vos mense Januario deferrebatūr.

13. Hic tantum interfuit inter me , & inimicos meos. Ego , quum homines in tribunali Aurelio palam conscribi , centuriarique vidissem : quum intelligerem , veteres ad spem cædis Catilinæ copias esse revocatas : quum viderem , ex ea parte homines , cui parti nos vel principes numerabamur , partim quòd mihi inviderent , partim quòd sibi timerent , aut proditores esse , aut desertores salutis meæ : quum duo consules , empti pactione provinciarum , auctores se inimicis reipublicæ tradidissent : quum egestatem , avaritiam , libidines suas viderent expleri non posse , nisi me constrictum domesticis hostibus dedissent : quum senatus equitesque Romani flere pro me , ac , mutatâ veste , vobis supplicare edictis atque imperiis viderentur : quum omnium provinciarum pactiones , quum omnia cum omnibus fœdera , reconciliationes gratiarum , sanguine meo sancirentur : quum omnes boni non recusarent , quin vel pro me , vel mecum perirent : armis decertare pro mea salute nolui , quod potui , quoniam & vincere , & vinci luctuosum reipublicæ fore putavi. At inimici mei mense Januario quum de me ageretur , corporibus civium trucidatis , flumine sanguinis meum reditum intercludendum putaverunt.

VI. Itaque quum ego abfui, eam rempublicam habuistis, ut æquè me, atque illam, restituendam putaretis: ego autem, in qua civitate nihil valeret senatus, omnis esset impunitas; nulla judicia, vis & ferrum in foro versarentur: quum privati se parietum præsidio, non legum tuerentur: tribuni plebis vobis inspectantibus vulnerarentur, ad magistratuum domos cum ferro & facibus iretur, consulis fascēs frangerentur, deorum immortalium templa incenderentur; rempublicam esse nullam putavi. Itaque neque republicā exterminatā, mihi locum in hac urbe esse duxi; nec, si illa restitueretur, dubitavi, quin me secum ipsa reduceret.

15. An ego, quum mihi esset exploratissimum, P. Lentulum proximo anno consulem futurum, qui illis ipsis reipublicæ periculosissimis temporibus ædilis curulis, me consule, omnium meorum consiliorum particeps, periculorumque socius fuisset; dubitarem, quin is me confectum consularibus vulneribus, consulari medicinā ad salutem reduceret? Hoc duce, collegā autem ejus, clementissimo atque optimo viro, primò non adversante, post etiam adjuvante, reliqui magistratus pene omnes fuerunt defensores salutis meæ: ex quibus excellenti animo, virtute, auctoritate, præsidio, copiis, T. Annius, &

P. Sextius, præstanti in me benevolentia, & divino studio exstiterunt: eodemque P. Lentulo auctore, & pariter referente collegâ, frequentissimus senatus, uno dissentiente, nullo intercedente, dignitatem meam quibus potuit verbis amplissimis ornavit; salutem vobis, municipiis, coloniisque omnibus commendavit.

16. Ita me nudum a propinquis, nullâ cognatione munitum, consules, prætores, tribuni plebis, senatus, Italia cuncta, semper a vobis deprecata est: denique omnes, qui vestris maximis beneficiis honoribusque sunt ornati, producti ad vos ab eodem, non solum ad me conservandum vos cohortati sunt, sed etiam rerum mearum gestarum auctores, testes, laudatoresque fuerunt.

VII. Quorum princeps ad cohortandos vos, & ad rogandos fuit Cn. Pompeius, vir omnium, qui sunt, fuerunt, erunt, princeps virtute, sapientiâ, ac gloriâ, qui mihi unus uni privato amico eadem omnia dedit, quæ universæ reipublicæ, salutem, otium, dignitatem: cujus oratio fuit, quemadmodum accepi, tripartita: primùm vos docuit, meis consiliis rempublicam esse servatam, causamque meam cum communi salute conjunxit; hortatusque est, ut auctoritatem senatus, statum civitatis, fortunas civis be-

nie meriti defenderetis: tum in perorando posuit, vos rogari a senatu, rogari ab equitibus Romanis, rogari ab Italia cuncta: denique ipse ad extremum pro mea vos salute non rogavit solum, verum etiam obsecravit.

17. Huic ego homini, Quirites, tantum debeo, quantum hominem homini debere vix fas est. Hujus consilia, P. Lentuli sententiam, senatus auctoritatem vos secuti, in eo me loco, in quo vestris beneficiis fueram, iisdem centuriis, quibus collocaratis, reposuistis. Eodem tempore audistis eodem ex loco summos viros, ornatissimos atque amplissimos homines, principes civitatis, omnes consulares, omnes prætorios, eadem dicere, ut omnium testimonio per me unum rempublicam conservatam esse constaret. Itaque quum P. Servilius, gravissimus vir, & ornatissimus civis, dixisset, operâ meâ rempublicam incolumem magistratibus deinceps traditam, dixerunt in eandem sententiam ceteri. Sed audistis eo tempore clarissimi viri non solum auctoritatem, sed etiam testimonium L. Gellii, qui, quia suam classem attentatam magno cum suo periculo pene sensit; dixit in concione vestra, *Si ego consul, quum fui, non fuisset, rempublicam funditus interituram fuisse.*

VIII. En ego tot testimoniis, Quiri-

tes, hac auctoritate senatûs, tantâ consensione Italiæ, tanto studio bonorum omnium, agente P. Lentulo, consentientibus ceteris magistratibus, deprecante Cn. Pompeio, omnibus hominibus faventibus, diis denique immortalibus, frugum ubertate, copiâ, vilitate, redditum meum comprobantibus, mihi, meis, reipublicæ restitutus, tantum vobis, quantum facere possum, Quirites, pollicebor: primum, quâ sanctissimi homines pietate erga deos immortales esse solent, eâdem me erga populum Romanum semper fore; numenque vestrum æquè mihi grave & sanctum, ac deorum immortalium, in omni vita futurum; deinde, quoniam me in civitatem respublica ipsa reduxit, nullo me loco reipublicæ defuturum.

19. Quòd si quis existimat, me aut voluntate esse mutatâ, aut debilitatâ virtute, aut animo fracto, vehementer errat: mihi, quod potuit vis, & injuria, & sceleratorum hominum furor detrahare, eripuit, abstulit, dissipavit: quod viro forti adimi non potest, id manet, & permanebit. Vidi ego fortissimum virum, municipem meum, C. Marium, quoniam nobis quasi aliquâ fatali necessitate, non solum cum his, qui hæc delere voluissent, sed etiam cum fortuna belligerandum fuit: eum tamen vidi, quum esset summâ se-

nectute , non modò non infracto animo propter magnitudinem calamitatis , sed confirmato , atque renovato.

20. Quem egomet dicere audivi , tum se fuisse miserum , quum careret patriâ , quam obsidione liberavisset : quum sua bona possideri ab inimicis , ac diripi audiret : quum adolescentem filium videret ejusdem socium calamitatis : quum in paludibus demersus , concursu ac misericordiâ Minturnensium corpus ac vitam suam conservasset : quum parvâ naviculâ trajectus in Africam , quibus regna ipse dederat , ad eos inops supplexque venisset : recuperatâ verò suâ dignitate , se non commissurum , ut , quum ea , quæ amiserat , sibi restituta essent , virtutem animi non haberet , quam numquam perdidisset. Sed hoc inter me atque illum interest ; quòd ille , quâ re plurimum potuit , eâ ipsâ re inimicos suos ultus est , armis ; ego , quâ consuevi , utar ; quoniam illi arti in bello ac seditione locus est ; huic in pace atque otio. Quamquam ille animo irato nihil nisi de inimicis ulciscendis agebat ; ego de ipsis inimicis tantum , quantum mihi res publica permittet , cogitabo.

IX. Denique , Quirites , quoniam me quatuor omnino genera hominum violaverunt : unum eorum , qui odio reipublicæ , quòd eam ipsis invitis conservaram , mihi

inimicissimi fuerunt ; alterum , qui per simulationem amicitiae , nefarie prodiderunt ; tertium , qui , quum propter inertiam suam eadem assequi non possent ; inviduerunt laudi & dignitati meae ; quartum , qui quum custodes reipublicae esse debuerunt , salutem meam , statum civitatis , dignitatem ejus imperii , quod erat penes ipsos , vendiderunt : sic ulciscar facinorum singula , quemadmodum a quibusque sum provocatus ; malos cives , rempublicam bene gerendo ; perfidos amicos , nihil credendo , atque omnia cavendo ; invidos , virtuti & gloriae ferviendo ; mercatores provinciarum , revocando domum , atque ab iis provinciarum rationem repetendo.

22. Quamquam mihi majori curae est , quemadmodum quidem vobis , qui de me estis optimè meriti , gratiam referam , quàm , quemadmodum inimicorum injurias , crudelitatemque persequar. Etenim ulciscendae injuriae facilior ratio est , quàm beneficii remunerandi , propterea quòd superiorem esse contra improbos , minùs est negotii , quàm bonis exaequari : tum etiam ne tam necessarium quidem est malè meritis , quàm optimè meritis , referre quod debeas.

23. Odium vel precibus mitigari potest , vel temporibus reipublicae communique utilitate deponi , vel difficultate ulciscen-

di teneri, vel vetustate sedari: bene meritos quin colas, nec exorari fas est, nec id reipublicæ repetere utcumque necesse est, neque est excusatio difficultatis, neque æquum est tempore & die memoriam beneficii definire. Postremò qui in ulciscendo remissior fuit, mox aperte laudatur: at gravissimè vituperatur, qui in tantis beneficiis, quanta vos in me contulistis, remunerandis, est tardior; neque solum ingratus, quod ipsum grave est, verum etiam impius appelletur, necesse est. Atque in officio persolvendo dissimilis est ratio, & pecunia debita; propterea quòd pecuniam qui retinet, non dissolvit; qui reddidit, non habet: gratiam & qui retulit, habet; & qui habet, dissolvit.

X. Quapropter memoriam vestri beneficii colam benevolentiam sempiternam, non solum dum animam spirabo meam, sed etiam quum mortuo monumenta vestri in me beneficii permanebunt. In referenda autem gratia hoc vobis repromitto, semperque præstabo, mihi neque in consiliis de reipublica capiendis, diligentiam; neque in periculis a reipublica propulsandis, animum; neque in sententia simpliciter referenda, fidem; neque in hominum voluntatibus pro reipublica lædendis, libertatem; nec in perferendo labore, industriam; nec in vestris commodis augendis, gratam animi benevolentiam de futuram.

46 *ORATIO II. POST REDITUM.*

25. Atque hæc cura, Quirites, erit infixæ animo meo sempiterna, ut, quum vobis, qui apud me deorum immortalium vim & numen tenetis, tum posteris vestris, cunctisque gentibus dignissimus eâ civitate videar, quæ suam dignitatem non posse tenere se, nisi me recuperasset, cunctis suffragiis judicavit.






PRO DOMO SUA,
AD PONTIFICES.

ORATIO VIGESIMA NONA.

Restituto in patriam Cicerone, magna fuit contentio de ejus domo, quam publicatam & eversam Clodius Libertati consecrarat, ne umquam profana fieri posset. Populus quidem eam jure eodem esse jusserat, quo fuisset: verum senatus decreverat, ut de ejus religione ad Pontificum collegium referretur. Igitur Cicero pridie Calendas Octobris pro domo sua hanc dixit orationem, in qua primum respondet Clodio, qui sententiam ejus de potestate rei frumentariæ Pompeio permittenda reprehenderat. Deinde domum suam, propter Clodii consecrationem, sa-

cram non esse, sed ab omni religione vacuam & puram esse ostendit, quòd ea consecratio neque jure, neque ritè facta sit. Atque ita decreverunt Pontifices. Hinc Cicero in Pisonem 52. Me consequentibus diebus in ea ipsa domo, quâ me expuleras, quam expilaras, quam incenderas, pontifices, consules, patres conscripti collocaverunt; mihiq; quod ante me nemini, pecuniâ publicâ ædificandam domum censuerunt. Vide Epist. 2. Libri 4. ad Atticum.

I.  UUM multa divinitus, Pontifices; a majoribus nostris inventa, atque instituta sunt, tum nihil præclarius, quàm quòd vos eosdem & religionibus deorum immortalium, & summæ reipublicæ præesse voluerunt: ut amplissimi & clarissimi cives rempublicam benè gerendo, pontifices religiones sapienter interpretando, rempublicam conservarent. Quòd si ullo tempore magna causa in sacerdotum populi Romani judicio, ac potestate versata est; hæc profectò tanta est, ut omnis reipublicæ dignitas, omnium civium salus, vita, libertas, aræ,

aræ, foci, dii penates, bona, fortunæ, domicilia, vestræ sapientiæ, potestatique commissa, creditaque esse videantur.

2. Vobis hodierno die constituendum est, utrùm posthac amentes ac perditos magistratus improborum ac sceleratorum civium præsidio nudare, an etiam deorum immortalium religione armare malitis. Nam si illa labes ac flamma reipublicæ suum illum pestiferum & funestum tribûnatum, quem æquitate humanâ tueri non potest, divinâ religione defenderit; aliæ cæremoniæ nobis erunt, alii antistites deorum immortalium, alii interpretes religionum requirendi: sin autem vestrâ auctoritate, sapientiâque, Pontifices, ea, quæ furore improborum in republica ab aliis oppressa, ab aliis deserta, ab aliis prodita, gesta sunt, rescinduntur; erit causa, cur consilium majorum, in amplissimis viris ad sacerdotia deligendis, jure ac meritò laudare possimus. Sed, quoniam ille demens, si ea, quæ ego per hos dies in senatu de republica sensi, vituperasset, aliquem se aditum ad aures vestras esse habiturum putavit, omittam ordinem dicendi meum; respondebo hominis furiosi non orationi, quâ ille uti non potest, sed convicio, cujus exercitationem quum intolerabili petulantia, tum etiam diuturnâ impunitate munivit.

II. Ac primùm illud a te , homine vefano ac furiofo , requiro , quæ te tanta pœna tuorum ſclerum , flagitiorumque vexet , ut hos tales viros , qui non ſolùm conſiliis ſuis , ſed etiam ſpecie ipſâ dignitatem rei-publicæ ſuſtinent , quòd ego in ſententia dicenda ſalutem civium cum honore Cneii Pompeii conjunxerim , mihi eſſe iratos , & aliud de ſumma hoc tempore religione ſenſuros , ac me abſente ſenſerint , arbitrare.

4. Fuiſti tu , inquit , apud pontifices ſuperior ; ſed jam , quoniam te ad populum contuliſti , ſis inferior , neceſſe eſt. Itane verò ? quod in imperita multitudine eſt vitiſſimum , varietas , & inconstantia , & crebra , tamquam tempeſtatum , ſic ſententiarum , commutatio , hoc tu ad hos transferas , quos ab inconstantia gravitas , a libidinofa ſententia certum & definitum jus religionum , vetuſtas exemplorum , auctoritas litterarum , monumentorumque deterret ? Tune es ille , inquit , quo ſenatus carere non potuit ? quem boni luxerunt ? quem reſpublica deſideravit ? quo reſtituto , ſenatus auctoritatem reſtitutam putabamus ? quam primùm adveniens prodidiſti ? Nondum de mea ſententia dico : impudentiæ primùm reſpondebo tuæ.

III. Hunc igitur , funeſta rei-publicæ peſtis , hunc tu civem ferro , & armis , &

PRO DOMO SUA. 51

exercitûs terrore , & consulum scelere , & audacissimorum hominum minis , servorum delectu , obsessione templorum , occupatione fori , oppressione curiæ , domo & patriâ , ne cum improbis boni ferro dimicarent , cedere curasti , quem a senatu , quem a bonis omnibus , quem a cuncta Italia desideratum , arcessitum , revocatum , conservandæ reipublicæ causâ , confiteris ?

6. At enim in senatum venire , in Capitolium intrare turbulento illo die non debuisti. Ego verò neque veni , & domo me tenui , quamdiu turbulentum tempus fuit ; quum servos tuos ad rapinam , ad bonorum cædem paratos , cum illa tua conscleratorum ac perditorum manu , armatos in Capitolium tecum venisse constabat : quod quum mihi nuntiaretur , scio me domi mansisse , & tibi , & gladiatoribus tuis instaurandæ cædis potestatem non fecisse : postea quàm mihi nuntiatum est , populum Romanum in Capitolium , propter metum atque inopiam rei frumentariæ , convenisse ; ministros autem scelerum tuorum perterritos , partim amissis gladiis , partim ereptis , diffugisse ; veni non solum sine ullis copiis , ac manu , verùm etiam cum paucis amicis.

7. An ego , quum P. Lentulus consul , optimè de me , ac de republica meritis ,

quum Q. Metellus, qui, quum meus inimicus esset, frater tuus, & dissensionis nostræ, & precibus tuis salutem ac dignitatem meam prætulisset, me arcesserent in senatum: quum tanta multitudo civium tam recenti officio suo me ad referendam gratiam nominatim vocarent, non venirem, quum præsertim te jam illinc cum tua fugitivorum manu discessisse constaret? Hic tu me etiam custodem, defensoremque Capitolii, templorumque omnium, hostem Capitolinum appellare ausus es, quod, quum in Capitolio senatum duo consules haberent, eò venirem? Utrumne est tempus aliquod, quo in senatum venisse turpe sit? an res illa talis erat, de qua agebatur, ut rem ipsam repudiare, & eos, qui agebant, condemnare deberem?

IV. Primum dico senatoris esse boni, semper in senatum venire: nec cum his sentio, qui statuunt minus bonis temporibus in senatum ipsi non venire; non intelligentes, hanc suam nimiam perseverantiam vehementer iis, quorum animum offendere voluerunt, gratam & jucundam fuisse. At enim nonnulli propter timorem, quod se in senatu tutò non esse arbitrabantur, discesserunt. Non reprehendo; nec quæro, fueritne aliquid pertimescendum: puto, suo quemque arbitratu timere oportere. Cur ego non timuerim, quæris? quia

te illinc abiisse constabat. Cur, quum viri boni nonnulli putarint, tutò se in senatu esse non posse, ego non idem senserim? Cur, quum ego me existimassem tutò omnino in civitate esse non posse, illi non item? an aliis licet, & rectè licet, in meo metu sibi nihil timere; mihi uni necesse erit & meam, & aliorum vicem pertimescere?

9. An, quia non condemnavi sententiâ meâ duo consules, sum reprehendendus? eos igitur ego potissimum damnare debui, quorum lege perfectum est, ne ego indemnatus, atque optimè de republica meritis, damnatorum pœnam sustinerem? quorum etiam delicta, propter eorum egregiam in me conservando voluntatem, non modò me, sed omnes bonos ferre deberet, eorum optimum consilium ego potissimum, per eos in meam pristinam dignitatem restitutus, consilio repudiarem meo? At quam sententiam dixi? Primum eam, quam populi sermo in animis nostris jam antè defixerat: deinde eam, quæ erat superioribus diebus agitata in senatu: deinde eam, quam senatus frequens, tum, quum mihi est assensus, secutus est: ut neque allata sit a me res inopinata, ac recens; nec, si quod in sententia vitium est, magis sit ejus, qui dixerit, quàm omnium, qui probarint. At enim liberum senatûs ju-

dicium , propter metum , non fuit. Si timuisse eos facis , qui discesserunt , concede , non timuisse eos , qui remanserunt : sin autem sine iis , qui tum abfuerunt ; nihil decerni liberè potuit ; quum omnes adessent , cœptum est referri de inducendo senatusconsulto : ab universo senatu reclamatum est.

V. Sed quæro , in ipsa sententia , quoniam princeps ego sum ejus atque auctor , quid reprehendatur. Utrùm causa capiendi novi consilii non fuit ? an meæ partes in ea causa non præcipuæ fuerunt ? an aliò potius confugiendum fuit ? Quæ vis , quæ causa major esse , quàm fames , potuit ? quàm seditio ? quàm consilia tua , tuorumque ; qui , facultate oblatâ ad imperitorum animos incitandos , renovaturum te tua illa funesta latrocinia ob annonæ causam putarunt ?

II. Frumentum provinciæ frumentariæ partim non habebant ; partim in alias terras , credo , propter varietatem venditorum miserant ; partim , quò gratius esset , tum , quum in ipsa fame subvenissent , custodiis suis clausum continebant , ut subito novum mitterent. Res erat non in opinione dubia , sed in præsentî , atque ante oculos proposito periculo : neque id conjecturâ prospiciebamus , sed jam experti videbamus : nam , quum ingravesceret anno-

tia, ut jam planè inopia ac fames, non caritas timeretur, concursus est ad templum Concordiæ factus, senatum illuc vocantē Metello consule: qui si verus fuit, ex dolore hominum, & fame; certè consules causam suscipere, certè senatus aliquid consilii capere potuit: sin causa fuit annona, seditionis quidem instimulator & concitator tu fuisti; nonne id agendum nobis omnibus fuit, ut materiem subtraheremus furori tuo?

12. Quid, si utrumque fuit, ut & fames stimularet homines, & tu in hoc ulcere, tamquam unguis, existeres? nonne fuit eò major adhibenda medicina, quæ & illud nativum, & hoc delatum malum sanare posset? Erat igitur & præsens caritas, & futura fames; non est satis: facta lapidatio est. Si ex dolore plebei, nullo incitante; magnum malum: si P. Clodii impulsu; usitatum hominis facinorosi scelus: si utrumque, ut & res esset ea, quæ suâ sponte multitudinis animos incitaret, & parati atque armati seditionis duces; videturne ipsa respublica & consulis auxilium implorasse, & senatûs fidem? Atqui utrumque fuisse perspicuum est; difficultatem annonæ, summamque inopiam rei frumentariæ, ut homines non jam diuturnam caritatem, sed ut famem planè timerent, nemo negat: hanc istum, otii & pacis hostem, causam

arrepturum fuisse ad incendia ; cædem , rapinas , nolo , Pontifices , suspicemini , nisi videritis.

13. Qui sunt homines a Q. Metello , fratre tuo , consule , in senatu palam nominati , a quibus ille se lapidibus appetitum , etiam percussum esse dixit ? L. Sergium , & M. Lollium nominavit. Quis est iste Lollius ? qui sine ferro ne nunc quidem tecum est : qui te tribuno plebis , nihil de me dicam , sed qui Cn. Pompeium interficiendum depoposcit. Quis est Sergius ? armiger Catilinæ , stipator tui corporis , signifer seditionis , concitator tabernariorum , damnatus injuriarum , percussor , lapidator , fori depopulator , obsessor curiæ. His , atque hujusmodi ducibus , quum tu in annonæ caritate in consules , in senatum , in bona , fortunasque locupletium , per causam inopum atque imperitorum , repentinos impetus comparares : quum tibi salus esse in otio nulla posset : quum desperatis ducibus decuriatos , ac descriptos haberes exercitus perditorum : nonne providendum senatui fuit , ne in hanc tantam materiem seditionis ista funesta fax adhæresceret ? Fuit igitur causa capiendi novi consilii. Videte nunc , fuerintne partes meæ pene præcipuæ.

VI. Quem tum Sergius ille tuus , quem Lollius , quem ceteræ pestes in lapidatione

illa nominabant ? quem annonam præstare oportere dicebant ? nonne me ? quid ? puerorum illa concursatio nocturna ? num a te ipso instituta ? Me frumentum flagitabant. Quasi verò ego aut rei frumentariæ præfuissem , aut compressum aliquod frumentum tenerem , aut in isto genere omnino quidquam , aut curatione , aut potestate valuisset. Sed homo ad cædem imminens , meum nomen operis ediderat , imperitis injecerat. Quum de mea dignitate in templo Jovis Optimi Maximi senatus frequentissimus , uno isto dissentiente , decrevisset ; subito , illo ipso die , carissimam annonam nec opinata vilitas consecuta est.

15. Erant qui deos immortales (id quod ego sentio) numine suo reditum meum dicerent comprobasse : nonnulli autem illam rem ad illam rationem , conjecturamque revocabant , qui , quòd in meo reditu spes otii & concordiae sita videbatur , in discessu autem quotidianus seditionis timor , jam pene belli depulso metu , commutatam esse annonam dicebant : quæ quia rursus in meo reditu facta erat. durior , a me , cujus adventu fore vilitatem boni viri dictitabant , annona flagitabatur.

VII. Ego denique non solum ab operis tuis , impulsu tuo , nominabar , sed etiam , depulsis ac dissipatis tuis copiis , a populo Romano universo , qui tum in Capitolium

convenerat, quum illo die minùs valerem, nominatim in senatum vocabar. Veni expectatus: multis sententiis jam dictis, rogatus sum sententiam: dixi reipublicæ saluberrimam, mihi necessariam. Petebatur a me frumenti copia, annonæ vilitas: num possem aliquid in ea re gerenda, ratio non habebatur. Flagitabar bonorum expostulatione; improborum convicia sustinere non poteram: delegavi amico locupletiori, non quò illi, ita de me merito, onus illud imponerem (succubuissem enim potius ipse) sed quia videbam, id quod omnes; quod nos de Cn. Pompeio polliceremur, id illum fide, consilio, virtute, auctoritate, felicitate denique suâ facillimè perfecturum.

17. Itaque, sive hunc dii immortales fructum mei reditûs populo Romano tribuunt, ut, quemadmodum discessu meo frugum inopia, fames, vastitas, cædes, incendia, rapinæ, scelerum impunitas, fuga, formido, discordia fuisset; sic reditu meo ubertas agrorum, frugum copia, spes otii, tranquillitas animorum, judicia, leges, concordia populi, senatûs auctoritas, mecum simul reducta videantur: sive egomet aliquid adventu meo, consilio, auctoritate, diligentia pro tanto beneficio populo Romano præstare debui; præsto, promitto, spondeo: nihil dico amplius: hoc, quod satis est huic tempori, dico, rem-

publicam annonæ nomine in id discrimen, quò vocabatur, non esse venturam.

VIII. Num igitur in hoc officio, quod fuit præcipuè meum, sententia mea reprehenditur? Rem maximam eripui a peste summi periculi, non solùm eam, sed etiam vos a cæde, incendiis, vastitate: nemo negat: quum ad causam caritatis accederet iste speculator communium miseriarum, qui semper in reipublicæ malis sceleris sui faces inflammavit. Negat oportuisse quidquam uni extra ordinem decerni. Non jam tibi sic respondebo, ut ceteris; Cn. Pompeio plurima, periculosissima, maxima, terrâ marique bella extra ordinem esse commissa: quarum rerum si quem pœniteat, eum victoriæ populi Romani pœnitere: non ita tecum ago.

19. Cum his hæc a me haberi oratio potest, qui ita disputant, se, si qua res ad unum deferenda sit, ad Cn. Pompeium delaturos potissimùm; sed se extra ordinem nihil cuiquam dare: quum Pompeio datum sit, id se pro dignitate hominis ornare ac tueri solere. Horum ego sententiam ne laudem, impediatur Cn. Pompeii triumphis; quibus ille, quum esset extra ordinem ad patriam defendendam vocatus, auxit nomen populi Romani, imperiumque honestavit: constantiam probo, quâ mihi quoque utendum fuit, quo ille

auctore extra ordinem bellum cum Mithridate, Tigraneque gessit.

20. Sed cum illis tamen possum aliquid disputare : tua verò quæ tanta impudentia est , ut audeas dicere , extra ordinem dari nihil cuiquam oportere ? qui quum lege nefariâ Ptolemæum , regem Cypri , fratrem regis Alexandrini , eodem jure regnantem , causâ incognitâ , publicasses , populumque Romanum scelere obligasses : quum in ejus regnum , bona , fortunas , latrocinium hujus imperii immisisses , cujus cum patre , avo , majoribus societas nobis & amicitia fuisset : hujus pecuniæ deportandæ , & , si quis suum jus defenderet , bello gerendo M. Catonem præfecisti. Dices , Quem virum ? sanctissimum , prudentissimum , fortissimum , amicissimum reipublicæ , virtute , consilio , ratione vitæ mirabili ad laudem , & propè singulari. Sed quid ad te , qui negas esse verum , quemquam ulli rei publicæ extra ordinem præfici.

IX. Atque in hoc solùm inconstantiam redarguo tuam ; qui in ipso Catone , quem tu non pro illius dignitate produxeras , sed pro tuo scelere subduxeras ; quem tuis Sergiis , Lolliis , Titiis , ceterisque cædis & incendiorum ducibus objeceras ; quem carnificem civium , quem indemnatorum necis principem , quem crudelitatis aucto-

rem fuisse dixeras : ad hunc , honorem & imperium extra ordinem nominatim rogatione tuâ detulisti ; & tantâ fuisti intemperantiâ , ut illius tui sceleris rationem occultare non posses.

22. Litteras in concione recitasti , quas tibi a C. Cæsare missas diceres : CÆSAR PULCHRO : quum etiam es argumentatus , amoris esse hoc signum , quum nominibus tantum uteretur , neque adscriberet , *Proconsule* , aut *Tribuno plebis*. Deinde gratulari tibi , quod idem in posterum M. Catonem tribunatu tuo removisses , & quod idem in posterum de extraordinariis potestatibus libertatem ademisses : quas aut numquam tibi ille litteras misit ; aut , si misit , in concione recitari noluit ; aut , sive ille misit , sive tu finxisti ; certè consilium tuum de Catonis honore , illarum litterarum recitatione patefactum est. Sed omitto Catonem , cujus eximia virtus , dignitas , & in eo negotio , quod gessit , fides & continentia , tegere videntur improbitatem & legis , & actionis tuæ.

23. Quis provinciam homini post homines natos turpissimo , sceleratissimo , contaminatissimo ? quis illam opimam fertilemque Syriam , quis bellum pacatissimis gentibus , quis pecuniam ad emendos agros constitutam , ereptam vi ex Cæsaris rebus actis , quis imperium infinitum de-

dit? Cui quidem quum Ciliciam dedisses; mutasti pactionem, & Ciliciam ad prætorem item extra ordinem transtulisti; Gabinio, pretio amplificato, Syriam nominatim dedisti. Quid? homini teterrimo, crudelissimo, fallacissimo, omnium scelerum, libidinumque maculis notatissimo, L. Pisoni, nonne nominatim populos liberos multis senatusconsultis, etiam recenti lege generi ipsius liberatos, vinctos & constrictos tradidisti? nonne, quum ab eo merces tui beneficii, pretiumque provinciae meo sanguine tibi esset persolutum, tamen ærarium cum eo partitus es?

24. Itane verò? tu provincias consulares, quas C. Gracchus, qui unus maxime popularis fuit, non modo non abstulit ab senatu, sed etiam, ut necesse esset quotannis constitui per senatum, decretâ lege fanxit; eas lege Semproniam per senatum decretas rescidisti? extra ordinem, sine sorte, nominatim dedisti, non consulibus, sed reipublicae pestibus? nos, quod nominatim rei maximae pene jam desperatae summum virum, sæpe ad extrema reipublicae discrimina delectum, præfecimus, a te reprehendemur?

X. Quid tandem, si, quæ tum illis reipublicae tenebris, cæcisque nubibus & procellis, quum senatum a gubernaculis dejecisses, populum e navi exturbasses,

ipse archipirata cum grege prædonum impurissimo plenissimis velis navigares ; si , quæ tum promulgasti , constituisti , promisiisti , vendidisti , perferre potuisses , qui locus in orbe terrarum vacuus extraordinariis fascibus , atque imperio Clodiano fuisset ?

25. Sed excitatus aliquando Cn. Pompeii (dicam ipso audiente , quod sensi , & sentio , quoquo animo me auditurus est) excitatus , inquam , aliquando Cn. Pompeii nimium diu reconditus , & penitus abstrusus animi dolor subvenit subito reipublicæ , civitatemque fractam malis , mutam , debilitatam , abjectam metu , ad aliquam spem libertatis , & pristinae dignitatis erexit. Hic vir extra ordinem rei frumentariæ præficiendus non fuit ? Scilicet tu helluoni spurcissimo , prægustatori libidinum tuarum , homini egentissimo & facinorosissimo Sex. Clodio , socio tui sanguinis , qui suâ linguâ etiam sororem tuam a te abalienavit , omne frumentum privatum & publicum , omnes provincias frumentarias , omnes mancipēs , omnes horreorum claves lege tuâ tradidisti : qua ex re primum caritas nata est ; deinde incipia : impendebat fames , incendia , cædes , direptio : imminebat tuus furor omnium fortunis & bonis.

26. Queritur etiam importuna pestis ex

ore impurissimo Sex. Clodii rem frumentariam esse ereptam, summisque in periculis ejus viri auxilium implorasse rempublicam, a quo sæpe se & servatam, & amplificatam esse meminisset. Extra ordinem ferri nihil placet Clodio. Quid? de me quod tulisse te dicis, patricida, fratricida, fororicida, nonne extra ordinem tulisti? An de peste civis, quemadmodum omnes jam dii atque homines judicaverunt, conservatoris reipublicæ, quemadmodum autem tute ipse confiteris, non modò indemnati, sed ne accusati quidem, licuit tibi ferre non legem, sed nefarium privilegium, lugente senatu, mœrentibus bonis omnibus, totius Italiæ precibus repudiatis, oppressâ, captâque republicâ; mihi, populo Romano implorante, senatu poscente, temporibus reipublicæ flagitantibus, non licuit de salute populi Romani sententiam dicere? qua quidem in sententia, si Cn. Pompeii dignitas aucta est, conjuncta cum utilitate communi, certè laudandus essem, si ejus dignitati suffragatus viderer, qui meæ salutis opem & auxilium tulisset.

XI. Desinant, desinant homines iisdem machinis sperare me restitutum posse labe factari, quibus antea stantem perculerunt. Quod enim par amicitiae consularis fuit umquam in hac civitate conjunctius, quàm

PRO DOMO SUA. 65

fuiamus inter nos, ego & Cn. Pompeius? quis apud populum Romanum de illius dignitate industrius, quis senatui sæpius dixit? qui tantus fuit labor, quæ simultas, quæ contentio, quam ego non pro illius dignitate susceperim? qui ab illo in me honos, quæ prædicatio de mea laude, quæ remuneratio benevolentiae prætermissa est?

28. Hanc nostram conjunctionem, hanc conspiracyonem in republica bene gerenda, hanc jucundissimam vitæ atque officiorum omnium societatem, certi homines fictis sermonibus & falsis criminibus diremerunt; quum iidem illum, ut me metueret, me caveret, monerent; iidem apud me, mihi illum esse uni inimicissimum dicerent: ut neque ego ab illo quæ mihi petenda essent, satis audaciter petere possem; neque ille, tot suspicionibus certorum hominum & scelere exulceratus, quæ meum tempus postularet, satis prolixè mihi polliceretur.

29. Data merces est erroris mei magna, Pontifices, ut me non solum pigeat stultitiæ meæ, sed etiam pudeat: qui, quum me non repentinum aliquod meum tempus, sed veteres multò antè suscepti & provisi labores, cum viro fortissimo & clarissimo conjunxissent, sim passus a tali amicitia distrahi; neque intellexerim, qui-

bus aut ut apertis inimicis obsisterem , aut ut insidiosis amicis non crederem. Proinde desinant aliquando me iisdem inflammare verbis : Quid sibi iste vult ? nescit , quantum auctoritate valeat , quas res gesserit , quâ dignitate sit restitutus ? cur ornat eum , a quo desertus est ?

30. Ego verò neque me tum desertum puto , sed pene deditum ; nec , quæ sint in illa reipublicæ flamma gesta contra me , neque quomodo , neque per quos , patefaciendum mihi esse arbitror. Si utile reipublicæ fuit , haurire me unum pro omnibus illam indignissimam calamitatem ; etiam hoc utile sit , quorum id scelere conflatum sit , me occultare , & tacere. Illud verò est hominis ingrati , tacere : itaque libentissimè prædicabo , Cn. Pompeium studio & auctoritate æquè , ut unumquemque vestrū , opibus , contentione , precibus , periculis denique , præcipuè pro salute mea laborasse.

XII. Hic tuis , P. Lentule , quum tu nihil aliud dies & noctes , nisi de salute mea cogitares , consiliis omnibus interfuit : hic tibi gravissimus auctor ad instituendam , fidelissimus socius ad comparandam , fortissimus adjutor ad rem perficiendam fuit : hic municipia , coloniasque adiit : hic Italiæ totius auxilium cupientis imploravit : hic in senatu princeps sententiæ fuit : idem-

que quum dixisset, tum etiam pro salute mea populum Romanum obsecravit.

31. Quare istam orationem, quâ usus, omittas licet; post illam sententiam, quam dixeram de annona, pontificum animos esse mutatos: perinde, quasi isti aut de Cn. Pompeio aliter, atque ego existimo, sentiant; aut, quid mihi pro expectatione populi Romani, pro Cn. Pompeii meritis erga me, pro ratione mei temporis faciendum fuerit, ignorent; aut etiam, si cujus fortè pontificis animum, quod certò scio aliter esse, mea sententia offendit, alio modo sit constituturus aut de religione pontificum, aut de republica, quàm eum aut cæremoniarum jus, aut civitatis salus coëgerit.

32. Intellego, Pontifices, me plura extra causam dixisse, quàm aut opinio tulerat, aut voluntas mea: sed quum me purgatum vobis esse cuperem, tum etiam vestra in me attentè audiendo benignitas provexit orationem meam. Sed hoc compensabo brevitate ejus orationis, quæ pertinet ad ipsam cognitionem vestram: quæ quum sit in jus religionis, & in jus reipublicæ distributa, religionis partem, quæ multò est verbosior, prætermittens, de jure reipublicæ dicam. Quid est enim aut tam arrogans, quàm de religione, de rebus divinis, de cæremoniis sacris, pontifi-

cum collegium docere conari ; aut tam stultum , quàm , si quis quid in vestris libris invenerit , id narrare vobis ; aut tam curiosum , quàm ea scire velle , de quibus majores nostri vos solos & consuli , & scire voluerunt ?

XIII. Nego potuisse jure publico , legibus iis , quibus hæc civitas utitur , quemquam civem ullâ ejusmodi calamitate affici , sine judicio : hoc juris in hac civitate , etiam tum , quum reges essent , dico fuisse ; hoc nobis esse a majoribus traditum ; hoc esse denique proprium liberæ civitatis , ut nihil de capite civis , aut de bonis , sine judicio senatûs , aut populi , aut eorum , qui de quaque re constituti judices sint , detrahi possit.

34. Videsne me non radicitus evellere omnes actiones tuas ? neque illud agere , quod apertum est , te omnino nihil gessisse jure , non fuisse tribunum plebis ? hoc dico , esse patricium : dico apud pontifices ; augures adsunt ; versor in medio jure publico. Quod est , Pontifices , jus adoptionis ? nempe ut is adoptet , qui neque procreare jam liberos possit , & , quum potuerit , sit expertus. Quæ deinde causa cuique sit adoptionis , quæ ratio generum ac dignitatis , quæ sacrorum , quæri a pontificum collegio solet. Quid est horum in ista adoptione quæsitum ? Adop-

at annos viginti natus, etiam minor, senator. Liberatorumne causa? At procreare potest: habet uxorem: suscepit etiam liberos: exheredabit igitur pater filium. Quid? sacra Clodiæ gentis cur intereunt, quod in te est? quæ omnis notio pontificum, quum adoptarere, esse debuit.

35. Nisi fortè ex te ita quæsitum est, num perturbare rempublicam seditionibus velles; & ob eam causam adoptari, non ut filius esses, sed ut tribunus plebis fieres, & funditus everteres civitatem. Respondisti, credo, te ita velle: pontificibus bona causa visa est: approbaverunt. Non ætas ejus, qui adoptabat, quæsitæ est, ut in Cn. Aufidio, M. Pupio; quorum uterque nostrâ memoriâ summâ senectute, alter Orestem, alter Pisonem adoptavit: quas adoptiones, sicut alias innumerabiles, hereditates nominis, pecuniæ, sacrorum secutæ sunt. Tu neque Fonteius es, qui esse debebas; neque patris heres: neque, amissis sacris paternis, in hæc adoptiva venisti. Ita perturbatis sacris, contaminatis gentibus, & quam deseruisti, & quam polluisti, jure Quiritium legitimo tutelarum & hereditatum relicto, factus es ejus filius contra fas, cujus per ætatem pater esse potuisti.

XIV. Dico apud pontifices: nego, istam adoptionem pontificio jure esse fac-

tam : primùm , quod hæ vestræ sint ætates , ut is , qui te adoptavit patris loco , vel filii tibi loco per ætatem esse potuerit , vel eo quo fuit : deinde quòd causa quæri soleat adoptandi , ut & is adoptet , qui , quod naturâ jam assequi non potest , & legitimo , & pontificio jure quærat ; & ita adoptet , ut ne quid aut de dignitatè generum , aut de sacrorum religione minuatur : illud in primis , ne qua calumnia , ne qua fraus , ne quis dolus adhibeatur : ut hæc simulata adoptio filii , quàm maximè veritatem illam suscipiendorum liberorum imitata esse videatur.

37. Quæ major calumnia est , quàm venire imberbem adolescentulum , bene valentem , ac maritum ; dicere , filium senatorem populi Romani sibi velle adoptare ; id autem scire , & videre omnes , non ut ille filius instituatur , sed ut e patriciis exeat , & tribunus plebis fieri possit , idcirco adoptari ? neque id obscurè ; nam adoptatum emancipari statim , ne sit ejus filius , qui adoptarit. Cur ergo adoptatur ? Probate genus adoptionis : jam omnium sacra interierint , quorum custodes vos esse debetis ; jam patricius nemo relinquetur : cur enim quisquam vellet tribunum plebis se fieri non licere ? angustiores sibi esse petitionem consulatûs ? in sacerdotium quum possit venire , quia patricio non sit is lo-

cus, non venire? Ut cuique aliquid acciderit, quare commodius sit esse plebeium, simili ratione adoptabitur.

38. Ita populus Romanus brevi tempore, neque regem sacrorum, neque flamines, nec salios habebit, nec ex parte dimidia reliquos sacerdotes; neque auctores centuriatorum, & curiatorum comitiorum: auspiciæque populi Romani, si magistratus patricii creati non sint, intereant necesse est, quum interrex nullus sit, quòd & ipsum patricium esse, & a patricio prodi necesse est. Dixi apud pontifices, istam adoptionem nullo decreto hujus collegii probatam, contra omne pontificium jus factam, pro nihilo esse habendam; quâ sublata, intelligis, totum tribunatum tuum concidisse.

XV. Venio ad augures, quorum ego libros, si qui sunt reconditi, non scrutor: non sum in exquirendo jure augurum curiosus: hæc, quæ unà cum populo didici, quæ sæpe in concionibus responsa sunt, novi. Negant fas esse agi cum populo, quum de cœlo servatum sit. Quo die de te lex curiata lata esse dicatur, audes negare de cœlo esse servatum? Adest præsens vir singulari virtute, constantiâ, gravitate præditus, M. Bibulus: hunc consulem illo ipso die contendo servasse de cœlo. Infirma sunt igitur, tuâ sententiâ,

acta C. Cæsaris, viri fortissimi? Minimè: neque enim mea jam quidquam interest, exceptis his telis, quæ ex illius actionibus in meum corpus immissa sunt.

40. Sed hæc de auspiciis, quæ ego nunc perbreuiter attingo, acta sunt a te: tu, tuo præcipitante jam & debilitato tribunatu, auspiciorum patronus subito exististi: tu M. Bibulum in concionem, tu augures produxisti: te interrogante augures responderunt, quum de cœlo servatum sit, cum populo agi non posse: tibi M. Bibulus quærenti, se de cœlo servasse respondit: idemque in concione dixit, ab Appio, fratre tuo, productus, te omnino, quòd contra auspicia adoptatus esses, tribunum plebis non fuisse: tua denique omnis actio posterioribus mensibus fuit, omnia, quæ C. Cæsar egisset, quòd contra auspicia essent acta, per senatum rescindi oportere; quod si fieret, dicebas te tuis humeris me custodem urbis in urbem relaturum. Videte hominis amentiam, ubi per suum tribunatum Cæsaris actis illigatus teneretur. Si & sacrorum jure pontifices, & auspiciorum religione augures totum evertunt tribunatum tuum, quid quæris ampliùs? an etiam apertius aliquod jus populi, atque legum?

XVI. Horâ fortasse sextâ diei questus sum in judicio, quum C. Antonium, collegam

legam meum, defenderem, quædam de republica, quæ mihi visa sunt ad illius mi-
seri causam pertinere : hæc homines im-
probi ad quosdam viros fortes longè ali-
ter, atque a me dicta erant, detulerunt :
horâ nonâ, illo ipso die, tu es adoptatus.
Si, quod in ceteris legibus trinûm nundi-
nûm esse oportet, id in adoptione satis est,
trium esse horarum ; nihil reprehendo : sin
eadem observanda sunt : si decrevit sena-
tus, M. Drusi legibus, quæ contra legem
Cæciliam & Didiam latæ essent, popu-
lum non teneri : jam intelligis, omni ge-
nere juris, quod in sacris, quod in auspi-
ciis, quod in legibus sit, te tribunum ple-
bis non fuisse.

42. Atque ego hoc totum non sine cau-
sa relinquo. Video enim quosdam clarissi-
mos viros, principes civitatis, aliquot lo-
cis judicasse, te cum plebe jure agere po-
tuisse ; qui etiam de me ipso, quum tuâ
rogatione funere elatam rempublicam esse
dicerent, tamen id funus, etsi miserum
atque acerbum fuisset, jure indictum esse
dicebant : quod de me cive ac de repu-
blica bene merito tulisses, funestum funus
te indixisse reipublicæ ; quod salvis auspi-
ciis tulisses, jure egisse dicebant. Quare li-
cebit, ut opinor, nobis eas actiones non
infirmare, quibus illi actionibus constitu-
tum tribunatum tuum comprobaverunt.

Fueris sanè tribunus plebis tam jure , quàm lege , quàm fuit hic ipse Rullus , vir omnibus rebus clarissimus atque amplissimus : quo jure , quo more , quo exemplo legem nominatim de capite civis indemnati tulisti ?

XVII. Vetant leges sacratæ , vetant XII. tabulæ , leges privatis hominibus irrogari : id est enim privilegium : nemo umquam tulit : nihil est crudelius , nihil perniciosius , nihil , quod minùs hæc civitas ferre possit. Proscriptionis miserrimum nomen illud , & omnis acerbitas Sullani temporis , quid habet , quod maxime sit insigne ad memoriam crudelitatis ? opinor , pœnam in cives Romanos nominatim sine judicio constitutam.

44. Hanc vos igitur , Pontifices , judicio atque auctoritate vestrà tribuno plebis potestatem dabitis , ut proscribere possit quos velit ? quæro enim , quid sit aliud proscribere. VELITIS , JUBEATIS , ut *M. Tullius in civitate ne sit , bonaque ejus ut mea sint.* Ita enim fecit , etsi aliis verbis tulit. Hoc plebiscitum est ? hæc lex ? hæc rogatio est ? hoc vos pati potestis ? hoc ferre civitas , ut singuli cives singulis versiculis e civitate tollantur ? Equidem jam perfunctus sum : nullam vim , nullum impetum metuo ; explevi animos invidorum ; placavi odia improborum ; saturavi etiam perfidiam , &

scelus proditorum : denique de mea causa , quæ videbatur perditis civibus ad invidiam esse proposita , jam omnes urbes , omnes ordines , omnes dii , atque homines judicaverunt.

45. Vobismetipsis , Pontifices , & vestris liberis , ceterisque civibus , pro vestra auctoritate & sapientiâ consulere debetis : nam quum tam moderata judicia populi sint a majoribus constituta : primum , ut ne poena capitis cum pecunia jungatur ; deinde , ne , nisi predictâ die , quis accusetur ; ut ter antè magistratus accuset , intermissâ die , quàm multam irroget , aut judicet ; quarta sit accusatio trinum aundinum predictâ die , quâ die judicium sit futurum : tum multa etiam ad placandum , atque ad misericordiam reis concessa sunt : deinde exorabilis populus , facilis suffragatio pro salute : denique etiam si qua res illum diem aut auspiciis , aut excusatione sustulit , tota causa judiciumque sublatum est.

XVIII. Hæc quum ita sint in re , ubi crimen est ? ubi accusator ? ubi testes ? Quid indignius , quàm , qui neque adesse sit jussus , neque citatus , neque accusatus , de ejus capite , liberis , fortunis omnibus , conductos sicarios egentes & perditos suffragium ferre , & eam legem putare ? At , si hoc de me potuit , quem honos , quem

dignitas , quem causa , quem respublica tuebatur , cuius denique pecunia non expetebatur , cui nihil oberat præter conversionem statûs , & inclinationem communium temporum ; quid tandem futurum est iis , quorum vita remota ab honore populari , & ab hac illustri gratia est ; pecuniæ autem tantæ sunt , ut eas nimium multi , egentes , sumptuosi , nobiles concupiscant ? Date hanc tribuno plebis licentiam , & intuemini paulisper animis juventutem , & eos maximè , qui imminere jam cupiditate videntur in tribunitiam potestatem : collegia , medius fidius , tribunorum plebis tota reperientur , hoc jure firmato , quæ coëant de hominum locupletissimorum bonis , prædâ præsertim populari , & spe largitionis oblatâ.

47. At quid tulit legum scriptor peritus & callidus ? *VELITIS , JUBEATIS , ut M. Tullio aquâ & igni interdicatur ?* Crudеле , nefarium , ne in sceleratissimo quidem cive sine judicio ferendum. Non tulit , ut interdicatur : quid ergo ? *Ut interdictum sit.* O cœnum , ô portentum , ô scelus ! Hanc tibi legem Clodius scripsit , spurciorem linguâ suâ , ut interdictum sit , cui non sit interdictum ? Sexte noster , bona venia , quoniam jam dialecticus es , & hoc quoque liguris ; quod factum non est , ut sis factum , ferri ad populum , aut ver-

bis ullis sanciri aut suffragiis confirmari potest?

48. Hoc tu scriptore, hoc consiliario, hoc ministro, omnium non bipedum solum, sed etiam quadrupedum impurissimo, rempublicam perdidisti: neque tu eras tam excors, tamque demens, ut nescires hunc Clodium esse, qui contra leges faceret; alios, qui leges scribere solerent: sed neque eorum, neque ceterorum, in quibus esset aliquid modestiæ, cujusquam tibi potestas fuit; neque tu legum scriptoribus iisdem potuisti uti, quibus ceteri; neque operum architectis; neque pontificem adhibere quem velles; postremò ne in prædæ quidem sectione mancipem, aut prædæ socium, extra tuorum gladiatorum numerum; aut denique suffragii latorem in ista tua proscriptione quemquam, nisi fu-rem aut sicarium, reperire potuisti.

XIX. Itaque quum tu florens ac potens per medium cohortis popularis volitares; amici illi tui, te uno amico tecti & beati, qui se populo commiserant, ita repellabantur, ut etiam Palatinam tuam perderent: qui in iudicium venerant, sive accusatores erant, sive rei, te deprecante damnabantur: denique etiam ille novitius Ligur, venalis adscriptor & subscriptor tuus, quum M. Papirii, sui fratris, esset testamento & iudicio improbatus, mor-

tem ejus se velle persequi dixit : nomen Sexti Propertii detulit : accusare alienæ damnationis , scelerisque socios , propter calumniæ metum , non est ausus.

50. De hac igitur lege dicimus , quæ jure rogata videatur ; cujus quam quisque partem tetigit , digito , voce , prædâ , suffragio , quocumque venit , repudiatus , convictusque discessit. Quid , si iis verbis scripta est ista proscriptio , ut se ipsa dissolvat ? est enim, *Quod M. Tullius falsum senatusconsultum retulerit*. Si igitur retulit falsum senatusconsultum , tum est rogatio ; si non retulit , nulla est. Satisne tibi videtur a senatu judicatum , me non modò non e mentitum esse auctoritatem ejus ordinis , sed etiam unum post urbem conditam diligentissimè senatui paruisse ? Quot modis doceo , legem istam , quam vocas , non esse legem ? Quid , si etiam pluribus de rebus uno scitu tulisti ? tamenne arbitraris , id , quod M. Drusus in legibus suis plerisque , bonus ille vir , M. Scaurus , & L. Crassus consularis non obtinuerint , id te posse , omnium facinorum & stuprorum omnium , Decimis & Clodiis auctoribus , obtinere ?

XX. Tulisti de me , ne reciperer , non ut exirem ; quem tu ipse non poteràs dicere non licere esse Romæ. Quid enim diceres ? damnatum ? certè non : expulsus ?

quî licuit ? sed tamen ne id quidem est scriptum, ut exirem : pœna est, qui receperit ; quam omnes neglexerunt : ejectionusquam est. Verùm sit : quid ? operum publicorum exactio : quid ? nominis inscriptio ; tibi num aliud videtur esse, ac meorum bonorum direptio : præterquam quòd ne id quidem per legem Liciniam, ut ipse tibi curationem ferres, facere potuisti ? Quid hoc ipsum, quod nunc apud pontifices agis, te meam domum consecrasse, te monumentum fecisse, in meis ædibus te signum dedicasse, eaque te ex una rogatiuncula fecisse ; unum & idem videtur esse, atque id, quod de me ipso nominatim tulisti ?

52. Tam hercule est unum, quàm quod idem tu lege unâ tulisti, ut Cyprius rex, cujus majores huic populo socii atque amici semper fuerunt, cum bonis omnibus sub præcone subjiceretur, & exsules Byzantium reducerentur. Eidem, inquit, utraque de re negotium dedi : sed quid, si eidem negotium dedisses, ut in Asia cistophorum flagitaret, inde iret in Hispaniam ; quum Româ decessisset, consulatum ei petere liceret ; quum factus esset, provinciam Syriam obtineret ? quoniam de uno homine scriberes, una res esset ?

53. Quòd si jam populus Romanus de ista re consultus esset, & non omnia per

fervos latronesque gessisses ; nonne fieri poterat , ut populo de Cyprio rege placeret , de exsulibus Byzantinis displiceret ? Quæ est quasi alia vis , quæ sententia Cæciliæ legis & Didiaë , nisi hæc , ne populo necesse sit in conjunctis rebus compluribus , aut id , quod nolit , accipere ; aut id , quod velit , repudiare ? Quid si per vim tulisti ? tamenne lex est ? aut quidquam jure gestum videri potest , quod per vim gestum esse constet ? an , si in ipsa latione tua , captâ jam urbe , lapides jacti , si manus collata non est , idcirco tu ad illam labem , atque eluvîem civitatis , sine summa vi pervenire potuisti ?

XXI. Quum in tribunali Aurelio conscribebas palam non modò liberos , sed etiam fervos , ex omnibus vicis concitatos , vim tum videlicet non parabas : quum edictis tuis tabernas claudi jubebas , non vim imperitæ multitudinis , sed hominum honestorum modestiam , prudentiamque quærebas : quum arma in ædem Castoris comportabas , nihil aliud , nisi uti ne quid per vim agi posset , machinabare : quum verò gradus Castoris convellisti , ac removisti , tum , ut modestè tibi agere liceret , homines audaces ab ejus templi aditu atque adscensu repulisti : quum eos , qui in conventu virorum bonorum verba de salute mea fecerant , adesse jussisti , eorum-

que advocationem, manibus, ferro, lapidibus discussisti; tum profectò ostendisti, vim tibi maximè displicere. Verùm hæc furiosa vis vesani tribuni plebis facilè superari, frangique potuit virorum bonorum vel virtute, vel multitudine.

55. Quid? quum Gabinio Syria dabatur, Macedonia Pisoni, utrique infinitum imperium, ingens pecunia, ut tibi omnia permitterent, te adjuvarent, tibi manum, copias, tibi suos paratos centuriones, tibi pecunias, tibi familias compararent; te suis sceleratis concionibus sublevarent, senatûs auctoritatem irriderent, equitibus Romanis mortem proscriptionemque minitarentur; me terrent minis; mihi cædem & dimicationem denuntiarent; meam domum, refertam viris bonis, per amicos suos terrore complerent; proscriptionis metu me frequentia nudarent virorum bonorum, me præsidio spoliarent; senatum pro me non modò pugnare, amplissimum ordinem, sed etiam plorare & supplicare, mutatâ veste, prohiberent; ne tum quidem vis erat?

XXII. Quid igitur ego cessi, aut qui timor fuit? non dicam in me: fac me timidum esse naturâ: quid? illa tot virorum fortissimorum millia: quid? nostri equites Romani: quid? senatus: quid? denique omnes boni, si nulla erat vis, cur me

flentes potiùs profecuti sunt, quàm aut increpantes retinuerunt, aut irati reliquerunt? An hoc timebam, si mecum ageretur more institutoque majorum, ut possem præsens sustinere?

57. Utrùm si dies dicta esset, iudicium mihi fuit pertimescendum? an sine iudicio privilegium? Iudicium in causa tam turpi? scilicet is homo sum, qui, etiam si causa esset ignota, dicendo non possem explicare. An eam causam probare non poteram, cujus tanta bonitas est, ut ea ipsa non modò se, sed etiam me absentem per se probarit? an senatus, an ordines, an ii, qui cuncta ex Italia ad me revocandum convolaverunt, seigniores me præsentem ad me retinendum & conservandum fuissent in ea causa, quam ipse jam parricida talem dicat fuisse, ut me ab omnibus ad meam pristinam dignitatem expetitur, atque revocatum queratur?

58. An verò in iudicio periculi nihil fuit; privilegium pertimui, ne, mihi præfenti si multa irrogaretur, nemo intercederet? Tam inops autem ego eram ab amicis, aut tam nuda respublica a magistratibus? Quid? si vocatæ tribus essent, proscriptionem, non dicam in me, ita de sua salute merito, sed omnino in ullo cive comprobavissent? An, si ego præsens fuisset, veteres illæ copiae conjuratorum,

trique perditī milites atque egentes, & nova manus sceleratissimorum consulum corpori meo pepercissent? qui quum eorum omnium crudelitati scelerique cessissem, ne absens quidem luctu meo mentes illorum satiare potui.

XXIII. Quid enim vos uxor mea misera violarat? quam vexavistis, raptavistis, omni crudelitate laceravistis: quid mea filia? cujus fletus assiduus, sordesque lugubres vobis erant jucundæ; ceterorum omnium mentes oculosque flectebant: quid parvus filius? quem quamdiu abfui, nemo nisi lacrymantem confectumque vidit; quid fecerat, quod eum toties per insidias interficere voluistis? quid frater meus? qui quum aliquantō post meum discessum ex provincia venisset, neque sibi vivendum, nisi me restituto, putaret, quum ejus mœror, squalor incredibilis & inauditus, omnibus mortalibus miserabilis videretur; quoties ex vestro ferro, ac manibus est elapsus?

60. Sed quid ego vestram crudelitatem expromo, quam in ipsum me, ac meos adhibuistis; qui parietibus, qui tectis, qui columnis, ac postibus meis horrificum quoddam, & nefarium, omni imbutum odio bellum intulistis? Non enim te arbitror, quum post meum discessum, omnium locupletium fortunas, omnium pro-

vinciarum fructus, tetrarcharum ac regum bona spe & avaritiâ devorasses, argenti & supellectilis meæ cupiditate esse cæcaturum: non existimo, Campanum illum consulem cum saltatore collega, quum alteri totam Achaiam, Thessaliam, Bœotiam, Græciam, Macedoniam, omnemque Barbariam, bona civium Romanorum condonasses; alteri Syriam, Babylonem, Persas, integerrimas pacatissimasque gentes ad diripiendum tradidisses; illos tam cupidos liminum meorum, & columnarum, & valvarum fuisse.

61. Neque porrò illa manus, copiæque Catilinæ, cæmentis ac testis tectorum meorum se famem suam expleturas putaverunt. Sed, ut hostium urbes, nec omnium hostium, verum eorum, quibuscum acerbum bellum internecivumque suscepimus, non prædâ adducti, sed odio solémus excindere, quòd, in quos propter eorum crudelitatem inflammatae mentes nostræ fuerunt, cum horum etiam tectis ac sedibus residere aliquod bellum semper videtur. ***

Deest nonnihil.

XXIV. Nihil erat latum de me; non adesse eram jussus; non citatus: abfueram: eram etiam tuo judicio civis incolumis, quum domus in Palatio, villa in Tusculano, altera ad alterum consulem

transferebatur : senatum consules vetabant : columnæ marmoreæ ex ædibus meis , inspectante populo Romano , ad focrum consulis portabantur : in fundum autem vicini consulis non modò instrumentum , aut ornamenta villæ , sed etiam arbores transferebantur ; quum ipsa villa non prædæ cupiditate (quid enim erat prædæ ?) sed odio & crudelitate funditus everteretur : domus ardebat in Palatio non fortuito , sed oblato incendio : consules epulabantur , & in conjuratorum gratulatione versabantur , quum alter se Catilinæ delicias , alter Cethegi consobrinum fuisse diceret.

63. Hanc ego vim , Pontifices , hoc scelus , hunc furorem meo corpore opposito , ab omnium bonorum cervicibus depuli , omnemque impetum discordiarum , omnem diu collectam vim improborum , quæ inveterata , compresso odio atque tacito , jam erumpebat , nacta tam audaces duces , excepi meo corpore : in me uno consulares faces jactæ manibus tribunitiis ; in me omnia , quæ ego quondam retude-ram , conjurationis nefaria tela adhæserunt. Quòd si , ut multis fortissimis viris placuit , vi & armis contra vim decertare voluissem ; aut vicissem cum maxima interne-
cione improborum , sed tamen civium ; aut , interfectis bonis omnibus , quod illis

optatissimum erat , unà cum republica concidissem.

64. Videbam , vivo senatu populoque Romano , celerem mihi summa cum dignitate reditum ; nec intelligebam fieri diutius posse , ut mihi non liceret esse in ea republica , quam ipse servassem : quòd si non liceret ; audieram , & legeram , clarissimos nostræ civitatis viros se in medios hostes ad perspicuam mortem pro salute exercitûs injecisse : ego pro salute reipublicæ universæ dubitarem ? hòc meliore conditione , quàm Decii , quòd illi ne auditores quidem suæ gloriæ , ego etiam spectator meæ laudis esse potuissem.

XXV. Itaque infractus furor tuus inanes faciebat impetus : omnem enim vim omnium sceleratorum acerbitas mei casûs exceperat : non erat in tam immani injuria , tantisque ruinis novæ crudelitati locus. Cato fuerat proximus. Quid ageres ? non erat , ut , qui modus moribus fuerat , idem esset injuriæ. Quid ? posses extrudere ad Cypriam pecuniam : præda perierit : alia non deerit : hunc modò amandandum esse. Sic M. Cato , invisus , quasi per beneficium , Cyprum relegatur : ejiciuntur duo , quos improbi videre non poterant ; alter per honorem turpissimum ; alter per honestissimam calamitatem.

66. Atque , ut sciatis , non hominibus

istum, sed virtutibus hostem semper fuisse; me expulso, Catone amandato, in eum ipsum se convertit, quo auctore, quo adjutore, in concionibus, ea, quæ gerebat, omnia, quæque gesserat, se fecisse, & facere dicebat. Cn. Pompeium, quem omnium judicio longè principem esse civitatis videbat, diutius furori suo veniam daturum non arbitrabatur; qui ex ejus custodia, per insidias, regis amici filium, hostem captivum, furripuisset, & eâ injuriâ virum fortissimum lacessisset: speravit iisdem se copiis cum illo posse configere, quibuscum ego noluissem, bonorum periculo, dimicare; & primò quidem, adjutoribus consulibus: postea fregit fœdus Gabinus; Piso tamen in fide mansit.

67. Quas iste tum cædes, quas lapidationes, quas fugas fecerit, quàm facilè ferro, quotidianisque insidiis, quum jam a firmissimo robore copiarum suarum relictus esset, Cn. Pompeium foro curiæque privarit, domumque conjecerit, vidistis: ex quo judicare potestis, quanta vis illa fuerit oriens, & congregata, quum hæc Cn. Pompeium terruerit jam distracta, & extincta.

XXVI. Hoc vidit in sententia dicenda Kalendis Januariis vir prudentissimus, & quum reipublicæ, tum mihi, tum etiam veritati amicissimus, L. Cotta, qui legem

de meo reditu ferendam non censuit :
» qui me consuluisse reipublicæ , cessisse
» tempestati ; amicio rem vobis ceterisque
» civibus , quàm mihi ac meis exstitisse ;
» vi , armis , dissensione hominum ad cæ-
» dem institutâ , novoque dominatu pul-
» sum esse dixit : nihil de meo capite po-
» tuisse ferri ; nihil esse jure scitum , aut
» posse valere : omnia contra leges moref-
» que majorum temerè , turbulentè , per
» vim , per furorem esse gesta : quòd si illa
» lex esset , nec referre ad senatum con-
» sules , nec sententiam dicere sibi licere ;
» quorum utrumque quin fieret , non
» oportere , ut de me lex ferretur , decer-
» ni ; ne illa , quæ nulla esset , esse lex ju-
» dicaretur. Sententia verior , gravior ,
utilior , melior reipublicæ nulla esse po-
tuit : hominis enim scelere & furore nota-
to , similis a republica labes in posterum
demovebatur.

69. Neque hoc Cn. Pompeius , qui or-
natissimam de me sententiam dixit , vos-
que , Pontifices , qui me vestris sententiis
auctoritatibusque defendistis , non vidistis ,
illam esse nullam , atque esse potiùs flam-
mam temporis , interdictum sceleris , vo-
cem furoris : sed prospexistis , ne qua po-
pularis in vos aliquando invidia redunda-
ret , si sine populi judicio restituti videremur : eodemque consilio , M. Bibuli , for-

tissimi viri , senatus sententiam secutus est , ut vos de mea domo statueretis ; non quòd dubitaret , quin ab isto nihil legibus , nihil religionibus , nihil jure esset actum ; sed ne quis oriretur aliquando in tanta ubertate improborum , qui in meis ædibus aliquam religionem residere diceret : nam legem quidem istam nullam esse , quotiescumque de me senatus sententiam dixit , toties judicavit ; quoniam quidem scripto illo istius sententiam dicere vetabatur. Atque hanc rem par illud simile , Piso & Gabinius , vidit. Homines legum , judiciorumque metuentes , quum frequentissimus senatus eos , ut de me referrent , quotidie flagitaret , non se rem improbare dicebant , sed lege istius impediri. Erat hoc verum : nam impediabantur , verùm eâ lege , quam idem iste de Macedonia , Syriaque tulerat.

XXVII. Hanc tu , P. Lentule , neque privatus , neque consul legem esse umquam putasti : nam tribunis plebis referentibus , sententiam de me designatus consul sæpe dixisti : ex Kalendis Januariis , quoad perfecta res est , de me retulisti : legem promulgasti , tulisti : quorum tibi , si esset illa lex , nihil liceret. At etiam Q. Metellus , collega tuus , vir clarissimus , quam legem esse homines alienissimi a P. Clodio judicarant , Piso & Ga-

binus, eam nullam esse frater P. Clodii, quum de me ad senatum tecum unà retulit, judicavit.

71. Sed isti, qui Clodii leges time-
runt, quemadmodum ceteras observa-
runt? Senatus quidem, cujus est gravis-
simum judicium de jure legum, quoties-
cumque de me consultus est, toties eam
nullam esse judicavit: quod idem tu, Len-
tule, vidisti in ea lege, quam de me tu-
listi: nam non est ita latum, ut mihi Ro-
mam venire liceret, sed UT VENIREM:
non enim voluisti, id, quod licebat, fer-
re, ut liceret; sed me ita esse in republica,
magis ut arcessitus imperio populi Roma-
ni viderer, quàm ad administrandam civi-
tatem restitutus.

72. Hunc tu etiam, portentosa pestis,
exulem appellare ausus es, quum tantis
sceleribus esses notatus, ut omnem lo-
cum, quò adisses, exilii simillimum red-
deres? Quid est enim exsul? ipsum per se
nomen calamitatis, non turpitudinis. Quan-
do igitur est turpe? re verâ, quando est
pœna peccati; opinione autem hominum,
etiam si est pœna damnati. Utrùm igitur
peccato meo exsulis nomen subeo, an re
judicatâ? Peccato? Jam neque tu id di-
cere audes, quem isti satellites tui felicem
Catilinam nominant, neque quisquam eo-
rum, qui solebant: non modò jam nemo

PRO DOMO SUA. 91

est tam imperitus, qui ea, quæ gessi in consulatu, peccata esse dicat: sed nemo est tam inimicus patriæ, qui non meis consiliis patriam conservatam esse fateatur.

XXVIII. Quod enim est in terris commune tantum, tantulumve consilium, quod non de meis rebus gestis ea, quæ mihi essent optatissima & pulcherrima, judicarit? Summum est populi Romani, populorumque, & gentium omnium, ac regum consilium senatus: decrevit, ut omnes, qui rempublicam salvam esse velent, ad me unum defendendum venirent; ostenditque, nec stare potuisse rempublicam, si ego non fuisset restitutus, nec futuram esse ullam, si non rediissem.

74. Proximus est huic dignitati ordo equester: omnes omnium publicanorum societates de meo consulatu, ac de meis rebus gestis amplissima atque ornatissima decreta fecerunt. Scribæ, qui nobiscum in rationibus monumentisque publicis versantur, non obscurum de meis in rempublicam beneficiis suum judicium, decretumque esse voluerunt. Nullum est in hac urbe collegium, nulli pagani, aut montani (quoniam plebi quoque urbanæ majores nostri conventicula, & quasi concilia quædam esse voluerunt) qui non amplissimè non modò de salute mea, sed etiam de dignitate decreverint.

75. Nam quid ego illa divina , atque immortalia municipiorum , & coloniarum , & totius Italiae decreta commemorem , quibus tamquam gradibus , mihi videor in coelum adscendisse , non solum in patriam revertisse ? Ille verò dies quis fuit , quum te , P. Lentule , legem de me ferentem populus Romanus ipse vidit , sensitque , quantus , & quantâ dignitate esses ? constat enim nullis umquam comitiis , campum Martium tantâ celebritate , tanto splendore omnis generis hominum , ætatum , ordinum floruisse. Omitto civitatum , nationum , provinciarum , regum , orbis denique terrarum de meis in omnes mortales meritis unum iudicium , unumque consensum. Adventus meus , atque introitus in urbem qui fuit ? utrùm me patria sic accepit , ut lucem salutemque redditam sibi ac restitutam accipere debuit , an ut crudelem tyrannum ? quod vos Catilinæ gregales de me dicere solebatis. Itaque ille unus dies , quo die me populus Romanus a porta in Capitolium , atque inde domum suâ celebritate lætitiâque comitatum honestavit , tantæ mihi jucunditati fuit , ut tua mihi conscelerata illa vis non modò non propulsanda , sed etiam emenda fuisset videatur. Quare illa calamitas (si ita est appellanda) excussit hoc genus totum maledicti , ne quisquam audeat jam reprehendere.

dere consulatum meum tot, tantis, tam
ornatis judiciis, testimoniis, auctoritatibus
comprobatum.

76. Quòd si in isto tuo maledicto pro-
brum non modò mihi nullum objectas,
sed etiam laudem illustras meam; quid te
aut fieri, aut fingi dementius potest? uno
enim maledicto, bis a me patriam serva-
tam esse concedis; semel, quum id feci,
quod omnes non negent immortalitati, si
fieri potest, mandandum, tu supplicio pu-
niendum putasti; iterum, quum tuum,
multorumque propter te inflammatum in
bonos omnes impetum, meo corpore ex-
cepi, ne eam civitatem, quam servassem
inermis, armatus in discrimen adducerem.

XXIX. Esto, non fuit in me pœna ul-
la peccati: at fuit iudicii. Cujus? quis me
umquam ullâ lege interrogavit? quis pos-
tulavit? quis diem dixit? Potest igitur
damnati pœnam sustinere indemnat? hoc
tribunitium est? hoc populare? quam-
quam ubi tu te popularem, nisi quum pro
populo fecisti, potes dicere? Scilicet
quum hoc juris a majoribus proditum sit,
ut nemo civis Romanus aut libertatem,
aut civitatem possit amittere, nisi ipse
auctor factus sit; quod tu ipse potuisti in
tua causa discere: credo enim, quamquam
in illa adoptione legitimè factum est nihil,
tamen te esse interrogatum, *Auctore es-*

ses, ut in te P. Fonteius vitæ necisque potestatem haberet, ut in filio. Quæro, si aut negasses, aut tacuisses, si tamen id XXX Curia jussissent, num id jussum esset ratum? certè non: quid ita? quia jus a majoribus nostris, qui non fictè & fallaciter populares, sed verè & sapienter fuerunt, ita comparatum est, ut civis Romanus libertatem nemo possit invitus amittere. Quinetiam, si decemviri sacramentum in libertatem injustum judicassent, tamen, quotiescumque vellet quis, in hoc genere solo rem judicatam referre posse voluerunt. Civitatem verò nemo umquam ullo populi jussu amittet invitus.

XXX. Qui cives Romani in colonias Latinas proficiscebantur, fieri non poterant Latini, qui non erant auctores facti, nomenque dederant: qui erant rerum capitalium condemnati, non priùs hanc civitatem amittebant, quàm erant in eam recepti, quò vertendi, hoc est, mutandi soli causâ venerant; id autem ut esset faciendum, non ademptione civitatis, sed rectori, & aquæ, & ignis interdictione faciebant.

79. Populus Romanus, L. Sullâ dictatore ferente, comitiis centuriatis, municipiis civitatem ademit; ademit iisdem agros: de agris ratum est; fuit enim populi potestas: de civitate, ne tamdiu qui-

dem valuit, quamdiu illa Sullani temporis arma valuerunt. Hanc verò Volaterranis, quum etiam tum essent in armis, L. Sulla victor, republicâ recuperatâ, comitiis centuriatis, civitatem eripere non potuit; hodieque Volaterrani non modò cives, sed etiam optimi cives, fruuntur nobiscum simul hac civitate: consulari homini P. Clodius, eversâ republicâ, civitatem adimere potuit, concilio advocato, conductis operis non solùm egentium, sed etiam servorum, Sedulio principe, qui se illo die confirmat Romæ non fuisse?

80. Quòd si non fuit, quid te audacius, qui in æs ejus nomen incideris? quid desperatius, qui ne ementiendo quidem potueris auctorem adumbrare meliorem? sin autem is primus scivit, quod facilè potuit, propter inopiam tecti, in foro pernoctans; cur non jurèt se Gadibus fuisse, quum tu te fuisse Interamnæ probaveris? Hoc tu igitur, homo popularis, jure muniam civitatem & libertatem nostram putas esse oportere, ut, si, tribuno plebis rogante, VELITIS, JUBEATISNE, Sedulii centum se velle & jubere dixerint, possit unusquisque nostrum amittere civitatem? Tum igitur majores nostri populares non fuerunt, qui de civitate & libertate ea jura sanxerunt, quæ nec vis temporum, nec potentia magistratuum, nec res judicata,

nec denique universi populi Romani potestas, quæ ceteris in rebus est maxima, labefactare possit.

81. At tu etiam, ereptor civitatis, legem de injuriis publicis tulisti Anagnino nescio cui Menulæ, per gratiam, qui tibi ob eam legem statuum in meis ædibus posuit, ut locus ipse in tua tanta injuria legem & inscriptionem statuæ refelleret: quæ res municipibus Anagninis ornatissimis multò majori dolori fuit, quam quæ idem ille gladiator scelera Anagninæ fecerat.

XXXI. Quid si, ne scriptum quidem usquam est in ista ipsa rogatione, quam se Sedulius negat scivisse; tu hujus, ut acta tui præclari tribunatûs hominis dignitate cohonestes, auctoritatem amplecteris? sed, tametsi nihil de me tulisti, quò minùs essem non modò in civium numero, sed etiam in eo loco, in quo me honores populi Romani collocaverunt; tamenne eum tuâ voce violabis, quem post. nefarium scelus consulum superiorum, tot vides judiciis senatûs, populi Romani, totius Italiæ honestatum? quem ne tum quidem, quum aberam, negare poteras esse tuâ lege senatorem? Ubi enim tuleras, ut mihi aquâ & igni interdiceretur? quod Gracchus de P. Popilio, Saturninus de Metello tulit: homines seditiosissimi de optimis ac fortissimis civibus non, ut esset interdictum,

tum, quod ferri non poterat, tulerunt, sed ut interdiceretur. Ubi cavisti, ne meo loco censor in senatum legeret? quod de omnibus, etiam quibus damnatis interdictum est, scriptum est in legibus.

83. Quære hoc e Sex. Clodio, scriptore legum tuarum: jube adesse: latitat omnino, sed si requiri jusseris, invenient hominem apud sororem tuam, occultantem se capite demisso. Sed si patrem tuum, civem medius fidius egregium, dissimilemque vestri, nemo umquam sanus exsulem appellavit, qui, quum de eo tribunus plebis promulgasset, adesse propter iniquitatem illius Cinnani temporis noluit, eique imperium est abrogatum: si in illo poena legitima turpitudinem non habuit propter vim temporum; in me, cui dies dicta numquam est, qui reus non fui, qui numquam sum a tribuno plebis citatus, damnati poena esse potuit, ea praesertim, quæ ne ipsâ quidem rogatione perscripta est?

XXXII. At vide, quid intersit inter illum iniquissimum patris tui casum, & hanc fortunam, conditionemque nostram. Patrem tuum, civem optimum, clarissimi viri filium, qui si viveret, quâ severitate fuit, tu profectò non viveres, L. Philippus censor avunculum suum praeteriit in recitando senatu: nihil enim poterat di-

cere , quare rata non essent , quæ erant acta in ea republica , in qua se illis ipsis temporibus censorem esse voluisset : me L. Cotta , homo censorius , in senatu juratus dixit , se , si censor tum esset , quum ego aberam , meo loco senatorem recitaturum fuisse.

85. Quis in meum locum judicem subdidit ? quis meorum amicorum testamentum discessu meo fecit , qui mihi non idem tribuerit , quod & si adessem ? quis me non modò civis , sed socius recipere contra tuam legem , & juvare dubitavit ? Denique universus senatus multò antè , quàm est lata lex , de me GRATIAS AGENDAS CENSUIT CIVITATIBUS HIS , QUÆ M. TULLIUM ; tantùmne ? immo etiam , CIVEM OPTIME DE REPUBLICA MERITUM , RECEPISSENT. Et tu unus pestifer civis , eum restitutum negas esse civem , quem ejectum universus senatus non modò civem , sed etiam egregium civem semper putavit ?

86. At verò , ut annales populi Romani , & monumenta vetustatis loquuntur , Cæso ille Quintius , & M. Furius Camillus , & M. Servilius Ahala , quum essent optimè de republica meriti , tamen populi incitati vim iracundiamque subierunt ; damnatique comitibus centuriatis quum in exsilium profugissent , rursus ab eodem populo

placato sunt in suam pristinam dignitatem restituti. Quòd si iis damnatis non modò non imminuit calamitas clarissimi nominis gloriam, sed etiam honestavit (nam, etsi optabilius est, cursum vitæ configere sine dolore & sine injuria, tamen ad immortalitatem gloriæ plus affert desideratum esse a suis civibus, quàm omnino nunquam esse violatum) mihi sine ullo iudicio populi profecto, tum amplissimis omnium iudiciis restituto, maledicti locum, aut criminis obtinebit?

87. Fortis & constans in optima ratione civis, P. Popilius, semper fuit; tamen ejus in omni vita nihil est ad laudem illustrius, quàm calamitas ipsa: quis enim jam meminisset, eum bene de republica meritum, nisi & ab improbis expulsus esset, & per bonos restitutus? Q. Metelli præclarum imperium in re militari fuit, egregia censura, omnis vita plena gravitatis; tamen hujus viri laudem ad sempiternam memoriam temporis calamitas propagavit.

XXXIII. Quòd si & illis, qui expulsi sunt iniquè, sed tamen legibus reducti, inimicis interfectis, rogationibus tribunitiis, non auctoritate senatûs, non comitiis centuriatis, non decretis Italiæ, non desiderio civitatis, inimicorum injuria probro non fuit; in me, qui profectus sum integer, abfui simul cum republica, rediî

maxima cum dignitate, te vivo, fratre tuo altero consule reducente, altero prætore petente, tuum scelus, meum probum putas esse oportere?

88. Ac, si me populus Romanus, incitatus iracundiâ aut invidiâ, e civitate eiecisset, idemque postea mea in rempublicam beneficia recordatus, se collegisset, temeritatem atque injuriam suam restitutione meâ reprehendisset; tamen profectò nemo tam esset amens, qui mihi populi tale iudicium non dignitati potius, quàm dedecori, putaret esse oportere: nunc verò, quum me in iudicium populi nemo omnium vocarit; condemnari non potuerim, qui accusatus non sim; denique ne expulsus quidem ita sim, ut, si contenderem, superare non possem; contraque a populo Romano semper sim defensus, amplificatus, ornatus: quid est, quare quicquam mihi se ipsâ populari ratione anteponat?

89. An tu populum Romanum esse illum putas, qui constat ex iis, qui mercede conducuntur? qui impelluntur, ut vim afferant magistratibus? ut obsideant senatum? optent quotidie cædem, incendia, rapinas? quem tu tamen populum, nisi tabernis clausis, frequentare non poteras: cui populo duces Lentidios, Lollios, Plauguleios, Sergios præfeceras. O speciem,



dignitatemque populi Romani, quam reges, quam nationes exteræ, quam gentes, ultimæ pertimescant, multitudinem hominum ex servis, ex conductis, ex facinorosis, ex egentibus congregatam!

90. Illa fuit pulchritudo populi Romani, illa forma, quam in campo vidisti, tum quum etiam tibi contra senatûs, totiusque Italiæ auctoritatem, & studium, dicendi potestas fuit. Ille, ille populus est dominus regum, victor atque imperator omnium gentium, quem illo clarissimo die, scelerate, vidisti tum, quum omnes principes civitatis, omnes ordinum, atque ætatum omnium, suffragium se non de civis, sed de civitatis salute ferre censebant: quum denique homines in campum non tabernis, sed municipiis clausis venerunt.

XXXIV. Hoc ego populo, si tum consules aut fuissent in republica, aut omnino non fuissent, nullo labore, tuo præcipiti furori atque impio sceleri restitissem: sed publicam causam contra vim armatam, sine populi præsidio suscipere nolui: non quò mihi P. Scipionis, fortissimi viri, vis intima, privati hominis, displiceret: sed Scipionis factum statim P. Mucius consul, qui in gerenda republica putabatur fuisse segnior gestâ, multis senatusconsultis non modò defendit, sed etiam ornavit: mihi aut, te interfecto, cum consulibus; aut,

te vivo , & tecum , & cum illis , armis decertandum fuit.

92. Erant eo tempore multa etiam alia metuenda : ad servos , medius fidius , res pervenisset : tantum homines impios ex veteri illa conjuratione inustum nefariis mentibus bonorum odium retinebat. Hic tu me etiam gloriari vetas : negas esse ferenda , quæ soleam de me prædicare ; & homo facetus , inducis etiam sermonem urbanum ac venustum : me dicere solere , esse me Jovem : eundemque dictitare , Minervam esse sororem meam. Non tam insolens sum , quòd Jovem esse me dico , quàm eruditus , quòd Minervam sororem Jovis esse existimo : sed tamen , ego mihi sororem virginem adscisco : tu sororem tuam virginem esse non sivist. Sed vide , ne tu te debeas Jovem dicere , quòd tu jure eandem sororem & uxorem appellare possis.

XXXV. Et quoniam hoc reprehendis , quòd solere me dicas de me ipso gloriosius prædicare ; quis umquam audivit , quum ego de me , nisi coactus , ac necessario dicerem ? nam si , quum mihi furta , largitiones , libidines objiciuntur , ego respondere soleo , meis consiliis , periculis , laboribus , patriam esse conservatam ; tam sum existimandus de gestis rebus gloriari , quàm de objectis non confiteri : sed si mihi

ante hæc durissima reipublicæ tempora nihil umquam aliud objectum est, nisi crudelitas illius temporis, quum a patria perniciem depuli; quid? me huic maledicto utrùm non respondere, an demissè respondere decuit?

94. Ego verò etiam reipublicæ semper interesse putavi, me illius pulcherrimi facti, quod ex auctoritate senatûs, consensu bonorum omnium, pro salute patriæ gessissem, splendorem verbis dignitatemque retinere; præsertim quum mihi uni in hac reipublica, audiente populo Romano, operâ meâ hanc urbem & hanc rempublicam esse salvam jurato dicere fas fuisset.

95. Exstinctum est jam illud maledictum crudelitatis, quod me non ut crudelem tyrannum, sed ut mitissimum parentem, omnium civium studiis desideratum, repetitum, arcessitum vident. Aliud exortum est: obijciunt mihi meus ille discessus: cui ego crimini respondere sine mea maxima laude non possum. Quid enim, Pontifices, debeo dicere? peccati me conscientiam profugisse? At id, quod mihi crimini dabatur, non modò peccatum non erat, sed erat res, post natos homines pulcherrima. Iudicium populi pertimuisse? At id, nec propositum ullum fuit; &, si fuisset, duplicatâ gloriâ discessissem. Bonorum mihi præsidium defuisse? Fal-

sum est. Me mortem timuisse ? Turpe est.

XXXVI. Dicendum igitur est id, quod non dicerem, nisi coactus (nihil enim umquam de me dixi sublatius adsciscendæ laudis causâ potius, quàm criminis depellendi) dico igitur, & quàm possum maximâ voce dico : Quum omnium perditorum & conjuratorum incitata vis, duce tribuno plebis, consulibus auctoribus, afflicto senatu, perterritis equitibus Romanis, suspensâ ac sollicitâ totâ civitate, non tam in me impetum faceret, quàm per me in omnes bonos; me vidisse, si vicissem, tenues reipublicæ reliquias; si victus essem, nullas futuras : quod quum judicassem, deflevi conjugis miseræ discidium, liberorum carissimorum solitudinem, fratris absentis amantissimi atque optimi casum, subitas fundatissimæ familiæ ruinas : sed his omnibus rebus vitam anteposui meorum civium; remque publicam concidere unius discessu, quàm omnium interitu occidere malui : speravi, id quod accidit, me jacentem posse a vivis viris fortibus excitari; si unâ cum bonis interiissem, nullo modo posse recreari.

97. Accepi, Pontifices, magnum atque incredibilem dolorem; non nego : neque istam mihi adscisco sapientiam, quam nonnulli in me requirebant, qui me animo nimis fracto esse atque afflicto loquebantur.

An ego poteram, quum a tot rerum tanta varietate divellerer (quas idcirco prætereo, quòd ne nunc quidem sine fletu commemorare possum) infitiri me esse hominem, & communem naturæ sensum repudiare? Tum verò neque illud meum factum laudabile, nec beneficium ullum a me in rempublicam profectum dicerem, si quidem ea reipublicæ causâ reliquissem, quibus æquo animo carerem; eamque animi duritiem, sicut corporis, quod quum uritur, non sentit, stuporem potius, quàm virtutem putarem.

XXXVII. Suscipere tantos animi dolores, atque ea, quæ, captâ urbe, accidunt victis, stante urbe unum perpeti, & jam se videre distrahi a complexu suorum, disturbari tecta, diripi fortunas, patriæ denique causâ patriam ipsam amittere, spoliari populi Romani beneficiis amplissimis, præcipitari ex altissimo dignitatis gradu, videre prætextatos inimicos, nondum morte comploratâ, arbitria petentes funeris; hæc omnia subire conservandorum civium causâ, atque ita, ut quum dolenter absis, non tam sapiens, quàm ii, qui nihil curant, sed tam amans tuorum, ac tui, quàm communis humanitas postulat; ea laus præclara, atque divina. Nam, qui ea, quæ numquam cara ac jucunda duxit, animo æquo reipublicæ causâ deserit,

nullam benevolentiam insignem in rempublicam declarat : qui autem ea relinquit , seipublicæ causâ , a quibus cum summo dolore divellitur , ei patria cara est ; cujus salutem caritati anteponit suorum.

99. Quare disrumpatur licet ista furia , atque audiat hæc ex me , quoniam lacesivit : bis servavi ; ut consul togatus armatos vicerim ; privatus consulibus armatis cesserim. Utriusque temporis fructum tuli maximum ; superioris , quod ex senatus auctoritate , & senatum , & omnes bonos , meæ salutis causâ , mutatâ veste vidi ; posterioris , quod & senatus , & populus Romanus , & omnes mortales , & privatim & publicè judicarunt , sine meo reditu rempublicam salvam esse non posse.

100. Sed hic meus reditus , Pontifices , vestro iudicio continetur : nam , si vos me in meis ædibus collocatis , id quod in omni mea causa semper studiis , consiliis , auctoritatibus , sententiisque fecistis ; video me planè , ac sentio restitutum : sin mea domus non modò mihi non redditur , sed etiam monumentum præbet inimico , doloris mei , sceleris sui , publicæ calamitatis ; quis erit , qui hunc reditum potius , quàm poenam sempiternam putet ? In conspectu præterea totius urbis domus est mea , Pontifices ; in qua si manet illud non monumentum urbis , sed sepulcrum

inimico nomine inscriptum ; demigrandum potius aliquid est , quàm habitandum in ea urbe , in qua tropæa & de me , & de republica videam constituta.

XXXVIII. An ego tantam aut animi duritiem habere , aut oculorum impudentiam possim , ut , cujus urbis servatorem me esse senatus omnium assensu toties judicavit , in ea possim intueri domum meam everfam non ab inimico meo , sed ab hoste communi , & ab eodem exstructam , & positam in oculis civitatis , ne umquam conquiescere possit fletus bonorum ? Spuri Melii , regnum appetentis , domus est complanata : ecquid aliud ? æquum accidisse Melio populus Romanus judicavit ; nomine ipso Æquimelii , Melii poena comprobata est. Sp. Cassii domus ob eandem causam everfa ; atque in eodem loco ædes posita. Telluris. In. Vacci pratis domus fuit M. Vacci , quæ publicata est , & everfa , ut illius facinus memoriâ & nomine loci notaretur. M. Manlius , quum ab adscensu Capitolii Gallorum impetum repulisset , non fuit contentus beneficii sui gloriâ ; regnum appetisse est judicatus : ergo ejus domum everfam , duobus lucis convestitam videtis. Quam igitur majores nostri sceleratis ac nefariis civibus maximam poenam constitui posse arbitrati sunt , eamdem ego subibo , ac sustinebo , ut apud

posteris nostris non extinctor conjurationis & sceleris, sed auctor & dux fuisse videar?

102. Hanc verò, Pontifices, labem turpitudinis & inconstantiae poterit populi Romani dignitas sustinere; vivo senatu, vobis principibus publici consilii, ut domus M. Tullii Ciceronis cum domo Fulvii Flacci; ad memoriam poenae publicè constitutae, conjuncta esse videatur. M. Flaccus, quia cum Graccho contra salutem reipublicae fecerat, & senatus sententiam est interfectus, & ejus domus everfa, & publicata est; in qua porticum post aliquantò Q. Catulus de manubiis Cimbricis fecit. Ista autem fax ac furia patriae, quum urbem, Pisone & Gabinio ducibus, cepisset, occupasset, teneret; uno eodemque tempore & clarissimi viri mortui monumenta debebat, & meam domum cum M. Flacci domo conjungebat; ut, quā poenā senatus affecerat everforem civitatis, eadem iste, oppresso senatu, afficeret eum, quem patres conscripti custodem patriae judicassent.

XXXIX. Hanc verò in Palatio, atque in pulcherrimo urbis loco porticum esse patiemini, furoris tribunitii, sceleris consularis, crudelitatis conjuratorum, calamitatis reipublicae, doloris mei defixum iudicium ad memoriam omnium gentium

sempiternam? quam porticum pro amore, quem habetis in rempublicam, & semper habuistis, non modò sententiis, sed, si opus esset, manibus vestris disturbare cuperetis; nisi quem fortè illius castissimi sacerdotis superstitiosa dedicatio deterret.

104. O rem, quam homines soluti ridere non desinant; tristiores autem sine maximo dolore audire non possint! Publiusne Clodius, qui ex pontificis maximi domo religionem eripuit, is in meam intulit? hunc cin' vos, qui estis antistites caeremoniarum & sacrorum, auctorem habetis, & magistrum publicæ religionis? O dii immortales! (vos enim hæc audire cupio). P. Clodius vestra sacra curat? vestrum numen horret? res omnes humanas religione vestrâ contineri putat? hic non illudit auctoritati horum omnium, qui adsunt, summorum virorum? non vestrâ, Pontifices, gravitate abutitur? ex isto ore religionis verbum excidere, aut elabi potest? quum tu eodem ore, accusando senatum, quòd severè de religione decerneret, impurissimè teterrimèque violasti.

XL. Adspicite, adspicite, Pontifices, hominem religiosum, &, si vobis videtur (quod est bonorum pontificum) monete eum, modum quemdam esse religionis: nimium esse superstitiosum non oportere. Quid tibi necesse fuit anili superstitione,

homo fanaticæ, sacrificium, quod alienæ domi fieret, invisere? quæ autem te tanta mentis imbecillitas tenuit, ut non putares, deos satis posse placari, nisi etiam muliebribus religionibus te implicuisses? quemumquam audisti majorum tuorum, qui & sacra privata coluerunt, & publicis sacerdotiis præfuerunt, quum sacrificium Bonæ deæ fieret, interfuisse? neminem, ne illum quidem, qui cæcus est factus. Ex quo intelligitur, multa in vita falsò homines opinari; quum ille, qui nihil viderat sciens quod nefas esset, lumina amisit; istius, qui non solum adspectu, sed etiam incesto flagitio, & stupro polluit cæremónias, pœna omnis oculorum ad cæcitatem mentis est conversa. Hoc auctore tam casto, tam religioso, tam sancto, tam pio, potestis, Pontifices, non commoveri, quum suis dicat se manibus domum civis optimi evertisse, & eam iisdem manibus consecrassè?

106. Quæ tua fuit consecratio? Tuleram, inquit, ut mihi liceret. Quid? non exceperas, ut, si quod jus non esset rogare, ne esset rogatum? Jus igitur statuetis esse, uniuscujusque vestram sedes, aras, focos, deos Penates, subjectos esse libidini tribunitiæ? in quem quisque per homines concitato irruerit, quem impetu perculerit, hujus domum non solum affli-

PRO DOMO SUA. III

gere, quod est præsentis infantiæ, quasi tempestatis repentinæ, sed etiam in posterum tempus religione sempiternâ obligare?

XLI. Equidem sic accepi, Pontifices, in religionibus suscipiendis, caput esse, interpretari, quæ voluntas deorum immortalium esse videatur; nec est ulla erga deos pietas, nisi honesta de numine eorum ac mente opinio, quum expeti nihil ab iis, quod sit injustum atque inhonestum, arbitrere. Hominem invenire ista labes tum, quum omnia tenebat, neminem potuit, cui meas ædes addiceret, cui traderet, cui donaret: ipse quum loci illius, quum ædium cupiditate flagraret, ob eamque causam unam, unâ justâ illâ rogatione suâ vir bonus dominum se in meis bonis esse voluisset; tamen illo ipso in furore suo non est ausus meam domum, cujus cupiditate inflammatus erat, possidere: deos immortales existimatis, cujus labore & consilio sua ipsi templa tenuerunt, in ejus domum afflictam & eversam per unius hominis sceleratissimi nefarium latrocinium immigrare voluisse?

108. Civis est nemo in tanto populo, extra contaminatam illam & cruentam Publii Clodii manum, qui rem ullam de meis bonis attigerit, qui non pro suis opibus in illa tempestate defenderit: at, qui aliquâ

se contagione prædæ, societatis, emptio-
nis, contaminaverunt, nullius neque pri-
vati, neque publici judicii poenam effu-
gere potuerunt. Ex his igitur bonis, quo-
rum nemo rem ullam attigit, qui non om-
nium judicio sceleratissimus haberetur, dii
immortales domum meam concupiverunt?
Ista tua pulchra Libertas deos Penates &
familiares, meos Lares expulit, ut a te
ipsa, tamquam in captivis sedibus collo-
cetur?

109. Quid est sanctius, quid omni re-
ligione munitius, quàm domus uniuscujus-
que civium? hinc aræ sunt, hinc foci, hinc
dii Penates, hinc sacra, religiones, cære-
moniæ, continentur: hoc perfugium est
ita sanctum omnibus, ut inde abripi ne-
minem fas sit.

XLII. Quò magis est furor istius ab au-
ribus vestris repellendus, qui, quæ majores
nostri religionibus tuta nobis & sancta
esse voluerunt, ea iste non solum contra
religionem labefactavit, sed etiam ipsius
religionis nomine evertit. At quæ dea est?
Bonam esse oportet, quandoquidem est
abs te dedicata. Libertas, inquit, est. Eam
tu igitur domi meæ collocasti, quam ex
urbe totâ sustulisti?

110. Tu, quum collegas tuos, summâ
potestate præditos, negares liberos esse:
quum in templum Castoris aditus esset

apertus nemini : quum hunc clarissimum virum , summo genere natum , summis populi beneficiis usum , pontificem , & consularem , & singulari bonitate & modestiâ præditum , quem satis mirari quibus oculis adspicere audeas non queo , audiente populo Romano a pedisequis conculcari juberes : quum indemnatum exturbares , privilegiis tyrannicis irrogatis : quum principem orbis terræ virum , inclusum domi contineres : quum forum armatis catervis perditorum hominum possideres : Libertatis simulacrum in ea domo collocabas , quæ domus erat ipsa indicio tui crudelissimi dominatûs , & miserrimæ populi Romani servitutis ? Eumne potissimum Libertas domo suâ debuit pelli , qui nisi fuisset , in servorum potestatem civitas tota venisset ?

. XLIII. At unde inventa est ista Libertas ? quæsi vi enim diligenter. Tanagræa quædam meretrix fuisse dicitur : ejus non longè a Tanagris simulacrum e marmore in sepulcro positum fuit. Hoc quidam homo nobilis , non alienus ab hoc religioso Libertatis sacerdote , ad ornatum ædilitatis suæ deportavit : etenim cogitarat omnes superiores muneris splendore superare. Itaque omnia signa , tabulas , ornamentorum quod superfuit in fanis & communibus locis , tota e Græcia , atque insulis om-

nibus, honoris populi Romani causâ, sanè frugaliter domum suam deportavit.

112. Is posteaquam intellexit, posse se, interversâ ædilitate, a L. Pisone consule prætorem renunciari, si modò eâdem primâ litterâ competitorem habuisset aliquem; ædilitatem duobus in locis, partim in arca, partim in hortis suis collocavit: signum de busto meretricis ablatum isti dedit, quod esset signum magis istorum, quàm publicæ libertatis. Hanc deam quisquam violare audeat, imaginem meretricis, ornamentum sepulcri, a fure sublatam, a faerilego collocatam? hæc me domo meâ pellet? hæc ultrix afflictæ civitatis, reipublicæ spoliis ornabitur? hæc erit in eo monumento, quod positum est, ut esset indicium oppressi senatûs ad memoriam sempiternam turpitudinis?

113. O Q. Catule (patremne appellem, an filium? recentior memoria filii est, & cum rebus meis gestis conjunctior) tantumne te fefellit, quum mihi summa, & quotidie majora præmia in republica fore putabas? negabas fas esse, duo consules esse in hac civitate inimicos reipublicæ. Duo sunt inventi, qui senatum tribuno furenti constrictum traderent: qui pro me patres conscriptos deprecari, & populo supplices esse, edictis atque imperio vetarent: quibus inspectantibus domus

mea disturbaretur, diriperetur: qui denique ambustas fortunarum mearum reliquias, suas in domos comportari juberent.

114. Venio nunc ad patrem. Tu, Q. Catule, M. Fulvii domum, quum is fratris tui focer fuisset, monumentum tuarum manubiarum esse voluisti, ut ejus, qui perniciofa reipublicæ consilia cepisset, omnis memoria funditus ex oculis hominum ac mentibus tolleretur. Hoc si quis tibi ædificanti illam porticum diceret, fore tempus, quum is tribunus plebis, qui auctoritatem senatûs, judicium bonorum omnium neglexisset, tuum monumentum, consulibus non modò inspectantibus, verùm adjuvantibus disturbaret, everteret, idque cum ejus civis, qui rempublicam ex senatûs auctoritate consul defendisset, domo conjungeret; nonne responderes, id, nisi eversâ civitate, accidere non posse.

XLIV. At videte hominis intolerabilem audaciam cum projecta quadam & effrenata cupiditate. Monumentum iste umquam, aut religionem ullam excogitavit? habitare laxè & magnificè voluit; duasque & magnas, & nobiles domos conjungere: eodem puncto temporis, quo meus discessus isti causam cadis eripuit, a Q. Sejo contendit, ut sibi domum venderet: quum ille id negaret, primò se luminibus ejus esse obstructurum minabatur. Affirmabat

Postumius, se vivo, illam domum istius numquam futuram. Acutus adolescens ex ipsius sermone intellexit, quid fieri oporteret; hominem veneno apertissimè sustulit: emit domum, licitatoribus defatigatis, propè dimidio carius, quàm aestimabat.

116. Quorsum igitur hæc oratio pertinet? Domus mea illa propè tota vacua est: vix pars ædium mearum decima ad Catuli porticum accessit: causa fuit ambulatio, & monumentum, & ista Tanagræa, oppressa libertate, Libertas: in Palatio, pulcherrimo prospectu, porticum cum conclavibus pavimentatam trecentum pedum concupierat, amplissimum peristylum; cetera ejusmodi, facile ut omnium domos & laxitate, & dignitate superaret. Et homo religiosus, quum ædes meas idem emeret, & venderet; tamen illis tantis tenebris non est ausus suum nomen emptioni illi adscribere: posuit scilicet Scatonem illum, hominem suâ virtute egentem, ut is, qui in Marsis, ubi natus est, tectum, quo imbris vitandi causâ succederet, nullum haberet, ædes in Palatio nobilissimas emis-
se se diceret. Inferiorem ædium partem assignavit non suæ genti Fonteïæ, sed Clodiæ, quam reliquit: quem in numerum ex multis Clodiis nemo nomen dedit, nisi aut egestate, aut scelere perditus.

XLV. Hanc vos, Pontifices, tam va-

riam, tam novam in omni genere voluntatem, impudentiam, audaciam, cupiditatem, comprobabitis? Pontifex, inquit, affuit. Non te pudet, quum apud pontifices res agatur, pontificem dicere, non collegium pontificum affuisse; præsertim quum tribunus plebis, vel denuntiare potueris, vel etiam cogere? Esto: collegium non adhibuisti: quid? de collegio quis tandem affuit? posuerat enim auctoritatem in uno, quæ est in his omnibus; sed tamen auget & ætas, & honos dignitatem: opus erat etiam scientiâ; quam etsi omnes consecuti sunt, tamen certè peritiores vetustas facit.

118. Quis ergo affuit? Frater, inquit, uxoris meæ. Si auctoritatem quærimus, etsi id est ætatis, ut nondum consecutus sit; tamen quanta est in adolescente auctoritas, ea, propter tantam conjunctionem affinitatis, minor est putanda: sin autem scientia est quæsitâ; quis erat minùs peritus, quàm is, qui paucis illis diebus in collegium venerat? qui etiam tibi erat magis obstrictus beneficio recenti, quum se, fratrem uxoris tuæ, fratri tuo germano antelatum videbat. Etsi in eo providisti, ne frater te accusare posset. Hanc tu igitur dedicationem appellas, ad quam non collegium, non honoribus populi Romani ornatum pontificem, non denique adolescentem quemquam, quum haberes

in collegio familiarissimos, adhibere potuisti? Affuit is, si modò affuit, quem tu impulisti; soror rogavit, mater coëgit.

119. Videte igitur, Pontifices, quid statuatis in mea causa de omnium fortunis. Ergone, Pontifices, putatis, si is postem tenuerit, & aliquid dixerit, domum uniuscujusque consecrari posse? An istæ dedicationes, & templorum, & delubrorum religiones, ad honorem deorum immortalium, sine ulla civium calamitate a majoribus nostris constitutæ sunt? Est inventus tribunus plebis, qui consularibus copiis instructus, omni impetu furoris in eum civem irruerit, quem percussum ipsa respublica suis manibus extolleret.

XLVI. Quid, si quis similis istius (neque enim jam deerunt, qui imitari velint) aliquem mei dissimilem, cui respublica non tantum debeat, per vim affligerit, domum ejus per pontificem dedicarit; id vos istâ auctoritate constituetis ratum esse oportere? Dicetis, quem reperiet pontificem? Quid? & tribunus plebis idem esse non potest pontifex? M. Drusus, ille clarissimus tribunus plebis, pontifex fuit: ergo, si is Q. Cæpionis, inimici sui, postem ædium tenuisset, & pauca verba fecisset, ædes Cæpionis essent dedicatæ?

121. Nihil loquor de pontificio jure, nihil de ipsius verbis dedicationis, nihil

de religione, cæremoniis: non dissimulo me nescire ea, quæ etiam si scirem, dissimularem, ne aliis molestus, vobis etiam curiosus viderer: etsi effluunt multa ex vestra disciplina, quæ etiam ad nostras aures sæpe permanant. Postemteneri in dedicatione oportere videor audisse templi: ibi enim postis est, ubi templi aditus est, & valvæ. Ambulationis postes nemo umquam tenuit in dedicando. Simulacrum autem, aut aram si dedicasti, sine religione loco moveri potest. Sed jam hoc dicere tibi non licebit, quoniam pontificem postem tenuisse dixisti.

XLVII. Quamquam quid ego de dedicatione loquar? aut quid de vestro jure & religione, contra quam proposueram, disputabo? Ego verò, si omnia solennibus verbis, veteribus & priscis institutis acta esse dicerem; tamen me reipublicæ jure defenderem. An, quum tu ejus civis discessu, cujus unius operâ senatus atque omnes boni civitatem esse incolumem toties judicassent, oppressam teterrimo latrocinio cum duobus sceleratissimis consulibus reipublicam teneres; domum ejus, qui patriam a se servatam perire suo nomine noluisse, per pontificem aliquem dedicasses; posset recreata respublica sustinere?

123. Date huic religioni aditum, Pontifices; jam nullum fortunis communibus

exitum reperietis. An, si postem tenuerit pontifex, & verba ad religionem deorum immortalium composita, ad perniciem civium transfulerit, valebit ad injuriam nomen sanctissimum religionis; si tribunus plebis verbis non minus priscis, & pene solennibus bona civis cujuspian consecravit, non valebit? Atqui C. Atinius, patrum memoriâ, bona Q. Metelli, qui eum ex senatu censor ejecerat, avi tui, Q. Metelle, & tui, P. Servili, & proavi tui, P. Scipio, consecravit, foculo posito in Rostris, adhibitoque tibicine. Quid tum? num ille furor tribuni plebis, ductus ex nonnullis veterum temporum exemplis, fraudi Metello fuit, summo illi & clarissimo viro? Certè non fuit.

124. Vidimus, hoc idem Cn. Lentulo censori tribunum plebis facere. Numquid igitur is bona Lentuli religioni obligavit? Sed quid ego ceteros? Tu, tu, inquam, capite velato, concione advocatâ, foculo posito, bona tui Gabinii, cui regna omnia Syrorum, Arabum, Persarumque donaras, consecrasti. Quod si tum nihil est actum; quid in meis bonis agi potuit? si est ratum, cur ille gurgis, helluatus tecum simul reipublicæ sanguinem, ad cælum tamen exstruxit villam in Tusculano visceribus ærarii; mihi meas ruinas, quarum
ego

ego similem totam urbem esse passus non sum, adspicere non licuit?

XLVIII. Omitto Gabinium: quid exemplo tuo bona tua nonne L. Mummius, vir omnium fortissimus, atque optimus, consecravit? quod si, quia ad te pertinet, ratum esse negas oportere; ea jura constituisti, in præclaro tribunatu tuo, quibus in te conversis, recusares, alios everteres? sin ista consecratio legitima est, quid est, quod profanum in tuis bonis esse possit? An consecratio nullum habet jus, dedicatio est religiosa? Quid ergo illa tuztum obtestatio tibicinis? quid focus? quid preces? quid prisca verba voluerunt? ementiri, fallere, abuti deorum immortalium numine ad hominum timorem voluisti? Nam si est illud ratum; mitto Gabinium; tua domus certè, & quidquid habes aliud, est Cereri consecratum: sin ille tibi ludus fuit; quid te impurius, qui religiones omnes pollueris, aut ementiendo, aut stuprando?

126. Jam fateor, inquit, in Gabinio me nefarium fuisse. Quippe vides, pœnam illam a te in aliam institutam, in te ipsum esse conversam. Sed, homo omnium scelerum, flagitiorumque documentum, quod in Gabinio fateris, cujus impudicitiam pueritiæ, libidines adolescentiæ, dedecus & egestatem reliquæ vitæ, latrocinium con-

fulatûs vidimus ; cui ne ista quidem ipsa calamitas injuriâ potuit accidere : id in me infirmas ? & gravius esse dicis , quod uno adolescente , quàm quod concione totâ teste , fecisti ? Dedicatio magnam , inquit , habet religionem.

XLIX. Nonne vobis Numa Pompilius videtur loqui ? discite orationem , Pontifices , & vos , Flamines : etiam tu , rex , discce a gentili tuo ; quamquam ille gentem istam reliquit : sed tamen discce ab homine religionibus dedito , justo , tum omnium religionum perito. Quid ? in dedicatione nonne & quis dicit , & quid , & quomodo , quæritur ? An tu hæc ita confundis , & perturbas , ut , quicumque velit , quod velit , quomodo velit , possit dedicare ? quis eras tu , qui dedicabas ? quo jure ? quâ lege ? quo exemplo ? quâ potestate ? ubi te isti rei populus Romanus præfecerat ? video enim esse legem veterem tribunitiam , quæ vetet , injussu plebis ædes , terram , aram consecrare : neque tum hoc ille Q. Papirius , qui hanc legem rogavit , sensit , neque suspicatus est , fore periculum , ne domicilia , aut possessiones indemnatorum civium consecrarentur : neque enim id fieri fas erat , neque quisquam fecerat , neque erat causa , cur prohibendo non tam detertere videretur , quàm admonere.

128. Sed quia consecrabantur ædes, non privatorum domicilia, sed quæ sacræ nominantur: consecrabantur agri, non ita ut nostra prædia, si quis vellet, sed ut imperator agros de hostibus captos consecraret: statuebantur aræ, quæ religionem afferrent, ipso si loco essent consecratæ: hæc, nisi plebs jussisset, fieri vetuit. Quæ si tu interpretaris de nostris ædibus atque agris scripta esse, non repugno: sed quæro, quæ lex lata sit, ut tu ædes meas consecrares: ubi tibi hæc potestas data sit: quo jure feceris. Neque ego nunc de religione, sed de bonis omnium nostrum, nec de pontificio, sed de jure publico disputo.

L. Lex Papiria vetat, ædes injussu plebis consecrari. Sit sanè hoc de nostris ædibus, ac non de publicis templis. Unum ostende verbum consecrationis in ipsa tua lege; si illa lex est, ac non vox sceleris & crudelitatis tuæ. Quòd si tibi tum in illo reipublicæ naufragio omnia in mentem venire potuissent, aut si tuus scriptor in illo incendio civitatis non syngraphas cum Byzantiis exsulibus, & cum legatis regis faceret, sed vacuo animo tibi ista non scita, sed portenta conscriberet: esses omnia, si minùs re, at verbis legitimis consecutus. Sed uno tempore cautiones fiebant pecuniarum; fœdera feriebantur pro-

vinciarum ; regum appellationes venales erant ; fervorum omnium viciatim celebrabatur totâ urbe descriptio ; inimici in gratiam reconciliabantur ; imperia adscribebantur novæ juventuti ; Q. Sejo venenum misero parabatur ; de Cn. Pompeio , propugnatore , & custode imperii interficiendo consilia inibantur ; senatus ne quid esset , ut lugerent boni semper , ut capta respublica consulum proditione , vi tribunitiâ teneretur : hæc quum tot , tantaque agerentur , non mirum est , præsertim in furore animi & cæcitate , multa illum & te fefellisse. At videte , quanta vis sit hujus Papiriæ legis in re tali ; non qualem tu affers , sceleris plenam & furoris. Q. Marius , censor , signum Concordiæ fecerat , idque in publico collocarat : hoc signum C. Cassius censor quum in curiam transfuisset , collegium vestrum consuluit , num quid esse causæ videretur , quin id signum , curiamque Concordiæ dedicaret.

LI. Quæso , Pontifices , & hominem cum homine , & tempus cum tempore , & rem cum re comparate. Ille erat summiâ modestiâ , & gravitate censor ; hic tribunus plebis , scelere , & audaciâ singulari : tempus illud erat tranquillum , & in libertate populi , & gubernatione positum senatûs ; tuum porro tempus , libertate populi Romani oppressâ , senatûs auctoritate

deletâ : res illa plena justitiæ , sapientiæ , dignitatis : censor enim , penes quem majores nostri (id quod tu sustulisti) judicium senatûs de dignitate esse voluerunt , Concordiæ signum volebat in curia , curiamque ei deæ dedicare.

131. Præclara voluntas , atque omni laude digna : præscribere enim se arbitrabatur , ut , sine studiis dissensionis , sententiæ dicerentur , si sedem ipsam ac templum publici consilii , religione Concordiæ devinxisset. Tu quum ferro , quum metu , quum edictis , quum privilegiis , quum præsentibus copiis perditorum , absentis exercitûs terrore & minis , consulum societate , & nefario fœdere , servitute oppressam civitatem teneres ; Libertatis signum posuisti magis ad ludibrium impudentiæ , quàm ad simulationem religionis. Ille in curia , quæ poterat , sine cujusquam incommodo , dedicabat ; tu in civis optimè de republica meriti cruore , ac pene ossibus , simulacrum non libertatis publicæ , sed licentiæ , collocasti. Atque ille tamen ad collegium retulit : tu ad quem retulisti ?

132. Si quid deliberares ; si quid tibi aut piandum , aut instituendum fuisset religione domesticâ ; tamen instituto ceterorum vetere , ad pontificem detulisses : novum delubrum quum in urbis clarissimo loco , nefando quodam atque inaudito in-

stituto, inchoares; referendum ad sacerdotes publicos non putasti? At, si collegium pontificum adhibendum non videbatur; nemone horum tibi idoneus visus est, qui ætate, honore, auctoritate antecellunt, ut cum eo dedicationem communicares? quorum quidem tu non contempsisti, sed pertinuisti dignitatem.

LII. An tu auderes quærere ex P. Servilio, aut ex M. Lucullo, quorum ego consilio atque auctoritate rempublicam consul ex vestris manibus ac faucibus eripui, quibusnam verbis, aut quo ritu, primum hoc dico, civis domum consecrares; deinde civis ejus, cui princeps senatus, cui etiam ordines omnes, deinde Italia tota, post cunctæ gentes, testimonium hujus urbis atque imperii conservati dedissent? Quid diceres, ô nefanda & perniciofa labe civitatis? Ades, ades, Luculle, Servili, dum dedico domum Ciceronis, ut mihi præeatis, postemque teneatis. Es tu quidem quum audaciâ, tum impudentiâ singulari; sed tibi tamen oculi, vultus, verba cecidissent, quum te viri, qui suâ dignitate personam populi Romani, atque auctoritatem imperii sustinerent, verbis gravissimis perterruissent; neque sibi fas esse dixissent, furori interesse tuo, atque in patriæ parricidio, & scelere.

134. Quæ quum videres, tum te ad:

tuum affinem non delectum a te, sed relictum a ceteris contulisti: quem ego tamen credo, si est ortus ab illis, quos memoriae proditum est ab ipso Hercule, perfuncto jam laboribus, sacra didicisse, in viri fortis ærumnis non ita crudelem fuisse, ut in vivi etiam spirantis caput bustum suis manibus imponeret: qui aut nihil dixit, aut, si fecit, omnino pœnam hanc maternæ temeritatis tulit, ut mutam in delicto personam, nomenque præberet: aut, si dixit aliquid verbis hæsitantibus, postemque tremebundâ manu tetigit; certè nihil ritè, nihil castè, nihil more institutoque perfecit. Viderat ille Murenam, vitricum suum, consulem designatum, ad me consulem cum Allobrogibus communis exitii indicia afferre: audierat ex illo, se a me bis salutem accepisse, separatim semel, iterum cum universis.

135. Quare quis est, qui existimare possit, huic novo pontifici, primam hanc post sacerdotium initum religionem instituenti, vocemque mittenti, non & linguam obmutuisse, & manum obtorpuisse, & mentem debilitatam metu concidisse: præsertim quum ex collegio tanto, non regem, non flaminem, non pontificem videret; fierique particeps alieni sceleris invitus cogeretur, & gravissimas pœnas affinitatis impurissimæ sustineret?

LIII. Sed, ut revertar ad jus publicum dedicandi, quod ipsi pontifices semper non solum ad suas caeremonias, sed etiam ad populi iussa accommodaverunt: habetis in commentariis vestris, C. Cassium censorem de signo Concordiæ dedicando ad pontificum collegium retulisse, eique M. Æmilium, pontificem maximum, pro collegio respondisse, nisi eum populus Romanus nominatim præfecisset, atque ejus jussu faceret; non videri ea rectè posse dedicari. Quid, quum Licinia virgo Vestalis, summo loco nata, sanctissimo sacerdotio prædita, T. Flaminio, Q. Metello consulibus, aram & ædiculam, & pulvinar sub saxo sacro dedicasset, non eam rem ex auctoritate senatûs ad hoc collegium Sextus Julius prætor retulit? quum P. Scævola, pontifex maximus, pro collegio respondit, quòd in loco publico Licinia, Caii filia; injussu populi dedicasset, sacrum non videri. Quam quidem rem quantâ severitate, quantâque diligentia senatus sustulerit, ex ipso senatusconsulto facillè cognoscetis. Recita. SENATUSCONSULTUM.

137. Videtisne, prætori urbano negotium datum, ut curaret, ne id sacrum esset? & ut, si quæ essent incisæ, aut inscriptæ litteræ, tollerentur? O tempora, ô mores! Tum censorem, hominem san-

Altissimum, simulacrum Concordiæ dedicare pontifices in templo inaugurato prohibuerunt: post autem senatus in loco augusto consecratam eam aram, tollendam ex auctoritate pontificum censuit, neque ullum est passus ex ea dedicatione litterarum exstare monumentum: tu, procella patriæ, turbo ac tempestas pacis atque otii, quod in naufragio reipublicæ tenebris offusis, demerso populo Romano, everso atque ejecto senatu, dirueris, ædificaris, religione omni violatâ, reipublicæ tamen nomine contaminaris; in civis hujusce ædibus, & in urbe, quam suis laboribus ac periculis conservasset, monumentum deletæ reipublicæ collocaris ad equitum notam, ad dolorem bonorum omnium, sublatoque Q. Catuli nomine incideris; id sperasti rempublicam diutius, quàm, quoad mecum simul expulsa careret his mœnibus, esse laturam? At, si, Pontifices, neque is, cui licuit, neque id, quod fas fuit, dedicavit; quid me attinet jam illud tertium, quod proposueram, docere, non his institutis, ac verbis, quibus cæremoniæ postulant, dedicasse?

LIV. Dixi a principio, nihil me de scientia vestra, nihil de sacris, nihil de abscondito jure pontificum, dicturum: quæ sunt adhuc a me de jure dedicandi

disputata , non sunt quæsitæ ex occulto aliquo genere litterarum , sed sumpta de medio , ex rebus palam per magistratus actis , ad collegiumque delatis , ex senatusconsulto , ex lege. Illa interiora , jam vestra sunt , quid dici , quid præcipere , quid tangi , quid teneri jus fuerit.

139. Quæ si omnia ex Coruncanii scientiâ , qui peritissimus pontifex fuisse dicitur , acta esse constarent ; aut si M. Horatius ille Pulvillus , qui , quum ejus dedicationem multi , propter invidiam , fictis religionibus impedirent , restitit , & constantissimâ mente Capitolium dedicavit , hujusmodi alicui dedicationi præfuisse ; tamen in scelere religio non valeret ; nedum valeat id , quod imperitus adolescens , novus sacerdos , sororis precibus , matris minis adductus , ignarus , invitus , sine collegis , sine libris , sine auctore , sine fictore , furtim , mente ac linguâ titubante fecisse dicatur : præsertim quum iste impurus atque impius hostis omnium religionum , qui contra fas inter viros sæpe mulier , & inter mulieres vir fuisset , ageret illam rem ita raptim , & turbulentè , ut neque mens , neque vox , neque lingua consisteret.

LV. Delatum tum est ad vos , Pontifices , & post omnium sermone celebratum ,

quemadmodum iste præposteris verbis ,
ominibus obscœnis , identidem se ipse re-
vocando , dubitans , timens , hæsitans ,
omnia aliter ac vos in monumentis habe-
tis , & pronuntiarit , & fecerit. Quod qui-
dem minimè mirum est , in tanto scelere ,
tantaque dementia , ne audaciæ quidem
locum ad timorem comprimendum fuisse.
Etenim , si nemo umquam prædo tam
barbarus atque immanis fuit , qui quum
fana spoliasset , deinde aram aliquam in
littore deserto , somniis stimulatus , aut re-
ligione aliquâ , consecraret , non horreret
animo , quum divinum numen scelere vio-
latum placare precibus cogeretur : quâ
tandem istum perturbatione mentis , om-
nium templorum , atque tectorum , totius-
que urbis prædonem fuisse censetis , quum
pro detestatione tot scelerum unam aram
nefariè consecraret ?

141. Non potuit ullo modo (quamquam
& insolentiâ dominatûs extulerat animos ,
& erat incredibili armatus audaciâ) non
in agendo ruere , ac sæpe peccare , præ-
fertim illo pontifice , & magistro , qui co-
geretur docere , antequam ipse didicisset.
Magna vis est quum in deorum immorta-
lium numine , tum verò in ipsa republica.
Dii immortales suorum templorum custo-
dem , ac præsidem sceleratissimè pulsum

quum viderent , ex suis templis in ejus ædes immigrare nolebant : itaque istius vecordissimi mentem curâ , metuque terrebant. Res verò publica , quamquam erat exterminata mecum , tamen obversabatur ante oculos extinctoris sui , & ab istius inflammato atque ignito furore jam tum me , seque repetebat. Quare quid est mirum , si iste metu , si furore instinctus , scelere præceps , neque institutas cæremonias persequi , neque verbum ullum solenne potuit effari ?

LVI. Quæ quum ita sint , Pontifices , revocate jam animos vestros ab hac subtili nostra disputatione ad universam rempublicam ; quam antea cum viris fortibus multis , in hac verò causa soli vestris cervicibus sustinetis. Vobis universi senatûs perpetua auctoritas , cui vosmetipsi præstantissimè semper in mea causa præfuiſtis ; vobis Italiæ magnificentissimus ille motus , municipiorumque concursus ; vobis campus , centuriarumque una vox omnium , quarum vos principes atque auctores fuistis ; vobis omnes societates , omnes ordines , omnes , qui aut re , aut spe denique sunt boni , omnes hi suum erga meam dignitatem studium , & judicium non modò commissum , verùm etiam commendatum esse arbitrantur.

143. Denique ipsi dii immortales, qui hanc urbem, atque hoc imperium tuentur, ut esset omnibus gentibus posteritatiq[ue] perspicuum, divino me numine esse reipublicæ redditum, idcirco mihi videntur fructum ipsum redditus, & gratulationis meæ ad suorum sacerdotum potestatem, judiciumque revocasse. Hic est enim redditus, Pontifices, hæc restitutio in domo, in sedibus, in aris, in focis, in diis penatibus recuperandis: quorum si iste suis scelerrimis manibus testa, sedesque convellit; ducibusque consulibus, tamquam urbe captâ, hanc unam domum, quasi acerimi propugnatoris, sibi delendam putavit; tamen illi dii penates, ac familiares mei, per vos in meam domum mecum erunt restituti.

LVII. Quocirca te, Capitoline, quem propter beneficia populus Romanus Optimum, propter vim Maximum nominavit, teque, Juno regina, & te, custos urbis, Minerva, quæ semper adiutrix consiliorum meorum, testis laborum exististi, precor ac quæso; vosque, qui maximè me repetistis, atque revocastis, quorum de sedibus hæc mihi proposita est contentio, Patrii penates, familiaresque, qui huic urbi & reipublicæ præsidetis, vos obtestor, quorum ego a templis ac delubris pesti-

feram illam & nefariam flammam depuli; teque, *Vesta mater*, cujus castissimas sacerdotes ab hominum amentia, furore, & scelere defendi, cujusque ignem illum sempiternum non sum passus aut sanguine civium restingui, aut cum totius urbis incendio commisceri:

145. Ut, si in illo pene fato reipublicæ objeci meum caput pro vestris cæremoniis, atque templis, perditissimorum civium furori, atque ferro: &, si iterum, quum ex mea contentione interitus bonorum omnium quæreretur, vos sum testatus, vobis me ac meos commendavi, meque ac meum caput eâ conditione devovi, ut, si & eo ipso tempore, & antè in consulatu meo, commodis meis omnibus, emolumentis, præmiis prætermissis, curâ, cogitatione, vigiliis omnibus, nihil, nisi de salute meorum civium laborassem; tum mihi republicâ aliquando restitutâ liceret frui: sin autem mea consilia patriæ non profuissent; ut perpetuum dolorem, avulsus a meis, sustinerem: hanc ego devotionem capitis mei, quum ero in sedes meas restitutus, tum denique convictam esse, & commissam putabo. Nam nunc quidem, Pontifices, non solum domo, de qua cognoscitis, sed totâ urbe careo, in quam videor esse restitutus. Urbis enim

celeberrimæ & maximæ partes adversum illud non monumentum, sed vulnus patriæ contuentur: quem quum mihi conspectum morte magis vitandum, fugiendumque esse videatis, nolite, quæso, eum, cujus re-ditu restitutam rempublicam fore putastis, non solùm dignitatis ornamentis, sed etiam urbis partibus velle esse privatum.

LVIII. Non me bonorum direptio, non tectorum excisio, non depopulatio prædiorum, non præda consulum ex meis fortunis crudelissimè capta permovet: ca-duca semper, & mobilia hæc esse duxi; non virtutis atque ingenii, sed fortunæ & temporum munera: quorum ego non tam facultatem umquam, & copiam expeten-dam putavi, quàm & in utendo rationem, & in carendo patientiam. Etenim ad nos-trum usum propemodum jam est definita moderatio rei familiaris; liberis autem nostris satis amplum patrimonium paterni nominis, ac nostræ memoriæ, relinque-mus: domo per scelus ereptâ, per latro-cinium occupatâ, per religionis vim sce-leratiùs etiam ædificatâ, quàm eversâ, carere sine maxima ignominia reipublicæ, meo dedecore, ac dolore non possum. Quapropter si diis immortalibus, si sena-tui, si populo Romano, si cunctæ Italiæ, si provinciis, si exteris nationibus, si vo-

136 ORATIO PRO DOMO SUA.

bismetipsis, qui in mea salute principem
semper locum auctoritatemque tenuistis,
gratum & jucundum meum reditum intel-
ligitis esse, quæso, obtestorque vos, Pon-
tifices, ut me, quem auctoritate, studio,
sententiis restitulistis, nunc, quoniam sena-
tus ita vult, manibus quoque vestris in se-
dibus meis collocetis.





D E

ARUSPICUM RESPONSIS.

ORATIO TRIGESIMA.

Auditus erat in agro Latiniensi strepitus quidam subterraneus, & horribilis armorum fremitus. Igitur senatus, ut solebat in ejusmodi prodigiis & ostentis, censuit consulendos aruspices. Hi responderunt deos iratos esse, quum ob alia, tum quòd loca sacra & religiosa, profana haberentur. Hanc occasionem arripiens Clodius ædilis, dixerat in concione designari domum Ciceronis, quæ sacra & religiosa, quippe a se Libertati consecrata, profana habebatur. Itaque Cicero, suæ domus defendendæ invidiæque liberandæ causâ, hanc in senatu orationem habuit,

in qua primùm docet domum suam ab omni religione vacuum & puram esse : deinde singula aruspicum responsa contra Clodium interpretatur, totamque ejus vitam criminando percurrit. Denique senatum ad concordiam, & ad religiones diligenter procurandas hortatur. Anno urbis 697. Ciceronis 51.

II
I. **Q**UO ESTERNO die, Patres conscripti, quum me & vestra dignitas, & frequentia equitum Romanorum, quibus senatus dabatur, magnopere commovisset, putavi mihi reprimendam esse P. Clodii impudentiam, quum is publicanorum causam stultissimis interrogationibus impediret, & P. Tullioni Syro navaret operam, atque ei sese, cui totus venierat, etiam vobis inspectantibus, venditaret. Itaque hominem furem, exsultantemque continui, simulac periculum judicii intendi: duobus inceptis verbis omnem impetum gladiatoris, ferociamque compressi.

2. Attamen ignarus ille qui consules essent, exsanguis, atque æstuans, se ex curia repentè proripuit, cum quibusdam fractis jam atque inanibus minis, & cum illius Pisoniani temporis, Gabinianique ter-

roribus. Quem quum egredientem insequi cœpisssem , cepi equidem fructum maximum , & ex confurrectione omnium vestrum , & ex comitatu publicanorum : sed vecors repentè sine suo vultu , sine colore , sine voce constitit : deinde respexit , & simulac. Cn. Lentulum consulem adspexit , concidit in curiæ pene limine , recordatione , credo , Gabinii sui , desiderioque Pisonis : cujus ego de effrenato & præcipiti furore quid dicam ? haud potest gravioribus a me verbis vulnerari , quàm est statim , in facto ipso , a gravissimo viro , P. Servilio , confectus , ac trucidatus : cujus si etiam vim , & gravitatem illam singularem , ac pene divinam assequi possem , tamen non dubito , quin ea tela , quæ conjecerit inimicus , quàm ea , quæ collega patris emisit , leviora , atque hebetiora esse videantur.

II. Sed tamen mei facti rationem exponere illis volo , qui hesterno die dolore me elatum , & iracundiâ longiùs propè digressum arbitrabantur , quàm sapientis hominis cogitata ratio postularet. Nihil feci iratus , nihil impotenti animo , nihil non diu consideratum , ac multò antè meditatum. Ego enim , Patres conscripti , inimicum me semper esse professus sum duobus , qui me , qui rempublicam quum defendere deberent , servare possent ; quum-

que ad consulare officium ipsis insignibus illius imperii, ad meam salutem non solum auctoritate, sed etiam precibus vestris vocarentur; primò reliquerunt, deinde prodiderunt, postremò oppugnaverunt, præmiisque nefariæ pactionis funditus unà cum republica oppressum, extinctumque voluerunt: quique suo ductu, & imperio cruento illo, atque funesto, supplicia neque a sociorum mœnibus prohibere, neque hostium urbibus inferre potuerunt: excisionem, inflammationem, eversionem, depopulationem, vastitatem eam, sua cum præda, meis omnibus tectis atque agris intulerunt. Cum his furiis, & facibus, cum his, inquam, exitiosis prodigiis, ac pene hujus imperii pestibus bellum mihi inexpiabile dico esse susceptum; neque id tamen ipsum tantum, quantum meus, ac meorum, sed tantum, quantum vester, atque omnium bonorum dolor postulavit.

III. In Clodium verò non est hodiè meum majus odium, quàm illo die fuit, quum illum, ambustum religiosissimis ignibus, cognovi muliebri ornatu, ex incesto stupro, atque ex domo pontificis maximi emissum: tum, inquam, tum vidi, ac multò antè prospexi, quanta tempestas excitaretur, quanta impenderet procella rei publicæ. Videbam, illud scelus tam im-

portunum, audaciam tam immanem adolescentis furentis, nobilis, vulnerati, non posse arceri otii finibus: erupturum illud malum aliquando, si impunitum fuisset, ad perniciem civitatis.

5. Non multum mihi sanè post ad odium accessit: nihil enim contra me fecit odio mei, sed odio severitatis, odio dignitatis, odio reipublicæ: non me magis violavit, quàm senatum, quàm equites Romanos, quàm omnes bonos, quàm Italiam cunctam: non denique in me sceleratior fuit, quàm in ipsos deos immortales. Etenim illos eo scelere violavit, quo nemo antea: in me fuit eodem animo, quo etiam ejus familiaris Catilina, si vicisset, fuisset. Itaque eum numquam a me esse accusandum putavi, non plus, quàm stipitem illum, qui quorum hominum esset, nesciremus, nisi se Ligurem ipse esse diceret. Quid enim hunc persequar, pecudem ac beluam, pabulo inimicorum meorum & glande corruptum? qui si sensit, quo sese scelere devinxerit; non dubito, quin sit miserrimus: sin autem id non videt; periculum est, ne se stuporis excusatione defendat. Accedit etiam, quòd, expectatione omnium, fortissimo & clarissimo viro, T. Annio, devota, & constituta ista hostia esse videtur; cui me præripere desponsam jam, & destinatam laudem,

quum ipse ejus operâ & dignitatem , & salutem recuperarim , valde est iniquum.

I V. Etenim , ut P. ille Scipio natus mihi videtur ad interitum exitiumque Carthaginiis , qui illam a multis imperatoribus obfessam , oppugnatam , labefactatam , pene captam aliquando , quasi fatali eventu , solus evertit : sic T. Annius ad illam pestem comprimendam , exstinguendam , funditus delendam natus esse videtur , & quasi divino munere donatus reipublicæ. Solus ille cognovit , quemadmodum armatum civem , qui lapidibus , qui ferro alios fugaret , alios domi contineret , qui urbem totam , qui curiam , qui forum , qui templa omnia cæde incendiisque terreret , non modò vincere , verùm etiam vincere deberet.

7. Huic ego & tali , & ita de me , ac de patria merito viro , numquam meâ voluntate præripiam eum præsertim reum , cujus ille inimicitias non solùm suscepit propter salutem meam , verùm etiam appetivit. Sed si etiam nunc illaqueatus jam omnium legum periculis , irretitus odio bonorum omnium , exspectatione supplicii jam non diuturnâ implicatus , feretur tamen hæsitans , & in me impetum impeditus facere conabitur ; resistam , & aut concedente , aut etiam adjuvante Milone , ejus conatum refutabo : velut hesterno die ,

quum mihi tacenti stans minaretur, voce tantum attigi legum initium, & judicii: confedit ille: conticuit. Diem dixisset, ut fecerat: fecissem, ut ei statim tertius a prætore dies diceretur. Atque hoc sic moderetur, & cogitet, si contentus sit iis sceleribus, quæ commisit, jam se esse consecratum Miloni: si quod in me telum intenderit, statim me esse arrepturum arma judiciorum, atque legum. Atqui paulò antè, Patres conscripti, concionem habuit, quæ est ad me tota delata; cujus concionis primum universum argumentum, sententiamque audite: quum riseritis impudentiam hominis, tum a me de tota concione audietis.

V. De religionibus sacris, & cæremoniis est concionatus, Patres conscripti, Clodius: P. inquam, Clodius sacra & religiones negligi, violari, pollui, questus est. Non mirum, si hoc vobis ridiculum videtur: etiam sua concio risit hominem, quomodo ipse gloriari solet, ducentis confixum senatusconsultis, quæ sunt omnia contra illum pro religionibus facta, hominemque eum, qui pulvinaribus Bonæ Deæ stuprum intulerit, eaque sacra, quæ viri oculis, ne imprudentis quidem, adspici fas est, non solum adspectu virili, sed flagitio, stuproque violarit, in concione de religionibus neglectis conqueri.

9. Itaque nunc proxima concio ejus expectatur de pudicitia. Quid enim interest, utrùm ab altaribus religiosissimis fugatus, de sacris & religionibus conqueratur, an ex fororum cubiculo egressus, pudorem pudicitiamque defendat? Responsum aruspicum hoc recens de fremitu, in concione recitavit; in quo cum aliis multis scriptum etiam illud est (*id quod audistis*) *loca sacra, & religiosa, profana haberi*. In ea causa esse dixit domum meam, a religiosissimo sacerdote, P. Clodio, consecratam.

10. Gaudeo mihi de toto hoc ostento, quod haud scio, an gravissimum multis his annis huic ordini nuntiatum sit, datam non modò justam, sed etiam necessariam causam esse dicendi. Reperietis enim ex hoc toto prodigio, atque responso, nos de istius scelere ac furore, ac de impendentibus periculis maximis, propè jam voce Jovis optimi maximi præmoneri. Sed primùm expiabo religionem ædium meorum, si id facere verè, ac sine cujusquam dubitatione potero: sin scrupulus tenuissimus residere aliquis videbitur; non modò patienti, sed etiam libenti animo portentis deorum immortalium, religionique parebo.

VI. Sed quæ tandem est in hac urbe tanta domus, ab ista religionis suspitione
tam

tam vacua, atque pura? Quamquam vestrae domus, Patres conscripti, ceterorumque civium, multò maxima ex parte sunt liberae religione; tamen una mea domus judiciis omnibus liberata, in hac urbe sola est. Te enim appello, Lentule, & te, Philippe: ex hoc aruspicum responso decrevit senatus, ut de locis sacris religiosis ad hunc ordinem referretis: potestisne referre de mea domo? quæ (ut dixi) sola, in hac urbe, omni religione, omnibus judiciis, liberata est: quam primùm inimicus ipse in illa tempestate ac nocte reipublicæ, quum cetera scelera stilo illo impuro Sex. Clodii ore tincto conscripsisset, ne unâ quidem attigit litterâ religionis: deinde eandem domum populus Romanus, cujus est summa potestas omnium rerum, comitiis centuriatis, omnium ætatum ordinumque suffragiis, eodem jure esse jussit, quo fuisset.

12. Postea vos, Patres conscripti, non quòd dubia res esset, sed ut huic furia, si diutius in hac urbe, quam delere cuperet, maneret, vox interdiceretur, decrevistis, ut de mearum ædium religione ad pontificum collegium referretur. Quæ tanta religio est, quâ non in nostris dubitationibus, atque in maximis superstitionibus, unius P. Servilii, ac M. Luculli responso, ac verbo liberemur? De sacris

publicis , de ludis maximis , de deorum Penatium , Vestæque matris cæremoniis , de illo ipso sacrificio , quod fit pro salute populi Romani , quod post Romam conditam , hujus unius casti tutoris religionum scelere violatum est , quod tres pontifices statuissent , id semper populo Romano , semper senatti , semper ipsis diis immortalibus satis sanctum , satis augmentum , satis religiosum esse visum est. At verò meam domum P. Lentulus , consul & pontifex , P. Servilius , M. Lucullus , Q. Metellus , M. Glabrio , M. Messalla , L. Lentulus , flamen Martialis , P. Galba , Q. Scipio , C. Farnius , M. Lepidus , L. Claudius , rex sacrorum , M. Scaurus , M. Crassus , C. Curio , Sex. Cæsar , flamen Quirinalis , Q. Cornelius , P. Albinovanus , Q. Terentius , pontifices minores , causâ cognitâ , duobus locis dictâ , maximâ frequentiâ amplissimorum ac sapientissimorum civium adstante , omni religione unâ mente omnes liberaverunt.

VII. Nego umquam post sacra constituta , quorum eadem est antiquitas , quæ ipsius urbis , ulla de re , ne de capite quidem virginum Vestalium , tam frequens collegium judicasse : quamquam ad facinoris disquisitionem interest adesse quamplurimos (ita est enim interpretatio illa pontificum , ut iidem potestatem habeant

judicium : religionis expiatio vel ab uno pontifice perito rectè fieri potest ; quod idem in judicio capitis durum atque iniq̃uum est) tamen sic reperietis , frequentiores pontifices de mea domo , quàm umquam de cæremoniis virginum , judicasse. Postero die frequentissimus senatus , te consule designato , Lentule , sententiæ princepe , P. Lentulo & Q. Metello , consulibus referentibus , statuit , quum omnes pontifices , qui erant hujus ordinis , adessent ; quumque alii , qui honoribus populi Romani antecedeabant , multa de collegii judicio verba fecissent , omnesque iidem scribendo adessent , domum meam , judicio pontificum , religione liberatam videri.

14. De hoc igitur loco sacro potissimum videntur aruspices dicere , qui locus solus ex privatis locis omnibus hoc præcipuè juris habet , ut ab ipsis , qui sacris præsunt , sacer non esse judicatus sit ? Verum referte , quod ex senatusconsulto facere debetis : aut vobis cognitio dabitur , qui primi de hac domo sententiam dixistis , & eam religione omni liberaistis ; aut senatus ipse judicabit , qui , uno illo solo antistite sacrorum dissentiente , frequentissimus antea judicavit ; aut , id quod certè fiet , ad pontifices rejicietur , quorum auctoritati , fidei , prudentiæ majores nostri sacra , religionesque , & privatas , & pu-

blicas commendarunt. Quid ergo hi possunt aliud judicare, ac judicaverunt? Multæ sunt domus in hac urbe, Patres conscripti, atque haud scio, an pene cunctæ jure optimo; sed tamen jure privato, jure hereditario, jure auctoritatis, jure mancipi, jure nexi: nego esse ullam domum aliam æquè privato jure, atque optimâ lege, publico verò omni præcipuo, & humano, & divino jure munitam: quæ primum ædificatur ex auctoritate senatûs, pecuniâ publicâ; deinde contra vim nefariam hujus gladiatoris, tot senatusconsultis munita; atque septa est.

VIII. Primum negotium iisdem magistratibus est datum anno superiore, ut curarent, ut sine vi mihi ædificare liceret, quibus in maximis periculis, universa respublica commendari solet: deinde, quum ille faxis, & ignibus, & ferro vastitatem meis sedibus intulisset; decrevit senatus, eos, qui id fecissent, lege de vi, quæ est in eos, qui universam rempublicam oppugnassent, teneri. Vobis verò referentibus, ô post hominum memoriam fortissimi, atque optimi consules, decrevit idem senatus frequentissimus, qui meam domum violasset, contra rempublicam esse facturum.

16. Nego, ullo de opere publico, de monumento, de templo, tot senatûs extare consulta, quot de mea domo, quam

senatus unam, post hanc urbem constitutam, ex ærario ædificandam, a pontificibus liberandam, a magistratibus defendendam, a iudicibus puniendam putaret. P. Valerio, pro maximis in rempublicam beneficiis, data domus est in Velia publicè; at mihi in Palatio restituta: illi locus; at mihi etiam parietes, atque tectum: illi, quam ipse privato jure tueretur; mihi, quam publicè magistratus omnes defenderent. Quæ quidem ego si aut per me, aut ab aliis haberem, non prædicarem apud vos, ne nimis gloriari viderer: sed, quum sint mihi data a vobis, quum ea attententur ejus linguâ, cujus antea manu everfa vos mihi & liberis meis, manibus vestris, reddidistis; non ego de meis, sed de vestris factis loquor; nec vereor, ne hac mea vestrorum beneficiorum prædicatio, non grata potius, quàm arrogans videatur.

17. Quamquam, si me tantis laboribus pro communi salute perfunctum efferret aliquando ad gloriam, in refutandis maledictis improborum hominum, animi quidam dolor, quis non ignosceret? Vidi enim hesterno die quemdam murmurantem: quem aiebant negare ferre me posse, quia, quum ab hoc eodem impurissimo parricida rogarer, cujus essem civitatis, respondi, me, probantibus & vobis,

& equitibus Romanis, ejus esse, quæ carere me non potuisset. Ille, ut opinor, ingemuit. Quid igitur responderem? quæro ex eo ipso, qui ferre me non potest: me civem esse Romanum? litteratè respondissem: tacuisssem? desertum negotium. Potest quisquam vir in rebus magnis cum invidia versatus, satis graviter contra inimici contumeliam sine sua laude respondere? At ipse non modò respondet, quidquid potest, quum est lacessitus; sed etiam gaudet, se ab amicis, quid respondeat, admoneri.

IX. Sed, quoniam mea causa expedita est, videamus nunc, quid aruspices dicant. Ego enim fateor, me & magnitudine ostenti, & gravitate responsi, & unâ atque constanti aruspicum voce vehementer esse commotum. Neque is sum, qui, si cui fortè videor plus, quàm ceteri, qui æquè, atque ego, sunt occupati, versari in studio litterarum, his delecter, aut utar omnino litteris, quæ nostros animos deterrent, atque avocant a religione. Ego verò primùm habeo auctores ac magistros religionum colendarum, majores nostros; quorum mihi tanta fuisse sapientia videtur, ut satis superque prudentes sint, qui illorum prudentiam non dicam assequi, sed, quanta fuerit, perspicere possint; qui statas solennesque cæremonias,

pontificatu; rerum bene gerendarum auctoritates, augurio; fatorum veteres prædictiones Apollinis, vatum libris; portentorum explanationes, Etruscorum disciplinâ contineri putarunt: quæ quidem tanta est, ut nostrâ memoriâ primùm Italici belli funesta illa principia, post Sullani, Cinanique temporis extremum pene discrimen, tum hanc recentem urbis inflammandæ, delendique imperiû conjurationem, non obscure vobis paulò antè prædixerit.

19. Deinde etiam cognovi, multa homines doctissimos sapientissimosque & dixisse, & scripta de deorum immortalium numine reliquisse: quæ quamquam divinitus perscripta video, tamen ejusmodi sunt, ut ea majores nostri docuisse illos, non ab illis didicisse videantur. Etenim quis est tam vecors, qui aut, quum suspexerit in cœlum, deos esse non sentiat, & ea, quæ tantâ mente fiunt, ut vix quisquam arte ullâ ordinem rerum ac necessitudinem persequi possit, casu fieri putet; aut, quum deos esse intellexerit, non intelligat, eorum numine hoc tantum imperium esse natum, & auctum, & retentum? Quàm volumus licet, Patres conscripti, ipsi nos amemus: tamen nec numero Hispanos, nec robore Gallos, nec calliditate Pœnos, nec artibus Græcos, nec denique hoc ip-

fo hujus gentis , ac terræ domestico , nati-
voque sensu , Italos ipsos , ac Latinos ; sed
pietate ac religione , atque hac unâ sa-
pientiâ , quòd deorum immortalium numi-
ne omnia regi , gubernarique perspexi-
mus , omnes gentes , nationesque supera-
vimus.

X. Quare , ne plura de re minimè lo-
quar dubiâ , adhibete animos ; & mentes
vestras , non solùm aures , ad aruspicum
vocem admovete ? *Quòd in agro Latinien-
si auditus est strepitus cum fremitu.* Mitto
aruspices , mitto illam veterem ab ipsis
diis immortalibus , ut hominum fama est ,
Etruriæ datam disciplinam : nos nonne
aruspices esse possumus ? *Exauditus in
agro propinquo , & suburbano , est strepitus
quidam reconditus , & horribilis fremitus ar-
morum.* Quis est ex gigantibus illis , quos
poëtæ ferunt bellum diis immortalibus in-
tulisse , tam impius , qui hoc tam novo ,
tantoque motu , non magnum aliquid deos
populo Romano præmonstrare , & præ-
cinere fateatur ?

21. De ea re scriptum est , postulatio-
nes esse Jovi ; Saturno , Neptuno , Tellu-
ri , diis cœlestibus. Audio , quibus diis
violatis expiatio debeatur : sed , hominum
quæ ob delicta , quæro. *Ludos minùs di-
ligenter factos , pollutosque.* Quos ludos ?
te appello , Lentule : tui sacerdotii sunt

thenſæ, curricula, præcentio, ludi, libationes, epulæque ludorum publicorum: vosque, Pontifices, ad quos epulones Jovis optimi, maximi, ſi quid eſt prætermiſſum aut commiſſum, afferunt; quorum de ſententia illa eadem renovata, atque inſtaurata celebrantur: qui ſunt ludi minùs diligenter facti? quanto, aut quo ſcelere polluti? respondebis & pro te, & pro collegis tuis, & pro pontificum collegio, nihil cujuſquam aut negligentia contemptum, aut ſcelere eſſe pollutum: omnia ſolennia ac juſta ludorum, omnibus rebus obſervatis, ſumma cum cæremonia eſſe ſervata.

XI. Quos igitur aruſpices ludos minùs diligenter factos, pollutoſque eſſe dicunt? eos, quorum ipſi dii immortales, atque illa Mater Idea, te, te, Cn. Lentule, cujus ab avia manibus eſſet accepta, ſpectatorem eſſe voluit: quòd ni tu Megaleſia illo die ſpectare voluiſſes; haud ſcio an vivere nobis, atque his de rebus jam queri liceret: vis enim innumerabilis incitata ex omnibus vicis collecta ſervorum ab hoc ædili religioſo, repente fornicibus, oſtiis-que omnibus, in ſcenam, ſigno dato, immiſſa irrupit. Tua tum, tua, Cn. Lentule, eadem virtus fuit, quæ in privato quondam tuo proavo: te, nomen, imperium, vocem, adſpectum, impetum tuum

stans senatus, equitesque Romani, & omnes boni sequebantur, quum ille servorum & ludiorum multitudini senatum, populumque Romanum, vinctum ipso confessu, & constrictum spectaculis, atque impeditum turbâ & angustiis tradidisset.

23. An, si ludius constitit, aut tibicen repente conticuit, aut puer ille patrimus, & matrimus si terram non tenuit, aut thesam, aut lorum omisit, aut, si ædilis verbo, aut simpulo aberravit, ludi sunt non ritè facti, eaque errata expiantur, & mentes deorum immortalium, ludorum instauratione placantur: si ludi ab lætitia ad metum traducti sunt; si non intermissi, sed perempti, atque sublati sunt; si civitati universæ scelere ejus, qui ludos ad luctum conferre voluit, exstiterunt dies illi festi pene funesti; dubitabimus, quos ille fremitus nuntiet ludos esse pollutos? Ac, si volumus ea, quæ de quoque deo nobis tradita sunt, recordari, hanc Matrem magnam, cujus ludi violati, polluti, pene ad cædem & ad funus civitatis conversi sunt, hanc, inquam, accepimus, agros & nemora cum quodam strepitu, fremituque peragrarè.

XII. Hæc igitur vobis, hæc populo Romano, & scelerum indicia ostendit, & periculorum signa patefecit: nam quid ego de illis ludis loquar, quos in Palatio

nostri majores ante templum, in ipso Matris magnæ conspectu, Megalensibus fieri, celebrarique voluerunt? qui sunt more, institutisque maximè casti, solennes, religiosi: quibus ludis primum ante populi confessum, senatui locum P. Africanus iterum ille consul major dedit; ut eos ludos hæc lues impura pollueret: quod, si quis liber, aut spectandi, aut etiam religionis causâ, accesserat, manus afferébantur: quod matrona nulla adiit propter vim, confessumque servorum. Ita ludos eos, quorum religio tanta est, ut ex ultimis terris arcessita in hac urbe confederit; qui uni ludi ne verbo quidem appellantur Latino, ut vocabulo ipso & appetita religio externa, & Matris magnæ nomine suscepta declaretur: hos ludos servi fecerunt, servi spectaverunt; tota denique, hoc ædile, servorum Megalesia fuerunt.

25. Proh dii immortales! qui magis nobiscum loqui possetis, si essetis, versareminique nobiscum? ludos esse pollutos significatis, ac planè dicitis. Quid magis deformatum, inquinatum, perversum, conturbatum dici potest, quàm, omne servitium, permissu magistratûs, liberatum, in alteram scenam immissum, alteri præpositum, ut alter confessus potestati servorum objiceretur, alter servorum totus esset? Si examen apum ludis in scenam

venisset, aruspices acciendos ex Etruria putaremus: videmus universi repentè examina tanta servorum immissa in populum Romanum, septum atque inclusum, & non commovemur? Atque in apum fortasse examine, nos ex Etruscorum scriptis aruspices, ut a servitio caveremus, monerent.

26. Quod igitur ex aliquo disjuncto, diversoque monstro significatum cavere-mus; id quum sibi ipsum monstrum est, & quum in eo ipso periculum est; ex quo periculum portenditur, non pertimesce-mus? Istiusmodi Megalesia fecit pater tuus? istiusmodi patruus? Is mihi etiam ge-neris sui mentionem facit, quum Athe-nionis, aut Spartaci exemplo ludos facere maluerit, quàm Caii, aut Appii Claudio-rum? Illi quum ludos facerent, servos de cavea exire jubebant; tu in alteram ser-vos immisisti, ex altera liberos ejecisti: itaque qui antea voce præconis a liberis semovebantur, tuis ludis non voce, sed manu liberos a se segregabant.

XIII. Ne hoc quidem tibi in mentem veniebat Sibyllino sacerdoti, hæc sacra majores nostros ex vestris libris expetisse? si illi sunt vestri, quos tu impiâ mente con-quiris, violatis oculis legis, contaminatis manibus attrectas. Hac igitur vate suaden-te quondam, defessâ Italiâ Punico bello,

atque ab Annibale vexatâ , sacra ista maiores nostri adscita ex Phrygia Romæ collocaverunt ; quæ vir is accepit , qui est optimus populi Romani judicatus , P. Scipio ; femina autem , quæ matronarum castissima putabatur , Quinta Claudia : cujus priscam illam severitatem sacrificii mirificè tua soror existimatur imitata. Nihil te igitur neque maiores tui conjuncti cum his religionibus , neque sacerdotium ipsum , quo est hæc tota religio constituta , neque curulis ædilitas , quæ maximè hanc tueri religionem solet , permovit , quò minùs castissimos ludos omni flagitio pollueres , dedecore maculares , scelere obligares ?

28. Sed quid ego id admiror ? qui acceptâ pecuniâ Pessinuntem ipsum , sedem , domiciliumque Matris deorum , vastaris , & Brogitaro Gallogræco , impuro homini ac nefario , cujus legati , te tribuno , dividere in æde Castoris tuis operis nummos solebant , totum illum locum , fanumque vendideris ? sacerdotem ab ipsis aris , pulvinaribusque detraxeris ? omnia illa , quæ vetustas , quæ Persæ , quæ Syri , quæ reges omnes , qui Europam , Asiamque tenuerunt , semper summâ religione coluerunt , perverteris ? quæ denique nostri majores tam sancta duxerunt , ut , quum refertam urbem atque Italiam fano-

rum haberemus , tamen nostri imperatores maximis & periculosissimis bellis huic deæ vota facerent , eaque in ipso Pessinunte ad illam ipsam principem aram , & in illo loco , fanoque persolverent.

29. Quod quum Dejotarus religione suâ castissimè tueretur , quem unum habemus in orbe terrarum fidelissimum huic imperio , atque amantissimum nostri nominis ; Brogitaro , ut antè dixi , addictum pecuniâ tradidisti. Atque hunc tamen Dejotarum sæpe a senatu regali nomine dignum existimatum , clarissimorum imperatorum testimoniis ornatum , tu etiam regem appellari cum Brogitaro jubes : sed alter est rex , judicio senatûs , per nos ; pecuniâ Brogitarus , per te appellatus : alterum putabo regem , si habuerit unde tibi solvat , quod ei per syngrapham credidisti. Nam quum multa regia sunt in Dejotaro , tum illa maximè , quod tibi nummum nullum dedit ; quod eam partem legis tuæ , quæ congruebat cum judicio senatûs , ut ipse rex esset , non repudiavit ; quod Pessinuntem per scelus a te violatum , & sacerdote , sacrisque spoliatum , recuperavit , ut in pristina religione servaret ; quod cæremonias , ab omni vetustate acceptas , a Brogitaro pollui non sinit , mavultque generum suum munere tuo , quàm illud sanum antiquitate religionis carere. Sed ,

ut ad hæc aruspicum responsa redeam , ex quibus est primum de ludis : quis est , qui id non totum in istius ludos prædictum , & responsum esse fateatur ? Sequitur de locis sacris religiosis.

XIV. O impudentiam miram ! de mea domo dicere audes ? Committe vel consulibus , vel senatui , vel collegio pontificum tuam. Ac mea quidem his tribus omnibus judiciis , ut dixi antea , liberata est. At in iis ædibus , quas tu , Q. Sejo , equite Romano , viro optimo , per te apertissime interfecto , tenes , sacellum dico fuisse , & aras : tabulis hoc censorum , memoriâ multorum firmabo , ac docebo.

31. Agatur modò hæc res : quod ex eo senatusconsulto , quod nuper est factum , referri ad vos necesse est : habeo , quæ de locis religiosis velim dicere : quum de domo tua dixero ; in qua tamen ita est inædificatum sacellum , ut alius fecerit , tibi tantummodo sit demoliendum : tum videbo , num mihi necesse sit de aliis etiam aliquid dicere : putant enim nonnulli ad me pertinere , armamentarium Telluris aperire : nuper id patuisse dicunt , & ego recordor : nunc sanctissimam partem ac sedem maximæ religionis privato dicunt vestibulo contineri. Multa me movent ; quòd ædes Telluris est curationis meæ ; quòd is , qui illud armamentarium sustu-

lit, meam domum pontificum judicio liberatam, secundum fratrem suum judicatam esse dicebat: movet me etiam in hac caritate annonæ, sterilitate agrorum, inopia frugum, religio Telluris, & eò magis, quòd eodem ostento Telluri postulatio deberi dicitur. Vetera fortasse loquimur; quamquam hoc si minùs civili jure perscriptum est, lege tamen naturæ, communi jure gentium sancitum est, ut nihil mortales a diis immortalibus usu capere possint.

XV. Verumtamen antiqua negligimus: etiamne ea negligemus, quæ sunt quum maximè? quæ videmus? L. Pisonem quis nescit, his ipsis temporibus, maximum & sanctissimum Dianæ sacellum in Coeliculo sustulisse? adsunt vicini ejus loci: multi sunt etiam in hoc ordine, qui sacrificia gentilia illo ipso in sacello, statuto loco, anniversaria factitarint. Et conquirimus, dii immortales quæ loca desiderent, quid significant, de quo loquantur? A Sex. Serrano sanctissima sacella suffossa, incensa, inædificata, oppressa, summâ denique turpitudine esse fœdata nescimus?

33. Tu meam domum religiosam facere potuisti? Ecquâ mente? quam amiseras: quâ manu? quâ disturbaras: quâ voce? quâ incendi jusseras: quâ lege? quam ne in illa quidem impunitate tua scripseras:

quo pulvinari? quod stupraras: quo simulacro? quod ereptum ex meretricis sepulcro in imperatoris monumento collocaras. Quid habet mea domus religiosi, nisi quòd impuri & sacrilegi parietem tangit? Itaque, ne quis meorum imprudens introspicere possit tuam domum, ac te sacra illa tua facientem videre, tollam altius tectum; non ut ego te despiciam, sed ne tu adspicias urbem eam, quam delere voluisti.

XVI. Sed jam aruspicum reliqua responsa videamus. *Oratores, contra jus fasque interfectos.* Quid est hoc? de Alexandrinis esse video sermonem; quem ego non refuto: sic enim sentio, jus legatorum quum hominum præsidio munitum sit, tum etiam divino jure esse vallatum. Sed quæro ab illo, qui omnes indices tribunus e carcere in forum effudit, cujus arbitrio sicæ omnes nunc, atque omnia venena tractantur, qui cum Hermachio Chio syngraphas fecit; ecquid sciat, unum acerrimum adversarium Hermachi, Theodosium, legatum ad senatum a civitate libera missum, sicâ percussum? quod non minùs, quàm de Alexandrinis, indignum diis immortalibus esse visum, certò scio.

35. Nec confero nunc in te unum omnia: spes major esset salutis, si, præter te, nemo esset impurus: plures sunt: hoc

& tu tibi confidis magis , & nos propè jure diffidimus. Quis Platorem ex Orestide , quæ pars Macedoniæ libera , hominem in illis locis clarum ac nobilem , legatum Theſſalonicam ad nostrum (ut se ipse appellavit) imperatorem venisse nescit ? quem ille , propter pecuniam , quam ab eo extorquere non poterat , in vincula coniecit , & medicum intromisit suum , qui legato , socio , amico , libero fœdissimè & crudelissimè venas incideret. Secures suas cruentari scelere noluit : nomen quidem populi Romani tanto scelere contaminavit , ut id nullâ re possit , nisi ipsius supplicio , expiari. Quales hunc carnifices putamus habere , qui etiam medicis suis non ad salutem , sed ad necem utantur ?

XVII. Sed recitemus , quid sequatur. *Fidem , & jusjurandum neglectum.* Hoc quid sit , per se ipsum non facile interpretor ; sed ex eo , quod sequitur , suspicor de tuorum judicium manifesto perjurio dici ; quibus olim erepti essent nummi , nisi a senatu præsidium postulassent : quare autem de his dici suspicer , hæc causa est , quòd sic statuo , & illud in hac civitate esse maximè illustre atque insigne perjurium , & te ipsum tamen in perjurii poenam ab iis , quibuscum conjurasti , non vocari.

37. Et video, in aruspicum responsis hæc esse subjuncta, *Sacrificia vetusta, occultaque, minùs diligenter facta, pollutaque.* Aruspices hæc loquuntur, an patrii, penatesque dii? multi enim sunt, credo, in quos hujus maleficiæ suspicio cadat. Quis præter hunc unum? Obscurè dicitur, quæ sacra polluta sint? quid planius, quid gravius, quid religiosius dici potest? *Vetusta, occultaque.* Nego ulla verba Lentulum, gravem oratorem ac disertum, sæpius, quum te accusaret, usurpasse, quàm hæc, quæ nunc ex Etruscis libris in te conversa, atque interpretata dicuntur. Etenim quod sacrificium tam vetustum est, quàm hoc, quod a regibus æquale huic urbi accepimus? quod autem tam occultum, quàm id, quod non solum curiosos oculos excludit, sed etiam errantes? quod non modò improbitas, sed ne imprudentia quidem possit intrare? quod quidem sacrificium nemo ante P. Clodium omni memoriâ violavit, nemo umquam adiit, nemo neglexit, nemo vir adspicere non horruit? quod sit per virgines Vestales, sit pro populo Romano, sit in ea domo, quæ est in imperio, sit incredibili cæremonia; sit ei deæ, cujus ne nomen quidem viros scire fas est: quam iste idcirco Bonam dicit, quod in tanto sibi scelere ignoverit.

XVIII. Non ignovit, mihi crede, non : nisi fortè tibi ignotum putas, quòd te judices emiserunt excussum, & exhaustum ; suo judicio absolutum, omnium condemnatum : aut quòd oculos, ut opinio illius religionis est, non perdidisti. Quis enim ante te sacra illa vir sciens viderat, ut quisquam pœnam, quæ sequeretur illud scelus, scire posset ? An tibi luminis obesset cæcitas, plus quàm libidinis ? ne id quidem sentis, conniventes illos oculos abavi tui magis optandos fuisse, quàm hos flagrantés sororis ? Tibi verò, si diligenter attenderis, intelliges hominum pœnas deesse adhuc, non deorum : homines te in re fœdissima defenderunt ; homines turpissimum, nocentissimumque laudarunt ; homines propè confitentem judicio liberaverunt ; hominibus injuria tui stupri, illata in ipsos, dolori non fuit ; homines tibi arma, alii in me, alii pòst in illum invictum civem dederunt ; hominum beneficia prorsus concedo tibi ; ac majora non esse quærenda.

39. A diis quidem immortalibus quæ potest homini major esse pœna furore, atque dementiâ ? nisi fortè in tragœdiis, quos vulnere, ac dolore corporis cruciari vides, & consumi, graviores deorum immortalium iras subire, quàm illos, qui furentes inducuntur, putas. Non sunt illi

ejulatus & gemitus Philoctetæ tam miseri (quamquam sunt acerbi) quàm illa exsultatio Athamantis , & quàm somnium matricidarum. Tu , quum furiales in concionibus voces mittis , quum domos civium evertis , quum lapidibus optimos viros foro pellis , quum ardentes faces in vicinorum tecta jactas , quum ædes sacras inflammas , quum servos concitas , quum sacra , ludosque conturbas , quum uxorem sororemque non discernis , quum , quod ineas cubile , non sentis , quum baccharis , quum furis , tum das eas pœnas , quæ solæ sunt hominum sceleri a diis immortalibus constitutæ. Nam corporis quidem nostri infirmitas multos subit casus per se ; denique ipsum corpus tenuissima sæpe de causa conficitur : deorum tela in impiorum mentibus figuntur : quare inferior es , quum in omnem fraudem raperis oculis , quàm si omnino oculos non haberes.

XIX. Sed , quoniam de iis omnibus , quæ aruspices commissa esse dicunt , factis est dictum ; videamus , quid iidem aruspices a diis jam immortalibus dicant moneri. Monent : *Ne per optimatum discordiam , dissensionemque , patribus , principibusque cædes , periculaque creentur , auxilioque diminuti deficientur : quare ad unum imperium provinciæ redeant , exerci-*

tusque pulsus , diminutioque accedat. Aruspicum verba sunt hæc omnia : nihil addo de meo. Quis igitur hanc optimatum discordiam molitur ? idem iste : nec ullâ vi ingenii , aut consilii sui , sed quodam errore nostro ; quem quidem ille , quod obscurus non erat , facile perspexit : hoc enim etiam turpius afflictor respublica , quod ne ab eo quidem vexatur , ut , tamquam fortis in pugna vir , acceptis a forti adversario vulneribus adversis , cadere videatur.

41. Tib. Gracchus convellit statum civitatis : quâ gravitate vir ! quâ eloquentiâ ! quâ dignitate ! nihil ut a patris , avi-que Africani præstabili insignique virtute , præterquam quod a senatu desciverat , deflexisset. Secutus est C. Gracchus : quo ingenio ! quantâ vi : quantâ gravitate dicendi ! ut dolerent boni omnes , non illa tanta ornamenta ad meliorem mentem , voluntatemque esse conversa. Ipse L. Saturninus ita fuit effrenatus , & pene demens , ut auctor esset egregius , & ad animos imperitorum excitandos , inflammandosque perfectus. Nam quid ego de P. Sulpicio loquar ? cujus tanta in dicendo gravitas , tanta jucunditas , tanta brevitatis fuit , ut posset , vel ut prudentes errarent , vel ut boni minùs bene sentirent , perficere dicendo. Cum his conflictari , & pro

salute patriæ quotidie dimicare , erat omnino illis , qui tum rempublicam gubernabant , molestum ; sed habebat ea molestia quamdam tamen dignitatem.

XX. Hic verò , de quo ego ipse tam multa nunc dico , proh dii immortales ? quid est ? quid valet ? quid affert , ut tanta civitas , si cadet (quod dii omen obruant !) a viro tamen confecta videatur ? qui post patris mortem , primam illam ætatulam suam ad scurrarum locupletium libidines detulit ; quorum intemperantiâ expletâ , in domesticis est germanitatis stupris volutatus : deinde jam robustus , provinciæ se , ac rei militari dedit , atque ibi piratarum contumelias perpeffus , etiam Cilicum libidines , Barbarorumque fatiavit : post , exercitu L. Luculli sollicitato per nefandum scelus , fugit illinc , Romæque , recenti adventu suo , cum propinquis suis decidit , ne reos faceret : a Catilina pecuniam accepit , ut turpissimè prævaricaretur : inde cum Murena se in Galliam contulit ; in qua provincia mortuorum testamenta conscripsit , pupillos necavit , nefarias cum multis scelerum pactiones , societatesque conflavit : unde ut rediit , quæstum illum maximè fecundum , uberemque , campestrem , totum ad se ita redegit , ut homo popularis fraudaret improbissimè populum , idemque

vir clemens divisores omnium tribuum domi ipse suæ crudelissimâ morte mactaret.

43. Exorta est illa, reipublicæ, facris, religionibus, auctoritati vestræ, judiciis publicis funesta quæstura : in qua idem iste Deos, hominesque, pudorem, pudicitiam, senatûs auctoritatem, jus, fas, leges, judicia, violavit. Atque hic ei gradus (ô misera tempora, stultasque nostras discordias !) P. Clodio gradus ad rempublicam, hic primus est aditus ad popularem jactationem, atque adscensus. Nam Tib. Graccho invidia Numantini fœderis, cui feriendo, quæstor C. Mancini consulis quum esset, interfuerat, & in eo fœdere improbando senatûs severitas dolori, & timori fuit ; istaque res illum, fortem & clarum virum, a gravitate patrum desciscere coëgit. C. autem Gracchum mors fraterna, pietas, dolor, magnitudo animi, ad expetendas domestici sanguinis pœnas excitavit. Saturninum, quòd in annonæ caritate quæstorem a sua frumentaria procuratione senatus amovit, eique rei M. Scaurum præfecit, scimus, dolore factum esse popularem. Sulpicium ab optima causa profectum, Caioque Julio, consulatum contra leges petenti, resistantem, longiùs, quàm voluit, popularis aura provexit.

XXI. Fuit in his omnibus causa, etsi non iusta (nulla enim potest cuiquam malè de republica merendi iusta esse causa) gravis tamen, & cum aliquo animi, & virili dolore conjuncta. P. Claudius a crocota, a mitra, a muliebribus soleis, purpureisque fasciis, a strophio, a psalterio, a flagitio, a stupro, est factus repentinè popularis. Nisi eum mulieres exornatum ita deprehendissent; nisi ex eo loco, quò eum adire fas non erat, ancillarum beneficio emissus esset; populari homine populus Romanus, respublica civitali careret. Hanc ob amentiam in discordiis nostris, de quibus ipsis, his prodigiis recentibus, a diis immortalibus admonemur, arreptus est unus ex patriciis, cui tribuno plebis fieri non liceret.

45. Quod anno antè frater Metellus, & concors etiam tum senatus, principi Cn. Pompeio sententiam dicenti, excluferat, acerrimèque unà voce ac mente restiterat; id post dissidium optimatum, de quo ipso nunc monemur, ita perturbatum, itaque permutatum est, ut, quod frater consul ne fieret, obstiterat; quod affinis & sodalis, clarissimus vir, qui illum reum non laudarat, excluferat; id is consul eficeret in discordiis principum, qui illi unus inimicissimus esse debuerat; & eo fecisse auctore se diceret, cujus auctorita-

tis neminem posset pœnitere. Injēcta est fax fœda ac luctuosa reipublicæ , petita est auctoritas vestrā , gravitas amplissimorum ordinum , consensio bonorum omnium , totus denique civitatis status : hæc enim certè petebantur , quum in me , cognitorē harum omnium rerum , illa flamma illorum temporum conjiciebatur. Excepi , & pro patria solus exarsi ; sic tamen , ut vos , iisdem ignibus circumsepti , me primum ictum pro vobis , & fumantem videretis.

XXII. Non sedabantur discordiæ ; sed etiam crescebat in eos odium , a quibus nos defendi putabamur. Ecce , iisdem auctoribus , Pompeio principe , qui cupientem Italiam , populum Romanum desiderantem , flagitantes vos , non auctoritate suā solum , sed etiam precibus ad meam salutem excitavit , restituti sumus. Sit discordiarum finis aliquando : a diuturnis dissensionibus conquiescamus. Non sinit eadem ista labes : eas habet conciones , ea miscet , ea turbat , ut modò his , modò se venditet illis : nec tamen ita , ut se quisquam , si ab isto laudatus sit , laudatorem putet ; sed ut eos , quos non amant , ab eodem gaudeant vituperari. Atque ego hunc non miror : quid enim faciat aliud ? illos homines sapientissimos , gravissimosque miror ; primum , quod

quemquam clarum hominem, atque optimè de republica sæpe meritum, impurissimi voce hominis violari facillè patiuntur: deinde, quòd existimant, perditì hominis profligatque maledictis posse, id quod minimè conducit ipsis, cujusquam gloriam, dignitatemque violari: postremò, quòd non sentiunt id, quod tamen mihi jam suspicari videntur, illius furentes ac violentos impetus in se ipsos posse converti.

47. Atque ex hac nimia nonnullorum alienatione a quibusdam, hærent ea tela in republica, quæ quamdiu hærebant in uno me, graviter equidem, sed aliquantò levius ferebam. An iste, nisi primò se dedisset iis, quorum animos a vestra auctoritate sejunctos esse arbitrabatur; nisi eos in cœlum suis laudibus præclarus auctor extolleret; nisi exercitum C. Cæsaris, in quo fallebat, sed eum nemo redarguebat, nisi eum, inquam, exercitum signis infestis in curiam se immissurum minitaretur; nisi Cn. Pompeio adjutore, M. Crasso auctore, quæ faciebat, facere clamaret; nisi consules causam conjunxisse secum, in quo uno non mentiebatur, confirmaret; tam crudelis mei, tam sceleratus reipublicæ vexator esse potuisset?

XXIII. Idem, posteaquam respirare vos a metu cædis, emergere auctorita-

tem vestram e fluctibus illis fervitutis , reviviscere memoriam ac desiderium mei vidit , vobis se cœpit subitò fallacissimè venditare. Tum , leges Julias contra auspicia latas , & hîc , & in concionibus dicere : in quibus legibus inerat curiata illa lex , quæ totum ejus tribunatum continebat ; quam cæcus amentia non videbat : producebat fortissimum virum , M. Bibulum : quærebat ex eo , C. Cæsare leges ferente , de cœlo semperne servasset ? semper se ille servasse dicebat. Augures interrogabat quæ ita lata essent , rectene lata essent ? illi vitio lata esse dicebant. Ferebant in oculis hominem quidam boni viri , & de me optimè meriti , sed illius , ut ego arbitror , furoris ignari. Longiùs processit : in ipsum Cn. Pompeium , auctorem , ut prædicare est solitus , consiliorum suorum , invehi cœpit. Inibat gratiam a nonnullis.

49. Tum verò est ratus se posse , quoniam togatum domestici belli extinctorem nefario scelere fœdasset , illum etiam , illum externorum bellorum , hostiumque victorem affligere : tum est illa in templo Castoris scelerata , & pene deletrix hujus imperii sica deprehensa : tum ille , cui nulla hostium diutius urbs umquam fuit clausa , qui omnes angustias , omnes altitudines , omnium objecta tela , semper vi &

virtute perfregit, obsessus est ipse domi; meque nonnullâ imperitorum vituperatione timiditatis meæ, consilio & facto suo liberavit: nam, si Cn. Pompeio, viro omnium fortissimo, quicumque nati sunt, miserum magis fuit, quàm turpe, quamdiu ille tribunus plebis fuit, lucem non adspicere, carere publico, minas ejus perferre, quum in concionibus diceret, velle se in Carinis ædificare alteram porticum, quæ Palatio responderet; certè mihi exire domo meâ, ad privatum dolorem fuit luctuosum, ad rationem reipublicæ gloriosum.

XXIV. Videtis igitur, hominem per seipsum jampridem afflictum, ac jacentem, perniciosis optimatum discordiis excitari; cujus initia furoris; dissensionibus eorum, qui tum a vobis sejuncti videbantur, sustentata sunt. Reliqua jam præcipientis tribunatûs, etiam post tribunatum, obtrectatores eorum, atque adversarii defenderunt: ne a republica reipublicæ pestis removeretur, restiterunt: etiam, ne causam diceret: etiam, ne privatus esset. Etiamne in sinu atque in deliciis quidam optimi viri viperam illam venenatam, ac pestiferam habere potuerunt? quo tandem decepti munere? Volo, inquiunt, esse, qui in concione detrahat de Pompeio. Detrahat ille vituperando? Velim, sic hoc

vir summus, atque optimè de mea salute meritus, accipiat, ut a me dicitur: dicam quidem certè, quod sentio. Mihi, medius fidius, tum de illius amplissima dignitate detrahere, quum maximis laudibus efferebat, videbatur.

51. Utrùm tandem C. Marius splendior, quum eum C. Glaucia laudabat, an quum eundem iratus postea vituperabat? An ille demens, & jampridem ad pœnam exitiumque præceps, fœdior atque inquinatior in Cn. Pompeio accusando, quàm in universo senatu vituperando fuit? quod quidem miror, quum alterum gratum sit iratis, alterum esse tam bonis civibus non acerbum. Sed, ne viros optimos diutius delectet, legant hanc ejus concionem, de qua loquor; in qua Pompeium ornat, an potius deformat? Certè laudat, & unum esse in hac civitate dignum hujus imperii gloriâ dicit; & significat, se illi amicissimum esse, & reconciliationem esse gratiæ factam.

52. Quod ego quamquam, quid sit, nescio; tamen hoc statuo, hunc, si amicus esset Pompeio, laudaturum illum non fuisse. Quid enim, si illi inimicissimus esset, amplius ad ejus laudem minuendam facere potuisset? Videant ii, qui illum Cn. Pompeio inimicum esse gaudebant, ob eamque causam in tot tantisque scele-

ribus connivebant , & nonnumquam ejus indomitos atque effrenatos furores plausu etiam suo prosequiebantur , quàm se citò inverterit : nunc enim jam laudat illum ; in eos invehitur , quibus se antea venditabat. Quid existimatis , eum , si reditus ei gratiæ patuerit , esse facturum , qui tam libenter in opinionem gratiæ irrepat ?

XXV. Quas ego alias optimatium discordias a diis immortalibus definiri putem ? nam hoc quidem verbo neque P. Clodius , neque quisquam de gregalibus ejus , aut de consiliariis designatur. Habent Etrusci libri certa nomina , quæ in id genus civium cadere possunt : *Deteriores* , *repulsos* , quod jam audietis , hos appellant , quorum & mentes , & res sunt perditæ , longèque a communi salute disjunctæ. Quare , quum dii immortales monent de optimatium discordiis ; de clarissimorum , & optimè meritorum civium dissensione prædicunt : quum principibus periculum , cædemque portendunt ; in tuto collocant Clodium , qui tantum abest a principibus , quantum a puris , quantum a religiosis.

54. Vobis , ô clarissimi , atque optimi cives , & vestræ saluti consulendum , & prospiciendum vident : cædes principum ostenditur ; id , quod interitum optimatium sequi necesse est , adjungitur : etiam ,

ne in unius imperium res recidat, admonemur : ad quem metum si deorum monitis non duceremur , tamen ipsi nostro sensu , conjecturâque raperemur. Neque enim ullus alius discordiarum solet esse exitus inter claros & potentes viros , nisi aut universus interitus , aut victoris dominatus , aut regnum. Dissensit cum Mario , clarissimo cive , consul nobilissimus & fortissimus , L. Sulla : horum uterque ita cecidit victus , ut victor idem regnaverit. Cum Octavio collega Cinna dissensit : utrisque horum secunda fortuna regnum est largita , adversa mortem. Idem iterum Sulla superavit : tum sine dubio habuit regalem potestatem , quamquam rempublicam recuperavit.

55. Inest hoc tempore haud obscurum odium , atque id insitum penitus , & inustum animis hominum amplissimorum : dissident principes : captatur occasio : qui non tantum opibus valent , nescio quam fortunam tamen , ac tempus exspectant : qui sine controversia plus possunt , hi fortasse nonnumquam consilia , ac sententias inimicorum suorum extimescunt. Tollatur hæc e civitate discordia : jam omnes isti , qui portenduntur metus , extinguentur : jam ista serpens , quæ tum hîc delitescit , tum se emergit , & fertur illuc , compressa atque illisa morietur.

XXVI. Monent enim iidem , ne occultis consiliis respublica lædatur. Quæ sunt occultiora , quàm ejus , qui in concione ausus est dicere , justitium edici oportere , jurisdictionem intermitteri , claudi ærarium ; judicia tolli ? nisi fortè existimatis , hanc tantam colluvionem illi , tantamque eversionem civitatis , in mentem subito in Rostris nec cogitanti venire potuisse. Est quidem ille plenus vini , stupri , somni , plenusque inconsideratissimæ ac dementissimæ temeritatis : verumtamen nocturnis vigiliis , etiam coitione hominum , justitium illud concoctum , ac meditatum est. Mementote , Patres conscripti , verbo illo nefario tentatas aures vestras , & perniciosam viam , audiendi consuetudine , esse munitam.

56. Sequitur illud , *Ne deterioribus , repulsisque honos augeatur*. Repulsos videamus ; nam deteriores qui sint , post docebo : sed tamen in eum cadere hoc verbum maximè , qui sit unus omnium mortalium sine ulla dubitatione deterrimus , concedendum est. Qui sunt igitur repulsi ? non , ut opinor , ii , qui aliquando honorem vitio civitatis , non suo , non sunt affecuti : nam id quidem multis sæpe optimis civibus , atque honestissimis viris , accidit. Repulsi sunt ii , quos ad omnia progredientes , quos munera contra leges

gladiatoria parantes, quos apertissimè largientes, non solum alieni, sed etiam sui, vicini, tribules, urbani, rustici repulerunt. Hi ne honore augeantur, monemur. Debet esse gratum, quod prædicunt: sed tamen huic malo populus Romanus ipse, nullo aruspicum admonitu, suâ sponte prospexit.

57. Deteriores cavete; quorum quidem magna est natio: sed tamen eorum omnium hic dux est, atque princeps. Etenim, si unum hominem deterrimum poëta præstanti aliquis ingenio, fictis, conquistisque vitiis deformatum, vellet inducere, nullum profectò dedecus reperire posset, quod in hoc non inesset; multaque in eo penitus defixa, atque hærentia præteriret.

XXVII. Parentibus, & diis immortalibus, & patriæ nos primum natura conciliat: eodem enim tempore & suscipimur in lucem, & hoc cœlesti spiritu augemur, & certam in sedem civitatis, ac libertatis adscribimur. Iste parentum nomen, sacra, memoriam, gentem, Fonteiano nomine obruit: deorum ignes, solia, menfas, abditos ac penetrales focos, occulta & maribus non invisa solum, sed etiam inaudita sacra, inexpiabili scelere pervertit: idemque earum templum inflammavit dearum, quarum ope etiam aliis incendiis subvenitur.

58. Quid de patria loquar ? qui primùm eum civem vi , ferro , periculis , urbe , omnibus patriæ præsiidiis depulit , quem vos patriæ conservatorem esse sæpissimè judicaveratis : deinde everso senatùs , ut ego semper dixi , comite , duce , ut ille dicebat , senatum ipsum , principem salutis mentisque publicæ , vi , cæde , incendiisque pervertit : sustulit duas leges , Æliam & Fufiam , maximè reipublicæ salutare : censuram exstinxit : intercessionem removit : auspicia delevit : consules , sceleris sui socios , ærario , provinciis , exercitu armavit : reges qui erant , vendidit ; qui non erant , appellavit : Cn. Pompeium vi , ferro , domum compulit : imperatorum monumenta evertit , inimicorum domos disturbavit : vestris monumentis nomen suum inscripsit. Infinita sunt scelera , quæ ab illo in patriam sunt edita. Quid , quæ in singulos cives , quos necavit ? socios , quos diripuit ? imperatores , quos prodidit ? exercitus , quos tentavit ?

59. Quid verò ? ea , quanta sunt , quæ in ipsum se scelera , quæ in suos edidit ? Quis minùs umquam peperit hostium castris , quàm ille omnibus corporis sui partibus ? quæ navis umquam in flumine publico tam vulgata omnibus , quàm istius ætas fuit ? quis umquam nepos tam liberè est cum scortis , quàm hic cum sororibus ,

H vi

volutatus ? quam denique tam immanem Charybdim poëtæ fingendo exprimere potuerunt , quæ tantos exhaurire gurgites posset , quantas iste Byzantium , Brogitarorumque prædas exforbuit ? aut tam eminentibus canibus Scyllam , tamque jejunis , quàm , quibus istum videtis , Gelliis , Clodiis , Titii Rostra ipsa mandentem ?

60. Quare , id quod extremum est in aruspicum responsis , *Providete , ne rei-publicæ status commutetur* : etenim vix hæc si undique fulciamus , jam labefacta , vix , inquam , innixa in omnium nostrum humeris cohærebunt.

XXVIII. Fuit quondam ita firma hæc civitas , & valens , ut negligentiam senatus , vel etiam injurias civium ferre posset : jam non potest. Ærarium nullum est : vectigalibus non fruuntur , qui redemerunt : auctoritas principum cecidit : consensus ordinum est divulsus : judicia perierunt : suffragia descripta tenentur a paucis : bonorum animus ad nutum nostri ordinis expeditus jam non erit : civem , qui se pro patriæ salute opponat invidiæ , frustra posthac requiretis.

61. Quare hunc statum , qui nunc est , qualiscumque est , nullâ aliâ re , nisi concordia , retinere possumus : nam , ut meliore simus loco , ne optandum quidem

est, illo impunito; deteriore autem statur ut simus, unus est inferior gradus, aut interitûs, aut servitutis: quò ne trudemur, dii immortales nos admonent, quoniam jampridem humana consilia ceciderunt. Atque ego hanc orationem, Patres conscripti, tam tristem, tam gravem non suscepissem, non, inquam, nisi hanc personam, & has partes, honoribus populi Romani, vestris plurimis ornamentis mihi tributis, deberem, & possem sustinere: sed tamen facilè tacentibus ceteris, reticuissem: sed hæc oratio omnis fuit non auctoritatis meæ, sed publicæ religionis: mea fuerunt verba fortasse plura; sententiæ quidem omnes aruspicum: ad quos aut referri nuntiata ostenta non convenit, aut eorum responsis commoveri necesse est.

62. Quòd si cetera magis pervulgata nos sæpe, & leviora moverunt; vox ipsa deorum immortalium non mentes omnium permovebit? nolite enim id putare accidere posse, quod in fabulis sæpe videtis fieri, ut deus aliquis delapsus e cœlo, cœtus hominum adeat, versetur in terris, cum hominibus colloquatur: cogitate genus sonitûs ejus, quem Latinienses nuntiarunt: recordamini illud etiam, quod nondum est relaturn, quòd eodem ferè tempore factus in agro Piceno Potentiæ

182 ORATIO DE ARUSP. RESP.

nuntiatur terræ motus horribilis, cum quibusdam multis, metuendisque rebus : hæc eadem profectò, quæ futura prospicimus, impendentia pertimescetis.

63. Etenim hæc deorum immortalium vox, hæc pene oratio judicanda est, quum ipse mundus, quum aër, atque terræ, motu quodam novo contremiscunt, & inusitato aliquid sono, incredibilique prædicunt : in quo constituendæ nobis quidem sunt procurationes & obsecratio, quemadmodum monemur : sed faciles sunt preces apud eos, qui ultrò nobis viam salutis ostendunt : nostræ nobis sunt inter nos iræ, discordiæque placandæ.





P R O

PUBLIO SEXTIO.

ORATIO TRIGESIMA PRIMA.

*P. Sextius, quum Lentulo & Metello
Coss. tribunus plebis esset, omnem
vim tribunatûs sui ad Ciceronem pa-
triæ restituendum maximo animo
contulit. Ejus conatibus quum Pu-
blius Clodius, qui Ciceronem urbe
expulerat, homo seditiosus ac tur-
bulentus, obsisteret; factum, ut
VIII. Kal. Feb. inter eos, qui Cice-
roni favebant, & Clodianos magna
pugna, armatis utrimque homini-
bus, committeretur. Eo nomine,
anno post, Marcellino & Philippo
Coss. P. Sextii M. Tullius Albino-
vanus detulit nomen, eumque lege
Lutatiiâ de vi apud M. Æmilium*

*Scaurum prætorem postulavit. Defensus Sextius quum ab aliis, tum a duobus præstantissimis oratoribus, Q. Hortensio, & M. Tullio Cicero-
ne, atque absolutus est, anno urbis 697. Ciceronis 51. Oppugnaverat Sextium maximè P. Vatinius, qui etiam testimonium in illum dixerat. Itaque Cicero Vatinium testem perpetuâ interrogatione accusavit: quæ oratio Sextianam defensionem proximè sequitur. Vide Epist. ad Q. Fratrem lib. 2, 4. & ad Lentulum lib. 1. ad Fam. 9.*

I. **S**I quis antea, Judices, mirabatur, quid esset, quodd pro tantis opibus reipublicæ, tantaque dignitate imperii, nequaquam satis multi cives forti & magno animo invenirentur, qui auderent se, & salutem suam in discrimen offerre pro statu civitatis, & pro communi libertate: ex hoc tempore miretur potiùs, si quem bonum & fortem civem viderit, quàm si quem aut timidum, aut sibi potiùs quàm reipublicæ consulentem. Nam, ut omittatis de uniuscujusque casu cogitando recordari, uno adspectu intueri potestis eos,

qui cum senatu, cum bonis omnibus, rempublicam afflictam excitarint, & latrocinio domestico liberarint, mœstos, fordidos, reos, de capite, de fama, de civitate, de fortunis, de liberis dimicantes; eos autem, qui omnia divina & humana violarint, vexarint, perturbarint, everterint, non solum alacres lætosque volitare, sed etiam voluntarios fortissimis atque optimis civibus periculum moliri, de se nihil timere.

2. In quo quum multa sunt indigna, tum nihil minus est ferendum, quàm quòd jam non per latrones suos, non per homines egestate & scelere perditos, sed per vos nobis, per optimos viros optimis civibus periculum inferre conantur; & quos lapidibus, quos ferro, quos facibus, quos vi, manu, copiis delere non potuerunt, hos vestrà auctoritate, vestrà religione, vestris sententiis se oppressuros arbitrantur. Ego autem, Judices, quia quâ voce mihi in agendis gratiis, commemorandoque eorum, qui de me optimè sunt meriti, beneficio esse utendum putabam, eâ nunc uti cogor in eorum periculis depellendis; iis potissimum vox hæc serviat, quorum operâ & mihi, & vobis, & populo Romano restituta est.

II. Et quamquam a Q. Hortensio, clarissimo viro atque eloquentissimo, causa

est P. Sextii perorata ; nihilque ab eo prætermisſum eſt , quod aut pro republica conquerendum fuit , aut pro reo diſputandum : tamen aggrediar ad dicendum , ne mea propugnatio ei potiffimùm defuiſſe videatur , per quem eſt perfectum , ne ceteris civibus deeſſet. Atque ego ſic ſtatuo , Iudices , a me in hac cauſa , atque hoc extremo dicendi loco , pietatis potiùs , quàm deſenſionis ; querelæ , quàm eloquentiæ ; doloris , quàm ingenii partes eſſe ſuſceptas.

4. Itaque , ſi aut acriùs egero , aut liberius , quàm qui ante me dixerunt ; peto a vobis , ut tantum orationi meæ concedatis , quantum & pio dolori , & juſtæ iracundiæ concedendum putetis : neque enim officio conjunctior dolor ullius eſſe poteſt , quàm hic meus , ſuſceptus ex hominis , de me optimè meriti , periculo ; neque iracundia magis ulla laudanda , quàm ea , quæ me inflammat eorum ſcelere , qui cum omnibus ſalutis meæ deſenſoribus bellum eſſe ſibi gerendum judicaverunt.

5. Sed , quoniam ſingulis criminibus ceteri reſponderunt , dicam ego de omni ſtatu P. Sextii , de genere vitæ , de natura , de moribus , de incredibili amore in bonos , de ſtudio conſervandæ ſalutis communis atque otii ; contendamque , ſi

modò id consequi potero , ut in hac confusa atque universa defensione , nihil a me , quod ad vestram quæstionem ; nihil , quod ad reum ; nihil , quod ad rempublicam pertineat , prætermissum esse videatur. Et quoniam in gravissimis temporibus civitatis , atque in ruinis eversæ atque afflictæ reipublicæ , P. Sextii tribunatus est a fortuna ipsa collocatus ; non aggrediar ad illa maxima atque amplissima prius , quàm docuero , quibus initiis ac fundamentis hæ tantæ summis in rebus laudes excitatæ sint.

III. Parente P. Sextius natus est , iudices , homine , ut plerique meministis , & sapiente , & sancto , & severo : qui quum tribunus plebis primus inter homines nobilissimos temporibus optimis factus esset , reliquis honoribus non tam uti voluit , quàm dignus videri. Eo auctore duxit honestissimi & spectatissimi viri C. Albini filiam ; ex qua hic est puer ; & nupta jam filia. Duobus his gravissimæ antiquitatis viris sic probatus fuit , ut utrique eorum & carus maximè , & jucundus esset. Ademit Albino foci nomen mors filiæ , sed caritatem illius necessitudinis , & benevolentiam non ademit : hodie sic hunc diligit , ut vos facillimè potestis ex hac vel assiduitate ejus , vel sollicitudine , & molestia iudicare.

7. Duxit uxorem , patre vivo , optimi & calamitosissimi viri filiam , C. Scipionis. Clara in hoc P. Sextii pietas exstitit , & omnibus grata , quòd & Massiliam statim profectus est , ut socerum videre , consolarique posset , fluctibus reipublicæ expulsum , in alienis terris jacentem , quem in majorum suorum vestigiis stare oportebat ; & ad eum filiam ejus adduxit , ut illo insperato adspectu complexuque , si non omnem , at aliquam partem mœroris sui deponeret ; & maximis officiis & illius ærumnam , quoad vixit , & filiæ solitudinem sustentavit. Possum multa dicere de liberalitate , de domesticis officiis , de tribunatu militari , de provinciali in eo magistratu abstinentia ; sed mihi ante oculos obversatur reipublicæ dignitas , quæ me ad sese rapit , hæc minora relinquere hortatur.

8. Quæstor hic C. Antonii , collegæ mei , Judices , fuit forte , sed societate consiliorum meus. Impedior nonnullius officii , ut ego interpretor , religione , quò minùs exponam , quàm multa ad me detulerit , quantò antè providerit. Atque ego de Antonio nihil dico , præter unum : numquam illum in illo summo timore ac periculo civitatis , neque communem metum omnium , neque propriam nonnullorum de ipso suspicionem , aut infitiando

PRO P. SEXTIO. 189

tollere, aut dissimulando sedare voluisse. In quo collega sustinendo, atque moderando, si meam in illum indulgentiam, conjunctam cum summa custodia reipublicæ, laudare verè solebatis, par propè laus P. Sextii esse debet, qui suum ita consulem observavit, ut & illi quæstor bonus, & vobis omnibus optimus civis videretur.

IV. Idem, quum illa conjuratio ex latetris atque ex tenebris erupisset, palamque armata volitaret, venit cum exercitu Capuam; quam urbem, propter plurimas belli opportunitates, ab illa impia & scelerata manu attentari suspicabamur; & inde M. Aulanum, tribunum militum Antonii, Capuâ præcipitem eiecit, hominem perditum, & non obscurè Pisauri, & in aliis agri Gallici partibus, in illa conjuratione versatum. Idemque C. Marcellum, quum is non solum Capuam venisset, verum etiam se, quasi armorum studio, in maximam familiam coniecisset, exterminandum ex illa urbe curavit; qua de causa & tum conventus ille Capuæ, qui propter salutem illius urbis, consulatu conservatam meo, me unum patronum adoptavit, huic apud me P. Sextio maximas gratias egit; & hoc tempore iidem homines, nomine commutato, coloni, decurionesque fortissimi, atque optimi viri,

beneficium P. Sextii testimonio declarant; periculumque decreto suo deprecantur.

10. Recita, quæso, P. Sexti, quid decreverint Capuæ decuriones; ut jam virilis tua vox possit aliquid significare inimicis nostris, quidnam, quum se corroborarit, effectura esse videatur. **DECRETUM DECURIONUM.** Non recito decretum officio aliquo expressum vicinitatis, aut clientelæ, aut hospitii publici, aut ambitionis, aut commendationis gratiâ; sed recito memoriam perfuncti periculi, prædicationem amplissimi beneficii, vicem officii præsentis, testimonium præteriti temporis.

11. Atque illis temporibus iisdem, quum jam Capuam metu Sextius liberasset; urbem senatus, atque omnes boni, prehensis atque oppressis domesticis hostibus, me duce, ex periculis maximis extraxissent; ego litteris eum Capuâ arcessivi cum illo exercitu, quem tum secum habebat; quibus hic litteris lectis, ad urbem confestim incredibili celeritate advolavit. Atque, ut illius temporis atrocitatem recordari possitis, audite litteras, & vestram memoriam ad timoris præteriti cogitationem excitate. **LITTERÆ CICERONIS CONSULIS.**

V. Hoc adventu P. Sextii, tribunorum plebis novorum, qui tum extremis diebus

PRO P. SEXTIO. 191

consulatûs mei, res eas, quas gesseram, vexare cupiebant, reliquique conjurationis impetus & conatus sunt retardati. Ac, posteaquam est intellectum, Catone tribuno plebis, fortissimo atque optimo cive, rempublicam defendente, per seipsum senatum populumque Romanum, sine militum præsidio, tueri facile majestatem suam, & dignitatem eorum, qui salutem communem periculo suo defendissent; Sextius cum illo suo exercitu summâ celeritate est Antonium consecutus. Hic ego quid prædicem, quibus hic rebus consullem ad rem gerendam excitavit? quos stimulos admoverit homini studioso fortassis victoriæ, sed tamen nimium communem Martem bellicque casum metuenti? longum est ea dicere; sed hoc breve dicam. Si M. Petreii non excellens animo & amore reipublicæ virtus, non summa auctoritas apud milites, non mirificus usus in re militari exstitisset, neque adjutor ei P. Sextius ad excitandum Antonium, cohortandum, impellendum fuisset; datus illo in bello esset hiemi locus, neque umquam Catilina, quum e pruina Apennini, atque e nivibus illis emersisset, atque æstatem integram nactus, Italiæ calles & pastorum stabula præclara cepisset, sine multo sanguine; ac sine totius Italiæ vastitate miserrima concidisset.

13. Hunc igitur animum ad tribunatum attulit P. Sextius ; ut quæsturam Macedoniae relinquam , & aliquando ad hæc propiora veniam ; quamquam non est omit-tenda singularis illa integritas provincialis , cujus ego nuper in Macedonia vidi vesti-gia , non pressa leviter ad exigui prædicationem temporis , sed fixa ad memo-riam illius provinciæ sempiternam. Ve-rum hæc ita prætereamus , ut tamen in-tuentes , & respectantes relinquamus.

VI. Ad tribunatum , quia ipse ad sese jam dudum vocat , & quodammodo ab-sorbet orationem meam , contento studio cursuque veniamus : de quo quidem tri-bunatu ita dictum a Q. Hortensio , ut ejus oratio non defensionem modò cri-minum videretur continere , sed etiam memoriâ digna esset , uti & reipublicæ capeffendæ auctoritatem , disciplinamque præscriberet. Sed tamen , quoniam tribu-natus quidem totus P. Sextii nihil aliud nisi nomen meum causamque sustinuit , necessario mihi de iisdem rebus esse arbi-tror , si non subtiliùs disputandum , at certè , Judices , dolentiùs deplorandum. Qua in oratione si asperius in quosdam homines invehi vellem , quis non conce-deret , ut eos , quorum scelere & furore violatus essem , vocis libertate perstringe-rem ? Sed agam moderatè , & hujus po-tius

tius tempori serviam, quàm dolori meo : si qui occultè a salute nostra dissentiant ; lateant : si qui fecerunt aliquid aliquando, atque iidem nunc tacent, & quiescunt, nos quoque simus obliti : si qui se offenderunt insolenter & insectantur, quoad ferri poterunt, perferemus ; neque quemquam offendet oratio mea, nisi qui se ita obtulerit, ut in eum non invasisse, sed incurrisse videamur. Sed necesse est, antequam de tribunatu P. Sextii dicere incipiam, me totum superioris anni reipublicæ naufragium exponere : in quo colligendo ac reficienda salute communi, omnia reporientur P. Sextii dicta, facta, consilia ver-
fata.

VII. Fuerat ille annus in reipublicæ magno motu, & multorum timore, tanquam intentus arcus in me unum, sicut vulgò ignari rerum loquebantur, re quidem verà in universam rempublicam, traductione ad plebem furibundi hominis ac perditum, mihi irati, sed multò acrius otii & communis salutis inimici. Hunc vir clarissimus, mihiq;e, multis repugnantibus, amicissimus, Cn. Pompeius, omni cautione, fœdere, execratione devinxerat, nihil in tribunatu contra me esse facturum. At ille nefarius, ex omnium scelerum coluvione natus, parum se fœdus violaturum est arbitratus, nisi ipsum cauto-rem

alieni periculi suis propriis periculis terruisset.

16. Hanc tetram immanemque beluam, vinctam auspiciis, alligatam more majorum, constrictam legum sacratarum catenis, solvit subito legum consul, vel, ut ego arbitror, exoratus, vel, ut non nemo putaret, mihi iratus; ignarus quidem certè, & imprudens impendentium tantorum scelerum ac malorum. Qui, tribunus plebis, felix in evertenda republica fuit nullis suis nervis: qui enim in ejusmodi vita nervi esse potuerunt, hominis, fraternis flagitiis, sororiis stupris, omni inauditâ libidine infani?

17. Sed fuit profectò quædam illa reipublicæ fortuna fatalis, ut ille cæcus atque amens tribunus plebis nancisceretur, quid dicam consules? hocce ut ego appellem nomine eversores hujus imperii? proditores vestræ dignitatis? hostes bonorum omnium? qui ad delendum senatum, affligendum equestrem ordinem, extinguenda omnia jura atque instituta majorum, se illis fascibus, ceterisque insignibus summi honoris atque imperii ornatos esse arbitrabantur? Quorum, per deos immortales, si nondum scelera, vulneraque inusta reipublicæ vultis recordari; vultum, atque incessum animis intueamini: facilius facta eorum occurrent mentibus vestris, si ora ipsa oculis proposueritis.

VIII. Alter unguentis affluens, calamistratâ comâ, despiciens conscios stuprorum, ac veteres vexatores ætaturæ suæ, puteali & fœneratorum gregibus inflatus, atque perculsus, olim ne Scyllæo illo æris alieni in freto ad columnam adhæresceret, in tribunatûs portum perfugerat. Contemnebat equites Romanos, minitabatur senatui, venditabat se operis, atque ab iis se ereptum, ne de ambitu causam diceret, prædicabat, ab iisdemque se etiam, invito senatu, provinciam sperare dicebat; eamque nisi adeptus esset, se incolumem nullo modo fore arbitrabatur.

19. Alter, ô dii boni! quàm teter incedebat! quàm truculentus! quàm terribilis adspectu! unum aliquem te ex barbatis illis, exemplum imperii veteris, imaginem antiquitatis, columen reipublicæ diceres intueri: vestitus asperè nostrâ hac, purpurâ plebeîâ, ac pene fuscâ: capillo ita horrido, ut Capuâ, in qua ipse tum imaginis ornandæ causâ duumviratum gerebat, Seplasiâ sublaturus videretur. Nam quid ego de supercilio dicam? quod tum hominibus non supercilium, sed pignus reipublicæ videbatur: tanta erat gravitas in oculo, tanta contractio frontis, ut illo supercilio respublica, tamquam Atlante cœlum, niti videretur. Erat denique hic omnium sermo: Est tamen reipublicæ ma-

gnum firmumque subsidium: habeo quem opponam labi illi atque cœno: vultu, mediis fidiis, collegæ sui libidinem levitatemque franget: habebit senatus in hunc annum quem sequatur: non deerit auctor & dux bonis: mihi denique homines præcipuè gratulabantur, quòd habiturus essem contra tribunum plebis furiosum & audacem, quum amicum & affinem, tum etiam fortem & gravem consulem.

IX. Atque eorum alter fefellit neminem: quis enim clavum tanti imperii tenere, & gubernacula reipublicæ tractare in maximo cursu ac fluctibus posse arbitraretur hominem emersum subitò ex diuturnis tenebris lustrorum ac stuprorum? vino, ganeis, lenociniis, adulteriisque confectum? quum is præter spem in altissimo gradu alienis opibus positus esset, qui non modò tempestatem impendentem intueri temulentus, sed ne lucem quidem insolitam adspicere posset?

21. Alter multos planè in omnes partes fefellit: erat enim hominum opinione, nobilitate ipsâ, blandâ conciliatriculâ, commendatus. Omnes boni semper nobilitati favemus, & quia utile est reipublicæ, nobiles homines esse dignos majoribus suis, & quia valet apud nos clarorum hominum, & bene de republica meritorum memoria, etiam mortuorum. Quia

tristem semper , quia taciturnum , quia subhorridum atque incultum videbant , & quòd erat eo nomine , ut ingenerata familiæ frugalitas videretur ; favebant , gaudebant , & ad integritatem majorum spe suâ hominem vocabant , materni generis obliiti.

22. Ego autem (verè hoc dicam , Judices) tantum esse in homine sceleris , audaciæ , crudelitatis , quantum ipse cum republica sensi , numquam putavi : nequam esse hominem , & levem , & falsâ opinione , errore hominum ab adolescentia commendatum , sciebam : etenim animus ejus vultu , flagitia parietibus tegebantur ; sed hæc obstructio nec diuturna est , nec obducta ita , ut curiosis oculis perspicere non possit.

X. Videbamus genus vitæ , desidiâ , inertiam : inclusas ejus libidines , qui paulò propius accesserant , intuebantur : denique etiam sermonis ansas dabat , quibus reconditos ejus sensus tenere possemus. Laudabat homo doctus philosophos nescio quos ; neque eorum tamen nomina poterat dicere : sed tamen eos laudabat maximè , qui dicuntur præter ceteros esse auctores & laudatores voluptatis : cujus , & quo tempore , & quo modo , non quærebat ; verbum ipsum omnibus modis animi & corporis devorabat : eosdemque

præclarè dicere aiebat, Sapientes omnia suâ causâ facere : rempublicam capeffere hominem bene sanum non oportere : nihil esse præstabilius otiosâ vitâ, & plenâ & confertâ voluptatibus : eos autem, qui dicerent, dignitati esse serviendum, reipublicæ consulendum, officii rationem in omni vita, non commodi, esse ducendam, subeunda pro patria pericula, vulnera excipienda, mortem oppetendam ; vaticinari, atque insanire dicebat.

24. Ex his assiduis ejus quotidianisque sermonibus, & quodd videbam, quibuscum hominibus in interiore ædium parte viveret, & quodd ita domus ipsa fumabat, ut multa ejus sermonis indicia redoleret ; statuebam sic, boni nihil ab illis nugis exspectandum, mali quidem certè nihil pertimescendum. Sed ita est, Judices, ut, si gladium parvo puero, aut si imbecillo feni, aut debili dederis, ipse impetu suo nemini noceat ; sin ad nudum vel fortissimi viri corpus accesserit, possit acie ipsâ, & ferri viribus vulnerari : ita quum hominibus enervatis atque exsanguibus consulatus, tamquam gladius, esset datus, qui per se pungere neminem unquam potuissent, hi summi imperii nomine armati rempublicam contrucidaverunt. Fœdus fecerunt cum tribuno plebis palam, ut ab eo provincias acciperent, quas ipsi vel-

lent : exercitum , & pecuniam , quantam vellent , ea lege , si ipsi prius tribuno plebis afflictam & constrictam rempublicam tradidissent : id autem fœdus meo sanguine ictum sanciri posse dicebant. Quâ re patefactâ (neque enim dissimulari tantum scelus poterat , nec latere) promulgantur uno eodemque tempore rogationes ab eodem tribuno de mea pernicië , & de provinciis consulum nominatim.

XI. Hic tum senatus sollicitus , vos equites excitati , Italia cuncta permota ; omnes denique omnium generum atque ordinum cives summæ reipublicæ a consulibus , atque a summo imperio petendum esse auxilium arbitrabantur , quum illi soli essent , præter furiosum illum tribunum , duo reipublicæ turbines , qui non modò præcipitanti patriæ non subvenirent , sed eam nimium tardè concidere mœrerent. Flagitabatur ab his quotidie quum querelis bonorum omnium , tum etiam precibus senatûs , ut meam causam fusciperent , agerent ; aliquid denique ad senatum referrent : hi non modò negando , sed etiam irridendo , amplissimum quemque illius ordinis insequabantur.

26. Hic subito quum incredibilis in Capitolium multitudo ex tota urbe cunctaque Italia convenisset , vestem mutandam omnes , meque etiam omni ratione , privato

consilio (quoniam publicis ducibus respública careret) defendendum putarunt. Erat eodem tempore senatus in æde Concordiæ , quod ipsum templum repræsentabat memoriam consulatûs mei , quum flens universus ordo cincinnatum consulem orabat ; nam alter ille horridus & severus consultò se domi continebat. Quâ tum superbiâ cœnum illud ac labes amplissimi ordinis preces & clarissimorum civium lacrymas repudiavit ? me ipsum ut contempnit helluo patriæ ? nam quid ego patrimonii dicam , quod ille quum quasi quæstum faceret , amisit ? Quum venisset ad senatum , vos , inquam , equites Romani , & omnes boni , veste mutatâ , vos , inquam , pro meo capite ad pedes lenonis impurissimi projecistis , quum , vestris precibus a latrone illo repudiatis , vir incredibili fide , magnitudine animi , constantiâ , L. Mummius ad senatum de republica retulit ; senatusque frequens vestem pro mea salute mutandam censuit.

XII. O diem illum , Judices , funestum senatui , bonisque omnibus ! reipublicæ luctuosum ! mihi ad domesticum mœrorem gravem ! ad posteritatis memoriam gloriosum ! Quid enim quisquam potest ex omni memoria sumere illustrius , quàm pro uno cive & bonos omnes privato consensu , & universum senatum publico con-

silio mutasse vestem? quæ quidem tum mutatio non deprecationis causâ est facta, sed luctûs: quem enim deprecarentur, quum omnes essent sordidati? quumque hoc satis esset signi, esse improbum, qui mutatâ veste non esset? Hâc mutatione vestis factâ, tanto in luctu civitatis, omitto quid ille tribunus, omnium rerum divinarum humanarumque prædo, fecerit; qui adesse nobilissimos adolescentes, honestissimos equites Romanos, deprecatores salutis meæ jusserit, eosque operarum suarum gladiis & lapidibus objecerit: de consulibus loquor, quorum fide respublica niti debuit.

28. Exanimatus evolat ex senatu, non minùs perturbato animo atque vultu, quàm si paucis antè annis in creditorum conventum incidisset: advocat concionem: habet orationem talem consul, qualem numquam Catilina victor habuisset: Errare homines, si etiam tum senatum aliquid in republica posse arbitrarentur: equites verò Romanos datuos illius diei pœnas, quo, me consule, cum gladiis in clivo Capitolino fuissent: venisse tempus iis, qui in timore fuissent (conjuratos videlicet dicebat) ulciscendi se. Si dixisset hoc solùm, omni supplicio esset dignus: nam oratio ipsa consulis perniciofa potest rempublicam labefactare. Quid fecerit,

videte. L. Lamiam, qui quum me ipsum pro summa familiaritate, quæ mihi cum fratre, cum patre ejus erat, unicè diligebat, tum pro republicâ vel mortem optetere cupiebat, in concione relegavit; edixitque, ut ab urbe abesset millia passuum ducenta; quòd esset ausus pro cive, pro bene merito cive, pro amico, pro republica deprecari.

XIII. Quid hoc homine facias? aut quòd civem importunum, aut quòd potius hostem tam sceleratum reserves? qui, ut omittam cetera, quæ sunt ei cum collega immani impuroque conjuncta, atque communia, hoc unum habet proprium, ut expulerit ex urbe, relegarit, non dico equitem Romanum, non ornatissimum atque optimum virum, non amicissimum reipublicæ civem; non illo ipso tempore unâ cum senatu & cum bonis omnibus easum amici reique publicæ lugentem; sed civem Romanum sine ullo judicio, aut edicto, ex patria consul ejecerit.

30. Nihil acerbius focii Latini ferre soliti sunt, quàm, id quod perrarè accidit, ex urbe exire a consulibus juberi. Atque illis tum erat reditus in suas civitates, ad suos lares familiares; & in illo communi incommodo nulla in quemquam propria ignominia nominatim cadebat. Hoc verò quid est? exterminabit cives Romanos

edicto consul a suis diis penatibus? expellet a patria? deliget quem volet? damnabit atque ejiciet nominatim? Hic, si umquam vos eos, qui nunc estis in republica, fore putasset, si denique imaginem judiciorum, aut simulacrum aliquod futurum in civitate reliquum credidisset, umquam ausus esset senatum de republica tollere? equitum Romandrum preces aspernari? civium denique omnium, novis & inauditis edictis, jus libertatemque pervertere?

31. Etsi me attentissimis animis, summa cum benignitate auditis, Judices; tamen vereor, ne quis fortè vestram miretur, quid hæc mea oratio tam longa ac tam altè repetita velit, aut quid ad P. Sextii causam eorum, qui ante hujus tribunatum rempublicam vexarunt, delicta pertineant: mihi autem hoc propositum est ostendere, omnia consilia P. Sextii, mentemque totius tribunatus hanc fuisse, ut afflictæ & perditæ reipublicæ, quantum posset, mederetur. Ac, si in exponendis vulneribus illis de me ipso plura dicere videbor, ignoscite: nam & illam meam cladem vos & omnes boni maximum esse reipublicæ vulnus judicastis; & P. Sextius est reus non suo, sed meo nomine; qui quum omnem vim sui tribunatus in mea salute consumpserit, necesse

est meam causam præteriti temporis cum hujus præsentis defensione esse conjunctam.

XIV. Erat igitur in luctu senatus : squalibat civitas , publico consilio mutatâ veste : nullum erat Italiæ municipium , nulla colonia , nulla præfectura , nulla Romæ societas vectigalium , nullum collegium , aut concilium , aut omnino aliquod commune consilium , quod tum non honorificentissimè decrevisset de mea salute : quum subito edicunt duo consules , ut ad suum vestitum senatores redirent. Quis umquam consul senatum ipsius decretis parere prohibuit ? quis tyrannus miseros lugere vetuit ? Parumne est , Piso , ut omittam Gabinium , quod tantum homines fefellisti , ut negligeres auctoritatem senatûs ? optimi cujusque consilia contemneres ? rempublicam proderes ? consulare nomen affligeres ? etiamne edicere audebas , ne mœrerent homines meam , suam , rei publicæ calamitatem ? ne hunc suum dolorem veste significarent ? sive illa vestis mutatio ad luctum ipsorum , sive ad deprecandum valebat , quis umquam tam crudelis fuit , qui prohiberet quemquam aut sibi mœrere , aut ceteris supplicare ?

33. Quid ? suâ sponte homines in amicorum periculis vestitum mutare non solent ? pro te ipso , Piso , nēmone muta-

vit? ne isti quidem, quos legatos non modò nullo senatusconsulto, sed etiam repugnante senatu, tute tibi legasti? Ergo hominis desperati, & proditoris reipublicæ casum lugebunt fortasse qui volent; civis florentissimi benevolentiam bonorum, & optimè de salute patriæ meriti, periculum, conjunctum cum periculo civitatis, lugere senatui non licebit? Iidem consules (si appellandi sunt consules, quos nemo est, qui non modò ex memoria, sed etiam ex fastis evellendos putet) pacto jam fœdere provinciarum; producti in circo Flaminio in concionem ab illa furia ac peste patriæ, maximo cum gemitu vestro, illa omnia, quæ tum contra me contraque rempublicam dixerat; voce ac sententiâ suâ comprobaverunt.

XV. Iisdem consulibus sedentibus, atque inspectantibus, lata lex est, ne auspicia valerent, ne quis obnuntiaret, ne quis legi intercederet; ut omnibus fastis diebus legem ferri liceret; ut lex Ælia, lex Fusia ne valeret: quâ unâ rogatione, quis est, qui non intelligat, universam rempublicam esse deletam? Iisdem consulibus inspectantibus, servorum delectus habebatur pro tribunali Aurelio, nomine collegiorum, quum vicatim homines conscriberentur, decuriarentur, ad vim, ad manus, ad cædem, ad direptionem inci-

tarentur. Iisdem consulibus arma in templum Castoris palam comportabantur, gradus ejusdem templi tollebantur: armati homines forum & conciones tenebant: cædēs, lapidationesque fiebant: nullus erat senatus, nihil reliqui magistratus: unus omnem omnium potestatem armis & latrociniis possidebat, non aliquā vi suā, sed quum duo consules a republica provinciarum foedere retraxisset, insultabat, dominabatur, aliis pollicebatur, terrore ac metu multos, plures etiam spe & promissis tenebat.

35. Quæ quum essent ejusmodi, Judices, quum senatus duces nullos, ac producibus proditores, aut potius apertos hostes haberet; equester ordo reus a consulibus citaretur; Italiæ totius auctoritas repudiaretur; alii nominatim relegarentur, alii metu ac periculo terrentur; arma essent in templis, armati in foro; eaque non silentio consulum dissimularentur, sed & voce & sententiâ comproba-
rentur: quum omnes urbem nondum excisam & everfam, sed jam captam atque oppressam videremus; tamen his tantis malis, tanto bonorum studio, Judices, restitissimus: sed me alii metus, atque altæ curæ, suspicionesque moverunt.

XVI. Exponam enim hodierno die, Judices, omnem rationem facti & consi-

hi mei ; neque huic vestro tanto studio audiendi , neque verò huic tantæ multitudini , quanta , meâ memoriâ , numquam ullo in iudicio fuit , deero : nam , si ego in causa tam bona , tanto studio senatus , consensu tam incredibili bonorum omnium , tam parato , totâ denique Italiâ ad omnem contentionem expeditâ , cessi tribuni plebis , despiciatissimi hominis , furori ; contemptissimorum consulum levitatem , audaciamque pertimui ; nimium me timidum , nullius animi , nullius consilii fuisse confiteor.

37. Quid enim simile fuit in Q. Metello ? cujus causam etsi omnes boni probabant , tamen neque senatus publicè , neque ullus ordo propriè , neque suis decretis Italia tota susceperat : ad suam enim magis quamdâ ille gloriam , quàm ad perspicuam salutem reipublicæ spectarat , quum unus in legem per vim latam jurare noluerat : denique videbatur eâ conditione tam fortis fuisse , ut cum patriæ caritate constantiæ gloriam commutaret. Erat autem ei res cum exercitu C. Marii invicto : habebat inimicum C. Marium , conservatorem patriæ , sextum jam illum consulatum gerentem : res erat cum L. Saturnino iterum tribuno plebis , vigilante homine , & in causa populari si non moderatè , at certè populariter abstinenter-

que versato : cessit , ne aut victus a fortibus viris cum dedecore caderet ; aut victor multis & fortibus civibus rempublicam orbaret.

38. Meam causam senatus palam , equester ordo acerrimè , cuncta Italia publicè , omnes boni propriè enixèque susceperant : eas res gesseram , quarum non unus auctor , sed dux omnium voluntatis fuisset , quæque non modò ad singularem meam gloriam , sed ad salutem communem omnium civium & propè gentium pertinerent : eâ conditione gesseram , ut meum factum semper omnes præstare , tuerique deberent.

XVII. Erat autem mihi contentio non cum victore exercitu , sed cum operis conductis , & ad diripiendam urbem concitatis : habebam inimicum non C. Marium , terrorem hostium , spem subsidiumque patriæ ; sed duo importuna prodigia , quos egestas , quos æris alieni magnitudo , quos levitas , quos improbitas tribuno plebis constrictos addixerat.

39. Nec mihi res erat cum Saturnino , qui , quodd a se , quæstore Ostiensi , per ignominiam , ad principem & senatûs & civitatis , M. Scaurum , rem frumentariam translata sciebat , dolorem suum magnâ contentione animi persequabatur ; sed cum scurrarum locupletium scorto , cum foro-

ris adultero , cum stuprorum sacerdote , cum venefico , cum testamentario , cum sicario , cum latrone : quos homines , si , id quod facile factu fuit , & quod fieri debuit , quodque a me optimi & fortissimi cives flagitabant , vi armisque superassem , non verebar , ne quis aut vim vi repulsam reprehenderet , aut perditorum civium , vel potius domesticorum hostium mortem mœreret : sed me illa moverunt ; omnibus in concionibus illa furia clamabat , se , quæ faceret contra salutem meam , facere auctore Cn. Pompeio , clarissimo viro , mihiq̃ue & nunc , & quoad licuit , amicissimo. M. Crassus , quocum mihi erant omnes amicitiae necessitudines , vir fortissimus , ab eadem illa peste infestissimus esse meis fortunis prædicabatur. C. Cæsar , qui a me nullo meo merito alienus esse debebat , inimicissimus esse meæ salutis ab eodem quotidianis concionibus dicebatur.

40. His se tribus auctoribus in consiliis capiendis , adjutoribus in re gerenda esse usurum dicebat ; ex quibus unum , habere exercitum in Italia maximum : duo , qui privati tum essent , & præesse , & parare , si vellent , exercitum posse ; idque facturos esse dicebat : nec mihi ille iudicium populi , nec legitimam aliquam contentionem , nec disceptionem , aut causæ dic-

tionem , sed vim , arma , exercitus , imperatores , castra denuntiabat.

XVIII. Quid ergo ? inimici oratio ; vana præsertim , tam improbè in clarissimos viros conjecta , me movit ? Me verò non illius oratio , sed etiam eorum taciturnitas , in quos illa oratio tam improba conferebatur : qui tum , quamquam ob aliam causam tacebant , tamen hominibus , omnia timentibus , tacendo loqui , non infitiando confiteri videbantur : illi autem aliquo tum timore perterriti , quòd acta illa atque omnes res anni superioris labefactari a prætoribus , infirmari a senatu atque principibus civitatis putabant , tribunum popularem a se alienare nolebant , suæque sibi propiora pericula esse , quàm meæ , loquebantur.

41. Sed tamen & Crassus a consulibus meam causam suscipiendam esse dicebat ; & eorum fidem Pompeius implorabat ; neque se privatum publicè susceptæ causæ defuturum esse dicebat : quem virum studiosum mei , cupidissimum reipublicæ conservandæ , domi meæ certi homines ad eam rem compositi monuerunt , ut esset cautior ; ejusque vitæ a me insidias apud me domi positas esse dixerunt : atque hanc ei suspicionem alii litteris mittendis , alii nuntiis , alii coràm ipsi excitaverunt , ut ille , quum a me certè nihil timeret ,

ab illis, ne quid meo nomine molirentur, sibi cavendum putaret. Ipse autem Cæsar, quem maximè homines ignari veritatis, mihi esse iratum putabant, erat ad portas, erat cum imperio; erat in Italia ejus exercitus, inque eo exercitu ipsius tribuni plebis inimici mei fratrem præferebat.

XIX. Hæc ego quum viderem, neque enim erant occulta, senatum, sine quo civitas stare non posset, omnino de civitate esse sublatum; consules, qui publici consilii duces esse deberent, perfecisse, ut per ipsos publicum consilium funditus tolleretur; eos, qui plurimum possent, opponi omnibus concionibus falsò, sed formidolosè tamen, auctores ad perniciem meam; conciones haberi quotidie contra me; vocem pro me, ac pro republica neminem mittere; intenta signa legionum existimari cervicibus ac bonis vestris, falsò, sed putari tamen; conjuratorum copias veteres, & effusam illam ac superatam Catilinæ manum importunam, novo duce & insperatâ commutatione rerum esse renovatam.

43. Hæc quum viderem, quid agerem; Judices? scio enim, tum non mihi vestrum studium, sed meum propè vestro defuisse: contenderem contra tribunum plebis privatus armis? vicissent improbos

boni , fortes inertes : interfectus esset is , qui hac unâ medicinâ solâ potuit a reipublicæ peste depelli. Quid deinde ? quid reliquiarum restaret ? quid denique erat dubium , quin ille sanguis tribunitius , nullo præsertim publico consilio profusus , consules ultores & defensores esset habiturus ? quum quidem in concione dixisset , aut mihi semel pereundum , aut bis esse vincendum. Quid erat bis vincere ? Id profectò , ut , cum amentissimo tribuno plebis quum decertassem , cum consulibus ceterisque ejus ultoribus dimicaret.

44. Ego verò , si mihi uni pereundum fuisset , ac non accipienda plaga mihi sanabilis , illis mortifera , qui eam imposuissent ; semel perire tamen , Judices , maluissem , quàm bis vincere : erat enim illa altera ejusmodi contentio , ut neque victi , neque victores rempublicam tenere possemus. Quid si in primâ contentione , vi tribunitiâ victus , in foro , cum multis bonis viris concidissem ? senatum consules , credo , vocassent , quem totum de civitate delerant : ad arma vocarent , qui ne vestitu quidem defendi rempublicam sissent : a tribuno plebis post interitum meum dissidissent , qui eandem horam meæ pestis & suorum præmiorum esse voluissent.

XX. Unum enim mihi restabat illud, quod forsitan non nemo vir fortis & acris animi magnique dixerit: Restitisses, repugnasses, mortem pugnans appetisses. De quo te, te, inquam, Patria, testor, & vos Penates patriique Dii, me vestrarum sedium templorumque causâ, me propter salutem meorum civium, quæ mihi semper fuit meâ carior vitâ, dimicationem cædemque fugisse. Etenim, si mihi in aliqua nave cum meis amicis naviganti, hoc, Judices, accidisset, ut multi ex multis locis prædones classibus eam navem se oppressuros minitarentur, nisi me unum sibi dedidissent; si id vectores negarent, ac mecum simul interire, quàm me tradere hostibus mallent; jecissem me ipse potius in profundum, ut ceteros conservarem, quàm illos mei tam cupidos non modò ad certam mortem, sed in magnum vitæ discrimen adducerem.

46. Quum verò in hanc reipublicæ navem, ereptis senatui gubernaculis, fluitantem in alto tempestatibus seditionum ac discordiarum, armatæ tot classes, nisi ego unus deditus essem, incursturæ viderentur: quum proscriptio, cædes, direptio denuntiarentur: quum alii me suspicionem periculi sui non defenderent, alii vetere odio bonorum incitarentur, alii inviderent, alii obstare sibi me arbitraren-

tur, alii ulcisci dolorem suum aliquem vel-
lent, alii rem ipsam publicam atque hunc
bonorum statum otiumque odissent, & ob
hasce causas, tot, tamque varias, me
unum deposcerent: depugnarem potius
cum summo, non dicam exitio, sed pe-
riculo certè vestro liberorumque vestro-
rum, quàm non id, quod omnibus im-
pendebat, unus pro omnibus susceperem
ac subirem?

XXI. Victi essent improbi. At cives;
at ab eo privato, qui sine armis etiam
consul rempublicam conservarat: sin victi
essent boni; quid superesset? non ad ser-
vos videtis rem venturam fuisse? An mihi
ipsi, ut quidam putant, fuit mors æquo
animo oppetenda? quid? tum mortemne
fugiebam? an erat res nulla, quam mihi
magis optandam putarem? aut ego illas
res tantas, in tanta improborum multitu-
dine quum gerebam, non mihi mors,
non exsilium ob oculos versabantur? non
hæc denique a me tum, tamquam fata,
in ipsa re gerenda concinebantur? An
erat mihi in tanto luctu meorum, tanta
disjunctione, tanta acerbitate, tanta spo-
liatione omnium rerum, quas mihi aut
natura aut fortuna dederat, vita retinen-
da? tam eram rudis? tam ignarus rerum?
tam expers consilii, aut ingenii? nihil au-
dieram? nihil videram? nihil ipse legendo

quærendoque cognoveram? nesciebam vitæ brevem esse cursum, gloriæ sempiternum? quum esset omnibus definita mors, optandum esse, ut vita, quæ necessitati deberetur, patriæ potius donata, quàm reservata naturæ videretur? nesciebam, inter sapientissimos homines hanc contentionem fuisse, ut alii dicerent animos hominum sensusque morte restingui, alii autem tum maximè mentes sapientium ac fortium virorum, quum e corpore excessissent, sentire ac vigere? quorum alterum fugiendum non esse, carere sensu; alterum etiam optandum, meliore esse sensu.

48. Denique, quum omnia semper ad dignitatem retulissem, nec sine ea quidquam expetendum esse homini in vita putassem; mortem, quam etiam virgines Athenis, regis, opinor, Erechthei filiæ, pro patria contempsisse dicuntur, ego vir consularis, tantis rebus gestis, timerem? præsertim quum ejus essem civitatis, ex qua Q. Mucius solus in castra Porßenæ venisset, eumque interficere, propositâ sibi morte, conatus esset? ex quâ P. Decius primùm pater, post aliquot annos patriâ virtute præditus filius, se ac vitam suam, instructâ acie, pro salute populi Romani victoriaque devovisset? ex qua innumerabiles alii, partim adipiscendæ

laudis, partim vitandæ turpitudinis causâ; mortem, in variis bellis, æquissimis animis oppetissent? in qua civitate ipse meminisset, patrem hujus M. Crassi, fortissimum virum, ne videret victorem vivus inimicum, eâdem sibi manu vitam exhausisse, quâ mortem sæpe hostibus obtulisset?

XXII. Hæc ego & multa alia cogitans, hoc videbam, si causam publicam mea mors peremisset, neminem umquam fore, qui auderet suscipere contra improbos cives reipublicæ salutem. Itaque non solum si vi interissem, sed etiam si morbo extinctus essem, fore putabam, ut exemplum reipublicæ conservandæ mecum simul interiret. Quis enim umquam, me a senatu populoque Romano, tanto omnium bonorum studio, non restituto (quod certè, si essem interfectus, accidere non potuisset) ullam reipublicæ partem cum sua minima invidia auderet attingere? Servavi igitur rempublicam discessu meo, Judices: cædem a vobis, liberisque vestris, vastitatem, incendia, rapinas, meo dolore meoque luctu depuli; & unus rempublicam bis servavi, semel gloriâ, iterum ærumnâ meâ. Neque enim in hoc me hominem esse infitiabor umquam, ut me optimo fratre, carissimis liberis, fidelissimâ conjuge, vestro conspectu, patriâ,

triâ, hoc honoris gradu, sine dolore ca-
fuisse gloriari: quod si fecissem; quod a
me beneficium haberetis, quum pro vobis
ea, quæ mihi essent vilia, reliquissem?
Hoc, meo quidem animo, summi in pa-
triam amoris mei signum esse debet cer-
tissimum, quòd, quum abesse ab ea non
possem sine summo dolore, hunc me per-
peti, quàm illam labefactari ab improbis,
malui.

50. Memineram, Iudices, divinum il-
lum virum, atque ex iisdem, quibus nos,
radicibus natum ad salutem imperii hujus,
C. Marium, summâ senectute, quum vim
propè justorum armorum profugisset, pri-
mò senile corpus paludibus occultasse de-
mersum: deinde ad infimorum ac tenuis-
simorum hominum Minturnis misericor-
diam confugisse: inde navigio perparvo,
quum omnes portus terrasque fugeret, in
oras Africæ desertissimas pervenisse. At-
que ille vitam suam, ne inultus esset, ad
incertissimam spem, & * ad reipublicæ
statum reservavit: ego, qui (quemadmo-
dum multi in senatu, me absente, dixe-
runt) periculo reipublicæ vivebam, qui-
que ob eam causam consularibus litteris de
senatûs sententia exteris nationibus com-
mendabar, nonne, si meam vitam dese-
ruissem, rempublicam prodidissem? in
quo quidem nunc, me restituto, vivit me-

cum simul exemplum fidei publicæ, exemplum reipublicæ defendendæ: quod si immortale retinetur, quis non intelligit, immortalem hanc civitatem futuram?

XXIII. Nam externa bella regum, gentium, nationum, jampridem ita extincta sunt, ut præclare cum iis agamus, quos pacatos esse patiamur: denique ex bellica victoria non ferè quemquam est invidia civium consecuta: domesticis malis, & audacium civium consiliis sæpe est resistendum; eorumque periculorum est in republica retinenda medicina: quam omnem, Judices, perdidissetis, si meo interitu senatui populoque Romano doloris sui de me declarandi potestas esset erepta. Quare moneo vos, adolescentes, atque hoc meo jure præcipio, qui dignitatem, qui rempublicam, qui gloriam spectatis; ne, si qua vos aliquando necessitas ad rempublicam contra improbos cives defendendam vocabit, segniores sitis, & recordatione mei casus a consiliis fortibus refugiatis.

52. Primùm, non est periculum, ne qui umquam sint in civitate ejusmodi consules, præsertim si erit his id, quod debetur, persolutum: deinde numquam jam, ut spero, quisquam improbus consilio & auxilio bonorum se oppugnare rempublicam dicet, illis tacentibus; nec

armati exercitûs terrorem opponet togatis; neque erit iusta causa ad portas sedenti imperatori, quare terrorem suum falsò jactari, opponique patiatur: numquam enim erit tam oppressus senatus, ut ei ne supplicandi quidem ac lugendi sit potestas: tam captus equester ordo, ut equites Romani a consule relegentur. Quæ quum omnia, atque etiam multò alia majora, quæ consultò prætereo, accidissent, vidissetis me tamen in pristinam meam dignitatem, brevi temporis dolore interjecto, reipublicæ voce esse revocatum.

XXIV. Sed, ut revertar ad illud, quod mihi in hac omni est oratione propositum, omnibus malis illo anno, scelere confusum, rempublicam esse confectam; primum illo ipso die, qui mihi funestus fuit, omnibus bonis luctuosus, quum ego me e complexu patriæ conspectuque vestro eripuissem, & metu vestri periculi, non mei, furori hominis, sceleri, perfidiæ, telis, minisque cessissem; patriamque, quæ mihi erat carissima, propter ipsius patriæ caritatem reliquissem: quum meum illum casum tam horribilem, tam gravem, tam repentinum, non solum homines, sed tecta urbis ac templa lugerent: nemo vestrum forum, nemo curiam, nemo lucem adspicere vellet: illo, inquam, ipso die, die dico? immo horâ, atque etiam puncto

temporis eodem , mihi , reique publicæ perniciēs ; Gabinio , & Pisoni provincia rogata est. Proh dii immortales , custodes & conservatores hujus urbis atque imperii ! quænam illa in republica monstra , quæ scelera vidistis ? civis erat expulsus is , qui rempublicam ex senatûs auctoritate cum omnibus bonis defenderat ; & expulsus non alio aliquo , sed eo ipso crimine : erat autem expulsus sine judicio , vi , lapidibus , ferro , servitio denique concitato : lex erat lata , vastato ac relicto foro , & sicariis servisque tradito ; & ea lex , quæ ut ne ferretur , senatus fuerat veste mutatâ.

54. Hac tanta perturbatione civitatis , ne noctem quidem consules inter meum discrimen , & eorum prædam , interesse passi sunt : statim , me perculso , ad meum sanguinem hauriendum , & , spirante etiam republicâ , ad ejus spolia detrahenda advolaverunt. Omitto gratulationes , epulas , partitionem ærarii , beneficia , spem , promissa , prædam , lætitiâ paucorum in luctu omnium : vexabatur uxor mea : liberi ad necem quærebantur ; gener , & Piso gener , a Pisonis consulis pedibus supplex rejiciebatur : bona diripiebantur , eaque ad consules deferiebantur : domus ardebat in palatio : consules epulabantur. Quòd si meis incommodis lætabantur , urbis tamen periculo commoverentur.

XXV. Sed, ut a mea causa jam recedam, reliquas illius anni pestes recordamini: sic enim facillimè perspicietis, quantam vim omnium remediorum a magistratibus proximis respublica desiderarit: legum multitudinem, quum earum, quæ latæ sunt; tum verò, quæ promulgatæ fuerunt: nam latæ quidem sunt consulis illis, tacentibus dicam? immo verò approbantibus etiam, ut censoria notio, & gravissimum iudicium sanctissimi magistratus de republica tolleretur; ut collegia non modò illa vetera contra fenatùs consultum restituerentur, sed ab uno gladiatore innumerabilia alia nova conscriberentur; ut, remissis semissibus & trientibus, quinta propè pars vectigalium tolleretur; ut Gabinio pro illà sua Cilicia, quam sibi, si rempublicam prodidisset, pactus erat, Syria daretur; ut uni helluoni bis de eadem re deliberandi, &, rogatâ lege, potestas fieret provinciæ commutandæ.

XXVI. Mitto eam legem, quæ omnia jura religionum, auspiciorum, potestatum, omnes leges, quæ sunt de jure & de tempore legum rogandarum, unâ rogatione delevit: mitto omnem domesticam labem: etiam exteris nationes illius anni furore conquassatas videbamus. Lege tribuniâ Matris Magnæ Pessinuntius

K. iij

ille sacerdos expulsus & spoliatus sacerdotio est , fanumque sanctissimarum atque antiquissimarum religionum venditum pecuniâ grandi , Brogitaro , impuro homini , atque indigno illa religione ; præsertim quum ea sibi ille non colendi , sed violandi causâ appetisset : appellati reges a populo , qui id numquam ne a senatu quidem postulassent : reducti exsules Byzantium condemnati tum , quum indemnati cives e civitate ejiciebantur.

57. Rex Ptolemæus , qui si nondum erat ipse a senatu socius appellatus , erat tamen frater ejus regis , qui quum esset in eadem causa , jam erat a senatu honorem istum consecutus : erat eodem genere , iisdemque majoribus , eâdem vetustate societatis : denique erat rex , si nondum socius , at non hostis : pacatus , quietus , fretus imperio populi Romani , regno paterno atque avito ; regali otio perfruebatur : de hoc nihil cogitante , nihil suspicante , eisdem operis suffragium ferentibus , est rogatum , ut , sedens cum purpura & sceptro , & illis insignibus regiis , præconi publico subjiceretur ; & imperante populo Romano , qui etiam bello victis regibus regna reddere consuevit , rex amicus , nullâ injuriâ commemoratâ , nullis repetitis rebus , cum bonis omnibus publicaretur.

XXVII. Multa acerba, multa turpia, multa turbulenta habuit ille annus: tamen illi sceleri, quod in me illorum immanitas edidit, haud scio, an rectè hoc proximum esse dicam. Antiochum illum Magnum majores nostri, magnâ belli contentione, terrâ marique superatum, intra montem Taurum regnare jusserunt: Asiam, quâ illum multarunt, Attalo, ut is regnaret in ea, condonaverunt. Cum Armeniorum rege, Tigraue, grave bellum perditurumque gessimus; quum ille, injuriis in socios nostros inferendis, bello propè nos lacessisset: hic & ipse per se vehemens fuit, & acerrimum hostem hujus imperii Mithridatem, pulsum Ponto, opibus suis regnoque defendit; & a Lucullo, summo viro atque imperatore, pulsus, animo tamen hostili cum reliquis copiis suis in pristina mente mansit: hunc Cn. Pompeius, quum in suis castris supplicem abjectumque vidisset, erexit, atque insigne regium, quod ille de suo capite abjecerat, reposuit, &, imperatis certis rebus, regnare jussit: nec minùs & sibi & huic imperio gloriosum putavit, constitutum a se regem, quàm constrictum videri.

59. Tulit, gessit *. Qui & ipse hostis fuit populi Romani, & acerrimum hostem in regnum recepit: qui confligit, qui signa contulit, qui de imperio pene cer-

tavit, regnat hodie, & amicitiae nomen ac societatis, quod armis violarat, id precibus est consecutus. Ille Cyprius miser, qui semper socius, semper amicus fuit: de quo nulla umquam suspicio durior aut ad senatum, aut ad imperatores nostros allata est; vivus (ut aiunt) est, & videns, cum victu ac vestitu suo publicatus. En, cur ceteri reges stabilem esse suam fortunam arbitrentur, quum hoc illius funesti anni prodito exemplo videant, per tribunum aliquem & sexcentas operas, se fortunis spoliari & regno omni posse nudari.

XXVIII. At etiam eo negotio M. Catonis splendorem maculare voluerunt, ignari, quid gravitas, quid integritas, quid magnitudo animi, quid denique virtus valeret: quæ in tempestate sæva quieta est, & lucet in tenebris, & pulsa loco manet tamen, atque hæret in patria, splendetque per se semper, neque alienis umquam sordibus obsolescit. Non illi ornandum M. Catonem, sed relegandum; nec illi committendum illud negotium, sed imponendum putaverunt: qui in concione palam dixerint, linguam se evellisse M. Catoni, quæ semper contra extraordinarias potestates libera fuisset. Sentient, ut spero, brevi tempore, manere libertatem illam; atque hoc etiam, si fieri po-

terit, esse majorem, quòd cum consulibus illis M. Cato, etiam quum jam desperasset aliquid auctoritate suâ profici posse, tamen voce ipsâ ac dolore pugnavit, & post meum discessum, iis Pisonem verbis, flens meum & reipublicæ casum, vexavit, ut illum hominem perditissimum atque impudentissimum pene jam provinciæ pœniteret.

61. Cur igitur rogationi paruit? Quasi verò ille non in alias quoque leges, quas injustè rogatas putaret, jam antè jurarit: non offert se ille istis temeritatibus, ut, quum reipublicæ nihil prosit, se cive rempublicam privet. Consule me, quum esset designatus tribunus plebis, obtulit in discrimen vitam suam: dixit eam sententiam, cujus invidiam capitis periculo sibi præstandam videbat: dixit vehementer: egit acriter: ea quæ sensit, præ se tulit: dux, auctor, actor rerum illarum fuit: non quòd periculum suum non videret; sed in tanta reipublicæ tempestate nihil sibi, nisi de patriæ periculis cogitandum putabat. Consecutus est ipsius tribunatus.

XXIX. Quid ego de singulari magnitudine animi ejus, ac de incredibile virtute dicam? meministis illum diem, quum, templo a collega occupato, nobis omnibus de vita ejus viri & civis timentibus, ipse animo fortissimo venit in templum,

& clamorem hominum auctoritate, impetum improborum virtute sedavit. Adiit tum periculum, sed adiit ob causam: quæ quanta fuerit, jam mihi dicere non est necesse. At, si isti Cypriæ rogationi sceleratissimæ non paruisset, hæreret illa nihilominus in republica turpitudine. Regno enim jam publicato, de ipso Catone erat nominatim rogatum: quod ille si repudiasset, dubitatis, quin ei vis esset allata, quum omnia acta illius anni per illum unum labefactari viderentur?

63. Atque etiam hoc videbat: quoniam illa in republica macula regni publicati maneret, quam nemo jam posset eluere; quod ex malis boni possit in republica provenire, id utilius esse per se conservari, quàm per alios. Atque ille etiam si aliquapiam vi expelleretur illis temporibus ex hac urbe, facilè pateretur: etenim, qui superiore anno senatu caruisset, quò si tum veniret, me tamen socium suorum in republica consiliorum videre posset; is æquo animo tum, me expulso, & meo nomine quum universo senatu, tum sententiâ suâ condemnatâ, in hac urbe esse posset? Ille verò eidem tempore, cui nos, eidem furori, eisdem consulibus, eisdem minis, insidiis, periculis cessit: luctum nos hausimus majorem, dolorem ille animi non minorem.

XXX. His de tot tantisque injuriis in socios, in reges, in liberas civitates, consulum querela esse debuit: in ejus magistratus tutela reges, atque exteræ nationes semper fuerunt: ecquæ vox umquam est audita consulum? quamquam quis audiret, si maximè queri vellent? de Cyprio rege quererentur, qui me civem nullo meo crimine, patriæ nomine laborantem, non modò stantem non defenderunt, sed ne jacentem quidem protegerunt? Cesseram, si alienam a me plebem fuisse vultis, quæ non fuit, invidiæ: si commoveri omnia videbantur, tempori: si vis suberat, armis & si societas, magistratuum pactioni: si periculum civium, reipublicæ.

65. Cur, quum de capite civis (non disputo, cujusmodi civis) & de bonis proscriptio ferretur; quum & sacratæ legibus, & XII. tabulis sancitum esset, ut neque privilegium irrogari liceret, neque de capite, nisi comitiis centuriatis, rogari; nulla vox est audita consulum? constitutumque est illo anno, quantum in illis duabus hujus imperii pestibus fuit, jure posse per operas concitatas quemvis civem nominatim, tribuni plebis consilio, ex civitate exturbari?

66. Quæ verò promulgata illo anno fuerunt? quæ promissa multis? quæ con-

scripta? quæ sperata? quæ cogitata, quid dicam? qui locus orbis terræ jam non erat alicui destinatus? cujus negotii publici cogitari, optari, fingi curatio potuit, quæ non esset attributa atque descripta? quod genus imperii, aut quæ provincia, quæ ratio auferendæ, aut consulendæ pecuniæ non reperiiebatur? quæ regio, orave terrarum erat latior, in qua non regnum aliquod statueretur? quis autem rex, qui illo anno non aut emendandum sibi, quod non habebat, aut redimendum, quod habebat, arbitraretur? quis provinciam, quis pecuniam, quis legationem ab senatu petebat? Damnatis de vi restitutio; consulatûs petitio ipsi illi populari sacerdoti comparabatur. Hæc gemebant boni, sperabant improbi, agebat tribunus plebis, consules adjuvabant.

XXXI. Hic aliquantò seriùs, quàm ipse vellet, Cn. Pompeius, invitissimis iis, qui mentem optimi ac fortissimi viri, suis consiliis, fictisque terroribus, a defensione meæ salutis averterant; excitavit illam suam non sopitam, sed suspitione aliquâ retardatam consuetudinem reipublicæ bene gerendæ. Non est passus ille vir, qui sceleratissimos cives, qui acerrimos hostes, qui maximas nationes, qui reges, qui gentes feras atque inauditas, qui prædonum infinitam manum, qui etiã fer-

vitia virtute victoriâque domuisset ; qui omnibus bellis terrâ marique compressis ; imperium populi Romani orbis terrarum terminis definisset ; rempublicam everti scelere paucorum , quam ipse non solum consiliis , sed etiam sanguine suo sæpe servasset : accessit ad causam publicam ; restitit auctoritate suâ reliquis rebus : de præteritis questus est : fieri quædam ad meliorem spem inclinatio visa est.

68. Decrevit senatus frequens de meo reditu kalendis Jun. dissentiente nullo , referente L. Mummius , cujus in mea causa numquam fides virtusque contremuit. Intercessit Ligus iste nescio qui , additamentum inimicorum meorum. Res erat & causa nostra eò jam loci , ut erigere oculos & vivere videretur. Quisquis erat , qui aliquam partem in meo luctu sceleris Clodiani attigisset , quocumque venerat , quod judicium quumque subierat , damnabatur. Inveniebatur nemo , qui se suffragium de me tulisse confiteretur. Decesserat ex Asia frater meus magno squalore , sed multò etiam majore mœrore : huic ad urbem venienti tota obviam civitas cum lacrymis gemituque processerat : loquebatur liberius senatus : concurrebant equites Romani : Piso ille , gener meus , cui fructum pietatis suæ neque ex me , neque a populo Romano ferre licuit , a propinquo

suo focerum suum flagitabat : omnia senatus rejiciebat , nisi de me primùm consules retulissent.

XXXII. Quæ quum res jam manibus teneretur : & quum consules provinciarum pactione libertatem omnem perdidissent , qui , quum in senatu privatim , ut de me sententias dicerent , flagitabantur , legem illi se Clodiam timere dicebant : quum hæc non possent jam diutius sustinere , initur consilium de interitu Cn. Pompeii : quo patefacto , ferroque deprehenso , ille inclusus domi tamdiu fuit , quamdiu inimicus meus in tribunatu. De meo reditu octo tribuni promulgarunt : ex quo intellectum est , mihi absenti crevisse amicos , in ea præsertim fortuna , in qua nonnulli etiam , quos esse putaveram , non erant : sed eos voluntatem semper eandem , libertatem non eandem semper habuisse : nam ex novem tribunis , quos tunc habueram , unus , me absente , defluxit ; qui cognomen sibi ex Æliorum imaginibus arripuit ; quò magis nationis ejus esse , quàm generis , videretur.

70. Hoc igitur anno , magistratibus novis designatis , quum omnes boni omnem spem melioris statûs in eorum fidem convertissent ; princeps P. Lentulus auctoritate ac sententiâ suâ , Pisone & Gabinio repugnantibus , causam suscepit , tribunis

que plebis octo referentibus, præstantissimam de me sententiam dixit: qui quum ad gloriam suam, atque ad amplissimi beneficii gratiam magis pertinere videret, causam illam integram ad suum consulatuum reservari, tamen rem talem per alios citius, quàm per se tardius confici malebat.

XXXIII. Hoc interim tempore P. Sextius, Judices, designatus, iter ad C. Cæsarem pro mea salute suscepit. Quid egerit, quantum profecerit, nihil ad causam: equidem existimo, si ille (ut arbitror) æquus nobis fuerit, nihil ab hoc profectum; sin iratior, non multum: sed tamen sedulitatem atque integritatem hominis videris. Ingredior jam in Sextii tribunatum: nam hoc primum iter designatus reipublicæ causâ suscepit: pertinere & ad concordiam civium putavit, & ad perficiendi facultatem, animum Cæsaris a causa non abhorrere. Abiit ille annus: respirasse homines videbantur, nondum te, sed spe reipublicæ recuperandæ: exierunt malis ominibus atque execrationibus duo vulturii paludati; quibus utinam ipsis evenissent ea, quæ tum homines precabantur: neque nos provinciam Macedoniam cum exercitu, neque equitatum in Syria, & cohortes optimas perdidissemus.

72. Ineunt magistratum tribuni plebis,

qui omnes se de me promulgaturos confirmarant : ex his princeps emitur ab inimicis meis , is , quem homines in luctu iridentes , Gracchum vocabant : quoniam id etiam fatum civitatis fuit , ut illa ex vepreculis extracta nitedula rempublicam conaretur arrodere. Alter verò non ille Serranus ab aratro , sed ex deserto Gavii Cœpionis horreo calatis granis , in Calatinos Atilios insitus , subito nominibus in tabulas relatis , nomen suum de tabula sustulit. Veniunt kalendæ Januarii : vos hæc melius scire potestis : equidem audita dico : quæ tum frequentia senatûs , quæ exspectatio populi , qui concursus legatorum ex Italia cuncta , quæ virtus , actio , gravitas P. Lentuli consulis fuerit , quæ etiam collegæ ejus moderatio de me : qui quum inimicitias sibi mecum ex reipublicæ dissensione susceptas esse dixisset , eas se patribus conscriptis dixit , & temporibus reipublicæ permissurum.

XXXIV. Tum princeps rogatus sententiam L. Cotta dixit id , quod dignissimum reipublicâ fuit , nihil de me actum esse jure , nihil more majorum , nihil legibus : non posse quemquam de civitate tolli sine judicio : de capite non modò ferri , sed ne judicari quidem posse , nisi comitiis centuriatis : vim fuisse illam , flammam quassatæ reipublicæ , perturbatorum

que temporum, jure judiciisque sublati : magna rerum permutatione impendente, declinasse me paululum, & spe reliquæ tranquillitatis, præsentis fluctus tempestatemque fugisse : quare, quum absens rempublicam non minùs magnis periculis, quàm quodam tempore præsens liberasset, non restitui me solùm, sed etiam ornari a senatu decere. Disputavit etiam multa prudenter, ita de me illum amen-
tissimum & profligatissimum hostem pudoris & pudicitiae scripsisse, quæ scripserat, iis verbis, rebus, sententiis, ut, etiam si jure esset rogatum, tamen vim habere non posset : quare me, qui nullâ lege abessem, non restitui lege, sed revocari senatûs auctoritate oportere.

74. Hunc nemo erat, quin verissimè sentire diceret. Sed post eum rogatus Cn. Pompeius, approbatâ laudatâque Cottæ sententiâ, dixit, sese otii mei causâ, ut omni populari concitatione defungerer, censere, ut ad senatûs auctoritatem, populi quoque Romani beneficium erga me adjungeretur. Quum omnes certatim, aliisque alio graviùs atque ornatiùs de mea salute dixisset, fieretque sine ulla varietate discessio : surrexit, ut scitis, Attilius hic Gavianus : nec ausus est, quum esset emptus, intercedere ; noctem sibi ad deliberandum postulavit. Clamor senatûs,

querelæ , preces , focer ad pedes abjectus. Ille se affirmare , postero die moram nullam esse facturum. Creditum est : discessum est : illi interea deliberatori merces , longâ interpositâ nocte , duplicata est. Consecuti dies pauci omnino Januario mense , per quos senatum haberi liceret : sed tamen actum nihil , nisi de me.

XXXV. Quum omni morâ , ludificatione , calumniâ , senatûs auctoritas impediretur : venit tandem concilii de me agendi dies , VIII. kalend. Februar. Princeps rogationis , vir mihi amicissimus , Q. Fabricius , templum aliquantò ante lucem occupavit. Quietus eo die Sextius , is qui est de vi reus : actor hic , defensorque causæ meæ nihil progreditur , consilia exspectat inimicorum meorum. Quid illi , quorum consilio P. Sextius in iudicium vocatur ? quo se pacto gerunt ? quum forum , cōmitium , cūriam multâ de nocte armatis hominibus ac servis plerisque occupavissent , impetum faciunt in Fabricium , manus afferunt , occidunt nonnullos , vulnerant multos.

76. Venientem in forum , virum optimum & constantissimum , M. Cispium , tribunum plebis , vi depellunt : cædem in foro maximam faciunt : universique , districtis gladiis & cruentis in omnibus fori partibus , fratrem meum , virum optimum ,

fortissimum, meique amantissimum, oculis quærebant, voce poscebant; quorum ille telis libenter, in tanto luctu ac desiderio mei, non repugnandi, sed moriendi causâ, corpus obtulisset suum, nisi suam vitam ad spem mei reditûs reservasset: subiit tamen vim illam nefariam conscele-ratorum latronum; &, quum ad fratris salutem a populo Romano deprecandam venisset, pulsus e Rostris, in comitio jacuit, seque servorum & libertorum corporibus obtexit, vitamque tum suam noctis & fugæ præsidio, non juris iudiciorumque defendit. Meministis tum, Iudices, corporibus civium Tiberim compleri, cloacas referciri, e foro spongiis effingi sanguinem, ut omnes tantam illam copiam, & tam magnificum apparatus, non privatum aut plebeium, sed patricium & prætorium esse arbitrarentur: nihilque neque ante hoc tempus, neque hoc ipso turbulentissimo die criminationis esse in Sextium.

XXXVI. Atqui vis in foro versata est. Certè: quando enim major? lapidationes sæpe vidimus: non ita sæpe, sed nimium tamen sæpe gladios: cædem verò tantam, tantos acervos corporum exstructos, nisi fortè illo Cinnano atque Octaviano die, quis umquam in foro vidit? quâ ex concertatione animorum? nam ex

pertinaciâ aut constantiâ intercessoris oritur sæpe seditio , culpâ atque improbitate latoris , commodo aliquo imperitis , aut largitione propositâ : oritur ex concertatione magistratuum : oritur sensim ex clamore primùm , deinde aliquâ discessione concionis : vix , serò , & rarò ad manus pervenitur : nullo verò verbo factò , nullâ concione advocatâ , nullâ lege recitatâ concitatam nocturnam seditionem quis adivit ?

78. An verisimile est , ut civis Romanus , aut homo liber quisquam cum gladio in forum descenderit ante lucem , ne de me ferri pateretur , præter eos , qui ab illo pestifero ac perduto cive jampridem reipublicæ sanguine saginantur. Hic jam de ipso accusatore quæro , qui P. Sextium queritur cum multitudine in tribunatu & cum præsidio magno fuisse , num illo die fuerit. Certè , certè non fuit. Victa igitur est causa reipublicæ , & victa , non auspiciis , non intercessione , non suffragiis ; sed vi , manu , ferro : nam , si obnuntiasset Fabricio is prætor , qui se servasse de cœlo dixerat , accepisset respublica plagam , sed eam , quam acceptam gemere posset. Si intercessisset collega Fabricio , læsisset rempublicam , sed rempublicam jure læsisset. Gladiatores tu novitios , pro expectata ædilitate suppositos

cum sicariis e carcere emissis ante lucem immittas ? magistratus templo dejicias ? cædem maximam facias ? forum purges ? & , quum omnia vi & armis egeris , accuses eum , qui se præsidio munierit , non ut te oppugnaret , sed ut vitam suam posset defendere ?

XXXVII. Atqui ne ex eo quidem tempore id egit Sextius , ut a suis munitus , tutò in foro tum magistratum gereret , rempublicam administraret. Itaque fretus sanctitate tribunatûs , quum se non modò contra vim & ferrum , sed etiam contra verba atque interfationem legibus sacris esse armatum putaret ; venit in templum Castoris : obnuntiavit consuli : quum subito manus illa Clodiana , in cæde civium sæpe jam victrix , exclamat , incitatur , invadit , inermem atque imparatum tribunum alii gladiis adoriuntur , alii fragmentis septorum & fustibus : a quibus hic , multis vulneribus acceptis , ac debilitato corpore & contrucidato , se abjecit exanimatus ; neque ullâ aliâ re ab se mortem , nisi opinione mortis , depulit : quem quum jacentem & concisum plurimis vulneribus , extremo spiritu exsanguem & confectum viderent ; defatigatione magis & errore , quàm misericordiâ & modo , aliquando cedere destiterunt.

80. Et causam dicit Sextius de vi ? quid

ita ? quia vivit. At id non suâ culpâ : plaga una illa extrema defuit ; quæ si accessisset , reliquum spiritum exhausisset. Accusa Lentidium : non percussit locum : maledicito Sabinio , homini Reatino , cur tam tempore exclamarit occisum : ipsum verò quid accusas ? num defuit gladiis ? num repugnavit ? num , ut gladiatoribus imperari solet , ferrum non recepit ?

XXXVIII. An hæc ipsa vis est , non posse emori ? an illa , quòd tribunus plebis templum cruentavit ? an , quòd , quum esset ablatum , primùmque resipisset , non se referri jussit ? ubi est crimen , quod reprehenditis ? Hic quæro , Judices , si illo die gens ista Clodia , quod facere voluit , effecisset : si P. Sextius , qui pro occiso relictus est , occisus esset : fuistisne ad arma ituri ? fuistisne vos ad patrium illum animum , majorumque virtutem excitaturi ? fuistisne aliquando rempublicam a funesto latrone repetituri ? an etiam tunc quiesceretis , cunctaremini , timeretis , quum rempublicam a facinorosissimis sicariis , & a servis esse oppressam , atque occupatam videretis ? Cujus igitur mortem ulciscere mini , si quidem liberi esse , & habere rempublicam cogitaretis ; de ejus virtute viri quid vos loqui , quid sentire , quid cogitare , quid judicare oporteat , dubitandum putatis ?

82. At verò illi ipsi parricidæ , quorum effrenatus furor alitur impunitate diuturnâ , adeò vim facinoris sui perhorruerant , ut , si paulò longior opinio mortis Sextii fuisset , Gracchum illum suum , transferendi in nos criminis causâ , occidere cogitarint. Sensit rusticulus non incautus (neque enim homines nequam tacere potuerunt) suum sanguinem quæri ad restinguendam invidiam facinoris Clodiani : mulionicam penulam arripuit , cum qua primùm Romam ad comitia venerat : messoriâ se corbæ contextit : quum quærerent alii Numerium , alii Quintium , gemini nominis errore servatus est. Atque hoc scitis omnes , usque adeo hominem in periculo fuisse , quoad scitum sit Sextium vivere : quod nisi esset patefactum paulò citiùs , quàm vellem ; non illi quidem morte mercenarii sui transferre potuissent invidiam in quos putabant , sed acerbissimi sceleris infamiam grato quodam scelere minuisent.

83. Ac , si tunc P. Sextius , Iudices , in templo Castoris animam , quam vix retinuit , edidisset ; non dubito , quin , si modò esset in republica senatus , si majestas populi Romani revixisset , aliquando statua huic ob rempublicam interfecto in foro statueretur. Nec verò illorum quisquam , quos a majoribus nostris , morte obitâ , positos in illo loco atque in Ros-

tris collocatos videtis, esset P. Sextio aut acerbitate mortis, aut animo in rempublicam præponendus: qui quum causam civis calamitosi, causam amici, causam bene de republica meriti, causam senatûs, causam Italiæ, causam reipublicæ suscepisset; quumque auspiciis religionique parens obnuntiaret, quod senserat; luce palam a nefariis pestibus in deorum hominumque conspectu esset occisus, sanctissimo in templo, sanctissima in causa, sanctissimo in magistratu. Ejus igitur vitam quisquam spoliandam ornamentis esse dicet, cujus mortem ornandam monumento sempiterno putaretis?

XXXIX. Homines, inquit, emisisti, coëgisti, parasti. Quid uti faceret? senatum obsideret? cives indemnatos expelleret? bona diriperet? ædes incenderet? tecta disturbareret? templa deorum immortalium inflammaret? tribunos plebis ferro e Rostris expelleret? provincias, quas vellet, quibus vellet, venderet? reges appelleret? rerum capitalium condemnatos in liberas civitates per legatos nostros reduceret? principem civitatis ferro obsessum teneret? Hæc ut efficere posset; quæ fieri, nisi armis oppressâ republicâ nullo modo poterant, idcirco, credo, manum sibi P. Sextius & copias comparavit.

85. At nondum erat maturum: nondum
res

res ipsa ad ejusmodi præsidia viros bonos compellebat: pulsi nos eramus, non omnino istâ manu solâ, sed tamen non sine ista; vos taciti, mœrebatis. Captum erat forum anno superiore, æde Castoris, tamquam arce aliquâ, a fugitivis occupatâ; silebatur: omnia, hominum, quum egestate, tum audaciâ perditorum, clamore, concursu, vi, manu gerebantur; perferebatis: magistratus templis pellebantur: alii omnino aditu ac foro prohibebantur; nemo resistebat: gladiatores ex prætoris comitatu comprehensi, in senatum introducti, confessi, in vincula conjecti a Milone, emissi a Serrano; mentio nulla: forum corporibus civium Romanorum constratum cæde nocturnâ; non modo nulla nova quæstio, sed etiâ vetera judicia sublata: tribunum plebis plus viginti vulneribus acceptis jacentem moribundumque vidistis; alterius tribuni plebis, divini hominis (dicam enim quod sentio, & quod mecum sentiunt omnes) divini, insigni quâdam, inauditâ, novâ magnitudine animi, gravitate, fide præditi, domus est oppugnata ferro, facibus, exercitu Clodiano.

XL. Et tu hoc loco laudas Milonem, & jure laudas: quem enim umquam virum tam immortalis virtute vidimus? qui, nullo præmio proposito, præter hoc,

Tomus VI.

L

quod jam contritum & contemptum. putatur, iudicium bonorum, omnia pericula, summos labores, gravissimas contentiones, inimicitiasque suscepit? qui mihi unus ex omnibus civibus videtur re docuisse, non verbis, quid oporteret a præstantissimis viris in republica fieri, & quid necesse esset: oportere hominum audacium, everforum reipublicæ sceleribus, legibus & iudiciis resistere: si leges non valerent, iudicia non essent, si respublica vi consensuque audacium, armis oppressa teneretur; præsidio & copiis defendi vitam & libertatem necesse esse. Hoc sentire, prudentiæ est; facere, fortitudinis: sentire verò & facere, perfectæ cumulataque virtutis.

87. Adiit ad rempublicam tribunus plebis, Milo: de cuius laude plura dicam, non quòd aut ipse hæc dici, quàm existimari malit, aut ego hunc laudis fructum præsentì libenter impertiam, præsertim quum verbis consequi non possim: sed quòd existimo, si Milonis causam accusatoris voce collaudatam probaro, vos in hoc crimine parem Sextii causam existimatos. Adiit igitur T. Annius ad causam reipublicæ, sic ut civem patriæ recuperare vellet ereptum: simplex causa, constans ratio, plena consensionis omnium, plena concordia: collegas adjuto-

res habebat : consulis alterius summum studium , alterius animus pene placatus : de prætoribus unus alienus : senatûs incredibilis voluntas : equitum Romanorum animi ad causam excitati , erecta Italia : duo soli erant empti ad impediendum ; qui si homines despecti & contempti , tantam rem sustinere non potuissent , se causam , quam susceperat , nullo labore peractorum videbat : agebat auctoritate , agebat consilio , agebat per summum ordinem , agebat exemplo bonorum & fortium civium : quid republicâ , quid se dignum esset ; quis ipse esset , quid sperare , quid maioribus suis reddere deberet , diligentissimè cogitabat.

XLI. Huic gravitati hominis videbat ille gladiator se , si moribus ageret , parem esse non posse : ad ferrum , ad faces , ad quotidianam cædem , incendia , rapinas , se cum exercitu suo contulit : domum oppugnare , itineribus occurrere , vi lacerare & terrere cœpit. Non movit hominem summâ gravitate , summâque constantiâ : sed quamquam dolor animi , innata libertas , prompta excellensque virtus , fortissimum virum hortabantur , vim oblatam , præsertim sæpius , ut frangeret & refutaret ; tanta moderatio fuit hominis , tantum consilium , ut contineret dolorem , neque eâdem se re ulciscere

retur, quâ esset laccessitus; sed illum tot jam funeribus reipublicæ exsultantem ac tripudiantem, legum, si posset, laqueis constringeret.

89. Descendit ad accusandum: quis umquam tam propriè reipublicæ causâ, nullis inimiciis, nullis præmiis, nullâ hominum postulatione, aut etiam opinione, id umquam esse facturum? fracti erant animi hominis: hoc enim accusante, pristini illius sui iudicii turpitudinem desperabat. Ecce tibi consul, prætor, tribunus plebis, nova novi generis edicta proponunt: Ne reus adsit, ne citetur, ne quærat, ne mentionem omnino cuiquam iudicum aut iudiciorum facere liceat. Quid ageret vir ad virtutem, dignitatem, gloriam natus, vi sceleratorum hominum corroboratâ, legibus, iudiciisque sublati? cervices tribunus plebis privato, præstantissimus vir profligatissimo homini daret? an causam susceptam affligeret? an se domi contineret? Et vinci turpe putavit, & deterre-ri: etiam e republica credidit, ut, quoniam sibi in illum legibus uti non liceret, illius vim neque in suo, neque in reipublicæ periculo pertimesceret.

XLII. Quomodo igitur hoc in genere præsidii comparati accusas Sextium, quum idem laudes Milonem? an, qui sua testa defendit; qui ab aris, focis, ferrum,

flammamque depellit; qui sibi licere vult tutò esse in foro, in templo, in curia, jure præsidium comparat? qui vulneribus, quæ cernit quotidie toto corpore, moneatur, ut aliquò præsidio caput, & cervices, & jugulum ac latera tutetur, hunc de vi accusandum putas?

91. Quis enim vestrùm, Judices, ignorat, ita naturam rerum tulisse, ut quodam tempore homines, nondum neque naturali, neque civili jure descripto, fusi per agros ac dispersi vagarentur, tantumque haberent, quantum manu ac viribus per eadem ac vulnera aut eripere, aut retinere potuissent? Qui igitur primi virtute & consilio præstanti exstiterunt, ii perspecto genere humanæ docilitatis atque ingenii, dissipatos unum in locum congregarunt, eosque ex feritate illa ad justitiam atque mansuetudinem transduxerunt. Tum res ad communem utilitatem, quas publicas appellamus, tum conventicula hominum, quæ postea civitates nominatæ sunt, tum domicilia conjuncta, quas urbes dicimus, invento & divino & humano jure, mœnibus sepeferunt.

92. Atque inter hanc vitam perpolitam humanitate, & illam immanem nihil tam interest, quàm jus atque vis: horum utro uti nolimus, altero est utendum. Vim volumus extinguere? jus valeat necesse est.

id est, judicia, quibus omne jus continetur. Judicia displicent, aut nulla sunt? vis dominetur necesse est. Hæc vident omnes: Milo & vidit, & fecit, ut jus experiretur, vim depelleret: altero uti voluit, ut virtus audaciam vinceret; altero usus necessariò est, ne virtus ab audacia vinceretur. Eademque ratio fuit P. Sextii, si minùs in accusando (neque enim per omnes fuit idem necesse fieri) at certè in necessitate defendendæ salutis suæ, præsidioque contra vim & manum comparando.

XLIII. O dii immortales! quemnam ostenditis exitum nobis? quam spem reipublicæ datis? quotus quisque invenietur tantâ virtute vir, qui optimam quamque causam reipublicæ amplectatur? qui bonis viris deserviat? qui solidam laudem veramque quærat? quum sciat, duo illa reipublicæ pene fata, Gabinium & Pisonem, alterum haurire quotidie ex pacatissimis atque opulentissimis Syriæ gazis innumerable pondus auri? bellum inferre quiescentibus, ut eorum veteres illibatasque divitias in profundissimum libidinum suarum gurgitem profundat? villam ædificare in oculis omnium tantam, tugurium ut jam videatur esse illa villa, quam ipse tribunus plebis pictam olim in concionibus explicabat, quò fortissimum ac summum ci-

vem in invidiam homo castus ac non cupidus vocaret?

94. Alterum Thracibus ac Dardanis primum pacem maximam pecuniam vendidisse? deinde, ut illi pecuniam conficere possent, vexandam his Macedoniam & spoliandam tradidisse? eundemque bona creditorum, civium Romanorum, cum debitoribus Græcis divisisse? cogere pecunias maximas a Dyrhachinis, spoliare Thessalos, certam Achæis in annos singulos pecuniam imperavisse: neque tamen ullo in publico aut religioso loco, signum, aut tabulam, aut ornamentum reliquisse? Hos sic illudere, quibus omne supplicium atque omnis jure optimo poena debetur? reos esse hos duos, quos videtis? Omitto jam Numerium, Serranum, Ælium, quisquilias seditionis Clodianæ: sed tamen hi quoque etiam nunc volitant, ut videtis; nec, dum vos de vobis aliquid timebitis, illi umquam de se pertimescent.

XLIV. Nam quid ego de ædile ipso loquar, qui etiam diem dixit, & accusavit de vi Milonem? neque hic tamen ullam umquam injuriam adducetur; ut eum tali virtute tantæque firmitate animi se in rempublicam fuisse poeniteat: sed, qui hæc vident, adolescentes, quonam suas mentes conferent? ille, qui monumenta publica, qui ædes sacras, qui domos inimic-

corum suorum oppugnavit, excidit, incendit, qui stipatus semper sicariis, septus armatis, munitus indicibus fuit, quorum hodie copia redundat, qui & peregrinam manum facinorosorum concitavit, & servos ad cædem idoneos emit, & in tribunatu carcerem totum in forum effudit, volitat ædilis; accusat eum, qui aliqua ex parte ejus furorem exultantem repressit: hic, qui se est tutatus sic, ut in privata re deos penates suos, in republica jura tribunatûs auspiciâque defenderet, accusare eum moderatè, a quo ipse nefariè accusatur, per senatûs auctoritatem non est situs.

96. Nimirum hoc illud est, quod de me potissimum tu in accusatione quæsisti, quæ esset nostra natio optimatum: sic enim dixisti. Rem quæris præclaram juventuti ad discendum, nec mihi difficilem ad perdocendum: de qua pauca, Judices, dicam; &, ut arbitror, nec ab utilitate eorum, qui audient, nec ab officio nostro, nec ab ipsa causa P. Sextii abhorrebit oratio mea.

XLV. Duo genera semper in hac civitate fuerunt eorum, qui versari in republica, atque in ea se excellentius gerere studuerunt; quibus ex generibus alteri se populares, alteri optimates & haberi & esse voluerunt. Qui ea, quæ facièbant,

quæque dicebant, multitudini jucunda esse volebant, populares: qui autem ita se gerebant, ut sua consilia optimo cuique probarent, optimates habebantur. Quis ergo iste optimus quisque? de numero si quæris, innumerabiles: neque enim aliter stare possemus. Sunt principes consilii publici: sunt, qui eorum sectam sequuntur: sunt maximorum ordinum homines, quibus patet curia: sunt municipales, rusticique Romani: sunt negotia gerentes: sunt etiam libertini optimates. Numerus, ut dixi, hujus generis latè & variè diffusus est: sed genus universum (ut tollatur error) brevi circumscribi & definiri potest. Omnes optimates sunt, qui neque nocentes sunt, nec naturâ improbi, nec furiosi; nec malis domesticis impediti. Esto igitur, ut hi sint optimates (quam tu nationem appellasti) quique integri sunt, & sani, & bene de rebus domesticis constituti: horum qui voluntati, commodis, opinioni in gubernanda republica serviunt, defensores optimatum, ipsique optimates gravissimi & clarissimi cives numerantur, & principes civitatis.

98. Quid est igitur propositum his reipublicæ gubernatoribus, quod intueri, & quò cursum suum dirigere debeant? id quod est præstantissimum, maximèque optabile omnibus sanis, & bonis, & bea-

tis, cum dignitate otium. Hoc qui volunt, omnes optimates: qui efficiunt, summi viri & conservatores civitatis putantur: neque enim rerum gerendarum dignitate homines efferri ita convenit, ut otio non prospiciant; neque ullum amplectari otium, quod abhorreat a dignitate.

XLVI. Hujus autem otiosæ dignitatis hæc fundamenta sunt, hæc membra, quæ tuenda principibus, & vel capitis periculo defendenda sunt, religiones, auspicia; potestates magistratuum, senatûs auctoritas, leges, mos majorum, judicia, jurisdictio, fides, provinciæ, focii, imperii laus, res militaris, ærarium. Harum rerum tot, atque tantarum esse defensorem & patronum, magni animi est, magni ingenii, magnæque constantiæ. Etenim in tanto civium numero magna multitudo est eorum, qui aut propter metum pœnæ, peccatorum suorum conscii, novos motus conversionesque reipublicæ quærant; aut qui, propter insitum quemdam animi furorem, discordiis civium ac seditione pascantur; aut qui, propter implicationem rei familiaris, communi incendio malint, quàm suo deflagrare: qui quum auctores sunt & duces suorum studiorum vitiorumque nacti, in republica fluctus excitantur; ut vigilandum sit iis, qui sibi gubernacula patriæ depoposcerunt, eritendumque om-

ni scientiâ ac diligentia, ut conservatis his, quæ ego paulo antè fundamenta ac membra esse dixi, tenere cursum possint, & capere otii illum portum, & dignitatis. Hanc ego viam, Iudices, si aut asperam, aut arduam, aut plenam esse periculorum, aut insidiarum negem, mentiar; præsertim quum id non modo intellexerim semper, sed etiam præter ceteros senserim.

XLVII. Majoribus præsidis & copiis oppugnatur respublica, quàm defenditur, propterea quòd audaces homines & perditu nutu impelluntur; & ipsi etiam sponte suâ contra rempublicam incitantur: non nescio quomodo tardiores sunt, & principiis rerum neglectis, ad extremum ipsâ denique necessitate excitantur: ita ut nonnumquam cunctatione ac tarditate, dum optum volunt etiam sine dignitate retinere, ipsi utrumque amittant.

101. Propugnatores autem reipublicæ qui esse voluerunt, si leviores sunt, desciunt; si timidiores, defunt: permanent illi soli, atque omnia reipublicæ causâ perferunt, qui sunt tales, qualis pater tuus, M. Scaure, fuit, qui a C. Graccho usque ad Q. Varium seditiosis omnibus restitit; quem nulla umquam vis, nullæ minæ, nulla invidia labefecit: aut qualis Q. Metellus, patruus matris tuæ; qui, quum flo-

rentem hominem in populari ratione L. Saturninum censor notasset, quumque insitivum Gracchum contra vim multitudinis incitatae censu prohibuisset, quumque in eam legem, quam non jure rogatam judicaret, jurare unus noluisset, de civitate maluit, quam de sententia dimoveri; aut, ut vetera exempla, quorum est copia digna hujus imperii gloria, relinquam; neve eorum aliquem, qui vivunt, nominem; qualis nuper Q. Catulus fuit: quem neque periculi tempestas, neque honoris aura potuit umquam de suo cursu, aut spe, aut metu dimovere.

XLVIII. Hæc imitamini, per deos immortales! qui dignitatem, qui laudem, qui gloriam quaeritis: hæc ampla sunt, hæc divina, hæc immortalia: hæc famam celebrantur, monumentis annalium mandantur, posteritati propagantur. Est labor, non nego: pericula magna, fateor. *Multa insidia sunt bonis: verissime dictum est. Sed, te id, quod multi invideant, multique expectant, Institia sit, inquit, postulare, si tu laborem summam cum cura efferas, nullum.* Idem alio loco dixit, quod exciperent improbi cives, *Oderint, dum metuant.*

103. Præclara enim illa præcepta dederat juventuti: sed tamen hæc via, hæc ratio reipublicæ capeffendæ, olim erat magis pertimescenda, quum multis in re-

bus multitudinis studiū ad populi com-
modum ab utilitate reipublicæ discrepat-
bat. Tabellaria lex ab L. Cassio fereba-
tur : populus libertatem agi putabat suam :
dissentiebant principes , & in salute opti-
matum temeritatem multitudinis & ta-
bellæ licentiam pertimescebant. Agrariam
Tib. Gracchus legem ferebat : grata erat
populo : fortunæ constitui tenuiorum vi-
debantur : nitebantur contrā optimates ,
quod eā discordiam excitari videbant , &
quum locupletes possessionibus diuturnis
moverentur , spoliari rempublicam propu-
gnatoribus arbitrabantur. Frumentariam
legem C. Gracchus ferebat : jucunda res
plebi Romanæ : victus enim suppeditabatur
largè sine labore : repugnabant boni , quod
& ab industria plebē ad desidiā avo-
cari putabant , & ærarium exhauriri vide-
batur.

XLIX. Multa etiam , nostrā memo-
riā , quæ consultò prætereo , fuerunt in ea
contentione , ut popularis cupiditas a con-
silio principum dissideret. Nunc jam nihil
est , quod populus a delectis , principibus-
que dissentiat ; nec flagitat rem ullam ,
neque novarum rerum est cupidus , &
otio suo , & dignitate optimi cujusque ,
& universæ reipublicæ gloriā delectatur.
Itaque homines seditiosi ac turbulenti ,
quia nullā jam largitione populum Roma-

num concitare possunt, quod plebs perfuncta gravissimis seditionibus ac discordiis, otium malle videatur, conductas habent conciones; neque id agunt, ut ea dicant, aut ferant, quæ illi velint audire, qui in concione sunt; sed pretio ac mercede perficiunt, ut, quidquid dicant, id illi velle audire videantur.

105. Num vos existimatis, Gracchos, aut Saturninam, aut quemquam illorum veterum, qui populares habebantur, ullum unquam in concione habuisse conductum? nemo habuit: ipsa enim largitio, & spes commodi propositi, sine mercede ulla multitudinem concitabat. Itaque temporibus illis, qui populares erant, offendeabant illi quidem apud graves & honestos homines; sed populi judiciis, atque omni significatione florebat: his in theatro plaudebatur: hi suffragiis, quod contenderant, consequiebantur: horum homines nomen, orationem, vultum, incessum amabant. Qui autem adversabantur ei generi, graves & magni homines habebantur; sed valebant in senatu multum, apud bonos viros plurimum: multitudini jucundi non erant; suffragiis offendeatur sæpe eorum voluntas: plausum verò etiam si quis eorum aliquando acceperat, ne quid peccasset, pertimescebat. Attamen, si qua res erat major, idem

ille populus horum auctoritate maximè commovebatur.

L. Nunc, nisi me fallit, in eo statu civitas est, ut, si operas conductorum removeris, omnes idem de republica sensuri esse videantur. Etenim tribus locis significari maximè populi Romani iudicium ac voluntas potest, concione, comitiis, ludorum, gladiatorumque confessu. Quæ concio fuit per hos annos, quæ quidem esset non conductæ, sed veræ, in qua populi Romani consensus perspicui posset? Habitæ sunt multæ de me a gladiatoribus sceleratissimo, ad quas nemo adibat incorruptus, nemo integer: nemo illum fœdum vultum adspicere, nemo furialem vocem bonus audire poterat. Erant, erant illæ conciones perditorum hominum necessariò turbulentiæ.

107. Habuit de eodem me P. Lentulus consul concionem: concursus est populi Romani factus: omnes ordines, tota in illa concione Italia constitit: egit causam summa cum gravitate copiaque dicendi, tanto silentio, tantâ approbatione omnium, nihil ut umquam videretur tam populare ad populi Romani aures accidisse. Productus est ab eo Cn. Pompeius, qui se non solum auctorem meæ salutis, sed etiam supplicem populo Romano exhibuit: hujus oratio & pergravis, & grata con-

cioni fuit : sic contendo , numquam neque sententiam ejus auctoritate , neque eloquentiam jucunditate fuisse majorem.

108. Quo silentio sunt auditi de me ceteri principes civitatis ? quos idcirco non appello hoc loco , ne mea oratio , si minus de aliquo dixerò , ingrata ; si fatis de omnibus , infinita esse videatur. Cedo nunc ejusdem illius inimici mei de me eodem ad verum populum in campo Martio concionem. Quis non modò approbavit , sed non indignissimum facinus putavit , illum non dicam loqui , sed vivere ac spirare ? quis fuit , qui non ejus voce maculari rempublicam ; seque , si eum audiret , scelere adstringi arbitraretur ?

LI. Venio ad comitia , sive magistratum placet , sive legum. Leges videmus sæpe ferri multas : omitto eas , quæ feruntur ita , vix ut quini , & hi ex alia tribu , qui suffragium ferant , reperiantur. De me , quem tyrannum atque ereptorem libertatis esse dicebat , in illa ruina reipublicæ dicit se legem tulisse. Quis est , qui se , quum contra me ferebatur , inisse suffragium confiteatur ? quum autem de me eodem ex senatusconsulto , comitiis centuriatis , ferebatur , quis est , qui non profiteatur se affuisse , & suffragium de salute mea tulisse ? Utra igitur causa popularis debet videri : in qua omnes honestates ci-

vitatis, omnes ætates, omnes ordines unà consentiunt? an in qua furiae concitatae tamquam ad funus reipublicae convolant?

110. An, sicubi aderit Gellius, homo & fratre indignus, viro clarissimo, atque optimo consule, & ordine equestri, cujus ille ordinis nomen retinet, ornamenta confecit, id erit popolare? est enim homo iste populo Romano deditus. Nihil vidi magis: qui, quum ejus adolescentia in amplissimis honoribus summi viri, L. Philippi, vitrici, florere potuisset, usque eò non fuit popularis, ut bona solus comesset: deinde ex impuro adolescente & petulante, posteaquam rem paternam ab idiotarum divitiis ad philosophorum regulam perduxit, Græculum se atque otiosum putari voluit: studio litterarum se subito dedit. Nihil sanè Attæ juvabant: anagnostæ, libelli etiam pro vino sæpe oppignerabantur: manebat insaturabile abdomen, copiae deficiebant: itaque semper versabatur in spe rerum novarum: otio & tranquillitate reipublicae consenescebat.

LII. Ecquæ seditio umquam fuit, in qua non ille princeps? ecqui seditiosus, cui ille non familiaris? ecquæ turbulenta concio, cujus ille non concitator? cui bene dixit umquam bono? bene dixit? immo, quem fortem & bonum civem non petulantissime est insectatus? qui, ut credo, non li-

bidinis causâ , sed ut plebicola videretur , libertinam duxit uxorem. Is de me suffragium tulit , is affuit , is interfuit epulis & gratulationibus parricidarum ; in quo tamen est me ultus , quum illo ore inimicos est meos suaviatus : qui , quasi meâ culpâ bona perdiderit , ita ob eam ipsam causam est mihi inimicus , quia nihil habet. Utrûm ego tibi patrimonium eripui , Gelli , an tu comedisti ? quid ? tu meo periculo , gurges ac vorago patrimonii , belluabare ; ut , si ego consul rempublicam contra te & gregales tuos defendissem , in civitate esse me nolles ? te nemo tuorum videre vult : omnes aditum , sermonem , congressum tuum fugiunt : te sororis filius Postumus , adolescens gravis , senili iudicio , notavit , quum in magno numero tutorem liberis non instituit. Sed elatus odio , & meo , & reipublicæ nomine , quorum ille utri sit inimicior nescio , plura dixi , quàm dicendum fuit , in furiosissimum atque egentissimum ganeonem.

112. Illuc revertor : contra me quum sit actum , captâ urbe atque oppressâ , Gellium , Firmidium , Titium , ejusdem modi furias , illis mercenariis gregibus duces & auctores fuisse , quum ipse lator nihil ab horum turpitudine , audaciâ , foribus abhorreret : at , quum de dignitate mea ferebatur , nemo sibi nec valetudinis

excusationem, nec senectutis, satis justam putavit: nemo fuit, qui se non rempublicam mecum simul revocare in suas sedes arbitraretur.

LIII. Videamus nunc comitia magistratuum. Fuit collegium nuper tribunatium, in quo tres minimè, vehementer duo populares existimabantur: ex his, qui populares non habebantur, quibus in illo genere conductarum concionum consistendi potestas non erat, duos a populo Romano prætores video esse factos: & quantum sermonibus vulgi & suffragiis intelligere potui, præ se populus Romanus ferebat, sibi illum in tribunatu Cn. Domitii animum constantem & egregium, & Q. Ancharii fidem ac fortitudinem, etiam si nihil agere potuissent, tamen voluntate ipsa gratum fuisse. Jam de C. Fannio quæ sit existimatio, videmus: quod judicium populi Romani in honoribus ejus futurum sit, nemini dubium esse debet.

114. Quid? populares illi duo quid egerunt? alter, qui tamen se continuerat, tulerat nihil; senserat tantum de republica aliud, atque homines expectabant, vir & bonus, & innocens, & bonis viris semper probatus; quod parum videlicet intellexit in tribunatu, quid vero populo probaretur, & quod illum esse populum Romanum, qui in concione erat, arbitra-

batur, non tenuit eum locum, in quem; nisi popularis esse voluisset, facillimè pervenisset: alter, qui ita se in populari ratione jactarat, ut auspicia, legem Æliam, senatûs auctoritatem, consulem, collegas, bonorum judicium, nihil putaret, ædilitatem petivit cum bonis viris & hominibus primis, sed non præstantissimis opibus & gratiâ; tribum suam non tulit; Palatinam denique, per quam omnes illæ pestes vexare populum Romanum dicebantur, perdidit: nec quidquam illis comitiis, quod boni viri vellent, nisi repulsam tulit. Videtis igitur, populum ipsum; ut ita dicam, jam non esse popularem, qui ita vehementer eos, qui populares habentur, respuat; eos autem, qui ei generi adversantur, honore dignissimos judicet.

LIV. Veniamus ad ludos: facit enim, Judices, vester iste in me animorum oculorumque conjectus, ut mihi jam licere putem remissione uti genere dicendi. Comitiorum & concionum significationes interdum veræ sunt, nonnumquam vitiatæ atque corruptæ: theatrales gladiatoriique confessus dicuntur omnino solere, levitate nonnullorum, emptos plausus, & exiles, & raros excitare: attamen facile est, quum id fit, quemadmodum, & a quibus fiat; & quid integra multitudo faciat, videre.

Quid ego nunc dicam, quibus viris, aut cui generi civium maximè applaudatur? neminem vestrùm fallit: sit hoc sanè leve; quod non ita est, quoniam optimo cuique impertitur: sed, si est leve, homini gravi leve est; ei verò, qui pendet a rebus levissimis, qui rumore, & (ut ipsi loquuntur) favore populi tenetur, & ducitur, plausum, immortalitatem, sibilum, mortem videri necesse est.

116. Ex te igitur, Scaure, potissimùm quæro, qui ludos apparatusissimos magnificentissimosque fecisti, ecquis istorum popularium tuos ludos adspexerit: ecquis se theatro, populoque Romano commiserit. Ipse ille maximè ludius, non solum spectator, sed actor, & acroama, qui omnia fororis embolia novit; qui in cœtum mulierum pro psaltria adducitur; nec tuos ludos adspexit in illo ardenti tribunatu suo, nec ullos alios, nisi eos, a quibus vix vivus effugit. Semel, inquam, se ludis homo popularis commisit omnino, quum in templo Honoris-Virtutis honos habitus esset virtuti, Caiique Marii, conservatoris hujus imperii, monumentum, municipi ejus, & reipublicæ defensori, sedem ad salutem præbuisset.

LV. Quo quidem tempore, quid populus Romanus sentire se ostenderit, utroque in genere declaratum est: primò,

quum , audito senatusconsulto , ore ipsi ,
atque absenti senatui plausus est ab uni-
versis datus : deinde , quum senatoribus
singulis spectatum e senatu redeuntibus.
Quum verò ipse , qui ludos faciebat , con-
sul assedit ; stantes , & , manibus passis ,
gratias agentes , & lacrymantes gaudio ,
suam erga me benevolentiam ac miseri-
cordiam declararunt. At , quum ille furi-
bundus , incitatâ illâ suâ vecordi mente ,
venisset , vix se populus Romanus tenuit :
vix homines odium suum a corpore ejus
impuro atque infando represserunt : voces
quidem , & palmarum intentus , & male-
dictorum clamorem omnes profuderunt.

118. Sed quid ego populi Romani ani-
mum virtutemque commemoro , liberta-
tem jam ex diuturna servitute respicientis ,
in eo homine , cui tum petenti jam ædi-
litate ne histriones quidem coram sedenti
pepercerunt ? Nam quum ageretur Toga-
ta , Simulans , ut opinor , caterva tota ,
clarissimâ concentione in ore impuri ho-
minis imminens concionata est. *Huic vitæ
tuæ... & , Post principia , atque exitus vi-
tiosæ vitæ !* sedebat exanimatus ; & is , qui
antea cantorum convicio conciones cele-
brare suas solebat , cantorum ipsorum vo-
cibus ejiciebatur. Et , quoniam facta men-
tio est ludorum , ne illud quidem præter-
mittam , in magna varietate sententiarum

numquam ullum fuisse locum, in quo aliquid a poeta dictum cadere in tempus nostrum videretur, quod aut populum universum fugeret, aut non exprimeret ipse actor. Et, quæso, hoc loco, Judices, ne quâ me levitate ductum ad insolitum genus dicendi labi putetis, si de poëtis, de histrionibus, de ludis in judicio loquar.

LVI. Non sum tam ignarus, Judices, causarum, non tam insolens in dicendo, ut omni ex genere orationem aucuper, & omnes undique flosculos carpam, atque delibem: scio, quid gravitas vestra, quid hæc advocatio, quid ille conventus, quid dignitas P. Sextii, quid periculi magnitudo, quid ætas, quid honos meus postulet. Sed mihi sumpsi hoc loco doctrinam quamdam juventuti, qui essent optimates: in ea explicanda demonstrandum est, non esse populares omnes eos, qui putentur. Id facillimè consequar, si universi populi judicium verum & incorruptum, & si intimos sensus civitatis expressero.

120. Quid fuit illud, quòd, recenti nuntio de illo senatusconsulto, quod factum est in templo Virtutis, ad ludos scenamque perlato, confessu maximo, summus artifex, & mehercule semper partium in republica, tamquam in scena, optimatum, flens, & recenti lætitiâ, & misto dolore ac desiderio mei, egit aper-

tè multò gravioribus verbis meam causam, quàm egomet de me agere potuissem? summi enim poëtæ ingenium non solùm arte suâ, sed etiam dolore exprimebat. *Quid enim? qui rempublicam certo animo adjuverit, statuerit, steterit cum Achivis.* Vobiscum me stetisse dicebat, vestros ordines demonstrabat: revocabatur ab universis. *Re dubiâ, nec dubitarit vitam offerre, nec capiti pepercerit.* Hæc quantis ab illo clamoribus agebantur? quum jam, omisso gestu, verbis poëtæ, & studio actoris, & expectationi nostræ plauderetur? *Summum amicum, summo in bello...* (nam illud ipse actor adjungebat amico animo; & fortassis homines propter aliquod desiderium approbabant) *summo ingenio præditum.*

L VII. Tum illa, quanto cum gemitu populi Romani ab eodem paulò post in eadem fabula sunt acta? *O pater....* Me, me ille absentem, ut patrem deplorandum putarat, quem Q. Catulus, quem multi alii sæpe in senatu patrem patriæ nominarant. Quanto cum fletu de illis nostris incendiis ac ruinis, quum patrem pulsum, patriam afflictam deploraret, domum incensam eversamque? sic egit, ut demonstratâ pristinâ fortunâ, quum se convertisset, *Hæc omnia vidi inflammari....*
fletum

fletum etiam inimicis atque invidis excitaret.

122. Proh dii immortales ! quid ? illa quemadmodum dixit idem ? quæ mihi quidem ita & acta & scripta videntur esse ; ut vel a Catulo , si revixisset , præclare posse dici viderentur : is enim liberè reprehendere , & accusare populi nonnumquam temeritatem solebat , aut errorem senatûs : *O ingratifici Argivi , inanes Graii , immemores beneficii !* Non erat illud quidem verum : non enim ingrati , sed miseri , quibus reddere salutem , a quo acceperant , non liceret : nec unus in quemquam umquam gravior , quàm in me universi : sed tamen illud scripsit disertissimus poëta pro me ; egit fortissimus actor , non solum optimus , de me , quum omnes ordines demonstraret ; senatum , equites Romanos , universum populum Romanum accusaret : *Exsulare sinitis , sistis pelli , pulsum patimini.* Quæ tum significatio fuerit omnium , quæ declaratio voluntatis ab universo populo Romano in causa hominis non popularis , equidem audiebamus : existimare facilius possunt , qui affuerunt.

LVIII. Et , quoniam me huc provexit oratio , histrio casum meum toties collacrymavit , quum ita dolenter ageret causam meam , ut vox ejus illa præclara

lacrymis impediretur. Neque poëtæ, quorum ego semper ingenia dilexi, tempori meo defuerunt; eaque populus Romanus non solum plausu, sed etiam gemitu suo comprobavit. Utrum igitur hæc Æsopum potius pro me, aut Accium dicere oportuit, si populus Romanus liber esset, an principes civitatis? Nominatim sum appellatus in Bruto, *Tullius, qui libertatem civibus stabiliverat*. Millies revocatum est. Parumne videbatur populum Romanum judicare, id a me & a senatu esse constitutum, quod perditii cives sublatum per nos criminabantur?

124. Maximum verò populi Romani iudicium universo confesso gladiatorio declaratum est: erat enim munus Scipionis, dignum & eo ipso, & illo Q. Metello, cui dabatur. Id autem spectaculi genus erat, quod omni frequentia atque omni genere hominum celebratur: quo multitudo maximè delectatur. In hunc confessum P. Sextius tribunus plebis, quum ageret nihil aliud in eo magistratu, nisi meam causam, venit, & se populo dedit, non plausus cupiditate, sed ut ipsi inimici nostri voluntatem universi populi viderent: venit (ut scitis) ad columnam Memiam: tantus est ex omnibus spectaculis usque a Capitolio, tantus ex fori cancellis plausus excitatus, ut numquam major consensio,

aut apertior populi Romani universi fuisse ulla in causa diceretur. Ubi erant tum illi concionum moderatores, legum domini, civium expulsores? aliusne est aliquis improbis civibus peculiaris populus, cui nos offensi, invisique fuerimus?

LIX. Equidem existimo, nullum tempus esse frequentioris populi, quam illud gladiatorium; neque concionis ullius, neque verò ullorum comitiorum. Hæc igitur innumerabilis hominum multitudo, hæc populi Romani tanta significatio, sine ulla varietate universi, quum illis ipsis diebus de me actum iri putaretur, quid declaravit, nisi optimorum civium salutem & dignitatem populo Romano caram esse universo?

126. At verò & ille tribunus plebis, qui de me, non patris, avi, proavi, majorum denique suorum omnium, sed Græculorum instituto, concionem interrogare solebat, Vellentne me redire; &, quum erat reclamatum semivivis mercenariorum vocibus, populum Romanum negare dicebat: is, quum quotidie gladiatores spectaret, numquam est conspectus, quum veniret: emergebat subitò, quum sub tabulas subrepserat, ut, *Mater te appello* . . . dicturus videretur. Itaque illa via latebro-sa, quâ spectatum ille veniebat, Appia Jam vocabatur: qui tamen, quoquo tem-

pore conspectus erat, non modò gladiatores, sed equi ipsi gladiatorum repentinis sibilis extimescebant.

127. Videtisne igitur, quantum inter populum Romanum, & concionem intersit? dominos concionum omni odio populi notari? quibus autem consistere in operatum concionibus non liceat, eos omni populi Romani significatione decorari? Tu mihi etiam M. Atilium Regulum commemoras; qui redire ipse Carthaginem suâ voluntate ad supplicium, quàm sine iis captivis, a quibus ad senatum missus erat, Romæ manere maluerit? & mihi negas optandum reditum fuisse per familias comparatas, & homines armatos.

LX. Vim scilicet ego desideravi, qui, dum vis fuit, nihil egi, & quem, si vis non fuisset, nulla res labefactare potuisset. Hunc ego reditum repudiarem, qui ita florens fuit, ut verear, ne quis me studio gloriæ putet idcirco exisse, ut ita redirem? Quem enim umquam senatus civem, nisi me, nationibus exteris commendavit? cujus umquam propter salutem, nisi meam, senatus publicè sociis populi Romani gratias egit? de me uno patres conscripti decreverunt, ut, qui provincias cum imperio obtinerent, qui quæstores legatique essent, salutem & vitam meam custodirent. In una mea causa

post Romam conditam factum est, ut litteris consularibus ex senatusconsulto, cuncta ex Italia, omnes, qui rempublicam salvam vellent, convocarentur. Quod numquam senatus in universæ reipublicæ periculo decrevit, id in unius mea salute conservanda decernendum putavit. Quem curia magis requisivit? quem forum luxit? quem æquè ipsa tribunalia desideraverunt? Omnia discessu meo deserta, horrida, muta, plena luctûs, & mœroris fuerunt. Quis est Italiæ locus, in quo non fixum sit in publicis monumentis studium salutis meæ, testimonium dignitatis?

LXI. Nam quid ego illa de me divina senatusconsulta commemorem? vel quod in templo Jovis optimi maximi factum est, quum vir is, qui tripartitas orbis terrarum oras atque regiones tribus triumphis adjunctas huic imperio notavit, de scripto sententiâ dictâ, mihi uni testimonium patriæ conservatæ dedit? cujus sententiam ita frequentissimus senatus secutus est, ut unus dissentiret hostis; idque ipsum tabulis publicis mandaretur, ad memoriam posteritatis temporis sempiternam: vel quod est postridie decretum in curia, populi ipsius Romani, & eorum, qui ex municipiis convenerant, admonitu, ne quis de cœlo servaret; ne quis moram ullam afferret: si quis aliter fecisset, eum

planè everforem reipublicæ fore , idque senatum gravissimè laturum ; & ut statim de ejus factò referretur. Quâ gravitate suâ , quum frequens senatus nonnullorum scelus audaciamque tardasset ; tamen illud addidit , si diebus quinque , quibus agi de me potuisset , non esset actum , redirem in patriam , dignitate omni recuperatâ.

LXII. Decrevit eodem tempore senatus , ut iis , qui ex tota Italia , salutis meæ causâ convenerant , agerentur gratiæ ; atque ut iidem ad res redeuntes , ut venirent , rogarentur. Hæc erat studiorum in mea salute contentio ; ut ii , qui a senatu de me rogabantur , iidem senatui pro me supplicarent. Atque ita in his rebus unus est solus inventus , qui ab hac tam impensa voluntate bonorum palam dissideret , ut etiam Q. Metellus consul , qui mihi vel maximè ex magnis contentionibus reipublicæ fuisset inimicus , de mea salutè retulerit. Qui excitatus quum summâ auctoritate P. Servilii , tum incredibili quadam gravitate dicendi , quum ille omnes propè ab inferis evocasset Metellos , & ad illius generis , quod sibi cum eo commune esset , dignitatem , propinqui sui mentem a Clodianis latrociniis reflexisset : quumque eum ad domestici exempli memoriam , & ad Numidici illius Metelli casum vel gloriosum , vel gravem conver-

tisset, collacrymavit, ut vir egregius ac verè Metellus, totumque se P. Servilio dicenti etiam tum tradidit; nec illam divinam gravitatem, plenam antiquitatis, diutius homo ejusdem sanguinis potuit sustinere, & mecum absens beneficio suo rediit in gratiam. Quod certè, si est aliquis sensus in morte præclarorum virorum, quum omnibus Metellis, tum verò uni viro fortissimo, & præstantissimo civi gratissimum, fratri suo, fecit, socio laborum, periculorum, consiliorum meorum.

LXIII. Reditus verò meus qui fuerit, quis ignorat? quemamodum mihi advenienti, tamquam totius Italiæ, atque ipsius patriæ dexteram porrexerint Brundisini; quum ipsis nonis Sextilibus idem dies adventûs mei fuisset, qui & natalis idem carissimæ filiæ, quam ex gravissimo tum primùm desiderio luctuque conspexi; idem etiam ipsius coloniæ Brundisinæ, idemque Salutis: quumque me domus eadem optimorum & doctissimorum virorum, Lenii Flacci, & patris, & fratris ejus, lætissima accepisset, quæ proximo anno mœrens receperat, & suo præsidio periculoque defenderat: quumque itinere toto urbes Italiæ festos dies agere adventûs mei videbantur; viæ multitudine legatorum undique missorum celebrabantur; ad urbem accessus incredibili hominum mul-

titudine, & gratulatione florebat; iter a porta, in Capitolium adscensus, domum reditus erat ejusmodi, ut summa in lætitia illud dolerem, civitatem tam gratam, tam miseram atque oppressam fuisse.

132. Habes igitur, quod ex me quæsis, qui essent optimates: non est natio, ut dixisti; quod ego verbum agnovi: est enim illius, a quo uno maximè P. Sextius se oppugnari videt, hominis ejus, qui hanc nationem deleri & concidi cupivit: qui C. Cæsarem, mitem hominem, & a cæde abhorrentem sæpe increpuit, sæpe accusavit, quum affirmaret, illum numquam, dum hæc natio viveret, sine cura futurum: nihil profecit de universis: de me agere non destitit: me oppugnavit primùm per indicem Vectium, quem in concione de me, & de clarissimis viris interrogavit: in quo tamen eos cives conjunxit eodem periculo & crimine, ut a me inierit gratiam, quòd me cum amplissimis & fortissimis viris congregavit.

LXIV. Sed postea mihi, nullo meo merito, nisi quòd bonis placere cupiebam, omnes est insidias sceleratissimè machinatus. Ille ad eos, a quibus audiebat, quotidie aliquid defecti * afferebat: ille hominem mihi amicissimum, Cn. Pompeium, monebat, ut meam domum metueret, atque a me ipso caveret; ille se

sic cum inimico meo copularat, ut illum meae proscriptionis, quam adjuvabat Sex. Clodius, homo iis dignissimus, quibuscum vivit, tabulam esse, se scriptorem diceret: ille unus ordinis nostri discessu meo, luctu vestro palam exsultavit: de quo ego, quum quotidie rueret, verbum feci, Iudices, numquam: neque putavi, quum omnibus machinis ac tormentis, vi, exercitu, copiis oppugnarer, de uno sagittario me queri convenire.

134. Acta mea sibi ait displicere: quis nescit? qui legem eam contemnat, quæ dilucidè vetat, gladiatores biennio, quo quis petierit, aut petiturus sit, dare? In quo ejus temeritatem satis mirari, Iudices, non queo: facit apertissimè contra legem: facit is, qui neque elabi ex iudicio iucunditate suâ, neque emitti gratiâ potest; neque opibus & potentiâ leges ac iudicia perfringere. Quæ res hominem impellit, ut sit tam intemperans? istâ nimîâ gloriæ cupiditate familiam gladiatoriam, credo, nactus est, speciosam, nobilem, gloriosam: norat studia populi: videbat clamores & concursus futuros. Hac expectatione elatus homo, flagrans cupiditate gloriæ, tenere se non potuit, quin hos gladiatores induceret, quorum esset ipse pulcherrimus. Si ob eam causam peccaret, pro recenti populi Romani in se

benefico, populari studio elatus; tamen ignosceret nemo: quum verò ne de venalibus quidem homines electos, sed ex ergastulis emptos, nominibus gladiatoriiis ornarit, & sortitò alios Samnites, alios Provocatores fecerit; tanta licentia, tanta legum contemptio, nonne quem habitura sit exitum, pertimescit?

135. Sed habet defensiones duas: primum, Do, inquit, bestiarios: lex est scripta de gladiatoribus. Festivè. Accipite aliquid etiam acutius. Dicit se non gladiatores, sed unum gladiatorem dare, & totam ædilitatem in munus hoc transtulisse. Præclara ædilitas: unus leo: ducenti bestiarii. Verum utatur hac defensione: cupio eum suæ causæ confidere. Solet enim tribunos plebis appellare, & vi iudicium disturbare, quum diffidit: quem non tam admirror, quòd meam legem contemnat, hominis inimici, quàm quòd se statuit omnino consularem legem nullam putare. Cæciliam Didiam, Liciniam Juniam contempsit. Etiamne ejus, quem suâ lege & suo beneficio ornatum, munitum, armatum solet gloriari, C. Cæsaris legem de pecuniis reperundis non putat esse legem? Et aiunt alios esse, qui acta Cæsaris rescindant, quum hæc optima lex, & ab illo focero ejus, & ab hoc affecla negligatur?

LXV. Et cohortari ausus est accusator

in hac causa vos, Judices, ut aliquando essetis severi, aliquando medicinam adhiberetis reipublicæ. Non est ea medicina, quum sanæ parti corporis scalpellum adhibetur, atque integræ: carnificina est ista, & crudelitas: hi medentur reipublicæ, qui exsecant pestem aliquam, tamquam strumam civitatis. Sed, ut extremum habeat aliquid oratio mea, & ut ego antè dicendi finem faciam, quam vos me tam attentè audiendi; concludam illud de optimatibus, eorumque principibus, ac reipublicæ defensoribus: vosque, adolescentes, & qui nobiles estis, ad majorum vestrum imitationem excitabo; & qui ingenio & virtute nobilitatem potestis consequi, ad eam rationem, in qua multi homines novi & honore & gloriâ floruerunt, cohortabor.

137. Hæc est una via, mihi credite, & laudis, & dignitatis, & honoris; a bonis viris, sapientibus & bene naturâ constitutis, laudari & diligi: nosse descriptionem civitatis, a majoribus nostris sapientissimè constitutam; qui, quum regum potestatem non tulissent, ita magistratus annuos creaverunt, ut consilium senatûs reipublicæ proponerent sempiternum: deligerentur autem in id consilium ab universo populo, aditusque in illum summum ordinem omnium civium indus-

triæ ac virtuti pateret : senatum reipublicæ custodem , præsidem , propugnatorem collocaverunt : hujus ordinis auctoritate uti magistratus , & quasi ministros gravissimi consilii esse voluerunt : senatum autem ipsum proximorum ordinum splendore confirmari : plebis libertatem & comoda tueri atque augere voluerunt.

LXVI. Hæc qui pro virili parte defendunt , optimates sunt , cujuscumque sint ordinis : qui autem præcipuè suis cervicibus tanta munia , atque rempublicam sustinent , ii semper habiti sunt optimatum principes , auctores , & conservatores civitatis. Huic hominum generi fateor , ut antè dixi , multos adversarios , inimicos , invidos esse , multa proponi pericula , multas inferri injurias , magnos esse experientidos & subeundos labores : sed mihi omnis oratio est cum virtute , non cum desidia ; cum dignitate , non cum voluptate ; cum iis , qui se patriæ , qui suis civibus , qui laudi , qui gloriæ , non qui somno , & conviviiis , & delectationi natos arbitrantur. Nam , si qui voluptatibus ducuntur , & se vitiorum illecebris , & cupiditatum lenociniis dederunt , missos faciant honores : ne attingant rempublicam : patiantur viros fortes labore , se otio suo perfrui.

139. Qui autem bonam famam bonorum , quæ sola verè gloria nominari po-

test, expetunt, aliis otium quærere debent, & voluptates, non sibi: sudandum est his pro communibus commodis; ad-eundæ inimiciæ, subeundæ sæpe pro re-
publica tempestates: cum multis audaci-
bus, improbis, nonnumquam etiam po-
tentibus, dimicandum. Hæc audivimus de
clarissimorum virorum consiliis, & factis:
hæc accepimus, hæc legimus: neque eos
in laude positos videmus, qui incitarunt
aliquando populi animos ad seditionem,
aut qui largitione cæcarunt mentes impe-
ratorum, aut qui fortes & claros viros,
& bene de republica meritos in invidiam
aliquam vocaverunt: leves hos semper
nostri homines, & audaces, & malos,
& perniciosos cives putaverunt. At verò
qui horum impetus & conatus repreffe-
runt; qui auctoritate, qui fide, qui con-
stantiâ, qui magnitudine animi, consiliis
audacium restiterunt; ii graves, ii princi-
pes, ii duces, ii auctores hujus ordinis,
& dignitatis, atque imperii semper habiti
sunt.

LXVII. Ac, ne quis ex nostro, aut
aliquorum præterea casu hanc vitæ viam
pertimescat: unus in hac civitate, quem
quidem ego possim dicere, præclare vir
de republica meritus, L. Opimius, indi-
gnissimè concidit: cujus monumentum ce-
leberrimum in foro, sepulcrum desertissi-

mum in littore Dyrrhachino relictum est. Atque hunc tamen flagrantem invidiâ propter interitum C. Gracchi semper ipse populus Romanus periculo liberavit : alia quædam civem egregium iniqui iudicii procella pervertit : ceteri verò aut repentinâ vi perculsi , ac tempestate populari , per populum tamen ipsum recreati sunt , atque revocati ; aut omnino invulnerati , inviolatique vixerunt. At verò ii , qui senatûs consilium , qui auctoritatem bonorum , qui instituta majorum neglexerunt , & imperitæ , aut concitatæ multitudini jucundi esse voluerunt ; omnes ferè reipublicæ pœnas aut præsentî morte , aut turpi exsilio dependerunt.

141. Quodd si apud Athenienses , homines Græcos , longè a nostrorum hominum gravitate disjunctos , non deerant qui rempublicam contra populi temeritatem defenderent , quum omnes , qui ita fecerant , e civitate ejicerentur : si Themistoclem illum , conservatorem patriæ , non deteruit a republica defendenda nec Miltiadis calamitas , qui illam civitatem paulò antè servarat , nec Aristidis fuga , qui unus omnium justissimus fuisse traditur : si postea summi ejusdem civitatis viri , quos nominatim appellari non est necesse , propositis tot exemplis iracundiæ levitatisque popularis , tamen suam rempublicam illam

defenderunt : quid nos tandem facere debemus , primum in ea civitate nati , unde orta mihi gravitas & magnitudo animi videtur ? tum in tanta gloria insistentes , ut omnia humana leviora videri debeant ? deinde , ad eam rempublicam tuendam aggressi , quæ tantâ dignitate est , ut eam defendentem occidere non aliud sit , quàm oppugnantem rerum potiri ?

LXVIII. Homines Græci , quos antea nominavi , iniquè a suis civibus damnati atque expulsi , tamen , quia bene sunt de suis civitatibus meriti , tantâ hodie gloriâ sunt , non in Græcia solùm , sed etiam apud nos , atque in ceteris terris , ut eos , a quibus illi oppressi sunt , nemo nominet ; horum calamitatem dominationi illorum omnes anteponant. Quis Carthaginiensium pluris fuit Annibale , consilio , virtute , rebus gestis ; qui unus cum tot imperatoribus nostris per tot annos de imperio & de gloria decertavit ? hunc sui cives e civitate ejecerunt ; nos etiam hostem litteris nostris & memoriâ videmus esse celebratum.

143. Quare imitemur nostros Brutos , Camillos , Ahalas , Decios , Curios , Fabricios , Maximos , Sciptones , Lentulos , Æmilios , innumerabiles alios , qui hanc rempublicam stabiliverunt ; quos equidem in deorum immortalium cœtu ac numero repono : amemus patriam , pareamus se-

natui, consulamus bonis : præsentēs fructus negligamus , posteritati & gloriæ serviamus : id esse optimum putemus , quod erit rectissimum : speremus quæ volumus, sed quod acciderit feramus : cogitemus denique , corpus virorum fortium , magnorumque hominum , esse mortale ; animi verò motus , & virtutis gloriam sempiternam : neque hanc opinionem si in illo sanctissimo Hercule consecratam videmus, cujus corpore ambugto, vitam ejus & virtutem immortalitas excepisse dicitur , minùs existimemus , eos , qui hanc tantam rempublicam suis consiliis , aut laboribus , aut auxerint , aut defenderint , aut servarint, esse immortalem gloriam consecutos.

LXIX. Sed me repentè , Judices , de fortissimorum & clarissimorum civium dignitate & gloria dicentem , & plura etiam dicere parantem , horum adspèctus in ipso cursu orationis repressit. Video P. Sextium , meæ salutis , vestræ auctoritatis , publicæ causæ defensorem , propugnato-rem , auctorem , reum : video hunc prætextatum ejus filium oculis lacrymantibus me intuentem : video Milonem , vindicem vestræ libertatis , custodem salutis meæ , subsidium afflictæ reipublicæ , extinctorem domestici latrocinii , represso-rem cædis quotidianæ , defensorem templorum atque tectorum , præsidium curiæ , fordidatum & reum : video P. Lentulum,

cujus ego patrem , deum ac parentem statuo fortunæ ac nominis mei , & fratris , rerumque nostrarum , in hoc misero squalore & sordibus : cui superior annus idem & virilem , patris ; & prætextam , populi judicio , togam dederit , hunc hoc anno in hac toga , rogationis injustissimæ subitam acerbitatem pro patre fortissimo & clarissimo cive deprecantem.

145. Atque hic tot & talium civium squalor , hic luctus , hæc sordes susceptæ sunt propter unum me , quia me defenderunt , quia meum casum luctumque doluerunt , quia me lugenti patriæ , flagitanti senatui , poscenti Italiæ , vobis omnibus orantibus reddiderunt. Quod tantum est in me scelus ? quid tantopere deliqui illo , illo die , quum ad vos indicia , litteras , confessiones communis exitii detuli ? quum parui vobis ? At , si scelestum est amare patriam , pertuli poenarum fatis : eversa domus est , fortunæ vexatæ , dissipati liberi , raptata conjux , frater optimus , incredibili pietate , amore inaudito , maximo in squalore volutatus est ad pedes inimicissimorum : ego pulsus aris , focis , diis penetibus , distractus a meis , carui patriâ , quam (uti levissimè dicam) certè texeram : pertuli crudelitatem inimicorum , scelus infidelium , fraudem invidorum.

146. Si hoc non est fatis , quòd hæc omnia deleta videntur reditu meo : multò

mihi, multò, inquam, Judices, præstat; in eandem illam recidere fortunam, quàm tantam importare meis defensoribus & conservatoribus calamitatem. An ego in hac urbe esse possim, his pulsus, qui me hujus urbis compotem fecerunt? non ero, non potero esse, Judices; neque hic umquam puer, qui his lacrymis, quâ sit pietate, declarat, amisso patre suo propter me, me ipsum incolumem videbit; nec, quotiescumque me viderit, ingemiscet, ac pestem suam, & patris sui, sese dicet videre. Ego verò vos in omni fortuna, quæcumque erit oblata, complectar: nec me ab iis, quos meo nomine sordidatos videtis, umquam ulla fortuna divellet: neque eæ nationes, quibus me senatus commendavit, quibus de me gratias egit, hunc exulem propter me sine me videbunt.

147. Sed hæc dii immortales, qui me suis templis advenientem receperunt, stipatum ab his viris & P. Lentulo consule, atque ipsa respublica, quâ nihil est sanctius, vestræ potestati, Judices, commiserunt. Vos hoc judicio omnium bonorum mentes confirmare, improborum reprimere potestis: vos his civibus uti optimis: vos me reficere, & renovare rempublicam. Quare vos obtestor, atque obsecro, ut, si me salvum esse voluistis, eos conservetis, per quos me recuperavistis.



IN VATINIUM.

ORATIO TRIGESIMA SECUNDA.

1. **S**i tua tantummodò, Vatini, quid indignitas postularet, spectare voluissem, fecissem id, quod his vehementer placebat, ut te, cujus testimonium, propter turpitudinem vitæ, fordesque domesticas, nullius momenti putaretur, tacitus dimitterem: nemo enim horum aut ita te refutandum, ut gravem adversarium, aut ita rogandum, ut religiosum testem arbitrabatur. Sed fui paulò in te intemperantior fortasse, quàm debui: odio enim tuì, in quo, etsi omnes propter tuum in me scelus, superare debeo, tamen ab omnibus pene vincor, sic sum incitatus, ut, quum te non minùs contemnerem, quàm odissem, tamen vexatum potius, quàm despectum, vellem dimittere.

2. Quare, ne tibi hunc honorem a me haberi fortè mirere, quòd interrogem, quem nemo congressu, nemo aditu, nemo suffragio, nemo civitate, nemo luce

dignum putet ; nulla me ad id causa impulisset , nisi ut ferocitatem tuam istam comprimerem , & audaciam frangerem , & loquacitatem paucissimis interrogationibus irretitam retardarem. Etenim debuisti , Vatini , etiam si falsò venisses in suspicionem P. Sextio , tamen mihi ignoscere , si in tanto hominis de me optimè meriti periculo , & tempori ejus , & voluntati parere voluissem.

3. Sed hesterno pro testimonio esse mentitum , quum affirmares nullum tibi omnino cum Albinovano sermonem non modò de Sextio accusando , sed nulla umquam de re fuisse , paulò antè imprudens indicasti : qui & T. Claudium tecum communicasse , & a te consilium P. Sextii accusandi petisse , & Albinovanum , quem antea vix tibi notum esse dixisses , domum tuam venisse , multa tecum locutum dixeris : denique conciones P. Sextii scriptas , quas neque nosset , neque reperire posset , te Albinovano dedisse , easque in hujus judicio esse recitatas. In quorum altero es confessus , a te accusatores esse instructos , & subornatos ; in altero inconstantiam tuam quum levitate , tum etiam perjurio implicatam refellisti : quum , quem alienissimum a te esse dixisses , eum domi tuæ fuisse ; quem prævaricatorem ab initio judicasses , ei te , quos rogasset , ad accusandum libros dixeris dedisse.

II. Nimium es vehemens, feroxque naturâ: non putas fas esse verbum ex ore exire cujusquam, quod non jucundum & honorificum ad aures tuas accidat: venisti iratus omnibus; quod ego, simulac te adspexi, prius quam loqui cœpisti, quum antè Gellius, nutricula seditiosorum omnium, testimonium diceret, sensi, atque providi: repentè enim te, tamquam serpens e latibulis, oculis eminentibus, inflato collo, tumidis cervicibus intulisti: ut mihi renovatus ille tuus in te. **

5. Veterem meum amicum, sed tamen tuum familiarem defenderim, quum in hac civitate oppugnatio soleat, quâ tu nunc uteris, nonnumquam, defensio numquam vituperari. Sed quæro a te, cur C. Cornelium non defenderem: num legem aliquam Cornelius contra auspicia tulerit: num Æliam, num Fufiam legem neglexerit: num consuli vim attulerit: num armatis hominibus templum tenuerit: num intercessorem vi dejecerit: num religiones polluerit: ærarium exhauserit: rempublicam compilarit. Tua sunt, tua sunt hæc omnia. Cornelio ejusmodi nihil obiectum est. Codicem legisse dicebatur. Defendebatur, testibus collegis suis, non recitandi causâ legisse, sed recognoscendi. Constabat tamen, Cornelium concilium illo die dimisisse, intercessioni paruisse.

Tu verò, cui Cornelii defensio displicet, quam causam ad patronos tuos, aut quod os afferes? quibus jam præscribis, quanto illis probro futurum sit, si te defenderint, quum tu mihi Cornelii defensionem in maledictis obijciendam putaris.

6. Attamen hoc, Vatini, memento, paulò post istam defensionem meam, quam tu bonis viris displicuisse dicis, me quum universi populi Romani summâ voluntate, tum optimi cujusque singulari studio, magnificentissimè post hominum memoriam consulem factum, omniaque ea me pudenter vivendo consecutum esse, quæ tu impudenter vaticinando sperare te sæpe dixisti.

III. Nam quòd mihi discessum objecisti meum, & quòd horum, quibus ille dies acerbissimus fuit, qui idem tibi lætissimus, luctum & gemitum renovare voluisti; tantum tibi respondeo, me, quum tu, ceteræque reipublicæ pestes, armorum causam quæreretis, & quum per meum nomen fortunas locupletium diripere, sanguinem principum civitatis exforbere, crudelitatem vestram odiumque diuturnum, quod in bonos jam inveteratum habebatis, saturare cuperetis; scelus & furorem vestrum cedendo maluisse frangere, quàm resistendo. Quare peto a te, ut mihi ignoscas, Vatini, quum patriæ pepercerim,

quam servaram ; & , si ego te perditorem & vexatorem reipublicæ fero , tu me conservatorem & custodem feras. Deinde ejus viri discessum increpas , quem vides , civium omnium desiderio , ipsius denique reipublicæ luctu , esse revocatum ?

8. At enim dixisti , non meâ , sed reipublicæ causâ homines de meo reditu laborasse. Quasi verò quisquam vir excellenti animo in rempublicam ingressus optabilius quidquam arbitretur , quàm se a suis civibus reipublicæ causâ diligî. Scilicet aspera mea natura , difficilis aditus , gravis vultus , superba responsa , insolens vita : nemo humanitatem meam , nemo consuetudinem , nemo consilium , nemo auxilium requirebat : cujus desiderio (ut hæc minima dicam) forum moestum , muta curia , omnia denique bonarum artium studia siluerunt.

9. Sed nihil sit factum meâ causâ : omnia illa senatusconsulta , populi jussa , Italiæ totius , cunctarum sociëtatum , collegiorum omnium decreta de me reipublicæ causâ esse facta fateamur. Quid ergo , homo imperitissime solidæ laudis , ac veræ dignitatis , præstantius mihi potuit accidere ? quid optabilius ad immortalitatem gloriæ , atque ad memoriam mei nominis sempiternam , quàm omnes hoc cives meos judicare , civitatis salutem cum mea unius

salute esse conjunctam? quod quidem ego tibi reddo tuum: nam, ut tu me carum esse dixisti senatui, populoque Romano, non tam meâ causâ, quàm reipublicæ; sic ego te, quamquam sis omni diritate atque immanitate teterrimus, tamen dico esse odio civitati, non tam tuo, quàm reipublicæ nomine.

IV. Atque, ut aliquando ad te veniam, de me hoc sit extremum. Quid quisque nostrum de se ipse loquatur, non est sanè, non est requirendum: boni viri judicent: id est maximi momenti, & ponderis. Duo sunt tempora, quibus nostrorum, civium spectentur judicia de nobis; unum honoris, alterum salutis. Honos talis populi Romani voluntate paucis est delatus, ac mihi; salus tanto studio civitatis nemini reddita: de te autem homines quid sentiant, in honore experti sumus; in salute exspectamus. Sed tamen ne me cum his principibus civitatis, qui adsunt P. Sextio, sed ut tecum, homine uno impudentissimo atque infimo, conferam; de te ipso, homine & arrogantissimo & mihi inimicissimo, quæro, Vatini; utrùm tandem putes, huic civitati, huic reipublicæ, huic urbi, his templis, ærario, curiæ, viris his, quos vides, horum bonis, fortunis, liberis, civibus ceteris, denique deorum immortalium delubris, auspiciis,

auspiciis, religionibus, melius fuisse & præstabilius, me civem in hac civitate nasci, an te? quum mihi hæc responderis, aut ita impudenter, ut manus a te homines vix abstinere possint; aut ita dolenter, ut aliquando ista, quæ sunt inflata, rumpantur: tum memoriter respondeto ad ea, quæ de te ipso rogaro.

V. Atque illud tenebricosissimum tempus ineuntis ætatis tuæ patiar latere: licet impunè per me parietes in adolescentia perfoderis, vicinos compilaris, matrem verberaris: habeat hoc præmium tua indignitas, ut adolescentiæ turpitudine obscuritate & sordibus tuis obtegatur. Quæsturam petisti cum P. Sextio, quum hic nihil loqueretur, nisi quod agebat; tu de altero consulatu gerendo te diceres cogitare. Quæro abs te, teneasne memoriâ, quum P. Sextius quæstor sit cunctis suffragiis factus, tunc te vix, invitis omnibus, non populi beneficio, sed consulis, extremum adhæsisse?

12. In eo magistratu, quum tibi magno clamore aquaria provincia sorte obtigisset, missusne sis a me consule Puteolos, ut inde aurum exportari, argentumque prohiberes? in eo negotio, quum te non custodem ad continendas, sed portitorem ad partiendas merces missum putares, quumque omnium domos, apothecas,

naves , furacissimè scrutarere , hominesque negotia gerentes judiciis iniquissimis irretires , mercatores e 'navi egredientes terreres , conscendentes morarere ; teneasne memoriâ , tibi in conventu Puteolis manus esse allatas ? ad me consulem Puteolanorum querelas esse delatas ? post quæsturam , exierisne legatus in ulteriorem Hispaniam , C. Cosconio proconsule ? quum illud iter Hispaniense pedibus ferè confici soleat , aut , si quis navigare velit , certa sit ratio navigandi ; venerisne in Sardiniam , atque inde in Africam ? fuerisne , quod sine senatusconsulto tibi facere non licuit , in regno Hiempsalis ? fuerisne in regno Mastanefosi ? venerisne ad fretum per Mauritaniam ? quem scias umquam legatum Hispaniensem istis itineribus in illam provinciam pervenisse ?

13. Factus es tribunus plebis : quid enim te de Hispaniensibus flagitiis tuis , sordidissimisque furtis interrogem ? Quæro abs te primùm universè , quod genus improbitatis & sceleris in eo magistratu prætermiseris ? Ac tibi jam inde præscribo , ne tuas sordes cum clarissimorum virorum splendore permisceas. Ego te , quæcumque rogabo , de te ipso rogabo ; neque te ex amplissimi viri dignitate , sed ex tuis tenebris extraham ; omniaque mea tela

sic in te conjicientur ; ut nemo per tuum latus (quod soles dicere) saucietur ; in tuis pulmonibus ac visceribus hærebunt.

VI. Et, quoniam omnium rerum magnarum a diis immortalibus principia ducuntur, volo ut mihi respondeas tu, qui te Pythagoricum soles dicere, & hominis doctissimi nomen tuis immanibus & barbaris moribus prætere ; quæ te tanta pravitas mentis tenuerit, qui tantus furor, ut, quum inaudita ac nefaria sacra susceperis, quum inferorum animas elicere, quum puerorum extis deos manes mactare soleas, auspicia, quibus hæc urbs condita est, quibus omnis respublica atque imperium tenetur, contempseris? initioque tribunatus tui, senatui denuntiaris, tuis actionibus augurum responsa, atque ejus collegii arrogantiam impedimento non futuram?

15. Secundum ea quæro, servariske in eo fidem? num quando tibi moram attulerit, quò minus concilium advocares, legemque ferres, quòd eo die scires de cælo esse servatum? Et quoniam hic locus unus est, quem tibi cum Cæsare communem esse dicas; sejungam te ab illo, non solum reipublicæ causâ, verum etiam Cæsaris, ne qua ex tua summa indignitate labe illius dignitati adpersa videatur. Primum quæro, num tu senatui causam tuam

permittas, quod facit Cæsar? deinde, quæ sit auctoritas ejus, qui se alterius facto, non suo defendat? deinde (erumpet enim aliquando ex me vera vox, & dicam sine cunctatione quod sentio) si jam violentior aliqua in re C. Cæsar fuisset, si eum magnitudo contentionis, studium gloriæ, præstans animus, excellens nobilitas aliquò impulisset, quod in illo viro & tum ferendum esset, & maximis rebus, quas postea gessit, obliterandum; id tu tibi, furcifer, fumes, & Vatini latronis ac sacrilegi vox audietur, hoc postulantis, ut idem sibi concedatur, quod Cæsari?

VII. Sic enim ex te quæro. Tribunus plebis fuisti; sejunge te a consule: collegas habuisti viros fortes novem: ex his tres erant, quos tu quotidie sciebas ferre de cælo, quos irridebas, quos privatos esse dicebas; de quibus duos prætextatos sedentes vides, te ædilitiam prætextam togam, quam frustra confeceras, vendidisse: tertium scis ex illo obsessio atque afflicto tribunatu, consularem auctoritatem hominem esse adolescentem consecutum: reliqui sex fuerunt; ex quibus partim planè tecum sentiebant, partim medium quemdam cursum tenebant: omnes habuerunt leges promulgatas: in his multas meus necessarius, etiam de mea sententia, C. Cosconius, judex noster: quem,

tu disrumperis, quum ædilitium vides.

17. Volo uti mihi respondeas, num quis ex toto collegio legem sit ausus ferre, præter unum te? quæ tanta in te fuit audacia, quæ tanta vis, ut, quum novem tui collegæ sibi timendum esse duxerint, id unus tu, emersus e cœno, omnium facilè omnibus rebus infimus, contemnendum, despiciendum, irridendum putares? num quem post urbem conditam scias tribunum plebis egisse cum plebe, quum constaret servatum esse de cœlo?

18. Simul etiam illud volo uti respondeas, quum, te tribuno plebis, esset etiam tum in republica lex *Ælia*, & *Fufia*; quæ leges sæpenumero tribunitios furores debilitarunt, & represserunt; quas contra, præter te, nemo umquam est facere conatus; quæ quidem leges anno post, sedentibus in templo duobus non consulibus, sed proditoribus hujus civitatis ac pestibus, unà cum auspiciis, cum intercessionibus, cum omni jure publico confla-graverunt: ecquando dubitaris contra eas leges cum plebe agere, & concilium convocare? num quem ex tribunis plebis, quicumque seditiosi fuerint, tam audacem audieris fuisse, ut umquam contra legem *Æliam* aut *Fufiam* concilium advocaret?

VIII. Quæro illud etiam ex te, conatusne sis, voluerisne, denique cogitaris

(est enim res ejusmodi , ut , si tibi modò in mentem venit , nemo sit , qui te ullo cruciatu esse indignum putet) cogitarisne , in illo tuo intolerabili , non regno (nam cupis id audire) sed latrocinio , augur fieri in Q. Metelli locum ? ut , quicumque te adspexisset , duplicem dolorem gemitumque susciperet , & ex desiderio clarissimi & fortissimi civis , & ex honore turpissimi atque improbissimi ? Adeone non labefactam rempublicam te tribuno , neque conquassatam civitatem , sed captam hanc urbem atque eversam putares , ut augurem Vatinium ferre possemus ?

20. Hoc loco quæro , si , id quod concupieras , augur factus esses : in qua tua cogitatione nos , qui te oderamus , vix dolorem ferebamus ; illi autem , quibus eras in deliciis , vix risum tenebant : sed quæro , si ad cetera vulnera , quibus putasti rempublicam deleri , hanc quoque mortiferam plagam inflixisses auguratûs tui ; utrûm decreturus fueris id , quod augures omnes usque a Romulo decreverunt , Jove fulgente , cum populo agi nefas esse , an , quia tu semper sic egisses , auspicia fueris augur dissoluturus ?

IX. Ac , ne diutius loquar de auguratu tuo (quod invitatus facio , ut recorder ruinas reipublicæ : neque enim tu umquam , stante non modò majestate horum , sed

etiam urbe, te augurem fore putasti: verumtamen, ut somnia tua relinquam, ad scelera veniam) volo uti mihi respondeas: quum M. Bibulum consulem, non dicam bene de republica sentientem, ne tu mihi homo potens irascere, qui ab eo dissensisti; sed hominem certè nusquam progredientem, nihil in republica molientem, tantum animo ab actionibus tuis dissentientem: quum eum tu consulem in vincla duceres, & a tabula Valeria collegæ tui mitti juberent; fecerisne ante Rostra pontem, continuatis tribunalibus, per quem consul populi Romani moderatissimus & constantissimus, sublato auxilio, exclusis amicis, vi perditorum hominum incitatâ, turpissimo miserrimoque spectaculo non in carcerem, sed ad supplicium & ad necem duceretur?

22. Quæro, num quis ante te tam fuerit nefarius, qui id fecerit? ut sciamus, utrum veterum facinorum sis imitator, an inventor novorum. Idemque tu quum his atque hujusmodi consiliis ac facinoribus, nomine C. Cæsaris, clementissimi atque optimi viri, scelere verò atque audaciâ tuâ, M. Bibulum foro, curiâ, templis, locis omnibus expulisses, inclusum domi contineres; quumque non majestate imperii, non jure legum, sed januæ præsidio & parietum custodiis, consulis vita

tegeretur ; miserisne viatorem , qui M. Bibulum domo vi extraheret , ut , quod in privatis semper est servatum , id , te tribuno plebis , consuli domus exsilium esse non posset ?

23. Simulque mihi respondeto tu , qui nos , qui de communi salute consentimus , tyrannos vocas , fuerisne non tribunus plebis , sed intolerandus ex cœno nescio qui , atque ex tenebris tyrannus ? qui primum eam rempublicam , quæ auspiciis inventis constituta est , iisdem auspiciis sublati conarere pervertere : deinde sanctissimas leges , Æliam & Fufiam dico , quæ in Gracchorum ferocitate , & in audacia Saturnini , & in colluvione Drusi , & in contentione Sulpicii , & in cruore Cinnano , etiam inter Sullana arma vixerunt , solus conculcaris , ac pro nihilo putaris : qui consulem morti objeceris , inclusum obsederis , extrahere ex suis tectis conatus sis : qui in eo magistratu non modò emergeris ex mendicitate , sed etiam divitiis nos jam tuis terras : fuerisne tantâ crudelitate , ut delectos viros , & principes civitatis tollere , & delere tuâ rogatione conareris ?

X. Quum L. Vettium , qui in senatu confessus esset se cum telo fuisse , Cn. Pompeio , summo & clarissimo civi , suis manibus necem afferre voluisse , in concionem produxeris ; indicem in Rostris , in il-

lo, inquam, augurato templo ac loco collocaris, quò auctoritatis exquirendæ causâ ceteri tribuni plebis principes civitatis producere consueverunt; ibi tu indicem Vectium, linguam & vocem suam sceleris & menti tuæ præbere voluisti, ut diceret L. Vectius in concione tua, rogatus a te, se auctores, & impulsores, & socios habuisse sceleris illius eos viros, quibus e civitate sublati, quod tu eo tempore moliebare, civitas stare non posset: M. Bibulum, cujus inclusione contentus non eras, interficere volueras, spoliaveras consulatu, patriâ privare cupiebas: L. Lucillum, cujus tu rebus gestis, quòd ipse ad imperatorias laudes a puero videlicet spectaras, vehementius invidebas: C. Curionem, perpetuum hostem improborum omnium, auctorem publici consilii, libertate communi tuendâ maximè liberum, cum filio principe juventutis, cum republica conjunctiore etiam, quàm ab illa ætate postulandum fuit, delere voluisti:

25. L. Domitium, cujus dignitas & splendor præstringebat, credo, oculos Vatirii, quem tu propter commune odium in bonos oderas, in posterum autem propter omnium spem, quæ de illo est, atque erat, antè aliquantò timebas: L. Lentulum, hunc judicem nostrum, flaminem

Martialem, quodd erat eo tempore Gabi-
nii tui competitor, ejusdem Vectii indicio
opprimere voluisti: qui si tum illam labem
pestemque vicisset, quod ei tuo scelere
non licuit, respublica victa non esset: hu-
jus etiam filium eodem indicio & crimine
ad patris interitum aggregare voluisti:
L. Paulum, qui tum quaestor Macedo-
niam obtinebat, quem civem? quem vi-
rum? qui duos nefarios patriæ prodito-
res, domesticos hostes, legibus exterminat,
hominem ad conservandam rem-
publicam natum, in idem Vectii indicium,
atque in eundem hunc numerum congregasti.
Quid ego de me querar? qui etiam
gratias tibi agere debeo, quodd me ex fortis-
simorum civium numero sejungendum
non putaris.

XI. Sed qui fuit ille tunc tantus furor,
ut, quum jam Vectius ad arbitrium tuum
perorasset, & civitatis lumina notasset,
descendissetque de Rostris, eum repente
revocares, colloquerere, populo Romano
vidente; deinde interrogares, ecquosnam
alios posset nominare? inculcarisne, ut
C. Pisonem, generum meum, nominaret,
qui in summa copia optimorum adoles-
centium, pari continentia, virtute, pie-
tate reliquit neminem? itemque M. Late-
rensem, hominem dies atque noctes de
laude & de republica cogitantem? pro-

mulgarisne, impurissime & perditissime hostis, quæstionem de tot amplissimis & talibus viris, indicium Vectio, præmia amplissima? quibus rebus, omnium mortalium non voluntate, sed convicio repudiatis, fregerisne in carcere cervices ipsi illi Vectio, ne quod indicium corrupti indicii exstaret, ejusque sceleris in te ipsum quæstio flagitaretur?

27. Et, quoniam crebrò usurpas, legem te de alternis consiliis rejiciendis tulisse, ut omnes intelligant, te ne rectè quidem facere sine scelere potuisse, quæro, quum lex esset æqua promulgata initio magistratûs, multas etiam alias tulisses, expectarisne, dum C. Antonius reus fieret apud Cn. Lentulum Clodianum? & posteaquam ille est reus factus, statim tuleris in eum, qui tuam post legem reus factus esset; ut homo consularis exclusus, miser, puncto temporis spoliaretur beneficio & æquitate legis tuæ?

28. Dices familiaritatem tibi fuisse cum Q. Maximo. Præclara defensio facinoris tui: nam Maximi quidem summa laus est, sumptis inimiciis, susceptâ causâ, quæsitore, consilioque delecto, commodiorem inimico suo conditionem rejectionis dare noluisse; nihilque Maximus fecit alienum aut suâ virtute, aut illis viris clarissimis, Paulis, Maximis, Africanis; quo-

rum gloriam hujus virtute renovatam non modò speramus, verùm etiam jam videmus: tua fraus, tuum maleficio, tuum scelus illud est, te id, quod promulgasses misericordiæ nomine, ad crudelitatis tempus distulisse. Ac nunc quidem C. Antonius hac unâ re miseriam suam consolatur, quòd imagines patris, & fratris sui, fratrisque filiam, non in familia, sed in carcere collocatam audire maluit, quàm videre.

XII. Et quoniam pecunias aliorum despicias, de tuis divitiis intolerantissimè gloriaris, volo uti mihi respondeas, fecerisne fœdera tribunus plebis cum civitatibus, cum regibus, cum tetrarchis? erogarisne pecunias ex ærario tuis legibus? eripuerisne partes illo tempore carissimas partim a Cæsare, partim a publicanis? Quæ quum ita sint, quæro ex te, sisne ex pauperrimo dives factus illo ipso anno, quo lex lata est de pecuniis repetundis acerrima? ut omnes intelligere possent, a te non modò nostra acta, quos tyran nos vocas, sed etiam amicissimi tui legem esse contemptam: apud quem tu etiam nos criminari soles, qui illi sumus amicissimi, quum tu ei contumeliosissimè toties maledicas, quoties illi affinem te esse dicis.

30. Atque illud etiam scire ex te cupio, quo consilio, aut quâ mente feceris, ut in

epulo Q. Arrii, familiaris mei, cum toga pulla accumberes? quem umquam videris? quem audieris? quo exemplo, quo more feceris? Dices, supplicationes te illas non probasse: optimè: nullæ fuerint supplicationes: videsne, me nihil de anni illius causa, nihil de eo, quod tibi cum summis viris commune esse videatur, sed de tuis propriis sceleribus ex te quærere? Nulla supplicatio fuerit: cedo, quis umquam cœnarit atratus? ita enim illud epulum est funebre, ut munus sit funeris; epulæ quidem ipsæ, dignitatis.

XIII. Sed omitto epulum, populi Romani festum diem, argento, veste, omni apparatu, ornatuque visendo: quis umquam in luctu domestico, quis in funere familiari cœnavit cum toga pulla? cui de balneis exeunti, præter te, toga pulla umquam data est? quum tot hominum millia accumberent, quum ipse epuli dominus, Q. Arrius, albatus esset; tu in templum Castoris te cum C. Fidulo atrato, ceterisque tuis furiis funestum intulisti. Quis tum non ingemuit? quis non doluit reipublicæ casum? quis sermo alius in illo epulo fuit, nisi, hanc tantam & tam gravem civitatem subjectam esse non modo furori, verum etiam irrisioni tuæ?

32. Hunc tu morem ignorabas? numquam epulum videras? numquam puer,

aut adolescens inter coquos fueras? Faus-
ti, adolescentis nobilissimi, paulò antè ex
epulo magnificentissimo famem illam ve-
terem tuam non expleras? quem accum-
bere atratum videras, dominum cum to-
ga pulla & ejus amicos ante convivium?
quæ te tanta tenuit amentia, ut tu, nisi
id fecisses, quod fas non fuit, nisi violas-
ses templum Castoris, nomen epuli, ocu-
los civium, morem veterem, ejus, qui
te invitarat, auctoritatem, parum putares
testificatum esse, supplicationes te illas non
putare?

XIV. Quæro illud etiam ex te, quod
privatus admisisti; in quo certè jam tibi
dicere non licebit, cum clarissimis viris
causam tuam esse conjunctam: postulatus-
ne sis lege Liciniâ & Juniâ? edixeritne
C. Memmius prætor ex ea lege, ut ades-
ses die tricesimo? quum is dies venisset,
fecerisne, quod in hac republica non mo-
dò factum antè numquam est, sed in om-
ni memoria sit omnino inauditum? ap-
pellarisne tribunos plebis, ne causam di-
ceres? levius dixi; quamquam idipsum esset
& novum, & non ferendum: sed appel-
larisne nominatim pestem illius anni, fu-
riam patriæ, tempestatem reipublicæ,
Clodium? qui tamen quum jure, quum
more, quum potestate judicium impedire
non posset, rediit ad illam vim & furo-

rem suum, ducemque se militibus tuis præbuit. In quo, ne quid a me dictum in te potius putes, quàm abs te esse quæsitum; nullum onus imponam mihi testimonii: quæ mihi brevi tempore ex eodem isto loco video esse dicenda, servabo, teque non arguam, sed, ut in ceteris rebus feci, rogabo.

34. Quæro ex te, Vatini, num quis in hac civitate post urbem conditam tribunos plebis appellarit, ne causam diceret? num quis reus in tribunal sui quæsitoreis adscenderit, eumque vi deturbarit? subsellia dissiparit? urnas delegerit? eas denique omnes res in iudicio disturbando commiserit, quarum rerum causâ iudicia sunt constituta? sciasne tum fugisse Memmium? accusatores esse tuos de tuis, tuorumque manibus ereptos? iudices quæstionum de proximis tribunalibus esse depulsos? in foro, luce, inspectante populo Romano, quæstionem, magistratus, morem majorum, leges, iudices, scelerum poenam esse sublatam? hæc omnia sciasne diligentia C. Memmii publicis tabulis esse notata, atque testata? Atque illud etiam quæro, quum, posteaquam es postulatus, ex legatione redieris, ne quis te iudicia defugere arbitraretur; teque, quum tibi, utrum velles, liceret, dictitaris causam dicere maluisse; quî consentaneum fuerit,

quum legationis perfugio uti noluiſſes , ap-
pellatione improbiſſimâ te ad auxilium
nefarium confuſiſſe ?

XV. Et quoniam legationis tuæ facta
mentio eſt , volo etiam audire de te , quo
tandem ſenatusconſulto legatus ſis ? De
geſtu intelligo quid reſpondeas ; tuâ lege
dicis. Eſne igitur patriæ certiffimus par-
ricida ? ſperarasne id , ut patres conſcripti
ex republica funditus tollerentur ? ne hoc
quidem ſenatui relinquebas , quod nemo
umquam ademit , ut legati ex ejus ordi-
nis auctoritate legarentur ? adeone tibi
fordidum conſilium publicum viſum eſt ?
adeo afflictuſ ſenatus , adeo miſera &
proſtrata reſpublica , ut non nuntios pacis
ac belli , non curatores , non interpretes ,
non bellici conſilii auctores , non minis-
tros muneris provincialis ſenatus more
majorum deligere poſſet ?

36. Eripueras ſenatui provinciæ decer-
nendæ poteſtatem , imperatoris deligendi
judicium , ærarii diſpenſationem ; quæ
numquam ſibi populus Romanus appeti-
vit , qui numquam hæc a ſummi conſilii
gubernatione auferre conatus eſt. Age ,
factum eſt horum aliquid in aliis : raro :
ſed tamen factum eſt , ut populus delige-
ret imperatorem. Quis legatos umquam
audivit ſine ſenatusconſulto ? ante te ne-
mo : poſt continuo fecit idem in duobus

prodigiis reipublicæ Clodius : quo etiam majore es malo mactandus , quòd non solum facto tuo , sed etiam exemplo reipublicam vulnerasti ; neque tantum es improbus ipse , sed etiam alios docere voluisti.

37. Atque illud etiam audire a te cupio , quare , quum ego legem de ambitu ex senatusconsulto tulerim , sine vi tulerim , salvis auspiciis tulerim , salvâ lege Æliâ & Fufiâ , tu eam esse legem non putes ; præsertim quum ego legibus tuis , quoquo modo latæ sint , paream. Quum mea lex dilucidè vetet , BIENNIO , QUO QUIS PETAT , PETITURUSVE SIT , GLADIATORES DARE , NISI EX TESTAMENTO PRÆSTITUTA DIE : quæ tanta in te sit amentia , ut in ipsa petitione gladiatores audeas dare ? num quem putes illius tui certissimi gladiatoris similem tribunum plebis posse reperiri , quæ se interponat , quò minùs reus meâ lege fias ? Ob hæc omnes res , sciasne te severissimorum hominum , Sabinorum , fortissimorum virorum , Marforum & Pelignorum , tribulium tuorum judicio notatum , nec post Romam conditam , præter te , tribulem quemquam , tribum Sergiam perdidisse ?

XVI. Ac si hæc omnia contemnis ac despicias , quòd ita tibi persuaseris , ut palam dictitas , te , diis hominibusque invitis , amore in te increbibili quodam C. Cæsa-

ris, omnia, quæ velis, consecuturum; ecquid audieris, ecquisnam tibi dixerit, C. Cæsarem nuper Aquileiæ, quum de quibusdam esset mentio facta, dixisse, C. Alfium præteritum permolestè tulisse, quòd in homine summam fidem probitatemque cognosset: graviterque etiam se ferre, prætorem aliquem esse factum, qui a suis rationibus dissensisset? tum quæsisse quemdam, de Vatiniò quemadmodum ferret, ipsum respondisse, Vatinium in tribunatu gratis nihil fecisse? qui omnia in pecunia posuisset, honore animo æquo carere debere?

39. Quòd si ipse, qui te suæ dignitatis augendæ causâ periculo tuo, nullo suo delicto, ferri præcipitem est facilè passus, tamen te omni honore indignissimum iudicat: si te vicini, si affines, si tribules ita oderunt, ut repulsam tuam, triumphum suum duxerint: si nemo adspicit, quin ingemiscat; nemo mentionem facit, quin exsecretur: si vitant, fugiunt, audire de te nolunt: quum viderunt, tamquam auspicium malum detestantur: si cognati respuunt, tribules exsecrantur, vicini metuunt, affines erubescunt: strumæ denique ab ore improbo demigrarunt, & aliis jam se locis collocarunt: si es odium publicum populi, senatûs, universorum hominum rusticanorum; quid est, quam ob rem præturam potiùs exoptes, quàm mor-

tem? præsertim quum popularem te velis esse, neque ulla in re populo gratius facere possis. Sed ut aliquando audiamus, quàm copiosè mihi ad rogata respondeas, concludam jam interrogationem meam, teque in extremo pauca de ipsa causa rogabo.

XVII. Quæro, quæ tanta in te vanitas, tanta levitas fuerit, ut in hoc iudicio T. Annium iisdem verbis laudares, quibus eum verbis laudare & boni viri, & boni cives consueverunt, quum in eundem nuper ab eadem illa teterrima furia productus ad populum, cupidissimè falsum testimonium dixeris? An erit hæc optio & potestas tua, ut, quum Clodiânas operas, & facinorosorum hominum & perditorum manum videris, Milonem dicas, id quod in concione dixisti, gladiatoribus & bestiariis obsedisse rempublicam; quum autem ad tales viros veneris, non audeas civem singulari virtute, fide, constantiâ, vituperare?

41. Sed, quum T. Annium tantopere laudes, & clarissimo viro nonnullam laudatione tuâ labeculam adspergas (in illorum enim numero mavult T. Annius esse, qui a te vituperantur) verumtamen quæro, quum in republica administranda, T. Annio cum P. Sextio consiliorum omnium societas fuerit (id quod non solum bonorum, verum etiam improborum iudicio

308 *ORATIO IN VATINIUM.*

declaratum est : est enim reus uterque ob eandem causam , & eodem crimine : alter die dictâ ab eo , quem tu unum improbiorem esse , quàm te , nonnumquam soles confiteri ; alter tuis consiliis , illo tamen adjuvante) quæro , quî possis eos , quos crimine conjungis , testimonio disjungere.

42. Extremum illud est , quod mihi abs te responderi velim : quum multa in Albinovanum de prævaricatione diceres , dixerisne , nec tibi placuisse , nec oportuisse Sextium de vi reum fieri ? quâvis lege , quovis crimine accusandum potius fuisse ? etiam illud dixeris , causam Milonis , fortissimi viri , conjunctam cum hoc existimari ? quæ pro me a Sextio facta sint , bonis esse grata ? Non coarguo inconstantiam orationis , ac testimonii tui. Quas enim hujus actiones probatas bonis esse dicis , in eas pluribus verbis testimonium dixisti : quicum autem ejus causam periculumque conjungis , eum summis laudibus extulisti. Sed hoc quæro , num P. Sextium , quâ lege accusandum omnino fuisse negas , eâ lege condemnari putes oportere ? aut , si te in testimonio consuli nolis , ne quid tibi auctoritatis a me tributum esse videatur , dixerisne in eum testimonium de vi , quem negaris reum omnino de vi fieri debuisse ?



P R O

L. CORNELIO BALBO.

ORATIO TRIGESIMA TERTIA.

Balbus, quum esset Gadibus in Hispania natus, ac bello Sertoriano imperatoribus Romanis probatus, bello confecto, a Cn. Pompeio civitate Romanâ donatus fuerat: quod beneficium quum consecutus esset per L. Cornelium, ideo L. Cornelius Balbus vocatus est. Eo præmio quum multis annis usus esset, huic inimici Cæsaris & Pompeii accusatorem compararunt Gaditanum quemdam, qui Balbo civitatis controversiam movit, negans eum jure & rectè civitate donatum, quum ex fœderato populo, quo in numero Gaditanus erat, nemo posset, nisi

is populus factus esset fundus , id est , auctor obstringendi se jure civium Romanorum , in civitatem venire Romanam , atque adeo suæ civitati auferri. Balbus defensores habuit M. Crassum , ipsum Pompeium , & Ciceronem. Anna urbis 697. Ciceronis 51. FABRICIUS.

SI auctoritates patronorum in judiciis valerent; ab amplissimis viris L. Cornelii causa defensa est : si usus , a peritissimis : si ingenia , ab eloquentissimis : si studia , ab amicissimis , & quum beneficiis cum L. Cornelio , tum maximâ familiaritate conjunctis. Quæ sunt igitur meæ partes ? auctoritatis tantæ , quantam vos in me esse voluistis , usûs mediocris , ingenii minimè voluntati paris : nam ceteris , a quibus est defensio , hunc debere plurimum video ; ego , quantum ei debeam , ostendam alio loco. Principio orationis hoc oppono ; me omnibus , qui amici fuerint salutis & dignitati meæ , si minus referendâ gratiâ satisfacere potuerim , at prædicandâ & habendâ certè satis esse facturum.

2. Quæ fuerit hesterno die Cn. Pompeii gravitas in dicendo , Judices , quæ facultas , quæ copia , non opinione tacitâ

PRO L. CORN. BALBO. 311

vestrorum animorum, sed perspicuâ admiratione declarari videbatur: nihil enim umquam audiui, quod mihi de jure subtilius dici videretur, nihil de memoria, de more, de exemplis acutiùs, nihil peritiùs de fœderibus, nihil illustriore auctoritate de bellis, nihil de republica graviùs, nihil de ipso modestiùs, nihil de causa & crimine ornatius.

3. Ut mihi jam verum videatur illud esse, quod nonnulli litteris ac studiis doctrinæ dediti, quasi quiddam incredibile dicere putabantur, eum, qui omnes animo virtutes penitus comprehendisset, omnia, quæ facere vellet, facillimè tractare. Quæ enim in L. Crasso potuit, homine nato ad dicendi singularem quamdam facultatem, si hanc causam ageret, major esse ubertas, varietas, copia, quàm fuit in eo, qui tantum potuit impertire huic studio temporis, quantum ipse a pueritia usque ad hanc ætatem a continuis bellis & victoriis conquievit? Quò mihi difficilius est hic extremus perorandi locus: etenim ei succedo orationi, quæ non prætervecta sit aures vestras, sed in animis omnium penitus infederit; ut plus voluptatis ex recordatione illius orationis, quàm non modò ex mea, sed ex cujusquam oratione capere possitis.

II. Sed mos est gerendus non modò

Cornelio, cujus ego voluntati in ejus periculis nullo modo deesse possum; sed etiam Cn. Pompeio, qui sui facti, sui judicii, sui beneficii, voluit me esse, ut apud eosdem vos, Judices, nuper in alia causa fuerim, & prædicatorem, & auctorem.

5. Ac mihi quidem hoc dignum reo videtur, hoc deberi hujus excellentis viri præstantissimæ gloriæ, hoc proprium esse vestri officii, hoc satis esse causæ, ut, quod fecisse Cn. Pompeium constet, id omnes & licuisse concedant. Nam verius nihil est, quàm quod hesterno die dixit ipse, ita L. Cornelium de fortunis omnibus dimicare, ut nullius in delicti crimen vocaretur. Non enim furatus esse civitatem, non genus suum e mentitis, non in aliquo impudenti mendacio delituisse, non irrepsisse in censum dicitur: unum objicitur, natum esse Gadibus; quod negat nemo: cetera accusator fatetur, hunc in Hispania, durissimo bello, cum Q. Metello, cum C. Memmio, & in classe, & in exercitu fuisse, & ut Pompeius in Hispaniam venerit, Memmiumque habere quæstorem cœperit, numquam a Memmio discessisse: Carthaginem esse profectum: acerrimis illis præliis & maximis, Sucronensi & Duriensi, interfuisse: cum Pompeio ad extremum belli tempus fuisse.

Hæc

Hæc sunt prælia Cornelii : talis in rempublicam nostram labor , assiduitas , dimicatio , virtus digna summo imperatore , spes pro periculis præmiorum : præmia quidem ipsa non sunt in ejus facto , qui adeptus est , sed in ejus , qui dedit.

III. Donatus igitur est ob eas causas a Cn. Pompeio civitate : id accusator non negat ; sed reprehendit : ut in Cornelio causa ipsius probetur , pœna quæatur ; in Pompeio causa lædatur , pœna sit nulla. Sic famam , sic innocentissimi hominis fortunas , præstantissimi imperatoris factum condemnari volunt. Ergo in judicium caput Cornelii , factum Pompeii vocatur : hunc enim in ea civitate , in qua sit natus , honestissimo loco natum esse concedis , & ab ineunte ætate , relictis rebus suis omnibus , in nostris bellis , nostris cum imperatoribus esse versatum : nullius laboris , nullius obsidionis , nullius prælii expertem fuisse : hæc sunt omnia quum plena laudis , tum propria Cornelii , nec in his rebus crimen est ullum.

7. Ubi igitur est crimen ? quodd eum Pompeius civitate donavit. Hujuscemodi crimen ? minimè : nisi honos ignominia putanda est. Cujus igitur ? reverâ nullius ; actione accusatoris , ejus unius , qui donavit : qui si adductus gratiâ , minus idoneum hominem præmio affecisset ; qui

etiam si virum bonum , sed non ita meritum ; si denique aliquid , quod non contrà , ac liceret , factum diceretur , sed contrà , atque oporteret : tamen esset omnis ejusmodi reprehensio a vobis , Judices , repudianda.

8. Nunc verò quid dicitur ? quid ait accusator ? fecisse Pompeium , quod ei facere non licuerit ? quod gravius est , quàm , si id factum ab eo diceret , quod non oportuisset. Est enim aliquid , quod non oporteat , etiam si licet : quidquid verò non licet , certè non oportet.

IV. Hic ego nunc cuncter sic agere , Judices , non esse fas dubitari , quin , quod Cn. Pompeium fecisse constet , id non solum decuisse , sed etiam debuisse fateamur ? Quid enim abest huic homini , quod si adesset , jure hoc tribui & concedi putaremus ? ususne rerum ? qui pueritiæ tempus extremum , principium habuit bellorum atque imperiorum maximorum ? cujus plerique æquales minùs sæpe castra viderunt , quàm hic triumphavit ? qui tot habet triumphos , quot oræ sunt , partesque terrarum ? tot victorias bellicas , quot sunt in rerum natura genera bellorum ? an ingenium ? quum etiam ipsi casus eventusque rerum , non duces , sed comites ejus consiliorum fuerint ? in quo uno ita summa Fortuna cum summa virtute certavit ,

ut omnium iudicio plus homini, quàm deæ tribueretur? an pudor, an integritas, an religio in eo, an diligentia umquam requisita est? quem provinciæ nostræ, quem liberi populi, quem reges, quem exteræ gentes, castiorem, moderatiorem, sanctiorem, non modò viderunt, sed aut sperando umquam, aut optando cogitaverunt?

10. Quid dicam de auctoritate? quæ tanta est, quanta in his tantis virtutibus ac laudibus esse debet: cui senatus populusque Romanus amplissimæ dignitatis præmia dedit, non postulanti imperia, verùm etiam recusanti: hujus de facto, Iudices, ita quæri, ut id agatur, licueritne ei facere, quod fecit, an verò, non dicam, non licuerit, sed nefas fuerit (contra fœdus enim, id est, contra populi Romani religionem & fidem fecisse dicitur) non turpe populo Romano? nonne vobis?

V. Audivi hoc de parente meo puer: quum Q. Metellus, Lucii filius, causam de pecuniis repetundis diceret, ille, ille vir, cui patriæ salus dulcior, quàm conspectus fuit: qui de civitate decedere, quàm de sententia maluit: hoc igitur causam dicente, quum ipsius tabulæ circumferrentur inspiciendi nominis causâ, fuisse iudicem ex illis equitibus Romanis, gra-

O ij

vissimis viris , neminem , quia removeret oculos , & se totum averteret , ne fortè , quod ille in tabulas publicas retulisset , dubitasse quisquam , verumne an falsum esset , videretur. Nos Cn. Pompeii decretum , judicium , de consilii sententia pronuntiatum recognoscemus ? cum legibus conferemus ? cum fœderibus omnia acerbissimâ diligentîâ perpendemus ?

12. Athenis aiunt , quum quidam apud eos , qui sanctè graviterque vixisset , & testimonium publicè dixisset , & (ut mos Græcorum est) jurandi causâ ad aras accederet , unâ voce omnes iudices , ne is juraret , reclamasse. Quum Græci homines , spectati viri noluerint religione videri potius , quàm veritate , fidem esse constrictam ; nos etiam in ipsa religione & legum & fœderum conservandâ , qualis fuerit Cn. Pompeius , dubitabimus ?

13. Utrùm enim inscientem vultis contra fœdera fecisse , an scientem ? si scientem ? ô nomen nostri imperii ! ô populi Romani excellens dignitas ! ô Cn. Pompeii sic latè longéque diffusa laus , ut ejus gloriæ domicilium communis imperii finibus terminetur ! ô nationes , urbes , populi , reges , tetrarchæ , tyranni , testes Cn. Pompeii non solùm virtutis in bello , sed etiam religionis in pace ! vos denique mutæ regiones imploro , & sola terrarum

ultimarum : vos maria , portus , insulæ , littoræque. Quæ est enim ora , quæ sedes , qui locus , in quo non existent hujus quum fortitudinis , tum verò humanitatis , tum animi , tum consilii impressa vestigia ? Hunc quisquam incredibili quadam atque inaudita gravitate , virtute , constantia præditum , fœdera scientem neglexisse , violasse , rupisse , dicere audebit ?

VI. Gratificatur mihi gestu accusator ; inscientem Cn. Pompeium fecisse significat : quasi verò levius sit , quum in tanta republica versere , & maximis negotiis præsis , facere aliquid , quod scias non licere ; an omnino nescire quid liceat. Etenim quum in Hispania bellum acerrimum & maximum gesserat , quo jure Gaditana civitas esset , nesciebat ? an , cujus linguam populi non nosset , interpretationem fœderis non tenebat ? Id igitur quisquam Cn. Pompeium ignorasse dicere audebit , quod mediocres homines , quod nullo usu , nullo studio militari præditi , quod librarioli denique scire profiteantur ?

15. Equidem contrà existimo , Judices , quum in omni genere ac varietate artium , etiam illarum , quæ sine summo otio non facile discuntur , Cn. Pompeius excellat , singularem quamdam laudem ejus , & præstabilem esse scientiam in fœderibus , pactionibus , conditionibus po-

pulorum, regum, exterarum nationum; in universo denique belli jure, ac pacis: nisi fortè, quæ nos libri docent in umbra & otio, ea Cn. Pompeium, neque quum requiesceret, litteræ; neque, quum rem gereret, res ipsæ docere potuerunt.

16. Atque ut ego sentio, Judices, causa dicta est temporis magis hujus vitio, quàm hominis: neque ego de tam iniquo genere judicii plura dicam. Est enim hujus seculi labes quædam, & macula, virtuti invidere, velle ipsum florem dignitatis infringere. Etenim, si Cn. Pompeius abhinc annos quingentos fuisset, is vir, a quo senatus adolescentulo, atque equite Romano, sæpe communis salutis auxilium expetisset: cujus res gestæ omnes gentes, cum clarissima victoria, terrâ marique peragrassent: cujus tres triumphi testes essent, totum orbem terrarum nostro imperio teneri: quem populus Romanus singularibus honoribus decorasset: si nunc apud vos, id, quod is fecisset, contra fœdus factum diceretur, quis audiret? nemo profectò: mors enim quum exstinxisset invidiam, res ejus gestæ sempiterni nominis gloriâ niterentur. Cujus igitur audita virtus dubitationi locum non daret; hujus præsens, experta, atque perspecta, obrectatorum voce lædetur?

VII. Omittam igitur Pompeium jam

oratione meâ reliquâ : sed vos , Judices , animis ac memoriâ tenetote : de lege , de fœdere , de exemplis , de perpetua consuetudine civitatis nostræ renovabo ea , quæ dicta sunt : nihil enim mihi novi , nihil integri , neque M. Crassus , qui totam causam & pro facultate & pro fide sua diligentissimè vobis explicavit , neque Cn. Pompeius , cujus oratio omnibus ornamentis abundavit , ad dicendum reliquit. Sed , quoniam , me recusante , placuit ambobus adhiberi hunc a me quasi perpoliendi quemdam operis extremum laborem ; peto a vobis , ut me officii potius , quàm dicendi studio , hanc suscepisse operam ac munus putetis.

18. Ac priùs quàm aggrediar ad jus causamque Cornelii , quiddam de communi conditione omnium nostrûm , deprecandæ malevolentiae causâ , breviter commemorandum videtur. Si , quo quisque loco nostrûm est , Judices , natus , aut , si in qua fortuna est nascendi initio constitutus , hunc vitæ statum usque ad senectutem obtinere debet , & , si omnes , quos aut fortuna extulit , aut ipsorum illustravit labor & industria , poenâ sunt afficiendi ; non gravior L. Cornelio , quàm multis viris bonis , atque fortibus , constitui lex vitæ & conditio videtur : sin autem multorum virtus , ingenium , humanitas , ex infimo

genere & fortunæ gradu non modò amicitias, & rei familiaris copias consecuta est, sed summam laudem, honores, gloriam, dignitatem; non intelligo, cur potiùs invidia violatura virtutem L. Cornelii, quàm æquitas vestra pudorem ejus adjutura videatur. Itaque, quod maximè petendum est, a vobis idcirco non peto, Judices, ne de vestra sapientia, atque de vestra humanitate dubitare videar. Est autem petendum, ne oderitis ingenium, ne inimici sitis industriæ, ne humanitatem opprimendam, ne virtutem puniendam putetis: illud peto, ut, si causam ipsam per se firmam esse & stabilem videritis, hominis ipsius ornamenta adjumento causæ potiùs, quàm impedimento, esse malitis.

VIII. Nascitur, Judices, causa Cornelii ex ea lege, quam L. Gellius, Cn. Cornelius ex senatus sententia tulerunt; quâ lege videmus, satis esse sanctum, uti cives Romani sint ii, quos Cn. Pompeius de consilii sententia singillatim civitate donaverit. Donatum esse L. Corneliū præsens Pompeius dicit; indicant publicæ tabulæ; accusator fatetur: sed negat ex fœderato populo quemquam potuisse, nisi is populus fundus factus esset, in hanc civitatem venire.

20. O præclarum interpretem juris! auctorem antiquitatis! correctorem, atque

emendatorem nostræ civitatis ! qui hanc pœnam fœderibus adscribat , ut omnium præmiorum beneficiorumque nostrorum expertes faciat fœderatos. Quid enim potuit dici imperitius , quàm fœderatos populos fieri fundos oportere ? nam id non magis est proprium fœderatorum , quàm omnium liberorum. Sed totum hoc , Judices , in ea fuit positum semper ratione atque sententia , ut , quum jussisset populus Romanus aliquid , si id adscivissent socii populi ac Latini , & , si ea lex , quam nos haberemus , eadem in populo aliquo , tamquam in fundo , resedisset ; ut tum lege eadem is populus teneretur ; non ut de nostro jure aliquid diminueretur : sed ut illi populi aut jure eo , quod a nobis esset constitutum , aut aliquo commodo , aut beneficio uterentur.

21. Tulit apud majores nostros legem C. Furius de testamentis : tulit Q. Voconius de mulierum hereditatibus : innumerales aliæ leges de civili jure sunt latæ : quas Latini voluerunt , adsciverunt : ipsâ denique Juliâ , quâ lege civitas est sociis & Latinis data , qui fundi populi facti non essent , civitatem non haberent. In quo magna contentio Heracliensium , & Neapolitanorum fuit , quum magna pars in iis civitatibus fœderis sui libertatem civitati anteferebat. Postremò hæc vis est istius &

juris, & verbi, ut fundi populi, beneficio nostro, non suo jure, fiant.

22. Quum aliquid populus Romanus jussit, id si est ejusmodi, ut quibusdam populis sive foederatis, sive liberis, permittendum esse videatur, ut statuunt ipsi non de nostris, sed de suis rebus, quo jure uti velint; tum, utrum fundi facti sint, an non, quærendum esse videatur: de nostra verò republica, de nostro imperio de nostris bellis, de victoria, de salute, fundos populos fieri noluerunt.

IX. Atqui si imperatoribus nostris, si senatui, si populo Romano non licebit propositis præmiis elicere ex civitatibus sociorum, atque amicorum, fortissimum atque optimum quemque ad subeunda pro salute nostra pericula; summâ utilitate, ac maximo sæpe præsidio in periculis, atque asperis temporibus carendum erit. Sed, per deos immortales! quæ est ista societas, quæ amicitia, quod foedus, ut aut nostra civitas careat in suis periculis Massiliensi propugnatore, careat Gaditano, careat Saguntino: aut, si quis ex illis populis sit exortus, qui nostros duces auxilio laboris, com meatûs, periculo suo juverit, qui cum hoste nostro cominus in acie sæpe pugnarit, qui se sæpe telis hostium, qui dimicationi capitis, qui morti objecerit; nullâ conditione hujus civitatis præmiis affici possit?

24. Etenim in populum Romanum grave est, non posse uti sociis excellenti virtute præditis, qui velint cum periculis nostris sua communicare: in socios verò ipsos, & in eos, de quibus agimus, fœderatos, injuriosum & contumeliosum est, his præmiis & his honoribus exclusos esse fidelissimos & conjunctissimos socios, quæ pateant stipendiariis, pateant hostibus, pateant sæpe servis. Nam & stipendiarios ex Africa, Sicilia, Sardinia, ceteris provinciis multos civitate donatos videmus: &, qui hostes ad nostros imperatores perfugissent, & magno ufui reipublicæ nostræ fuissent, scimus civitate esse donatos: servos denique, quorum jus & fortunæ conditio infima est, bene de republica meritos, persæpe libertate, id est, civitate publicè donari videbamus.

X. Hanc tu igitur, patrone fœderum ac fœderatorum, conditionem statuis Gaditanis, tuis civibus, ut, quod iis, quos Gaditanis adiutoribus armis subegimus, atque in ditionem nostram redeigimus, liceat, si populus Romanus permiserit, ut ab senatu, ab imperatoribus nostris, civitate donentur; id ne liceat ipsis? qui si suis decretis legibusve sanxissent, ne quis suorum civium castra imperatorum populi Romani iniret; ne quis se pro nostro imperio in periculum capitis, atque in vitæ

discrimen inferret; Gaditanorum auxiliis; quum vellemus, uti nobis non liceret: privatim verò, si, ne quis vir, & animo & virtute præcellens, pro nostro imperio periculo suo dimicaret; graviter id jure ferremus, minui auxilia populi Romani, debilitari animos fortissimorum virorum, alienigenarum nos hominum studiis, atque externâ virtute privari.

26. Atqui nihil interest, Judices, utrùm hæc fœderati jura constituent, ut ne cui liceat ex his civitatibus ad nostrorum bellorum pericula accedere; an, quæ nos eorum civibus, virtutis causâ, tribuerimus, ea rata esse non possint: nihil enim magis uteremur his adjutoribus, sublati præmiis virtutis, quàm, si omnino his versari in nostris bellis non liceret. Etenim, quum pro sua patria pauci post genus hominum natum reperti sint, qui nullis præmiis propositis, vitam suam hostium telis objecerint; pro aliena republica quemquam fore putatis, qui se opponat periculis, non modò nullo proposito præmio, sed etiam interdicto?

XI. Sed, quum est illud imperitissimè dictum de populis fundis, quod commune est liberorum populorum, non proprium fœderatorum; ex quo intelligi necesse est, aut neminem ex sociis civem fieri posse; aut etiam posse ex fœderatis: tum verò

jus omne noster iste magister mutandæ civitatis ignorat ; quod est , Judices , non solum in legibus publicis positum , sed etiam in privatorum voluntate. Jure enim nostro neque mutare civitatem quisquam invitus potest , neque , si velit , mutare non potest , modò adsciscatur ab ea civitate , cujus esse se civitatis velit : ut , si Gaditani sciverint nominatim de aliquo cive Romano , ut sit is civis Gaditanus , magna potestas sit nostro civi mutandæ civitatis , nec fœdere impediatur , quò minùs ex cive Romano civis Gaditanus possit esse.

28 Duarum civitatum civis esse nostro jure civili nemo potest : non esse hujus civitatis civis , qui se alii civitati dicarit , potest. Neque solum dicatione , quod in calamitate clarissimis viris Q. Maximo , C. Lænati , Q. Philippo Nuceriæ , C. Cætoni Tarracone , Q. Cæpioni , P. Rutilio Smyrnæ , vidimus accidisse , ut earum civitatum fierent cives , hanc antè amittere non potuissent , quàm hujus solum civitatis mutatione vertissent : sed etiam postliminio potest civitatis fieri mutatio. Neque enim sine causa de Cn. Publicio Menandro , libertino homine , quem apud majores legati nostri in Græciam proficiscentes interpretem secum habere voluerunt , ad populum latum , ut is Publicius ,

si domum revenisset , & inde Romam rediisset , ne minùs civis esset. Multi etiam superiore memoriâ cives Romani suâ voluntate indemnati , & incolumes , his rebus relictis , alias se in civitates contulerunt.

XII. Quòd si civi Romano licet esse Gaditanum sive exsilio , sive postliminio , sive rejectione hujus civitatis ; ut jam ad foedus veniam , quod ad causam nihil pertinet (de civitatis enim jure , non de foederibus disceptamus) quid est , quamobrem civi Gaditano in hanc civitatem venire non liceat ? Equidem longè secus sentio : nam quum ex omnibus civitatibus via sit in nostram , quumque nostris civibus pateat iter ad ceteras civitates ; tum verò , ut quæque nobiscum maximè societate , amicitia , sponsione , pactione , foedere conjuncta est ; ita mihi maximè communionem beneficiorum , præmiorum , civitatis , continere videtur.

30. Atqui ceteræ civitates omnes non dubitarent nostros recipere in suas civitates , si idem nos juris haberemus , quod ceteri : sed nos non possumus & hujus esse civitatis , & cujusvis præterea ; ceteris concessum est. Itaque in Græcis civitatibus videmus , Athenis Rhodios , Lacedæmonios , ceteros undique adscribi , multarumque esse eosdem homines civitatum.

Quo errore ductos vidi egomet nonnullos imperitos homines, nostros cives, Athenis in numero judicum atque Areopagitarum, certâ tribu, certo numero; quum ignorarent, si illam civitatem essent adepti, hanc se perdidisse, nisi postliminio recuperassent. Peritus verò nostri juris ac moris nemo umquam, qui hanc civitatem retinere vellet, in aliam civitatem se dicavit.

XIII. Sed hic totus locus disputationis, atque orationis meæ, Judices, pertinet ad commune jus mutandarum civitatum: nihil habet, quod sit proprium religionis, ac fœderum. Defendo enim rem universam, nullam esse gentem ex omni regione terrarum, neque tam dissidentem a populo Romano odio quodam, atque dissidio, neque tam fide, benevolentiaque conjunctam, ex qua nobis interdictum sit, ut ne quem adsciscere civem, aut civitate donare possimus.

31. O jura præclara, atque divinitus jam inde a principio Romani nominis a majoribus nostris comparata! ne quis nostrum plus quam unius civitatis esse possit (dissimilitudo enim civitatum varietatem juris habeat necesse est). ne quis invitus civitate mutetur; neve in civitate maneat invitus. Hæc sunt enim fundamenta firmissima nostræ libertatis, sui quemque juris & retinendi, & dimittendi esse domi-

num. Illud verò sine ulla dubitatione maximè nostrum fundavit imperium, & populi Romani nomen auxit, quod princeps ille, creator hujus urbis, Romulus, fœdere Sabino docuit, etiam hostibus recipiendis augeri hanc civitatem oportere: cujus auctoritate, & exemplo numquam est intermissa a majoribus nostris largitio, & communicatio civitatis. Itaque & ex Latio multi, & Tusculani, & Lanuvini, & ex ceteris generibus gentes universæ in civitatem sunt receptæ; ut Sabinorum, Volscorum, Hernicorum: quibus ex civitatibus nec coacti essent civitatem mutare, si qui noluisent; nec, si qui essent civitatem nostram beneficio populi Romani consecuti, violatum fœdus eorum videretur.

XIV. At enim quædam fœdera exstant, ut Germanorum, Insubrium, Helvetiorum, Iapidum, nonnullorum item ex Gallia Barbarorum, quorum in fœderibus exceptum est, ne quis eorum a nobis civis recipiatur. Quòd si exceptio facit, ne liceat; ibi necesse est licere, ubi non est exceptum. Ubi est igitur exceptum fœdere Gaditano, ne quem populus Romanus Gaditanum recipiat civitate? nusquam: ac sicubi esset; lex id Gellia & Cornelia, quæ definitè potestatem Pompeio civitatem donandi dederat, sustulisset. Except-

tum est, inquit: fœdus siquidem sacrosanctum est. Ignosco tibi, si neque Pœnorum jura calles (reliqueras enim civitatem tuam) neque nostras potuisti leges inspicere; ipsæ enim te a cognitione sua judicio publico repulerunt.

33. Quid fuit in rogatione ea, quæ de Pompeio a Gellio & a Lentulo, consulibus, lata est, in qua aliquid sacrosanctum exceptum videretur? Primùm enim sacrosanctum esse nihil potest, nisi quod populus plebsve sanxisset: deinde sanctiones sacrandæ sunt aut genere ipso, aut obtestatione & consecratione legis, aut pœnæ, quum caput ejus, qui contrà facit, consecratur. Quid habes igitur dicere de Gaditano fœdere ejusmodi? Utrùm capitis consecratione, an obtestatione legis sacrosanctum esse confirmas? nihil omnino umquam de isto fœdere ad populum, nihil ad plebem latum esse dico: de quibus etiam si latum esset, neque legem, neque pœnam latam esse, ne quem civem recipemus: tamen id esset, quod populus postea jussisset, ratum; neque quidquam illis verbis, *Si quid sacrosanctum esset*, esse exceptum videretur. De his, quum populus Romanus nihil umquam jusserit, quidquam audes dicere sacrosanctum fuisse?

XV. Nec verò hæc oratio mea ad infirmandum fœdus Gaditanorum, Judices,

pertinet : neque enim est meum , contra opinionem vetustatis , contra jus optimè meritæ civitatis , contra auctoritatem senatûs dicere. Duris enim quondam temporibus reipublicæ nostræ , quum præpotens terrâ marique Carthago , nixa duabus Hispaniis , huic imperio immineret , & quum duo fulmina nostri imperii subitò , in Hispania , Cn. & P. Scipiones , extincti occidissent ; L. Marcius , primipili centurio , cum Gaditanis fœdus fecisse dicitur : quod quum magis fide illius populi , justitiâ vestrâ , vetustate denique ipsâ , quàm aliquo publico vinculo religionis teneretur ; sapientes homines , & publici juris periti , Gaditani , M. Lepido , Q. Catulo consulibus , a senatu de fœdere postulaverunt. Tum est cum Gaditanis fœdus vel renovatum , vel ictum : de quo fœdere populus Romanus sententiam non tulit , qui injussu suo , nullo pacto potest religione obligari.

35. Ita Gaditana civitas , quod beneficiis suis erga rempublicam nostram consequi potuit , quod imperatorum testimoniis , quod vetustate , quod Q. Catuli , summi viri , auctoritate , quod judicio senatûs , quod fœdere , consecuta est : quod publicâ religione sanciri potuit , id abest ; populus enim se nusquam obligavit : neque ideo est Gaditanorum causa deterior :

gravissimis enim & plurimis rebus est fulta : sed isti disputationi certè nihil est loci. Sacrosanctum enim nihil potest esse, nisi quod per populum plebemve sancitum est.

XVI. Quòd si hoc fœdus, quod populus Romanus, auctore senatu, commendatione & judicio vetustatis, voluntate & sententiis suis comprobatur, idem suffragiis comprobasset : quid erat, cur ex ipso fœdere Gaditanum in civitatem nostram recipi non liceret ? Nihil est enim aliud in fœdere, nisi, *ut pia & aeterna pax sit*. Quid id ad civitatem ? Adjunctum illud etiam est, quod non est in omnibus fœderibus : *Majestatem populi Romani comiter conservanto* : id habet hanc vim, ut sit ille in fœdere inferior.

36. Primum verbi genus hoc conservandi, quo magis in legibus quàm in fœderibus uti solemus, imperantis est, non precantis. Deinde, quum alterius populi majestas conservari jubetur, de altero siletur ; certè ille populus in superiori conditione causaque ponitur, cujus majestas fœderis sanctione defenditur. In quo erat accusatoris interpretatio indigna responsione, qui ita dicebat, *comiter esse communiter* : quasi verò priscum aliquod, aut insolitum verbum interpretaretur. Comes, benigni, faciles, suaves homines esse dicuntur. *Qui erranti comiter monstrat viam* ;

benignè , & non gravatè : *communiter* quidem certè non convenit.

37. Et simul absurda res est , caveri fœdere , ut majestatem populi Romani communiter conservent ; id est , ut populus Romanus suam majestatem velit esse salvam : quod si jam ita esset , ut esse non potest ; tamen de nostra majestate , nihil de illorum caveretur. Potestne igitur nostra majestas a Gaditanis benignè conservari , si ad eam retinendam Gaditanos præmiis elicere non possumus ? potest esse ulla denique majestas , si impedimur , quò minùs per populum Romanum , beneficiorum , virtutis causâ , tribuendorum potestatem imperatoribus nostris deferamus ?

XVII. Sed quid ego disputo , quæ mihi tum , si Gaditani contra me dicerent , verè posse dici viderentur ? illis enim repetentibus L. Cornelium , responderem , legem populum Romanum jussisse de civitate tribuenda : huic generi legum fundos populos fieri non solere : Cn. Pompeium de consilii sententia civitatem huic dedisse : nullum populi nostri jussum Gaditanos habere : itaque nihil esse sacrosanctum , quod lege exceptum videretur : si esset ; tamen in fœdere nihil esse cautum , præter pacem : additum etiam esse illud , ut majestatem illi nostram conservare deberent ; quæ certè minueretur , si aut adju-

toribus illorum civibus uti in bellis nobis non liceret , aut præmii tribuendi potestatem nullam haberemus.

39. Nunc verò quid ego contra Gadi-tanos loquar , quum id , quod defendo , voluntate eorum , auctoritate , legatione ipsâ comprobetur ? qui a principio sui generis ac reipublicæ , ab omni studio , sensuque Pœnorum mentes suas ad nostrum imperium , nomenque flexerunt ? quos , quum maxima bella nobis inferrentur , mœnibus excluderunt ? classibus infecuti sunt ? corporibus , copiis , opibus depulerunt ? qui & veterem illam speciem fœderis Marciani semper omni arce duxerunt sanctiorem , & hoc fœdere ; Catuli senatûsque auctoritate , se nobiscum conjunctissimos esse arbitrati sunt ? quorum mœnia , delubra , agros , ut ipse Hercules , itinerum ac laborum suorum , sic majores nostri imperii ac nominis populi Romani terminos esse voluerunt ?

40. Testantur & mortuos nostros imperatores , quorum vivit immortalis memoria & gloria , Scipiones , Brutos , Horatios , Cassios , Metellos , & hunc præsentem Cn. Pompeium , quem procul ab eorum mœnibus , acre & magnum bellum gerentem , commeatu , pecuniâque juverunt ; & hoc tempore ipso populum Romanum , quem in caritate annonæ , ut

sæpe antè fecerant, frumento suppeditato levaverunt ; se hoc jus esse velle , ut sibi & liberis , si qui eximiâ virtute fuerint sit in nostris castris , sit in imperatorum prætoriis , sit denique inter signa , atque in acie locus ; sit his gradibus adscensum etiam ad civitatem.

XVIII. Quod si Afris , si Sardis , Hispanis , agris stipendioque multatis , virtute adipisci licet civitatem ; Gaditanis autem , officiis , vetustate , fide , periculis fœdere conjunctis , hoc idem non licebit non fœdus sibi nobiscum , sed iniquissimæ leges impositas a nobis esse arbitrabuntur. Atque hanc , Judices , non a me finem orationem , sed me dicere , quæ Gaditani judicaverint , res ipsa declarat. Hospitium multis annis ante hoc tempus cum L. Cornelio Gaditanos fecisse publicè dico : proferam testes , proferam legatos : excitalaudatores , quos ad hoc judicium , summos homines ac nobilissimos , deprecatores hujus periculi , missos videtis : denique multò antè Gadibus inauditum fore , huic ut ab illo periculum crearetur gravissima tum in istum civem suum Gaditani senatusconsulta fecerunt.

42. Potuit magis fundus populus Gaditanus fieri (quoniam hoc magnopere dilectare verbo) si tum sit fundus , quum scita ac jussa nostra suâ sententiâ compro-

bat, quàm quum hospitium fecit, ut & civitate illum mutatum esse fateretur, & jus civitatis honore dignissimum judicaret? potuit certius interponere iudicium voluntatis suæ, quàm quum etiam accusatorem hujus multâ & pœnâ multavit? potuit magis de re judicare, quàm quum ad vestrum iudicium cives amplissimos legavit, testes hujus juris, vitæ laudatores, periculi deprecatores?

43. Etenim quis est tam demens, quin sentiat, jus hoc Gaditanis esse retinendum, ne interseptum sit iis iter perpetuò ad hoc amplissimum præmium civitatis; & magnopere iis esse lætandum, hujus L. Cornelii benevolentiam erga suos remanere Gadibus; gratiam, & facultatem commendandi in hac civitate versari? Quis enim nostrum est, cui non illa civitas sit hujus studio, curâ, diligentia, commendatior?

XIX. Omitto quantis ornamentis populum istum C. Cæsar, quum esset in Hispania prætor, affecerit, controversias sedarit, jura ipsorum permissu statuerit, inveteratam quondam barbariam ex Gaditanorum moribus disciplinaque deleverit; summa in eam civitatem, hujus rogatu, studia & beneficia contulerit: multa præterea, quæ quotidie labore hujus & studio, aut omnino, aut certè facilius con-

sequuntur. Itaque & adsunt principes civitatis, & defendunt : amore, ut suum civem ; testimonio, ut nostrum ; officio, ut ex nobilissimo civi sanctissimum hospitem ; studio, ut diligentissimum defensorem commodorum suorum.

44. Ac, ne ipsi Gaditani arbitrentur ; quamquam nullo incommodo afficiantur, si liceat eorum cives virtutis causâ in nostram civitatem venire, tamen hoc ipso inferius esse suum fœdus, quàm ceterorum ; consolabor & hos præsentes viros optimos, & illam fidelissimam atque amicissimam nobis civitatem : simul & vos, non ignorantes, Judices, admonebo, quod de jure hoc judicium constitutum sit, de eo numquam omnino esse dubitatum. Quos igitur prudentissimos interpretes fœderum, quos peritissimos bellici juris, quos diligentissimos in exquirendis conditionibus civitatum atque causis, esse arbitramur ? eos profectò, qui jam imperia ac bella gesserunt.

XX. Etenim, si Q. Scævola ille augur, quum de jure prædatorio consuleretur, homo juris peritissimus, consultores suos nonnumquam ad Furium & Cascellium, prædiatores, rejiciebat : si nos de aqua nostra Tusculana M. Tugionem potius quàm C. Aquilium, consulebamus, quòd assiduus usus, uni rei deditus, & ingenium

nium & artem sæpe vincit : quis dubitet de fœderibus , & de toto jure pacis & belli , omnibus juris peritissimis imperatores nostros anteferre ?

46. Possumusne igitur tibi probare auctorem exempli , atque facti illius , quod a te reprehenditur , C. Marium ? quæris aliquem graviolem ? constantiorem ? præstantiorem virtute , prudentiâ , religione , æquitate ? Is igitur M. Annium Appium , fortissimum virum , summâ virtute præditum , civitate donavit , quum Camertinum fœdus sanctissimum , atque æquissimum sciret esse. Potest igitur , Judices , L. Cornelius condemnari , ut non C. Marii factum condemnetur ?

47. Exsistat ergo ille vir parumper cogitatione vestrâ , quoniam re non potest ; ut conspiciatis eum mentibus , quem oculis non potestis : dicat , se non imperitum fœderis , non rudem exemplorum , non ignarum belli fuisse : se Publii Africani discipulum , ac militem : se stipendiis , se legationibus bellicis eruditum : se , si tanta bella legisset , quanta gessit , & confecit ; si tot consulibus meruisset , quoties ipse consul fuisset , omnia jura belli perdiscere ac nosse potuisse : sibi non fuisse dubium , quin nullo fœdere a republica bene gerenda impediretur : a se ex conjunctissima atque amicissima civitate for-

tissimum quemque esse delectum : neque Iguvinationum , neque Camertium foedere esse exceptum , quò minùs eorum civibus a populo Romano præmia virtutis tribuerentur.

XXI. Itaque , quum paucis annis post hanc civitatis donationem acerrima de civitate quæstio , Liciniâ & Muciâ lege , venisset ; num quis eorum , qui de foederatis civitatibus esset civitate donatus , in iudicium est vocatus ? nam Spoletinus Lucius Matrinius , unus ex iis , quos Caius Marius civitate donasset , dixit causam ex colonia Latina , in primis firma & illustri : quem quum disertus homo L. Antistius accusaret , non dixit , fundum populum Spoletinum non esse factum : videbat enim , populos de suo jure , non de nostro , fundos fieri solere ; sed , quum lege Apuleiâ coloniæ non essent deductæ , quâ lege Saturninus C. Mario tulerat , ut in singulas colonias ternos cives Romanos facere posset , negabat hoc beneficium , re ipsâ sublatâ , valere debere.

49. Nihil habet similitudinis ista accusatio : sed tamen tanta auctoritas in C. Mario fuit , ut non per L. Crassum , affinem suum , hominem incredibili eloquentiâ , sed paucis ipse verbis causam illam gravitate suâ defenderit , & proba-

rit. Quis enim esset, Judices, qui imperatoribus nostris, in bello, in acie, in exercitu, delectum virtutis; qui fociis, qui foederatis, in defendenda republica nostra spem præmiorum eripi vellet? Quod si vultus C. Marii, si vox, si ille imperatorius ardor oculorum, si recentes triumphi, si præsens valuit adspectus; valeat auctoritas, valeant res gestæ, valeat memoria, valeat fortissimi & clarissimi viri nomen æternum: sit hoc discrimen inter gratiosos cives atque fortes, ut illi vivi fruantur opibus suis; horum, etiam mortuorum (si quisquam hujus imperiî defensor mori potest) vivat auctoritas immortalis.

XXII. Quid? Cn. Pompeius, pater; rebus Italico bello maximis gestis, P. Cæsium, equitem Romanum, virum bonum, qui vivit Ravennæ, foederato ex populo, nonne civitate donavit? quid? cohortes duas universas Camertium? quid? Heracliensium legionem, P. Crassus, vir amplissimus, ex ea civitate, quacum propè singulare foedus Pyrrhi temporibus, C. Fabricio consule, ictum putatur? quid? Massiliensem Aristonem Sulla? quid? quoniam de Gaditanis agimus, idem * heros novem Gaditanos? quid? vir sanctissimus, & summâ religione ac modestiâ, Q. Metellus Pius, Q. Fabium Saguntinum? quid? hic,

qui adest, a quo hæc, quæ ego nunc percurro, subtilissimè sunt omnia perpolita; M. Crassus, non Aletrinem foederatum civitate donavit, homo tum gravitate & prudentiâ præstans, tum vel nimium parcus in largienda civitate?

51. Hic tu Cn. Pompeii beneficium; vel potius iudicium & factum, infirmare conaris, qui fecit, quod C. Marium fecisse audierat: fecit, quod P. Crassum, quod L. Sullam, quod Q. Metellum, quod denique domesticum auctorem, patrem suum, facere viderat? neque verò in uno Cornelio id fecit: nam & Gadi-tanum Asdrubalem ex bello illo Africano, & Mamertinos Ovios, & quosdam Uticenses, & Saguntinos fabros, civitate donavit. Etenim, quum ceteris præmiis digni sunt, qui suo labore & periculo nostram rempublicam defendunt; tum certè dignissimi sunt, qui civitate eâ donentur, pro qua pericula ac tela subierunt. Atque utinam, qui ubique sunt propugnatores hujus imperii, possent in hanc civitatem venire, & contrà oppugnatores reipublicæ de civitate exterminari! Neque enim ille summus poeta noster Annibalis illam magis cohortationem, quàm communem imperatorum, voluit esse, *Hostem qui feriet, erit, inquit, mihi Carthaginiensis, Quisquis erit, cujatis siet*: id habent om-

nes leve, & semper habuerunt. Itaque & cives undique fortes viros adsciverunt, & hominum ignobilium virtutem persæpe nobilitatis inertiae prætulerunt.

XXIII. Habetis imperatorum summorum & sapientissimorum hominum, clarissimorum virorum, interpretationem juris ac fœderum: dabo etiam iudicium, qui huic quæstioni præfuerunt: dabo universi populi Romani: dabo & sanctissimum iudicium senatûs. Iudices, quum præ se ferrent palamque loquerentur, quid essent lege Papiâ de M. Cassio, Mamertinis repetentibus, iudicaturi; Mamertini, publicè susceptâ causâ, destiterunt. Multi, in civitatem recepti ex liberis fœderatisque populis, sunt liberati: nemo umquam est de civitate accusatus, quòd aut populus fundus factus non esset, aut quòd fœdere civitatis mutandæ jus impediretur. Audebo etiam hoc contendere, numquam esse condemnatum, quem constaret ab imperatore nostro civitate donatum.

53. Cognoscite nunc populi Romani iudicium, multis rebus interpositum, atque in maximis causis re ipsâ, atque usu comprobatum. Cum Latinis omnibus fœdus ictum, Sp. Cassio, Postumio Cominio, consulibus, quis ignorat? quod quidem nuper in columna ænea meminimus

post Rostra incisum, & perscriptum fuisse. Quomodo igitur L. Cossinius Tiburs, pater hujus equitis Romani, optimi atque ornatissimi viri, damnato T. Coelio; quomodo ex eadem civitate T. Coponius, civis item summâ virtute & dignitate (nepotes T. & C. Coponios nostris) damnato C. Massone, civis Romanus est factus? An linguâ, & ingenio patefieri aditus ad civitatem potuit? manu, & virtute non potuit? an de nobis trahere spolia fœderatis licebit; de hostibus non licebit? an, quod adipisci poterunt dicendo, id eis assequi pugnando non licebit? an accusatoris majores nostri majora præmia, quàm bellatorum, esse voluerunt?

XXIV. Quòd si acerbissimâ lege Servilia principes viri, ac gravissimi & sapientissimi cives, hanc Latinis, id est fœderatis, viam ad civitatem populi jussu patere passi sunt; neque in his est hoc reprehensum Liciniâ & Muciâ lege; quum præsertim genus ipsum accusationis & nomen, ejusmodi præmium, quod nemo assequi possit, nisi ex senatoris calamitate, neque senatori, neque bono cuiquam nimis jucundum esse posset; dubitandum fuit, quin, quo in genere judicium præmia rata essent, in eodem judicia imperatorum valerent? num fundos igitur fac-

tos populos Latinos arbitramur aut Servi-
liâ lege , aut ceteris , quibus Latinis ho-
minibus erat propositum aliqua ex re præ-
mium civitatis ?

55. Cognoscite nunc iudicium senatûs ,
quod semper est iudicio populi compro-
batum. Sacra Cereris , Iudices , summâ
maiores nostri religione confici , cæremoniâque voluerunt ; quæ quum essent as-
sumpta de Græcia , & per Græcas semper
curata sunt sacerdotes , & Græca omnia
nominata : sed quum illam , quæ Græcum
illud sacrum monstraret , & faceret , ex
Græcia deligerent ; tamen sacra pro civi-
bus civem facere voluerunt , ut deos im-
mortales scientiâ peregrinâ & externâ ,
mente domesticâ & civili , precaretur. Has
sacerdotes video ferè aut Neapolitanas ,
aut Velientes fuisse , fœderatarum sine du-
bio civitatum. Mitto vetera : proxima di-
co : ante civitatem Veliensibus datam , de
senatûs sententia C. Valerium Flaccum ,
prætorem urbanum , nominatim ad popu-
lum de Calliphana Velienſe , ut ea civis
Romana esset , tulisse. Num igitur aut fun-
dos factos Velientes , aut sacerdotem illam
civem Romanam factam non esse , aut fœ-
dus & a senatu & a populo Romano vio-
latum arbitrabimur ?

XXV. Intelligo , Iudices , in causa aper-

ta , minimèque dubia , multò & plura , & a pluribus peritissimis esse dicta , quàm res postularet : sed id factum est , non ut vobis rem tam perspicuam dicendo probaremus , verùm ut omnium malevolorum , iniquorum , invidorum animos frangeremus ; quos ut accusator incenderet , ut aliqui sermones hominum , alienis bonis mœrentium , etiam ad vestras aures permanarent , & in judicio ipso redundarent , idcirco illa in omni parte orationis suæ arte adspergi videbatis : tum pecuniam L. Cornelii , quæ neque invidiosa est , & , quantacumque est , ejusmodi est , ut conservata magis , quàm correpta , esse videatur : tum luxuriam , quæ non crimine aliquo libidinis , sed communi maledicto notabatur : tum Tusculanum , quod Q. Metelli fuisse meminerat , & L. Crassi : Crassum emisse de libertino homine , Soterico Marcio ; ad Metellum pervenisse de Venonii Vindicii bonis non tenebat : simul illud nesciebat , prædiorum nullam esse gentem : emptionibus ea solere sæpe ad alienos homines , sæpe ad infimos , non legibus , tamquam tutelas , pervenire.

57. Objectum est etiam , quòd in tribum Crustuminam pervenerit ; quod hic assecutus est legis de ambitu præmio , mi-

PRO L. CORN. BALBO. 345

nus invidioso , quàm qui legum præmiis prætoriam sententiam , & prætextam togam consequuntur. Et adoptio Theophanis agitata est , per quam Cornelius nihil est , præterquam propinquorum suorum hereditates , assecutus.

XXVI. Quamquam istorum animos ; qui ipsi Cornelio invident , non est difficillimum mitigare : more hominum invident , in conviviis rodunt , in circulis vellicant ; non illo inimico , sed hoc maledico dente carpunt. Qui amicis L. Cornelii aut inimici sunt , aut invident , hi sunt huic multò vehementiùs pertimescendi. Nam huic quidem ipsi quis est umquam inventus inimicus ? aut quis jure esse potuit ? quem bonum non coluit ? cujus fortunæ , dignitatique non concessit ? Versatus in intima familiaritate hominis potentissimi , in maximis nostris malis atque discordiis neminem umquam alterius rationis ac partis non re , non verbo , non vultu denique offendit : fuit hoc sive meum , sive reipublicæ fatum , ut in me unum omnis illa inclinatio communium temporum incumberet : non modò non exsultavit in ruinis nostris , vestrisque discordiis Cornelius ; sed omni officio , lacrymis , operâ , consolatione , omnes , me absente , meos sublevavit.

59. Quorum ego testimonio ac precibus munus hoc meritum huic, &, ut a principio dixi, justam & debitam gratiam refero: speroque, Judices, ut eos, qui principes fuerunt conservandæ salutis, aut dignitatis meæ, diligitis, & caros habetis; sic, quæ ab hoc pro facultate hujus, pro loco facta sunt, & grata esse vobis, & probata. Non igitur a suis, quos nullos habet, sed a suorum, qui & multi, & potentes sunt, urgetur inimicis: quos quidem hesterno die Cn. Pompeius copiosâ oratione, & gravi, secum, si vellent, contendere jubebat; ab hoc impari certamine, atque injusta contentione avocabat.

XXVII. Et erat æqua lex, & nobis; Judices, atque omnibus, qui nostris familiaritatibus implicantur, vehementer utilis, ut nostras inimicitias ipsi inter nos geramus, amicis nostrorum inimicorum temperemus. Ac, si mea auctoritas satis apud illos in hac re ponderis haberet, quum me præsertim rerum varietate, atque usu ipso jam perdoctum viderent; etiam ab illis eos majoribus discordiis avocarem: ita enim contendere de republica, quum id defendas, quod esse optimum sentias, & fortium virorum, & magnorum hominum semper putavi; neque huic

umquam labori , officio , muneri defui : sed contentio tamdiu sapiens est , quamdiu aut proficit aliquid , aut , si non proficit , non obest civitati.

61. Voluimus quædam , contendimus , experti sumus ; obtenta non sunt : dolorem alii , nos luctum mœroremque suscepimus. Cur ea , quæ mutare non possumus , convellere malumus , quàm tueri ? C. Cæsarem senatus & genere supplicationum amplissimo ornavit , & numero dierum novo. Idem in angustiis ærarii victorem exercitum stipendio affecit ; imperatori decem legatos decrevit ; lege Sempronîâ succedendum non censuit. Harum ego sententiarum & princeps , & auctor fui : neque me dissensionî meæ pristinæ putavi potius assentiri , quàm præsentibus reipublicæ temporibus , & concordîæ , convenire. Non idem aliis videtur : sunt fortasse in sententia firmiores : reprehendo neminem ; sed assentior non omnibus : neque esse inconstantis puto , sententiam aliquam , tamquam aliquod navigium , atque cursum , ex reipublicæ tempestate moderari.

62. Sed si qui sunt , quibus infinitum sit odium , in quos semel susceptum sit , quos video esse nonnullos ; cum ducibus ipsis , non cum comitatu , affectatoribusque con-

fligant : illam enim fortasse pertinaciam nonnulli, virtutem alii putabunt ; hanc verò iniquitatem omnes cum aliqua crudelitate conjunctam. Sed , si certorum hominum mentes nullâ ratione placare , Judices , possumus ; vestros quidem animos certè confidimus , non oratione nostrâ , sed humanitate vestrâ esse placatos.

XXVIII. Quid enim est , cur non potius ad summam laudem huic , quàm ad minimam fraudem , Cæsaris familiaritas valere debeat ? cognovit adolescens : placuit homini prudentissimo : in summa amicorum copia cum familiarissimis ejus est adæquatus in prætura : in consulatu præfectum fabrûm detulit , consilium hominis probavit , fidem est complexus , officia , observantiamque dilexit : fuit hic multorum illi laborum socius aliquando ; est fortasse nunc nonnullorum particeps commodorum : quæ quidem si huic obfuerint apud vos , non intelligo , quod bonum cuiquam sit apud tales viros profuturum.

64. Sed quoniam C. Cæsar abest longissimè , atque in iis est nunc locis , quæ regione , orbem terrarum , rebus illius gestis , imperium populi Romani definiunt : nolite , per deos immortales ! Judices , hunc illi acerbum nuntium velle perferri , ut suum præfectum fabrûm , ut hominem

sibi carissimum & familiarissimum ; non ob ipsius aliquod delictum , sed ob suam familiaritatem vestris oppressum sententiis audiat. Miseremini ejus , qui non de suo peccato , sed de hujus summi & clarissimi viri facto ; non de aliquo crimine , sed periculo suo , de publico jure disceptat : quod jus si Cn. Pompeius ignoravit , si M. Crassus , si Q. Metellus , si Cn. Pompeius pater , si L. Sulla , si L. Crassus , si C. Marius , si senatus , si populus Romanus , si , qui de re simili judicarunt , si fœderati populi , si focii , si illi antiqui Latini ; videte , ne utilius vobis , & honestius sit illis ducibus errare , quàm hoc magistro erudiri. Sed , si de certo , de perspicuo , de utili , de probato , de judicato vobis jure esse constituendum videtis ; nolite committere , ut in re tam inveterata quidquam novi sentiat. Simul & illa , Judices , omnia ante oculos vestros proponite : primum esse omnes etiam post mortem reos , clarissimos illos viros , quj fœderatos civitate donarunt ; deinde senatum , qui persæpe hoc judicavit ; populum , qui jussit ; judices , qui approbarunt : tum etiam illud cogitatote ; sic vivere , ac vixisse Cornelium , ut , quum omnium peccatorum quæstiones sint , non de vitiorum suorum poena , sed de virtutis præmio in judicium

350 *ORATIO PRO L. C. BALBO.*

vocetur. Accedat etiam illud , ut statuatis hoc iudicio , utrùm posthac amicitias clarorum virorum calamitati hominibus , an ornamento esse malitis. Postremò illud , Iudices , fixum in animis vestris tenetote , vos in hac causa non de maleficio L. Cornelii , sed de beneficio Cn. Pompeii iudicatu-
curos.





D E

PROVINCIIS CONSULARIBUS.

ORATIO TRIGESIMA QUARTA:

C. Sempronius Gracchius, Tiberii Frater, in tribunatu legem tulit, ut provinciæ consulares a senatu quotannis decernerentur. Ex ea lege consules Lentulus Marcellinus & L. Philippus retulerunt ad senatum de provinciis consularibus decernendis. Eæ tum quatuor erant, de quibus variæ sententiæ dictæ sunt; Macedonia, cui L. Piso, Syria, cui A. Gabinus, Galliæ duæ, quibus conjunctis cum imperio præerat C. Julius Cæsar. Qui ante Ciceronem sententiam dixere, id omnes, excepto P. Servilio, spectabant, ut Cæsari, quem oderant, vel omnino

auferretur imperium, ademptâ utraque Galliâ, vel certè, ulteriore aut citeriore detractâ, minueretur. Contradixit Cicero sententiam rogatus. De Cæsare magnas res gerente, propositâ reip. utilitate, nihil mutandum: Pisonem autem & Gabinium, qui provincias avarè, crudeliter, superbè administrarent, esse revocandos censuit. Anno urbis 697. Ciceronis 51. MANUTIUS.

I. **S**I quis vestrûm, Patres conscripti, exspectat, quas sim provincias decreturus, consideret ipse secum, qui mihi homines ex provinciis potissimum detrahendi sint: non dubitabit, quid me sentire conveniat, quum, quid mihi sentire necesse sit, cogitarit. Ac, si princeps eam sententiam dicerem; laudaretis profectò: si solus; certè ignosceretis: etiam si paulò minùs utilis vobis sententia videretur; veniam tamen aliquam dolori meo tribueretis. Nunc verò, Patres conscripti, non parvâ afficior voluptate, vel quòd hoc maximè reipublicæ conducit; Syriam, Macedoniamque decerni, ut dolor meus nihil a communi utilitate dissentiat; vel quòd habeo

auctorem P. Servilium, qui ante me sententiam dixit, virum clarissimum, & quum in universam rempublicam, tum etiam erga meam salutem, fide ac benevolentia singulari.

2. Quod si ille & paulò antè, & quotiescumque ei locus dicendi ac potestas fuit, Gabinium & Pisonem, duo reipublicæ portenta, ac pene funera, quum propter alias causas, tum maximè propter illud insigne scelus eorum, & importunam in me crudelitatem, non solum sententia suâ, sed etiam verborum gravitate esse notandos putavit; quonam me animo in eos esse oportet, cujus illi salutem pro pignore tradiderunt ad explendas suas cupiditates? Sed ego in hac sententia dicenda non parebo dolori meo, nec iracundiæ serviam: quo animo unusquisque vestrûm debet esse in illos, hoc ero: præcipuum illum & proprium sensum doloris mei, quem tamen vos communem semper vobis mecum esse duxistis, a sententia dicenda amovebo; ad ulciscendi tempora reservabo.

II. Quatuor sunt Provinciæ, Patres conscripti, de quibus adhuc intelligo sententias esse dictas: Galliæ duæ, quas hoc tempore uno imperio videmus esse conjunctas; & Syria, & Macedonia; quas, vobis invitis & oppressis, pestiferi con-

fules pro everſæ reipublicæ præmiis occupaverunt. Decernendæ nobis ſunt lege Sempronia duæ : quid eſt , quod poſſimus de Syria , Macedoniaque dubitare ? Mitto , quòd eas ita partas habent ii , qui nunc obtinent , ut non antè attigerint , quàm hunc ordinem condemnarint : quàm auctoritatem veſtram e civitate exterminarint : quàm fidem publicam , quàm perpetuam populi Romani ſalutem , quàm me , ac meos omnes foediffimè , crudeliſſimèque vexarint.

4. Omnia domeſtica illa , atque urbana mitto ; quæ tanta ſunt , ut numquam Anibal huic urbi tantum mali optarit , quantum illi effecerint. Ad ipſas venio provincias : quarum Macedonia , quæ erat antea munita plurimorum imperatorum , non turribus , ſed tropæis ; quæ multis victoriis erat jamdiu , triumphisque pacata ; ſic a Barbaris , quibus eſt propter avaritiam pax erepta , vexatur , ut Theſſalonicenſes , poſiti in gremio imperii noſtri , relinquere oppidum , & arcem munire cogantur : ut via illa noſtra , quæ per Macedoniam eſt uſque ad Hellespontum militaris , non ſolum excuſionibus Barbarorum ſit infeſta , ſed etiam caſtris Threciis diſtincta , ac notata. Ita gentes eæ , quæ , ut pace uterentur , vim argenti dederant præclaro noſtro imperatori ; ut exhaustas domos re-

plere possent, pro emptâ pace bellum nobis propè justum intulerunt. Jam verò exercitus ille noster, superbissimo delectu, & durissimâ conquisitione collectus, omnis interit.

III. Magno hoc dico cum dolore: miserandum in modum milites populi Romani capti, necati, deserti, dissipati sunt; incuriâ, fame, morbo, vastitate consumpti: ut, quod est indignissimum, scelus imperatoris in pœnam exercitus expetitum esse videatur. Atque hanc Macedoniam, domitis jam gentibus finitimis, Barbariâque compressâ, pacatam ipsam per se & quietam tenui præsidio, atque exiguâ manu, etiam sine imperio, per legatos nomine ipso populi Romani tuebamur: quæ nunc consulari imperio, atque exercitu ita vexata est, vix ut se possit diuturnâ pace recreare: quum interea, quis vestrum hoc non audivit, quis ignorat, Achæos ingentem pecuniam pendere L. Pisoni quotannis? vectigal ac portorium Dyrrhachinorum totum in hujus unius quæstam esse conversum? urbem Byzantiorum, vobis atque huic imperio fidelissimam, hostilem in modum esse vexatam? quod ille, posteaquam nihil exprimere ab egentibus, nihil ullâ vi a miseris extorquere potuit, cohortes in hiberna misit: his præposuit, quos putavit fore diligentissimos satellites

scelerum , ministros cupiditatum suarum.

6. Omitto jurisdictionem in libera civitate contra leges , senatûsque consulta : cædes relinquo , libidines prætereo : quarum acerbissimum exstat indicium , & ad insignem memoriam turpitudinis , & pene ad justum imperii nostri odium , quòd constat , nobilissimas virgines se in puteos abjecisse , & morte voluntariâ necessariam turpitudinem depulisse. Nec hæc idcirco omitto , quòd non gravissima sint , sed quia nunc sine teste dico.

IV. Ipsam verò urbem Byzantium fuisse refertissimam atque ornatissimam signis , quis ignorat ? quæ illi , exhausti sumptibus , bellisque maximis , quum Mithridaticos impetus , totumque Pontum armatum , effervescentem in Asiam atque erumpentem , ægrè repulsum , & cervicibus interclusum suis , sustinerent , tum , inquam , Byzantii , & postea signa illa , & reliqua urbis ornamenta , sanctissimè custodita , tenuerunt. Te imperatore infelicissimo & teterrimo , Cæsonine Calventi , civitas libera , & proximis suis beneficiis a senatu & a populo Romano liberata , sic spoliata , atque nudata est , ut , nisi C. Virgilius , legatus , vir fortis & innocens , intervenisset , unum signum Byzantii ex maximo numero nullum haberent. Quod fanum in Achaia , qui lo-

cus, aut lucus in Græcia tota tam sanctus fuit, in quo ullum simulacrum, ullum ornamentum reliquum sit? Emisti a foedissimo tribuno plebis, tum in illo naufragio hujus urbis, quam tu idem, qui gubernare debueras, everteras: tum, inquam, emisti grandi pecuniâ, ut tibi de pecuniis creditis jus in liberos populos contra senatusconsultum, & contra legem generi tui dicere liceret: id emptum ita vendidisti, ut aut jus non diceres, aut bonis cives Romanos everteres.

8. Quorum ego nihil nunc, Patres conscripti, in hominem ipsum; de provincia disputo. Itaque omnia illa, quæ & sæpe audistis, & tenetis animis, etiam si non audiat, prætermitto: nihil de hac ejus urbana, quam ille præsens, in oculis vestris mentibusque defixit, audacia loquor: nihil de superbia, nihil de contumacia, nihil de crudelitate disputo: lateant libidines ejus illæ tenebricosæ, quas fronte & supercilio, non pudore & temperantiâ contegebat: de provincia, quod agitur, id disputo. Huic vos non summittetis? hunc diutius manere patiemini? cujus, ut provinciam tetigit, sic fortuna cum improbitate certavit, ut nemo posset, utrum posterior, an infelicior esset, judicare.

9. An verò in Syria diutius est Semi-

ramis illa retinenda? cujus iter in provinciam fuit ejusmodi, ut rex Ariobarzanes consulem vestrum ad cædem faciendam, tamquam aliquem Threcem conductorer. Deinde adventus in Syriam primus, equitatus habuit interitum: post concisæ sunt optimæ cohortes. Igitur in Syria, imperatore illo, nihil aliud actum est, nisi pactiones pecuniarum cum tyrannis, decisiones, direptiones, latrocinia, cædes, quum palam populi Romani imperator, instructo exercitu, dexteram tendens, non ad laudem milites hortaretur, sed omnia sibi & empta, & emenda esse clamaret.

V. Jam verò publicanos miseros (me etiam miserum, illorum ita de me meritorum miseriis, ac dolore) tradidit in servitutem Judæis, & Syris, nationibus natis servituti. Statuit ab initio, & in eo perseveravit, jus publicano non dicere: pactiones sine ulla injuria factas rescidit: custodias sustulit: vestigales multos, ac stipendiarios liberavit: quo in oppido ipse esset, aut quò veniret, ibi publicanum, aut publicani servum esse vetuit: quid multa? crudelis haberetur, si in hostem animo fuisset eo, quo fuit in cives Romanos, ejus ordinis præsertim, qui est semper, dignitate suâ, benignitate magistratus sustentatus.

II. Itaque videtis, Patres conscripti,

non temeritate redemptionis , aut negotii gerendi infcitia , sed avaritia , superbia , crudelitate Gabinii , pene afflictos jam atque everfos publicanos : quibus quidem vos , in his angustiis ærarii , tamen subveniatis necesse est : etsi jam multis non potestis , qui propter illum hostem senatus , inimicissimum ordinis equestris , bonorumque omnium , non solum bona , sed etiam honestatem miseri deperdiderunt : quos non parcimonia , non continentia , non virtus , non labor , non splendor tueri potuit contra illius helluonis & prædonis audaciam.

12. Quid ? qui se etiam nunc subsidiis patrimonii , aut amicorum liberalitate sustentant , hos perire patiemur ? An , si qui frui publico non potuit per hostem , hic tegitur ipsa lege censoria ; quem is frui non sinit , qui est , etiam si non appellatur , hostis , huic ferri auxilium non oportet ? Retinete igitur in provincia diutius eum , qui de sociis cum hostibus , de civibus cum sociis faciat pactiones : qui hoc etiam se pluris esse , quam collegam , putet , quod ille vos tristitia , vultuque deceperit , ipse numquam se minus , quam erat , nequam esse simularit. Piso autem alio quodam modo gloriatur , se brevi tempore perfecisse , ne A. Gabinius unus omnium nequissimus existimaretur.

13. Hos vos de provinciis, si non aliquando deducendi essent, deripiendos non putaretis? & has duplices pestes sociorum, militum clades, publicanorum ruinas, provinciarum vastitates, imperii maculas, teneretis? At iidem vos, anno superiore hos eosdem revocabatis, quum in provincias jam pervenissent: quo tempore si liberum vestrum iudicium fuisset, nec toties dilata res, nec ad extremum e manibus erepta esset, restituissetis, id quod cupiebatis, vestram auctoritatem, iis, per quos erat amissa, revocatis, & his ipsis præmiis extortis, quæ erant pro scelere, atque eversione patriæ consecuti.

VI. Quam pœnam si tum aliorum opibus, non suis, invitissimis vobis, evolarunt; at aliam multò maiorem, gravio-remque subierunt: quæ enim homini, in quo aliquis si non famæ pudor, at supplicii timor est, gravior pœna accidere potuit, quàm non credi litteris iis, quæ rempublicam bene gestam in bello nuntiarent? Hoc statuit senatus, quum frequens supplicationem Gabinio denegavit: primùm homini, sceleribus, flagitiis contaminatissimo, nihil esse credendum: deinde a proditore, atque eo, quem præsentem hostem reipublicæ cognosset, bene rempublicam geri non potuisse: postremò, ne deos quidem immortales velle aperiri sua
templa,

templa, & sibi supplicari hominis impu-
rissimi & sceleratissimi nomine. Itaque ille
alter, aut ipse est homo doctus, & a suis
Græcis subtilius eruditus, quibuscum jam
in exoſtra helluatur, antea poſt ſiparium
ſolebat; aut amicos habet prudentiores,
quàm Gabinus, cujus nullæ litteræ per-
feruntur.

VII. Hoſce igitur imperatores habebi-
mus? quorum alter non audent nos cer-
tiores facere, ne imperator appelletur;
alterum, ſi tabellarii non ceſſarint, neceſſe
eſt paucis diebus pœniteat audere: cujus
amici, ſi qui ſunt, aut ſi belluæ tam im-
mani tamque tetræ poſſunt ulli eſſe amici,
hac conſolatione utuntur, etiam T. Albu-
cio ſupplicationem hunc ordinem dene-
gaſſe. Quod eſt primùm diſſimile: res in
Sardinia cum maſtrucatis latrunculis a pro-
prætore unâ cohorte auxiliariâ geſta, &
bellum cum maximis Syriæ gentibus, ac
tyrannis, conſulari exercitû imperioque
conſectum: deinde Albucius, quod a ſe-
natus petebat, ipſe ſibi in Sardinia antè
decreverat: conſtabat enim, Græcum ho-
minem ac levem in ipſa provincia quaſi
triumphaſſe. Itaque hanc ejus temeritatem
ſenatus ſupplicatione denegatâ notavit.

16. Sed fruatur ſanè hoc ſolatio; atque
hanc inſignem ignominiam, quoniam uni,
præter ſe, inuſta eſt, putet eſſe levio-
rem,

dummodo , cujus exemplo se consolatur ; ejus exitum exspectet : præsertim quum in Albucio nec Pisonis libidines , nec audacia Gabinii fuerit ; hac tamen unâ plagâ conciderit , ignominiâ fenatûs.

17. Atqui duas Gallias qui decernit consulibus duobus , hos retinet ambo ; qui autem alteram Galliam , & aut Syriam , aut Macedoniam , tamen alterum retinet , & in utriusque pari scelere disparem conditionem facit. Faciam , inquit , illas prætorias , ut Pisoni & Gabinio succedatur statim. Si hic sinat. Tum enim tribunus intercedere poterit , nunc non potest. Itaque ego idem , qui nunc consulibus iis , qui designati erunt , Syriam , Macedoniamque decerno , decernam easdem prætorias , ut & prætores annuas provincias habeant , & eos quàm primùm videamus , quos animo æquo videre non possumus.

VIII. Sed mihi credite : numquam succedetur illis , nisi quum eâ lege referetur , quâ intercedi de provinciis non licebit. Itaque , hoc tempore amisso , annus est integer vobis exspectandus : quo interjecto , civium calamitas , sociorum ærumna , sceleratissimorum hominum impunitas propagatur. Quòd si essent illi optimi viri , tamen ego meâ sententiâ C. Cæsari succedendum nondum putarem. Qua de re dicam , Patres conscripti , quod sentio ,

atque illam interpellationem mei familiarissimi, quâ paulò antè interrupta est oratio mea, non pertimescam. Negat me vir optimus inimiciorem Gabinio debere esse, quàm Cæsari: omnem enim illam tempestatem, cui cesserim, Cæsare impulsore atque adiutore esse excitatam. Cui si primum sic respondeam, me communis utilitatis habere rationem, non doloris mei; possimne probare, quum id me facere dicam, quod exemplo fortissimorum & clarissimorum civium facere possim? An Tib. Gracchus (patrem dico, cujus utinam filii ne degenerassent a gravitate paterna) tantam laudem est adeptus, quòd tribunus plebis solus ex toto illo collegio L. Scipioni auxilio fuit, inimicissimus & ipsius, & fratris ejus Africani, juravitque in concione, se in gratiam non rediisse; sed alienum sibi videri dignitate imperii, quò duces essent hostium, Scipione triumphante, ducti, eòdem ipsum duci, qui triumphasset?

19. Quis plenior inimicorum fuit C. Mario? L. Crassus, M. Scaurus. Alii inimici? omnes Metelli. At hi non modò illum inimicum ex Gallia sententiis suis non detrahebant, sed & propter rationem Gallici belli, provinciam extra ordinem decernebant. Bellum in Gallia maximum gestum est: domitæ sunt a Cæsare maximæ

nationes, sed nondum legibus, nondum jure certo, nondum satis firmâ pace devinctæ: bellum affectum videmus, &, verè ut dicam, pene confectum; sed ita, ut, si idem extrema persequitur, qui inchoavit, jam omnia perfecta videamus: si succeditur; periculum sit, ne instauratas maximi belli reliquias, ac renovatas audiamus. Ergo ego senator, inimicus, si ita vultis, homini; amicus esse, sicut semper fui, reipublicæ debeo. Quid, si ipsas inimicitias depono reipublicæ causa? quis me tandem jure reprehendat? præsertim quum ego omnium meorum consiliorum, atque factorum exempla semper ex summorum hominum factis mihi censuerim petenda.

IX. An verò M. ille Lepidus, qui bis consul & pontifex maximus fuit, non solum memoriæ testimonio, sed etiam annalium litteris, & summi poetæ voce laudatus est, quòd cum M. Fulvio collega, quo die censor est factus, homine inimicissimo, in campo statim rediit in gratiam, ut commune officium censuræ communi animo ac voluntate defenderent?

21. Atque, ut vetera, quæ sunt innumerable, mittam; tuus pater, Philippe, nonne uno tempore cum suis inimicissimis in gratiam rediit? quibus eum omnibus eadem respublica reconciliavit, quæ alienarat.

22. Multa prætereo, quòd intueor coràm hæc lumina atque ornamenta reipublicæ, P. Servilium, & M. Lucullum: utinam etiam L. Lucullus ille viveret! Quæ fuerunt inimiciæ graviores in civitate, quàm Lucullorum, atque Serviliorum? quas in viris fortissimis non solum exstinxit respublica dignitasque ipsorum, sed etiam ad amicitiam consuetudinemque traduxit. Quid? Q. Metellus Nepos, nonne consul in templo Jovis optimi maximi, permotus quum auctoritate vestrà, tum illius P. Servilii incredibili gravitate dicendi, absens. mecum, summo suo beneficio, rediit in gratiam? An ego possum huic esse inimicus, cujus litteris, famâ, nuntiis, celebrantur aures quotidie meæ novis nominibus gentium, nationum, locorum?

23. Ardeo, mihi credite, Patres conscripti (id quod vosmet de me existimatis, & facitis ipsi) incredibili quodam amore patriæ; qui me amor & subvenire olim impendentibus periculis maximis cum dimicatione capitis, & rursus, quum omnia tela undique esse intenta in patriam viderem, subire coëgit atque excipere unum pro universis: hic me meus in rempublicam animus pristinus ac perennis cum C. Cæsare reducit, reconciliat, restituit in gratiam. Quod volent denique homi-

nes existiment; nemini ego possum esse bene de republica merenti non amicus.

X. Etenim si iis, qui hæc omnia flammâ ac ferro delere voluerunt, non inimicitias solùm, sed etiam bellum indixi, atque intuli, quum partim mihi illorum familiares, partim etiam, me defendente, capitis judiciis essent liberati; cur eadem respublica, quæ me in amicos inflammare potuit, inimicis placare non possit? Quod mihi odium cum P. Clodio fuit, nisi quòd perniciosum patriæ civem fore putabam, qui, turpissimâ libidine incensus, duas res sanctissimas, religionem & pudicitiam, uno scelere violasset? Num est igitur dubium ex iis rebus, quas is egit, agitque quotidie, quin ego, in illo oppugnando, reipublicæ plus, quàm otio meo; nonnulli in eodem defendendo, suo plus otio, quàm communi, prospexerint?

25. Ego me a C. Cæsare in republica dissensisse fateor, & sensisse vobiscum: sed nunc iisdem vobis assentior, cum quibus antea sentiebam. Vos enim, ad quos litteras L. Piso de suis rebus non audet mittere, qui Gabinii litteras insigni quadam notâ, atque ignominiâ novâ condemnastis, C. Cæsari supplicationes decrevistis, numero, ut nemini uno ex bello; honore, ut omnino nemini. Cur igitur exspectem hominem aliquem, qui me

cum illo in gratiam reducat? reduxit ordo amplissimus, & ordo is, qui est & publici consilii, & meorum omnium consiliorum auctor & princeps. Vos sequor, Patres conscripti, vobis obtempero, vobis assentior: qui, quamdiu C. Cæsaris consilia in republica non maximè diligebatis, me quoque cum illo minùs conjunctum videbatis: posteaquam rebus gestis mentes vestras, voluntatesque mutastis, me non solum comitem esse sententiæ vestræ, sed etiam laudatorem vidistis.

XI. Sed quid est, quòd in hac causa maximè homines admirentur, & reprehendant meum consilium, quum ego idem antea multa decreverim, quæ magis ad hominis dignitatem, quàm ad reipublicæ necessitatem pertinerent? Supplicationem quindecim dierum decrevi sententiâ meâ. Reipublicæ satis erat tot dierum, quot C. Mario. Diis immortalibus non erat exigua eadem gratulatio, quæ ex maximis bellis. Ergo ille cumulus dierum hominis est dignitati tributus.

27. In quo ego (quo consule referente, primùm decem dierum supplicatio decreta Cn. Pompeio, Mithridate interfecto, confectoque Mithridatico bello, cujus sententiâ primùm duplicata est supplicatio consularis; mihi enim estis assensi, quum ejusdem Pompeii litteris recitatis,

confectis omnibus maritimis terrestribusque bellis, supplicationem decem dierum decrevistis) sum Cn. Pompeii virtutem & animi magnitudinem admiratus, quòd, quum ipse ceteris omnibus esset omni honore antelatus, ampliorem honorem alteri tribuebat, quàm ipse erat consecutus. Ergo in illa supplicatione, quam ego decrevi, res ipsa tributa est diis immortalibus, & majorum institutis, & utilitati reipublicæ: sed dignitas verborum, honos, & novitas, & numerus dierum, Cæsaris ipsius laudi gloriæque concessus est.

28. Relatum est ad nos nuper de stipendio exercitûs: non decrevi solùm, sed etiam, ut vos decerneretis, laboravi: multa dissentientibus respondi: scribendo affui: tum quoque homini plus tribui, quàm nescio cui necessitati: illum enim arbitrabar, etiam sine hoc subsidio pecuniæ, retinere exercitum prædâ antè partâ, & bellum conficere posse: sed decus illud & ornamentum triumphi minuendum nostrâ parcimoniâ non putavi. Actum est de decem legatis, quos alii omnino non dabant, alii exempla quærebant, alii tempus differebant, alii sine ullis verborum ornamentis dabant: in ea quoque re sic sum locutus, ut omnes intelligerent, me id, quod reipublicæ causâ sentirem, facere uberius propter ipsius Cæsaris dignitatem.

XII. At ego idem nunc in provinciis decernendis, qui illas omnes res egi silentio, interpellor; quum superioribus causis hominis ornamenta fuerint, in hac me nihil aliud, nisi ratio belli, nisi summa utilitas reipublicæ moveat. Nam ipse Cæsar, quid est, cur in provincia commorari velit, nisi ut ea, quæ per eum affecta sunt, perfecta reipublicæ tradantur? Amœnitas eum, credo, locorum, urbium pulchritudo, hominum nationumque illarum humanitas & lepos, victoriæ cupiditas, finium imperii nostri propagatio retinet. Quid illis terris asperius? quid incultius oppidis? quid nationibus immanius? quid porro tot victoriis præstabilius? quid Oceano longius inveniri potest? An reditus in patriam habet aliquam offensionem? utrùm apud populum, a quo missus; an apud senatum, a quo ornatus est? an dies augeat ejus desiderium, an magis oblivionem? ac laurea illa magnis periculis parata, amittit longo intervallo viriditatem? Quare, si qui hominem non diligunt, nihil est, quodd eum de provincia devocent: ad gloriam devocant, ad triumphum, ad gratulationem, ad summum honorem senatus, equestris ordinis gratiam, populi caritatem.

30. Sed, si ille hac tam eximiâ fortunâ propter utilitatem reipublicæ frui non pro-

Q v

perat, ut omnia illa conficiat ; quid ego ſenator facere debeo, quem, etiam ſi ille aliud vellet, reipublicæ conſulere oporteret ? Ego verò ſic intelligo, Patres conſcripti, nos hoc tempore in provinciis decernendis, perpetuæ pacis habere oportere rationem : nam quis hoc non ſentit, omnia alia eſſe nobis vacua ab omni periculo, atque etiam ab omni ſuſpicionē belli ?

31. Jamdū mare videmus illud immenſum, cujus fervore non ſolū maritimi curſus, ſed urbes etiam & viæ militares jam tenebantur, virtute Cn. Pompeii ſic a populo Romano, ab Oceano uſque ad ultimum Pontum, tamquam unum aliquem portum, tutum & clauſum teneri : nationes eas, quæ numero hominum, ac multitudine ipſâ poterant in provincias noſtras redundare, ita ab eodem eſſe partim reciſas, partim reſſas, ut Asia, quæ imperium antea noſtrum terminabat, nunc tribus novis provinciis ipſa cingatur. Poſſum de omni regione, de omni hoſtium genere dicere : nulla gens eſt, quæ non aut ita ſubacta ſit, ut vix exſtet ; aut ita domita, ut quieſcat ; aut ita pacata, ut victoriâ noſtrâ imperioque lætetur.

XIII. Bellum Gallicum, Patres conſcripti, C. Cæſare imperatore geſtum eſt ; antea tantummodo reſuſum : ſemper illas

nationes nostri imperatores refutandas potius bello, quàm laceffendas putaverunt. Ipse ille C. Marius, cujus divina atque eximia virtus magnis populi Romani luctibus funeribusque subvenit, influentes in Italiam Gallorum maximas copias repres- sit, non ipse ad eorum urbes sedesque penetravit. Modò ille meorum laborum, periculorum, consiliorum socius, Caius Pomptinus, fortissimus vir, ortum repente bellum Allobrogum, atque hac sceleratâ conjuratione excitatum, præliis fregit, eosque domuit, qui laceffierant; & eâ victoriâ contentus, republicâ metu liberatâ, quievit. C. Cæsaris longè aliam video fuisse rationem: non enim sibi solum cum iis, quos jam armatos contra populum Romanum videbat, bellandum esse duxit, sed totam Galliam in nostram ditionem esse redigendam.

33. Itaque cum acerrimis nationibus, & maximis Germanorum & Helvetiorum, præliis felicissimè decertavit: ceteras contrivit, domuit, compulit, imperio populi Romani parere assuefecit, &, quas regiones, quasque gentes nullæ nobis antea litteræ, nulla vox, nulla fama notas fecerat, has noster imperator, nosterque exercitus, & populi Romani arma peragrarunt. Semitam tantum Galliæ tenebamus antea, Patres conscripti: ceteræ partes a

gentibus aut inimicis huic imperio , aut infidis , aut incognitis , aut certè immanibus , & barbaris , & bellicosīs tenebantur : quas nationes nemo umquam fuit , qui non frangi , domarique cuperet : nemo sapienter de republica nostra cogitavit jam inde a principio hujus imperii , quin Galliam maximè timendam huic imperio putaret : sed propter vim ac multitudinem gentium illarum numquam est antea cum omnibus dimicatum : restitimus semper la- cessiti : nunc denique est perfectum , ut imperii nostri , terrarumque illarum idem esset extremum.

XIV. Alpibus Italiam munierat antè natura , non sine aliquo divino numine : nam , si ille aditus Gallorum immanitati , multitudinique patuisset , numquam hæc urbs summo imperio domicilium ac sedem præbuisset : quæ jam licet considant : nihil est enim ultra illam altitudinem montium usque ad Oceanum , quod sit Italiæ pertimescendum. Sed tamen una atque altera æstas , vel metu , vel spe , vel pœnâ , vel præmiis , vel armis , vel legibus potest totam Galliam sempiternis vinculis adstringere : impolitæ verò res , & acerbæ ; si erunt relictæ ; quamquam sunt accisæ , tamen efferent se aliquando , & ad renovandum bellum revirescent.

§5. Quare sit in ejus tutela Gallia , cu-

ius virtuti, fidei, felicitati, commendata est. Etenim si Fortunæ muneribus amplissimis ornatus, sæpius ejus deæ periculum facere nollet: si in patriam, si ad deos penates, si ad eam dignitatem, quam in civitate sibi propositam videt: si ad jucundissimos liberos, si ad clarissimum generum redire properaret: si in Capitolium invehî victor cum illa insigni laurea gestiret: si denique timeret casum aliquem, qui illi tantum addere jam non potest, quantum auferre: vos tamen oportet ab eodem illa omnia, a quo profligata sunt, confici velle. Quum verò ille suæ gloriæ jampridem, reipublicæ nondum satisfecerit, & malit tamen tardius ad suorum laborum fructus pervenire, quàm non ex- plere susceptum reipublicæ munus: nec imperatorem incensum ad rempublicam bene gerendam revocare, nec totam Galli- ci belli rationem, propè jam explicatam, perturbare, atque impedire debemus.

XV. Nam illæ sententiæ virorum cla- rissimorum minimè probandæ sunt; quo- rum alter ulteriorem Galliam decernit cum Syria, alter citeriorem: qui ulteriorem; omnia illa, de quibus differui paulò antè, perturbat; simul ostendit, eam se sciscere legem, quam esse legem neget; &, quæ pars provinciæ sit, cui non possit inter- cedi, hanc se avellere; quæ defensorem

374 *DE PROVINCIIS*

habeat, non tangere: simul & illud facit; ut, quod illi a populo datum sit, id non violet; quod senatus dederit, id senator properet auferre.

37. Alter belli Gallici rationem habet: fungitur officio boni senatoris: legem, quam non putat, eam quoque servat; præfinit enim successori diem: qui mihi nihil videtur minùs a dignitate disciplinaque majorum dissidere, quàm ut, qui consul Kalendis Jan. habere provinciam debet, is ut eam desponsam, non decretam habere videatur. Fuerit toto in consulu sine provincia, cui fuerit, antequam designatus esset, provincia decreta. Sortietur, an non? nam & non sortiri absurdum est, & quod sortitus sis, non habere. Proficiscetur paludatus? quò? quò pervenire ante certam diem non licebit. Januario, Februario, provinciam non habebit. Kalendis ei denique Martiis, nascetur repente provincia. Attamen his sententiis Piso in provincia permanebit. Quæ quum gravia sunt, tum nihil gravius illo, quòd multari imperatorem deminutione provinciae contumeliosum est; neque solùm summo in viro, sed etiam mediocri in homine ne accadat, providendum.

XVI. Ego vos intelligo, Patres conscripti, multos decrevisse honores eximios C. Cæsari, & propè singulares: quòd ita

meritus erat, grati, sin etiam, ut quàm conjunctissimus huic ordini esset, sapientes ac divini fuistis. Neminem umquam est hic ordo complexus honoribus, & beneficiis suis, qui ullam dignitatem præstabiliorẽ eâ, quam per vos esset adeptus, putarit: nemo umquam hic potuit esse princeps, qui maluerit esse popularis. Sed homines aut propter dignitatem suam diffisi ipsi sibi, aut propter reliquorum obtrectationem, ab hujus ordinis conjunctione depulsi, sæpe ex hoc portu se in illos fluctus propè necessariò contulerunt: qui, si ex illa jactatione cursuque populari, bene gestâ republicâ, referunt ad spectum in curiam, atque huic amplissimæ dignitati commendati esse volunt, non modò non repellendi sunt, verùm etiam expetendi.

39. Monemur a fortissimo viro, atque optimo post hominum memoriam consule, ut provideamus, ne citerior Gallia nobis invitis alicui decernatur, post eos consules, qui nunc erunt designati; perpetuòque posthac ab iis, qui hunc ordinem oppugnent, populari ac turbulentâ ratione teneatur. Quam ego plagam etsi non contemno, Patres conscripti, præsertim monitus a sapientissimo consule, & diligentissimo custode pacis & otii,

tamen vehementius arbitror pertimescendum, si hominum clarissimorum ac potentissimorum aut honorem minuero, aut studium erga hunc ordinem repudiaro. Nam ut C. Julius omnibus a senatu eximiis, aut novis rebus ornatus, per manus hanc provinciam tradat ei, cui minime vos velitis; per quem ordinem ipse amplissimam sit gloriam consecutus, ei ne libertatem quidem relinquat, adduci ad suspicandum nullo modo possum. Postremo, quo quisque animo futurus sit, nescio; quid sperem video: præstare hoc senator debeo, quantum possum, ne quis vir clarus, aut potens, huic ordini jure irasci posse videatur. Atque hoc, si inimicissimus essem C. Cæsari, sentirem tamen reipublicæ causâ.

XVII. Sed non alienum esse arbitror, quod minus sæpe aut interpeller a nonnullis, aut tacitorum existimatione reprehendar, explicare breviter, quæ mihi sit ratio & causa cum Cæsare. Ac primum illud tempus familiaritatis & consuetudinis, quæ mihi cum illo, quæ fratri meo, quæ C. Varroni, consobрино nostro, ab omnium nostrum adolescentia fuit, prætermitto. Posteaquam sum penitus in rempublicam ingressus, ita diffensi ab illo, ut in disjunctione sententiæ conjuncti tamen amicitia maneremus.

41. Consul ille egit eas res, quarum me participem esse voluit; quibus ego si minus assentiebar, tamen illius mihi iudicium gratum esse debebat: me ille, ut quinqueviratum acciperem, rogavit; me in tribus sibi conjunctissimis consularibus esse voluit: mihi legationem, quam vellem, quanto cum honore vellem, detulit: quæ ego omnia non ingrato animo, sed obstinatione quadam sententiæ repudiavi: quàm sapienter non disputo; multis enim non probabo: constanter quidem, & fortiter certè: qui quum me firmissimis opibus contra scelus inimicorum munire, & populares impetus populari præsidio propulsare possem, quamvis excipere fortunam, subire vim atque injuriam malui, quàm aut a vestris sanctissimis mentibus dissidere, aut de meo statu declinare. Sed non is solum gratus debet esse, qui accipit beneficium, verum etiam is, cui potestas accipiendi fuit. Ego illa ornamenta, quibus ille me ornabat, decere me, & convenire iis rebus, quas gesseram, non putabam: illum quidem amico animo me habere eodem loco, quo principem civium, suum generum, sentiebam.

XVIII. Traduxit ad plebem inimicum meum; sive iratus mihi, quòd me secum ne beneficiis quidem videbat posse con-

jungi; sive exoratus. Ne hæc quidem fuit injuria: nam postea me, ut sibi essem legatus, non solum suasit, verum etiam rogavit. Ne id quidem accepi; non quod alienum meam dignitate arbitrarer, sed quod tantum reipublicæ sceleris impendere a consulibus proximis non suspicabar.

43. Ergo adhuc magis est mihi verendum, ne mea superbia in illius liberalitate, quam ne illius injuria in nostra amicitia reprehendatur. Ecce illa tempestas, caligo bonorum, & subita, atque improvisa formido, tenebræ reipublicæ, ruina, atque incendium civitatis: terror injectus Cæsari de ejus actis, metus cædis bonis omnibus; consulum scelus, cupiditas, egestas, audacia. Si non sum adjutus; non debuit: si desertus; sibi fortasse providit: si etiam oppugnatus, ut quidam aut putant, aut volunt; violata amicitia est, accepi injuriam, inimitus esse debui, non nego: sed, si idem ille tum me salvum esse voluit, quum vos me ut carissimum filium desiderabatis; & si vos iidem pertinere ad causam illam putabatis, voluntatem C. Cæsaris a salute mea non abhorrere; & si illius voluntatis generum ejus habeo testem, qui idem Italiam in municipiis, populum Romanum in con-

cione, vos, mei semper cupidissimos, in Capitolio, ad meam salutem incitavit: si denique Cn. Pompeius idem mihi testis de voluntate Cæsaris, & sponsor est illi de mea; nonne vobis videor & ultimi temporis recordatione, & proximi memoriâ, medium illud tristissimum tempus debere, si ex rerum naturâ non possem evellere, ex animo quidem certè excidere? Ego verò, si mihi non licet per aliquos ita gloriari, me dolorem atque inimicitias meas reipublicæ concessisse, quod magni cujusdam hominis, & persipientis videtur; utar hoc, quod non tam ad laudem adipiscendam, quàm ad vitandam vituperationem valet, hominem me esse gratum, & non modò tantis beneficiis, sed etiam mediocri hominum benevolentia commoveri.

XIX. A viris fortissimis, & de me optimè meritis quibusdam peto, ut, si ego illos meorum laborum & incommodorum participes esse nolui, ne illi me suarum inimiciarum socium velint esse, præsertim quum mihi iidem illi concesserint, ut etiam acta illa Cæsaris, quæ neque oppugnavi antea, neque defendi, meo jam jure possim defendere.

45. Nam summi civitatis viri, quorum ego consilio rempublicam conservavi, &

380 *DE PROVINCIIS*

quorum auctoritate illam conjunctionem Cæsaris defugi, Julias leges, & ceteras, illo consule, rogatas, jure latas negant: iidem illam proscriptionem capitis mei, contra salutem reipublicæ, sed salvis auspiciis rogatam esse dicebant. Itaque vir summâ auctoritate, summâ eloquentiâ, dixit graviter, casum illum meum funus esse reipublicæ, sed funus justum & indictum. Mihi ipsi omnino perhonorificum, discessum meum funus dici reipublicæ. Reliqua non reprehendo; sed mihi ad id, quod sentio, assumo: nam, si illud jure rogatum dicere ausi sunt, quod nullo exemplo fieri potuit, nullâ lege licuit, quia nemo de cœlo servarat; oblitine erant, tum, quum ille, qui id egerat, plebeius est lege curiatâ factus, dici de cœlo esse servatum? qui si plebeius omnino esse non potuit, quâ tribunus plebis potuit esse? & ,cujus tribunatus si ratus est, nihil est, quod irritum ex actis Cæsaris possit esse; ejus non solum tribunatus, sed etiam perniciosissimæ res, auspiciorum religione conservatâ, jure latæ videbuntur?

46. Quare aut vobis statuendum est, legem Æliam manere, legem Fufiam non esse abrogatam, non omnibus fastis legem ferri licere: quum lex feratur, de cœlo servari, obnuntiari, intercedi licere: cen-

forum iudicium , ac notionem , & illud morum severissimum magisterium , non esse nefariis legibus de civitate sublatum : si patricius tribunus plebis fuerit , contra leges sacratas ; si plebeius , contra auspicia fuisse : aut mihi concedant homines oportet , in rebus bonis non exquirere jura ea , quæ ipsi in perditis non exquirunt , præsertim quum ab illis aliquoties conditio C. Cæsari lata sit , ut easdem res alio modo ferret ; quâ conditione auspicia requirebant , leges comprobabant : in Clodio auspiorum ratio sit eadem , leges omnes sint everse ac perditæ civitatis.

XX. Extremum illud est. Ego , si essent inimiciæ mihi cum C. Cæsare , tamen hoc tempore reipublicæ consulere , inimicitias in aliud tempus reservare deberem : possem etiam summorum virorum exemplo inimicitias reipublicæ causâ deponere : sed , quum inimiciæ fuerint numquam ; opinio injuriæ beneficio sit extincta : sententiâ meâ , Patres conscripti , si dignitas agitur C. Cæsaris , homini tribuam : si honos quidam , senatûs concordia consulam : si auctoritas decretorum vestrorum , constantiam ordinis in eodem ornando imperatore servabo : si perpetua ratio Gallici belli , reipublicæ providebo : si aliquod meum privatum officium , me non ingra-

382 *DE PROV. CONSULARIBUS.*

tum esse præstabo. Atque hoc velim probare omnibus, Patres conscripti: sed levissimè feram, si fortè aut iis minùs probaro, qui meum inimicum, repugnante vestrà auctoritate, texerunt; aut iis, si qui meum cum inimico suo reditum in gratiam vituperabunt, quum ipsi & cum meo, & cum suo inimico in gratiam non dubitarint redire.





P R O

M A R C O C Æ L I O .

ORATIO TRIGESIMA QUINTA.

*M. Cælius Rufus eques Romanus ,
cujus exstat epistolarum liber ad
Ciceronem , adolescens pulcher ad-
spectu , & summo ingenio præditus ,
post damnatum C. Antonium con-
sularem , quem ipse de majestate ac-
cusaverat , factus est familiaris Clo-
diæ , uxoris quondam Metelli Ce-
leris , impudicæ matronæ , a qua
etiam pecuniam mutuam accepit.
Quum deinde accusaret Sempronium
Atratinum de ambitu , & absolu-
tum rursus in judicium retraheret ,
Clodia verò suspicaretur a Cælio si-
bi venenum paratum fuisse ; hæc
L. Atratino Sempronii filio persua-*

*sit , ut nomen Cælii deferret lege
Lutatiâ de vi , cum subscriptoribus
L. Herennio Balbo , & P. Clodio
quodam , non eo , qui frater Clo-
diæ , Ciceronis inimicissimus erat.
Defensum a M. Crasso Cælium ,
Cicero ipse hac oratione defendit
apud Cn. Domitium prætorem ,
Marcellino & Philippo coss. anno
Urbis 697. Cic. 51. FERRATIUS.
Ipse quoque Cælius egit causam
suam , auctore Quintiliano 11 , 1.
& Suetonio de claris Oratoribus.*

I. **S**I quis , Judices , fortè nunc adsit ,
ignarus legum , judiciorum , consuetudi-
nis nostræ : miretur profectò , quæ sit tanta
atrocitas hujusce causæ , quòd diebus festis
ludisque publicis , omnibus negotiis foren-
sibus intermissis , unum hoc judicium exer-
ceatur ; nec dubitet , quin tanti facinoris
reus arguatur , ut , eo neglecto , civitas
stare non possit. Idem , quum audiat esse
legem , quæ de seditiosis consceleratisque
civibus , qui armati senatum obsederint ,
magistratibus vim attulerint , rempublicam
oppugnarint , quotidie quæri jubeat : le-
gem non improbet ; crimen , quod ver-
setur

setur in iudicio, requirat: quum audiat, nullum facinus, nullam audaciam, nullam vim in iudicium vocari; sed adolescentem illustri ingenio, industriâ, gratiâ, accusari ab ejus filio, quem ipse in iudicium & vocet, & vocarit; oppugnari autem opibus meretriciis: Atratini illius pietatem non reprehendat, muliebrem libidinem comprimendam putet, vos laboriosos existimet, quibus otiosis ne in communi quidem otio liceat esse.

2. Etenim, si attendere diligenter, atque existimare verè de omni hac causa volueritis, sic constitueris, Iudices, nec censurum quemquam ad hanc accusationem fuisse, cui, utrum vellet, liceret; nec, quum descendisset, quidquam habiturum spei fuisse, nisi alicujus intolerabili libidine, & nimis acerbo odio niteretur. Sed ego Atratino, humanissimo atque optimo adolescenti, meo necessario, ignosco, qui habet excusationem vel pietatis, vel necessitatis, vel ætatis. Si voluit accusare; pietati tribuo: si iussus est; necessitati: si speravit aliquid; pueritiæ: ceteris non modò nihil ignoscendum, sed etiam acriter resistendum.

II. Ac mihi quidem videtur, Iudices, hic introitus defensionis adolescentiæ M. Cælii maximè convenire, ut ad ea, quæ accusatores, deformandi hujus causâ, de-

trahendæ spoliandæque dignitatis gratiâ dixerunt, primùm respondeam. Objectus est pater variè, quòd aut parum splendidus ipse, aut parum piè tractatus a filio diceretur. De dignitate Cœlius notis ac majoribus natu, etiam sine mea oratione, tacitus, faciliè ipse respondet: quibus autem, propter senectutem, quòd jam diu minus in foro nobiscum versatur, non æquè est cognitus; hi sic habeant: quæcumque in equite Romano dignitas esse possit, quæ certè potest esse maxima, eam semper in M. Cœlio habitam esse summam, hodieque haberi, non solùm a suis, sed etiam ab omnibus, quibus poterit aliqua de causa esse notus.

4. Equitis autem Romani esse filium, criminis loco poni ab accusatoribus, neque his judicantibus oportuit, neque defendentibus nobis. Nam, quod de pietate dixistis, est quidem ista nostra existimatio, sed judicium certè parentis: quid nos opinemur, audietis ex juratis: quid parentes sentiant, lacrymæ matris incredibilisque mœror, squalor patris & hæc præfens mœstitia, quam cernitis, luctusque declarat.

5. Nam, quod est objectum, municipibus esse adolescentem non probatum suis; nemini umquam præsentis Puteolani majores honores habuerunt, quàm absenti

M. Cœlio ; quē & absentem in amplissimum ordinem cooptarunt , & ea non petenti detulerunt , quæ multis petentibus denegarunt : iidemque nunc lectissimos viros , & nostri ordinis , & equites Romanos cum legatione ad hoc iudicium , & cum gravissima atque ornatissima laudatione miserunt. Videor mihi jecisse fundamenta defensionis meæ ; quæ firmissima sunt , si tituntur iudicio suorum : neque enim vobis satis commendata hujus ætas esse posset , si non modò parenti , tali viro , verum etiam municipio tam illustri ac tam gravi displiceret.

III. Equidem , ut ad me revertar , ab his fontibus profluxi ad hominum famam ; & meus hic forensis labor , vitæque ratio dimanavit ad existimationem hominum paulò latius commendatione ac iudicio meorum. Nam , quod objectum est de pudicitia , quodque omnium accusatorum non criminibus , sed vocibus maledictisque celebratum est , id nunquam tam acerbè feret M. Cœlius , ut eum pœniteat non deformem esse natum : sunt etenim ista maledicta pervulgata in omnes , quorum in adolescentia forma & species fuit liberalis. Sed aliud est maledicere , aliud accusare : accusatio crimen desiderat , rem ut definiat , hominem ut notet , argumento probet , teste confirmet : maledictio

autem nihil habet propositi, præter contumeliam; quæ si petulantius jactatur, convicium; si facetius, urbanitas nominatur.

7. Quam quidem partem accusationis admiratus sum, & molestè tuli potissimum esse Atratino datam: neque enim decebat, neque ætas illa postulabat, neque, id quod animadvertere poteratis, pudor patiebatur optimi adolescentis, in tali illum oratione versari. Vellem aliquis ex vobis robustioribus hunc maledicendi locum suscepisset: aliquantò liberius, & fortius, & magis more nostro refutaremus istam maledicendi licentiam. Tecum, Atratine, agam levius, quòd & pudor tuus moderatur orationi meæ; & meum erga te, parentemque tuum, beneficium tueri debeo.

8. Illud tamen te esse admonitum volo: primum, qualis es, talem te esse existimes; ut, quantum a rerum turpitudine abes, tantum te a verborum libertate sejungas: deinde, ut ea in alterum ne dicas, quæ quum tibi falsò responsa sint, erubescas. Quis est enim, cui via ista non pateat? qui isti ætati, atque etiam dignitati non possit quàm velit petulanter, etiam si sine ulla suspicione, at non sine argumento, maledicere? Sed istarum partium culpa est eorum, qui te agere vo-

luerunt : laus pudoris tui , quòd ea te invitum dicere videbamus ; ingenii ; quòd ornatè politèque dixisti .

IV. Verùm ad istam omnem orationem brevis est defensio ; nam quoad ætas M. Cœlii dare potuit isti suspicioni locum , fuit primùm ipsius pudore , deinde etiam patris diligentia disciplinæque munita : qui ut huic virilem togam dedit , nihil dicam hoc loco de me ; tantum sit , quantum vos existimatis : hoc dicam , hunc a patre continuò ad me esse deductum : nemo hunc M. Cœlium in illo ætatis flore vidit , nisi aut cum patre , aut mecum , aut in M. Crassi castissima domo , quum artibus honestissimis erudiretur .

10. Nam quòd Catilinæ familiaritas objecta Cœlio est , longè ab ista suspitione abhorreere debet . Hoc enim adolescente scitis consulatum mecum petisse Catilinam : ad quem si accessit , aut si a me discessit umquam (quamquam multi boni adolescentes illi homini nequam atque improbo studuerunt) tum existimetur Cœlius Catilinæ nimium familiaris fuisse . At enim postea scimus , & vidimus esse hunc in illius amicis . Quis negat ? sed ego illud tempus ætatis , quod ipsum suâ sponte infirmum , aliorum libidine infestum est , id hoc loco defendo . Fuit assiduus mecum , prætor me : non noverat Cati-

linam : Africam tum prætor ille obtinebat. Secutus est annus : causam de pecuniis repetundis Catilina dixit. Mecum erat hic : illi ne advocatus quidem venit umquam. Deinceps fuit annus , quo ego consulatum petivi : petebat Catilina mecum. Numquam ad illum accessit : a me numquam recessit.

V. Tot igitur annos versatus in foro sine suspitione, sine infamia, studuit Catilinæ iterum petenti. Quem ergo ad finem putas custodiendam illam ætatem fuisse ? Nobis quidem olim annus erat unus , ad cohibendum brachium togæ , constitutus ; & ut exercitatione ludoque campestri tunicati uteremur : eademque erat , si statim mereri stipendia cœperamus , castrens ratio ac militaris : qua in ætate , nisi qui se ipse suâ gravitate & castimoniâ , & quum disciplinâ domesticâ , tum etiam naturali quodam bono defenderat , quoquo modo a suis custoditus esset , tamen infamiam veram effugere non poterat. Sed qui prima illa imperia ætatis integra , atque inviolata præstitisset ; de ejus fama ac pudicitia , quum is jam se corroboravisset , ac vir inter viros esset , nemo loquebatur.

12. Studuit Catilinæ , quum jam aliquot annos esset in foro , Coelius ; & multi hoc idem ex omni ordine , atque ex

omni ætate fecerunt : habuit enim ille , sicuti meminisse vos arbitror , permulta maximarum non expressa signa , sed adumbrata virtutum : utebatur hominibus improbis multis ; & quidem optimis se viris deditum esse simulabat : erant apud illum illecebræ libidinum multæ ; erant etiã industriæ quidam stimuli , ac laboris : flagrabant vitia libidinis apud illum ; vigebant etiam studia rei militaris : neque ego umquam fuisse tale monstrum in terris ullum puto , tam ex contrariis , diversisque inter se pugnantibus naturæ studiis , cupiditatibusque conflatum.

VI. Quis clarioribus viris quodam tempore jucundior ? quis turpioribus conjunctior ? quis civis meliorum partium aliquando ? quis tetrior hostis huic civitati ? quis in voluptatibus inquinatio ? quis in laboribus patientior ? quis in rapacitate avarior ? quis in largitione effusior ? Illa verò , Judices , in illo homine mirabilia fuerunt , comprehendere multos amicitia , tueri obsequio , cum omnibus communicare quod habebat , servire temporibus suorum omnium pecuniâ , gratiâ , labore corporis , scelere etiam , si opus esset audaciâ : versare suam naturam & regere ad tempus , atque huc & illuc torquere , & flectere : cum tristibus severè , cum remissis jucundè , cum senibus graviter , cum juventute

comiter, cum facinorosis audaciter, cum libidinosè luxuriosè vivere.

14. Hac ille tam variâ, multipliceque naturâ, quum omnes omnibus ex terris homines improbos, audacesque collegerrat; tum etiam multos fortes viros, & bonos specie quadam virtutis assimilatae tenebat: neque umquam ex illo delendi hujus imperii tam consceleratus impetus exstitisset, nisi tot vitiorum tanta immanitas quibusdam facilitatis & patientiæ radicibus niteretur. Quare ista conditio, Judices, respuatur, nec Catilinæ familiaritatis crimen hæreat: est enim commune cum multis, & cum quibusdam etiam bonis. Me ipsum, me, inquam, quondam pene ille decepit, quum & civis mihi bonus, & optimi cujusque cupidus, & firmus amicus ac fidelis videretur: cujus ego facinora oculis priùs, quàm opinione, manibus antè, quàm suspicione, deprehendi: cujus in magnis catervis amicorum, si fuit etiam Cœlius, magis est, ut ipse molestè ferat errasse se, sicuti nonnumquam in eodem homine me quoque erroris mei pœnitet, quàm ut istius amicitiae crimen reformidet.

VII. Itaque a maledictis pudicitiae ad conjurationis invidiam oratio est vestra delapsa: posuistis enim, atque id tamen titubanter & strictim, conjurationis hunc,

propter amicitiam Catilinæ, participem fuisse: in quo non modò crimen non hærebat, sed vix disertis adolescentis cohærebat oratio. Qui enim tantus furor in Cœlio? quod tantum aut in moribus naturaque vulnus, aut in re atque fortuna? ubi denique est in ista suspitione Cœlii nomen auditum? Nimiùm multa de re minimè dubiâ loquor: hoc tamen dico, non modò si socius conjurationis, sed nisi inimicissimus istius sceleris fuisset, numquam conjurationis accusatione adolescentiam suam potissimùm commendare voluisset.

16. Quod, haud scio, an de ambitu & de criminibus, istis sodalium ac sequestrium (quoniam huc incidi) similiter respondendum putem: numquam enim tam Cœlius amens fuisset, ut, si se isto infinito ambitu commaculasset, ambitûs alterum accusaret; neque ejus facti in altero suspicionem quæreretur, cujus ipse sibi perpetuam licentiam optaret; nec, si sibi semel periculum ambitûs subeundum putaret, ipse alterum iterum ambitûs crimine arcesceret: quod quamquam nec sapienter & me invito facit, tamen est ejus omnino cupiditatis, ut magis insectari alterius innocentiam, quàm de se timidè cogitare videatur.

17. Nam quòd æs alienum objectum

R v

est, sumptus reprehensi, tabulæ flagitatæ; videte, quàm pauca respondeam. Tabulas, qui in patris potestate est, nullas conficit; versuram numquam omnino fecit ullam. Sumptus unius generis objectus est, habitationis: triginta millibus dixistis eum habitare. Nunc demum intelligo, P. Clodii insulam esse venalem, cujus hic in ædiculis habitet, decem, ut opinor, millibus. Vos autem, dum illi placere vultis, ad tempus ei mendacium vestrum accommodavistis.

18. Reprehendistis, a patre quòd semigrârit; quod quidem jam in hac ætate minimè reprehendendum est: qui quum & ex reipublicæ causa esset mihi quidem molestam, sibi tamen gloriosam victoriam consecutus, & per ætatem magistratus petere posset, non modò permittente patre, sed etiam suadente, ab eo semigravit: & quum domus patris a foro longè abesset, quò faciliùs & nostras obire domos, & ipse a suis coli posset, conduxit in Palatio non magno domum.

VIII. Quo loco possum dicere id, quod vir clarissimus, M. Crassus, quum de adventu regis Ptolemæi quereretur, paulò antè dixit: *Utinam ne in nemore Pelio.....* ac longiùs quidem mihi contexere hoc carmen liceret. *Nam numquam hera errans hanc molestiam nobis exhiberet, Medea*

animo agra, amore sævo faucia.... Sic enim, Indices, reperietis, quod, quum ad id loci venero, ostendam, hanc Palatinam Medeam, migrationemque huic adolescenti causam sive malorum omnium, sive potius sermonum fuisse.

19. Quamobrem illa, quæ ex accusatorum oratione præmuniri jam, & fingi intelligebam, fretus vestrâ prudentiâ, Indices, non pertimesco. Aiebant enim fore testem senatorem, qui se pontificiis comitiis pulsatum a Cœlio diceret: a quo quæram, si prodierit, primum cur statim nihil egerit: deinde, si id queri, quàm agere maluerit, cur productus a vobis potius, quàm ipse per se: cur tantò post potius, quàm continuò, queri maluerit. Si mihi ad hæc acutè, argutèque responderit, tum quæram denique, ex quo iste fonte senator emanet: nam si ipse orietur & nascetur ex sese, fortasse, ut soleo, commovebor: sin autem, ut rivulus, arcessitus & ductus ab ipso capite accusationis vestræ; lætabor, quum tantâ gratiâ tantisque opibus accusatio vestra nitatur, unum senatorem solum esse, qui vobis gratificari vellet, inventum.

20. Nec tamen illud genus alterum nocturnorum testium pertimesco: est enim dictum ab illis, fore qui dicerent, uxores suas, a cœna redeuntes, attrectatas esse

a Cœlio. Graves erunt homines, qui hoc jurati dicere audebunt; quum sit his confitendum, numquam se, ne congressu quidem, & constituto cœpisse de tantis injuriis experiri.

IX. Sed totum genus oppugnationis hujus, Judices, & jam prospicitis animis, &, quum inferetur, propulsare debebitis: non enim ab iisdem accusatur M. Cœlius, a quibus oppugnatur: palam in eum tela jaciuntur, clam subministrantur. Neque id ego dico, ut invidiosum sit in eos, quibus gloriosum hoc etiam esse debet: funguntur officio: defendunt suos: faciunt quod viri fortissimi solent: læsi dolent, irati efferuntur, pugnant lacesiti: sed vestræ sapientiæ tamen est, Judices, non, si causa justa est viris fortibus oppugnandi M. Cœlium, ideo vobis quoque vos causam putare esse justam alieno dolori potius, quàm vestræ fidei consulendi. Quæ sit multitudo in foro, quæ genera, quæ studia, quæ varietas hominum, videtis: ex hac copia quàm multos esse arbitramini, qui hominibus potentibus, gratio-sis, disertis, quum aliquid eos velle arbitrentur, ultro se offerre soleant, operam navare, testimonium polliceri?

22. Hoc ex genere si qui se in hoc judicium fortè projecerint, excluditote eorum cupiditatem, Judices, sapientiâ ves-

trâ : ut eodem tempore & hujus salutis, & religioni vestræ, & contra periculosissimas hominum potentias conditioni omnium civium providisse videamini. Equidem vos abducam a testibus ; neque hujus judicii veritatem, quæ mutari nullo modo potest, in voluntate testium collocari sinam ; quæ facillimè fingi, nullo negotio flecti ac detorqueri potest : argumentis agemus : signis omni luce clarioribus crimina refellemus : res cum re, causa cum causa, ratio cum ratione pugnabit.

X. Itaque illam partem causæ facilè patior graviter & ornatè a M. Crasso esse perorata, de seditionibus Neapolitanis, de Alexandrinorum pulsatione Puteolana, de bonis Pallæ. Vellem dictum esset ab eodem etiam de Dione : de quo ipso tamen quid est, quod expectetis ; quod is, qui fecit, aut non timet, aut etiam fatetur ? est enim reus, qui hujus dictus est & adjutor fuisse, & conscius, P. Ascitius ; is judicio est liberatus. Quod igitur est hujusmodi crimen, ut, qui commisit, non neget ; qui negavit, absolutus sit ; id hic pertimescat, qui non modò a facto, verum etiam a conscientie suspicione absuit ? &, si Ascitio causa plus profuit, quàm nocuit invidia, huic oberit tuum maledictum, qui istius facti non modò

suspicionem, sed ne infamiâ quidem est ad-
spersus?

24. At prævaricatione est Ascitius libe-
ratus. Perfacile est isti loco respondere,
mihi præsertim, a quo ista causa defensa
est. Sed Coelius optimam causam Ascitii
esse arbitratur; cuiusmodi autem sit, a sua
putat esse sejunctam: neque solum Cœ-
lius, sed etiam adolescentes humanissimi
& doctissimi, rectissimis studiis atque op-
timis artibus præditi, Titus Caiusque Co-
ponii, qui ex omnibus maximè Dionis
mortem doluerunt; qui quum doctrinæ
studio atque humanitatis, tum etiam hos-
pitio Dionis tenebantur. Habebat is apud
L. Lucceium, ut audistis: fuerat ei cogni-
tus Alexandria. Quid aut hic, aut summo
splendore præditus, frater ejus, de Mar-
co Cœlio existimet, ex ipsis, si producti
erunt, audietis. Ergo hæc removeantur,
ut aliquando, in quibus causa nititur, ad
ea veniamus.

XI. Animadverti enim, Judices, au-
diri a vobis meum familiarem, L. He-
rennium, perattentè: in quo etsi magna
ex parte ingenio ejus, & dicendi genere
quodam tenebamini; tamen nonnumquam
verebar, ne illa subtiliter ad criminandum
inducta oratio ad animos vestros fensim
ac leniter accideret: dixit enim multa de
luxuria, multa de libidine, multa de vi-

tis juventutis , multa de moribus ; & , qui in reliqua vita mitis esset , & in hac suavitate humanitatis , quâ prope jam delectantur homines , versari perjucundè so-
leret , fuit in hac causa pertristis quidam patruus , censor , magister : objurgavit M. Cœlium , sicut neminem umquam parens : multa de incontinentia , intemperantiaque differuit. Quid quæritis , Judices ? ignoscebam vobis attentè audientibus , propterea quòd egomet tam triste illud , & tam asperum genus orationis horrebam.

26. Ac prima pars fuit illa , quæ me minùs movebat , fuisse meo necessario Bestiæ Cœlium familiarem , cœnasse apud eum , ventitasse domum , studuisse præturæ. Non me hæc movent , quæ perspicuè falsa sunt : etenim eos unà cœnasse dicit , qui aut absunt , aut quibus necesse est idem dicere. Neque verò illud me commovet , quòd sibi in Lupercis sodalem esse Cœlium dixit. Fera quædam sodalitas , & planè pastoritia , atque agrestis germanorum Lupercorum ; quorum coitio illa silvestris antè est instituta , quàm humanitas atque leges ; si quidem non modò nomina deferunt inter se sodales , sed etiam commemorant sodalitatem in accusando , ut ne , si quis id fortè nesciat , timere videatur.

27. Sed hæc omittam : ad illa , quæ me magis moverunt , respondebo. Deliciarum objurgatio fuit longa , & ea lenior ; plusque disputationis habuit , quàm atrocitatis ; quò etiam audita est attentius. Nam P. Clodius , amicus meus , quum se gravissimè vehementissimèque jactaret , & omnia inflammatus ageret tristissimis verbis , voce maximâ ; tametsi probabam ejus eloquentiam , tamen non pertimecebam : aliquot enim in causis eum videram frustra litigantem. Tibi autem , Balbe , respondebo primùm precariò , si licet , si fas est defendi a me eum , qui nullum convivium renuerit , qui unguenta fumpserit , qui Baias viderit.

XII. Equidem multos & vidi in hac civitate , & audivi , non modò qui primoribus labris gustassent genus hoc vitæ , & extremis , ut dicitur , digitis attigissent , sed qui totam adolescentiam voluptatibus dedissent , emersisse aliquando , & se ad frugem bonam , ut dicitur , recepisse , gravesque homines atque illustres fuisse. Datur enim concessu omnium huic aliquis ludus ætati , & ipsa natura profundit adolescentiæ cupiditates : quæ si ita erumpunt , ut nullius vitam labefactent , nullius domum evertant , faciles & tolerabiles haberi solent.

29. Sed tu mihi videbare ex communi

infamia juventutis aliquam invidiam Cælio velle conflare. Itaque omne illud silentium, quod est orationi tributum tuæ, fuit ob eam causam, quòd uno reo proposito de multorum vitiis cogitabamus. Facile est accusare luxuriam: dies jam me deficiet, si, quæ dici in eam sententiam possunt, coner expromere: de corruptellis, de adulteriis, de protervitate, de sumptibus, immensa oratio est: ut tibi reum neminem, sed vitia proponas, res tamen ipsa & copiosè & graviter accusari potest. Sed vestræ sapientiæ est, Judices, non abduci ab reo: nec, quos aculeos habeat severitas gravitasque vestra, quum eos accusator erexerit in rem, in vitia, in mores, in tempora, emittere in hominem, & in reum; quum is non suo crimine, sed multorum vitio sit in quodam odium injustum vocatus.

30. Itaque severitati tuæ, ut oportet, ita respondere non audeo: erat enim meum, deprecari vacationem adolescentiæ, veniamque petere: non inquam, audeo: perfugiis non utor ætatis: concessa omnibus jura dimitto: tantum peto, ut, si qua est invidia communis hoc tempore æris alieni, petulantiae, libidinum juventutis, quam video esse magnam, ne huic aliena peccata, ne ætatis ac temporum vitia noceant. Atque ego idem, qui hæc

postulo, quin criminibus, quæ in hunc propriè conferuntur, diligentissimè respondeam, non recuso.

XIII. Sunt autem duo crimina, auri, & veneni; in quibus una atque eadem persona urgetur: aurum sumptum a Clodia; venenum quæsitum, quod Clodiæ daretur, dicitur: omnia sunt alia, non crimina, sed maledicta jurgii petulantis magis, quàm publicæ quæstionis. Adulter, impudicus, sequester, convicium est, non accusatio: nullum est enim fundamentum horum criminum, nulla sedes: voces sunt contumeliosæ, temerè ab irato accusatore, nullo auctore, emissæ.

31. Horum duorum criminum video fontem, video auctorem, video certum nomen, & caput. Auro opus fuit: sumpsit a Clodia, sumpsit sine teste, habuit quamdiu voluit: maximum video signum cujusdam egregiæ familiaritatis. Necare eamdem voluit, quæsivit venenum, sollicitavit quos potuit, paravit, locum constituit, attulit: magnum rursus odium video cum crudelissimo discidio exstitisse. Res est omnis in hac causa nobis; Judices, cum Clodiâ, muliere non solum nobili, sed etiam notâ: de qua ego nihil dicam, nisi depellendi criminis causâ.

32. Sed intelligis pro tua præstanti prudentia, Cn. Domiti, cum hac sola rem

esse nobis: quæ si se aurum Cœlio com-
modasse non dicit, si venenum ab hoc
sibi paratum esse non arguit; petulanter
facimus, si matrem familiâs secus, quàm
matronarum sanctitas postulat, nomina-
mus: sin, istâ muliere remotâ, nec cri-
men ullum, nec opes ad oppugnandum
Cœlium illis relinquentur; quid est aliud,
quod nos patroni facere debeamus, nisi
ut eos, qui insectantur, repellamus?
quod quidem facerem vehementius, nisi
intercederent mihi inimicitiae cum istius
mulieris viro: fratrem volui dicere; sem-
per hîc erro: nunc agam modicè, nec
longius progrediar, quàm me mea fides &
causa ipsa coget: neque enim muliebres
umquam inimicitias mihi gerendas putavi;
præsertim cum ea, quam omnes semper
amicam omnium potius, quàm cuiusquam
inimicam putaverunt.

XIV. Sed tamen ex ipsa quæram prius,
utrùm me secum severè, & graviter, &
priscè agere malit, an remissè, ac leniter,
& urbanè: si illo austero more ac modo,
aliquis mihi ab inferis excitandus est, ex
barbatis illis, non hac barbulâ, quâ ista
delectatur; sed illâ horridâ, quam in sta-
tuis antiquis & imaginibus videmus; qui
objurget mulierem, & pro me loquatur,
ne ista mihi fortè succenseat. Exsistat igitur
ex hac ipsa familia aliquis; ac potissi-

mum Cæcus ille : minimum enim dolorem capiet , qui istam non videbit : qui profectò , si exstiterit , sic aget & sic loquetur : Mulier , quid tibi cum Cœlio ? quid cum homine adolescentulo ? quid cum alieno ? cur aut tam familiaris huic fuisti , ut aurum commodares , aut tam inimica , ut venenum timeres ? non patrem tuum videras ? non patruum ? non avum , proavum , atavum audieras consules fuisse ?

34. Non denique modò te Q. Metelli matrimonium tenuisse sciebas , clarissimi ac fortissimi viri , patriæque amantissimi ? qui , simul ac pedem limine extulerat , omnes propè cives , virtute , gloriâ , dignitate superabat : cui quum ex amplissimo genere in familiam clarissimam nupsisses , cur tibi Cœlius tam conjunctus fuit ? cognatus ? affinis ? viri tui familiaris ? nihil horum : quid igitur fuit , nisi quædam temeritas ac libido ? Nonne te , si nostræ imagines viriles non commovebant , ne progenies quidem mea , Q. illa Claudia , æmulam domesticæ laudis in gloria muliebri esse admonebat ? non virgo illa Vestalis Claudia ; quæ patrem complexa triumphantem ab inimico tribuno plebis de curru detrahi passa non est ? cur te fraterna vitia potius , quàm bona paterna , & avita , & usque a nobis quum in viris , tum etiam in feminis repetita , moverunt ? ideone

ego pacem Pyrrhi diremi, ut tu amorum turpissimorum quotidie fœdera ferires? ideo aquam adduxi, ut eâ tu incestè uterere? ideo viam munivi, ut eam tu alienis viris comitata celebrares?

XV. Sed quid ego, Judices, ita gravem personam induxi, ut verear, ne se idem Appius repentè convertat, & Cœlium incipiat accusare illâ suâ gravitate censoriâ? Sed videro hoc posterius, atque ita, Judices, ut vel severissimis disceptatoribus M. Cœlii vitam me probaturum esse confidam. Tu verò mulier (jam enim ipse tecum nullâ personâ introductâ loquor) si ea, quæ facis, quæ dicis, quæ insimulas, quæ moliris, quæ arguis, probare cogitas; rationem tantæ familiaritatis, tantæ consuetudinis, tantæ conjunctionis reddas atque exponas necesse est. Accusatores quidem libidines, amores, adulteria, Baias, actas, convivia, comessationes, cantus, symphonias, navigia jactant; iidemque significant, nihil se, te invitâ, dicere: quæ tu, quoniam mente nescio quâ effrenatâ, atque præcipiti, in forum deferri judiciumque voluisti; aut diluas oportet, & falsa esse doceas, aut nihil neque crimini tuo, neque testimonio credendum esse fateare.

36. Sin autem urbanius me agere mavis, sic agam tecum: removebo illum se-

nem durum ac pene agrestem : ex his igitur tuis sumam aliquem , ac potissimum minimum fratrem , qui est in isto genere urbanissimus : qui te amat plurimum : qui , propter nescio quam , credo , timiditatem , & nocturnos quosdam inanes metus , tecum semper pusio cum majore sorore cubitavit : eum putato tecum loqui : Quid tumultuaris , soror ? quid insanis ? quid , clamore exorsa , verbis parvam rem magnam facis ? vicinum adolescentulum adspexisti : candor hujus te , & proceritas , vultus , oculique pepulerunt : sæpius videre voluisti : fuisti nonnumquam in iisdem hortis visa nobilis mulier : illum filium familiās patre parco ac tenaci , habere tuis copiis devinctum non potes : calcitrat , respuit , non putat tua dona esse tanti : confer te aliò : habes hortos ad Tiberim ; ac diligenter eo loco præparasti , quò omnis juvenus natandi causâ venit : hinc licet conditiones quotidie legas : cur huic , qui te spernit , molesta es ?

XVI. Redeo nunc ad te , Cœli , vicissim , ac mihi auctoritatem patriam , severitatemque suscipio : sed dubito quem patrem potissimum sumam ; Cæcilianumne aliquem , vehementem atque durum ? *Nunc enim demum mihi animus ardet , nunc meum cor cumulat irâ... Aut illum , O infelix , ô scelestè... Ferrei sunt isti patres...*

Egone quid dicam? egone quid velim? quæ tu omnia tuis fœdis fœlis facis, ut nequidquam velim. Vix ferenda diceret talis pater, Cur te in istam viciniam meretriciam contulisti? cur illecebris cognitis non refugisti? cur alienam ullam mulierem nosti? dide, ac dissice, per me licebit: si egebis, tibi dolebit: mihi sat est, quæ, ætatis quod reliquum est, oblectem meæ.

38. Huic tristi ac decrepito seni responderet Cælius, se nullâ cupiditate inductum de via decessisse. Quid signi? nulli sumptus, nulla jactura, nulla versura. At fuit fama. Quotus quisque istam effugere potest in tam maledica civitate? Vicinum ejus mulieris miraris malè audisse, cujus frater germanus sermones iniquorum effugere non potuit? Leni verò & clementi patri, cujusmodi ille est, *Fores effregit? restituentur: discidit vestem? resarciatur*, filii causa est expeditissima. Quid enim esset, in quo se non facilè defenderet? Nihil jam in istam mulierem dico: sed, si esset aliqua dissimilis istius, quæ se omnibus pervulgaret, quæ haberet palam decretum semper aliquem, cujus in hortos, domum, Baias, jure suo libidines omnium commearent: quæ etiam aleret adolescentes, & parcimoniam patrum suis sumptibus sustentaret: si vidua liberè, proterva petulanter, dives effusè, libidi-

nosa meretricio more viveret ; adulterum ego putarem , si quis hanc paulò liberius salutasset ?

XVII. Dicet aliquis , Hæc igitur est tua disciplina ? sic tu instituis adolescentes ? ob hanc causam tibi hunc puerum parens commendavit , & tradidit , ut in amore & voluptatibus adolescentiam suam collocaret ; & hanc tu vitam , atque hæc studia defenderes ? Ego , si qui , Judices , hoc robore animi , atque hac indole virtutis ac continentiae fuit , ut respueret omnes voluptates , omnemque vitæ suæ cursum in labore corporis , atque in animi contentione conficeret : quem non quies , non remissio , non æqualium studia , non ludi , non convivium delectarent : nihil in vita expetendum putaret , nisi quod esset cum laude & cum dignitate conjunctum : hunc meâ sententiâ divinis quibusdam bonis instructum , atque ornatum puto. Ex hoc genere illos fuisse arbitror , Camillos , Fabricios , Curios , omnesque eos , qui hæc ex minimis tanta fecerunt.

40. Verùm hæc genera virtutum non solum in moribus nostris , sed vix jam in libris reperiuntur : chartæ quoque , quæ illam pristinam severitatem continebant , obsoleverunt ; neque solum apud nos , qui hanc sectam rationemque vitæ re magis , quàm verbis secuti sumus , sed etiam
apud

apud Græcos, doctissimos homines, quibus, quum facere non possent, loqui tamen & scribere honestè & magnificè licebat. Alia quædam, mutatis Græciæ temporibus, præcepta exstiterunt.

41. Itaque alii voluptatis causâ omnia sapientes facere dixerunt; neque ab hac orationis turpitudine eruditi homines refugerunt: alii cum voluptate dignitatem conjungendam putaverunt, ut res maximè inter se repugnantes dicendi facultate conjungerent: illud unum directum iter ad laudem cum labore qui probaverunt, propè jam soli in scholis sunt relictî. Multa enim nobis blandimenta natura ipsa genuit, quibus sopita virtus conniveret; & interdum multas vias adolescentiæ lubricas ostendit, quibus illa insistere, aut ingredi sine casu aliquo, aut prolapsione vix posset; & multarum rerum jucundissimarum varietatem dedit, quâ non modò hæc ætas, sed etiam jam corroborata caperetur. Quamobrem si quem fortè inveniatis, qui aspernetur oculis pulchritudinem rerum, non odore ullo, non tactu, non sapore capiatur; excludat auribus omnem suavitatem; huic homini ego fortasse, & pauci deos propitios, plerique autem iratos putabunt.

XVIII. Ergo hæc deserta via, & inculta, atque interclusa jam frondibus &

virgultis relinquatur : detur aliquid ætati : sit adolescentia liberior : non omnia voluptatibus denegentur : non semper superet vera illa & directa ratio : vincat aliquando cupiditas , voluptasque rationem , dummodo illa in hoc genere præscriptio , moderatioque teneatur : parcat juvenus pudicitiaæ suæ , ne spoliet alienam : ne effundat patrimonium , ne fœnore trucidetur : ne incurrat in alterius domum atque famam : ne probrum castis , labem integris , infamiam bonis inferat : ne quem vi terreat : ne intersit insidiis : scelere careat : postremò , quum paruerit voluptatibus , dederit aliquid temporis ad ludum ætatis , atque ad inanes hæc adolescentiæ cupiditates ; revocet se aliquando ad curam rei domesticæ , rei forensis , rei publicæ : ut ea , quæ ratione antea non perspexerat , satietate abjecisse , experiendo contempsisse videatur.

43. Ac multi & nostrâ , & patrum , majorumque memoriâ , Judices , summi homines , & clarissimi cives fuerunt , quorum quum adolescentiæ cupiditates deferuissent , eximiæ virtutes , firmatâ jam ætate , exstiterunt : ex quibus neminem mihi necesse est nominare ; vosmet vobiscum recordamini : nolo enim cujusquam fortis atque illustris viri ne minimum quidem erratum cum maxima laude conjungere :

quod si facere vellem, multi a me summi atque ornatissimi viri prædicarentur; quorum partim nimia libertas in adolescentia, partim profusa luxuries, magnitudo æris alieni, sumptus, libidines, nominarentur: quæ multis postea virtutibus oblecta, adolescentiæ, qui vellet, excusatione defenderet.

. XIX. At verò in M. Cælio (dicam enim jam confidentiùs de studiis ejus honestis, quoniam audeo quædam, fretus vestrà sapientiâ, liberè confiteri) nulla luxuries reperietur, nulli sumptus, nullum æs alienum, nulla conviviorum ac lustrorum libido: quod quidem vitium ventris & gutturis non modò non minuit ætas hominibus, sed etiam auget. Amores autem, & hæc deliciæ quæ vocantur, quæ firmiore animo præditis diutius molestæ non solent esse (maturè enim & celeriter deflorescunt) numquàm hunc occupatum impeditumque tenuerunt.

45. Audistis, quum pro se diceret: audistis antea, quum accusaret (defendendi hæc causâ, non gloriandi loquor) genus orationis, facultatem, copiam sententiarum atque verborum, quæ vestra prudentia est, perspexistis. Atque in eo non solum ingenium elucere ejus videbatis; quod sæpe etiam si industriâ non alitur, valet tamen ipsum suis viribus: sed inerat, nisi

me propter benevolentiam fortè fallebat, ratio & bonis artibus instituta, & curâ & vigiliis elaborata. Atqui scitote, Judices, eas cupiditates, quæ objiciuntur Cœlio, atque hæc studia, de quibus disputo, non facilè in eodem homine esse posse. Fieri enim non potest, ut animus libidini deditus, amore, desiderio, cupiditate, sæpe nimiâ copiâ, inopiâ etiam nonnumquam impeditus, hoc, quidquid est, quod nos facimus in dicendo, non modò agendo, verùm etiam cogitando possit sustinere.

46. An vos aliam causam esse ullam putatis, cur, in tantis præmiis eloquentiæ, tanta voluptate dicendi, tanta laude, tanta gratia, tanto honore, tam sint pauci, semperque fuerint, qui in hoc labore versentur? obterendæ sunt omnes voluptates; relinquenda studia delectationis, Judices: ludus, jocus, convivium, sermo est pene familiarium deferendus: quæ res in hoc genere homines a labore, studioque dicendi deterret; non quò aut ingenia deficiant, aut doctrina puerilis.

47. An hic, si sese isti vitæ dedisset, consularem hominem admodum adolescens in judicium vocavisset? hic, si laborem fugeret, si obstrictus voluptatibus teneretur, in hac acie quotidie versaretur? appeteret inimicitias? in judicium vocaret? subiret periculum capitis? ipso in-

spectante populo Romano tot menses aut de salute, aut de gloria dimicaret?

XX. Nihil igitur illa vicinitas redolet? nihil hominum fama? nihil Baiæ denique ipsæ loquuntur? Illæ verò non loquuntur solum, verum etiam personant, huc unius mulieris libidinem esse prolapsam, ut ea non modò solitudinem ac tenebras, atque hæc flagitiorum integumenta non quærat, sed in turpissimis rebus frequentissimâ celebritate, & clarissimâ luce lætetur. Verum si quis est, qui etiam meretriciis amoribus interdictum juventuti putet; est ille quidem valde severus: negare non possum: sed abhorret non modò ab hujus seculi licentia, verum etiam a majorum consuetudine, atque concessis. Quando enim hoc factum non est? quando reprehensum? quando non permissum? quando denique fuit, ut, quod licet, non liceret? Hic ego jam rem definiam: mulierem nullam nominabo: tantum in medio relinquam.

49. Si qua non nupta mulier domum suam patefecerit omnium cupiditati, palamque sese in meretricia vita collocarit; virorum alienissimorum convivius uti instituerit; si hoc in urbe, si in hortis, si in Baiarum illa celebritate faciet; si denique ita sese geret, non incessu solum, sed ornatu, atque comitatu; non flagrantia ocu-

lorum , non libertate sermonis , sed etiam complexu , osculatione , aquis , navigatione , conviviis , ut non solum meretrix , sed etiam procax videatur : cum hac si quis adolescens fortè fuerit , utrùm hic tibi , L. Herenni , adulter , an amator ; expugnare pudicitiam , an explere libidinem voluisse videatur ?

50. Obliviscor jam injurias , Clodia ; depono memoriam doloris mei : quæ abs te crudeliter in meos , me absente , facta sunt , negligo : ne sint hæc in te dicta , quæ dixi : sed ex te ipsa requiro , quoniam & crimen accusatores abs te , & testem ejus criminis te ipsam dicunt se habere : si qua mulier sit hujusmodi , qualem ego paulò antè descripsi , tui dissimilis , vitâ , institutoque meretricio ; cum hac aliquid adolescentem hominem habuisse rationis , num tibi perturpe aut perflagitiosum esse videatur ? Ea si tu non es , sicut ego malo , quid est , quod objiciant Cœlio ? sin eam te volunt esse , quid est , cur nos crimen hoc , si tu contemnis , pertimescamus ? Quare nobis da viam , rationemque defensionis : nam aut pudor tuus defendet , nihil a M. Cœlio petulantius esse factum ; aut impudentia & huic , & ceteris magnam ad se defendendum facultatem dabit.

XXI. Sed quoniam emersisse jam e

vadis , & scopulos præterveſta videtur oratio mea , perfacilis mihi reliquus curſus ostenditur. Duo ſunt enim crimina una in muliere ſummorum facinorum : auri , quod ſumptum a Clodia dicitur ; & veneni ; quod ejuſdem Clodiæ necandæ cauſâ paſſe Cœlium criminantur. Aurum ſumpsit , ut dicitis , quod L. Luceii ſervis daret , per quos Alexandrinus Dio , qui tum apud Luceium habitabat , necaretur : magnum crimen vel in legatis inſidiandis , vel in ſervis ad hoſpitem domi necandum ſollicitandis : plenum ſcleris conſilium , plenum audaciæ.

52. Quo quidem in crimine primum illud requiram , dixeritne Clodiæ , quam ad rem aurum tum ſumeret , an non dixerit : ſi non dixit , cur dedit ? ſi dixit , eodem ſe conſcientiæ ſcelere devinxit. Tunc aurum ex armario tuo promere auſa eſ ? tunc Venerem illam tuam ſpoliatricem ſpoliare ornamentis ? Ceterum , quum ſcires , quantum ad facinus aurum hoc quæreretur , ad necem legati , ad L. Luceii , ſanctiſſimi hominis atque integerimi , labem ſcleris ſempiterni ; huic facinori tanto tua mens liberalis conſcia , tua domus popularis miniſtra , tua denique hoſpitalis illa Venus adjutrix eſſe non debuit.

53. Vidit hoc Balbus : celatam eſſe

Clodiam dixit, atque ita Coelium ad illam attulisse, se ad ornatum ludorum aurum quærere. Si tam familiaris erat Clodiæ; quàm tu esse vis, quum de libidine ejus tam multa dicis, dixit profectò, quò vellet aurum: si tam familiaris non erat, non dedit. Ita si verum tibi Coelius dixit, ô immoderata mulier, sciens tu aurum ad facinus dedisti: si non est ausus dicere; non dedisti.

XXII. Quid ego nunc argumentis huic crimini, quæ sunt innumerabilia, resistam? possum dicere, mores M. Coelii longissimè a tanti sceleris atrocitate esse disjunctos; minimè esse credendum, homini tam ingenioso tamque prudenti non venisse in mentem, rem tanti sceleris ignotis alienisque servis non esse credendam: possum etiam illa & ceterorum patronorum, & meâ consuetudine, ab accusatore perquirere, ubi sit congressus cum servis Luceii Coelius: qui ei fuerit aditus: si per se, quâ temeritate? si per alium, per quem? possum omnes latebras suspicionum peragrarè dicendo: non causa, non locus, non facultas, non conscius, non perficiendi, non occultandi maleficii spes, non ratio ulla, non vestigium maximi facinoris reperietur.

§4. Sed hæc, quæ sunt oratoris pro-

pria ; quæ mihi non propter ingenium meum , sed propter hanc exercitationem usumque dicendi fructum aliquem ferre potuissent , quum a me ipso laborata proferri viderentur , brevitatis causâ relinquo omnia : habeo enim , Iudices , quem vos socium vestræ religionis jurisque jurandi facile esse patiamini , L. Luceium , sanctissimum hominem & gravissimum testem : qui tantum facinus in famam , atque fortunas suas , neque non audisset illatum a Cœlio , neque neglexisset , neque tulisset. An ille vir , illâ humanitate præditus , illis studiis , artibus , atque doctrinâ , illius ipsius periculum , quem propter hæc ipsa studia diligebat , negligere potuisset ? & , quod facinus in alienum hominem illatum severè acciperet , id omisisset curare in hospite ? quod per ignotos actum quum comperisset , doleret , id a suis tentatum esse negligeret ? quod in agris locisve publicis factum reprehenderet , id in urbe , ac suæ domi cœptum esse leviter ferret ? quod in alicujus agrestis periculo non prætermitteret , id homo eruditus in insidiis doctissimi hominis dissimulandum putaret ?

55. Sed cur diutius vos , Iudices , teneo ? ipsius jurati religionem , auctoritatemque percipite , atque omnia diligenter

testimonii verba cognoscite. Recita testimonium Luceii. TESTIMONIUM LUCEII. Quid exspectatis amplius ? an aliquam vocem putatis ipsam pro se causam, & veritatem posse mittere ? hæc est innocentiae defensio, hæc ipsius causæ oratio, hæc una vox veritatis. In crimine ipso nulla suspicio est, & in re nihil est argumenti: in negotio, quod actum esse dicitur, nullum vestigium sermonis, loci, temporis: nemo testis, nemo conscius nominatur: totum crimen profertur ex inimica, ex infami, ex crudeli, ex facinorosa, ex libidinosa domo: domus autem illa, quæ tentata scelere isto nefario dicitur, plena est integritatis, officii, religionis; ex qua domo recitatur vobis jurejurando devincta auctoritas: ut res minimè dubitanda in contentione ponatur, utrùm temeraria, procax, irata mulier finxisse crimen, an gravis, sapiens, moderatusque vir religiosè testimonium dixisse videatur.

XXIII. Reliquum est igitur crimen de veneno; cujus ego neque principium invenire, neque evolvere exitum possum. Quæ fuit enim causa, quamobrem isti mulieri venenum vellet dare Cœlius? ne aurum redderet? num petivit? ne crimen hæreret? num quis objecit? num quis de-

nique fecisset mentionem, si hic nemini nomen detulisset? Quin etiam Herennium dicere audistis, verbo se molestum non futurum fuisse Cælio, nisi iterum eadem de re suo familiari absoluto nomen hic detulisset. Credibile est igitur, tantum facinus nullam ob causam esse commissum? & vos non videtis fingi sceleris maximi crimen, ut alterius causa sceleris suscipiendi fuisse videatur?

57. Cui denique commisit? quo adjutore usus est? quo socio? quo conscio? cui tantum facinus, cui se, cui salutem suam credidit? servisne mulieris? sic enim objectum est. Et erat tam demens hic, cui vos ingenium certè tribuitis, etiam si cetera inimicâ oratione detrahitis, ut omnes suas fortunas alienis servis committeret? At quibus servis? refert enim magnopere idipsum: hisne, quos intelligebat non communi conditione servitutis uti, sed licentiùs, liberiùs, familiariùs cum domina vivere? quis enim hoc non videt, Judices? aut quis hoc ignorat, in ejusmodi domo, in qua materfamiliâs meretricio more vivat; in qua nihil geratur, quod foras proferendum sit; in qua lustra, libidines, luxuries, omnia denique inaudita vitia, atque flagitia versentur; hîc servos, non esse servos? quibus omnia

committantur, per quos gerantur, qui versentur iisdem in voluptatibus; quibus occulta credantur, ad quos aliquantum etiam ex quotidianis sumptibus ac luxuriâ redundet? Id igitur Cœlius non videbat? si enim tam familiaris erat mulieris, quàm vos vultis, istos quoque servos familiares esse dominæ sciebat; sin ei tanta confuetudo, quantâ a vobis inducitur, non erat; quæ cum servis potuit familiaritas esse tanta?

XXIV. Ipsius autem veneni quæ ratio fingitur? ubi quæsitum est? quemadmodum paratum? quo pacto? cuius quo in loco traditum? Habuisse aiunt domi, vimque ejus esse expertum in servo quodam; ad rem ipsam parato; cujus perceleri interitu esse ab hoc comprobatum venenum.

59. Proh dii immortales! cur interdum in hominum sceleribus maximis aut connivetur, aut præsentis fraudis poenas in diem reservatis? Vidi enim, vidi, & illum hausi dolorem vel acerbissimum in vita, quum Q. Metellus abstraheretur e sinu gremioque patriæ; quumque ille vir, qui se natum huic imperio putavit, tertio die post, quàm in curia; quàm in Rostris, quàm in republica florisset, integerrimâ ætate, optimo habitu, maximis viribus, eriperetur indignissimè bonis omnibus,

atque universæ civitati : quo quidem tempore ille moriens , quum jam ceteris ex partibus oppressa mens esset , extremum sensum ad memoriam reipublicæ revocabat : quum me intuens flentem significabat interruptis atque morientibus vocibus , quanta impenderet procella urbi , quanta tempestas civitati : & quum parietem sæpe feriens eum , qui cum Q. Catulo fuerat ei communis ; crebrò Catulum , sæpè me , sæpissimè rempublicam nominabat : ut non tam se emori , quàm spoliari suo præsidio quum patriam , tum etiam me doleret.

60. Quem quidem virum si nulla vis repentini sceleris sustulisset ; quonam modo ille furenti fratri suo patrueli consularis restitisset ; qui consul incipientem furere , atque conantem , suâ se manu interfecturum , audiente senatu , dixerit ? Ex hac igitur domo progressa ista mulier , de veneni celeritate dicere audebit ? nonne ipsam domum metuet , ne quam vocem eliciat ? non parietes conscios , non noctem illam funestam ac luctuosam perhorrescet ? Sed revertar ad crimen : etenim hæc facta illius clarissimi ac fortissimi viri mentio , & vocem meam fletu debilitavit , & mentem dolore impedivit.

XXV. Sed tamen venenum unde fue-

rit, quemadmodum paratum sit, non dicitur. Datum esse hoc aiunt P. Licinio, pudenti adolescenti & bono, Coelii familiari: constitutum factum esse cum servis, ut venirent ad balneas Senias: eodem Licinium esse venturum, atque iis veneni pyxidem traditurum. Hic primum illud requiro; quid attinuerit illud ferri in eum locum constitutum: cur illi servi non ad Coelium domum venerint: si manebat tanta illa consuetudo Coelii cum Clodia, tantaque familiaritas; quid suspicionis esset, si apud Coelium mulieris servus visus esset? sin autem jam suberat simultas, extincta erat consuetudo, discidium existerat; hinc illæ lacrymæ nimirum, & hæc causa est horum omnium scelerum, atque criminum. Immo, inquit, quum servi ad dominam rem istam & maleficium Coelii detulissent, mulier ingeniosa præcepit suis, ut omnia Coelio pollicerentur: sed, ut venenum, quum a Licinio traderetur, manifestò comprehendi posset, constitui locum jussit, balneas Senias, ut eò mitteret amicos, qui delitescerent: deinde repente, quum venisset Licinius, ut venenum traderet, prosilirent, hominemque comprehenderent.

XXVI. Quæ quidem omnia, Judices, perfacilem rationem habent reprehenden-

di. Cur enim balneas publicas potissimum constituerat? in quibus non invenio, quæ latebra togatis hominibus esse possit. Nam, si essent in vestibulo balnearum, non laterent: sin se in intimum conjicere velent; nec satis commodè calceati & vestiti id facere possent, & fortasse non reciperentur, nisi fortè mulier potens quadrantiâ illâ permutatione familiaris facta erat balneatori.

63. Atque equidem vehementer expectabam, quinam isti viri boni, testes hujus manifestò deprehensi veneni dicerentur: nulli enim sunt adhuc nominati. Sed non dubito, quin sint pergraves, qui primùm sint talis feminæ familiares; deinde eam provinciam susceperint, ut in balneas contruderentur; quod illa, nisi a viris honestissimis ac plenissimis dignitatis, quàm velit sit potens, numquam impetravisset. Sed quid ego de dignitate istorum testium loquor? virtutem eorum, diligentiamque cognoscite. In balneis delituerunt: testes egregios! deinde temerè prosiluerunt: homines gravitati deditos! sic enim fingunt, quum Licinius venisset, pyxidem teneret in manu, conaretur tradere, nondum tradidisset, tum repentè evolasse istos præclaros testes sine nomine: Licinium autem, quum jam manum

ad tradendam pyxidem porrexisset, retraxisset, atque illo repentino hominum impetu se in fugam coniecisset. O magna vis veritatis, quæ contra hominum ingenia, calliditatem, solertiam, contraque fictas omnium insidias, facile se per se ipsa defendat!

XXVII. Verùm hæc tota fabella veteris, & plurimarum fabularum poëtriæ, quàm est sine argumento? quàm nullum invenire exitum potest? Quid enim isti tot viri (nam necesse est fuisse non paucos, ut & comprehendi Licinius facile posset, & res multorum oculis esset testatior) cur Licinium de manibus emiserunt? qui minùs enim Licinius comprehendi potuit, quum se retraxit, ne pyxidem traderet, quàm si tradidisset? erant enim illi positi, ut comprehenderent Licinium; ut manifestò Licinius teneretur, aut quum retineret venenum, aut quum tradidisset. Hoc fuit totum consilium mulieris, hæc istorum provincia, qui rogati sunt: quos quidem tu quamobrem temerè prosiluisse dicas, atque ante tempus, non reperio: fuerant hoc rogati: fuerant ad hanc rem collocati, ut venenum, ut insidiæ, facinus denique ipsum ut manifestò comprehenderetur.

65. Potueruntne meliori tempore prosilire, quàm quum Licinius venisset? quum in

manu teneret veneni pyxidem? quæ si quum jam erat tradita servis, evasissent subito ex balneis mulieris amici, Liciniumque comprehendissent; imploraret hominum fidem, atque a se illam pyxidem traditam pernegaret: quem quomodo illi reprehenderent? vidisse se dicerent? primum ad se revocarent maximi facinoris crimen: deinde id se vidisse dicerent, quod, quo loco collocati fuerant, non potuissent videre. Tempore igitur ipso se ostenderunt, quum Licinius venisset, pyxidem expediret, manum porrigeret, venenum traderet. Mimi ergo est jam exitus, non fabulæ: in quo quum clausula non invenitur, fugit aliquis e manibus; deinde scabilla concrepant, aulæum tollitur.

XXVIII. Quæro enim, cur Licinium titubantem, hæsitantem, cedentem, fugere conantem, mulieraria manus ista de manibus emiserit: cur non comprehendierint: cur non ipsius confessione, multorum oculis, facinoris denique voce, tanti sceleris crimen expresserint? an timebant, ne tot unum, valentes imbecillum, alacres perterritum superare non possent? Nullum argumentum in re, nulla suspicio in causa, nullus exitus criminis reperietur. Itaque hæc causa, ab argumentis, a conjectura, ab iis signis, quibus veritas illustrari solet, ad

testes tota traducta est : quos quidem ego testes , Judices , non modò sine ullo timore , sed etiam cum aliqua spe delectationis exspecto.

67. Prægestit animus jam videre , primùm lautos juvenes , mulieris beatæ ac nobilis familiares ; deinde fortes viros , ab imperatrice in insidiis atque in præsidio balnearum locatos ; ex quibus requiram , quonam modo latuerint , aut ubi : alveusne ille , an equus Trojanus fuerit , qui tot invictos viros , muliebri bellum gerentes , tulerit , ac texerit. Illud verò respondere cogam , cur tot viri ac tales hunc & unum & tam imbecillum , quàm videtis , non aut stantem comprehenderint , aut fugientem consecuti sint : qui se numquam profectò , si istum in locum processerint , explicabunt ; quàm volent in conviviiis faceti , dicaces , nonnumquam etiam ad vinum disertum sint. Alia fori vis est , alia triclinii : alia subselliorum ratio , alia lectorum : non idem judicum , comessatorumque conspectus : lux denique longè alia est solis , & lychnorum. Quamobrem excutiemus omnes istorum delicias , omnes ineptias , si prodierint. Sed , si me audiant , navent aliam operam , aliam ineant gratiam , in aliis se rebus ostendent : vigeant apud istam mulierem venustate : dominen-

tur sumptibus : hæreant , jaceant , deser-
viant : capiti verò innocentis , & fortunis
parcant.

XXIX. At sunt servi illi de cognatorum
sententia , nobilissimorum & clarissimorum
hominum , manumissi. Tandem aliquid in-
venimus , quod ista mulier de suorum pro-
pinquorum , fortissimorum virorum , sen-
tentiâ , atque auctoritate fecisse videatur.
Sed scire cupio , quid habeat argumenti ista
manumissio ; in qua aut crimen est Cœlio
quæsitum , aut quæstio sublata , aut mul-
tarum rerum consciis servis cum causa
præmium persolutum.

69. At propinquis placuit : cur non place-
ret , quum rem tute ad eos non ab aliis tibi
allatam , sed a te ipsa compertam , deferre
diceres ? Hic etiam miramur , si illam com-
mentitiam pyxidem obscoenissima sit fabula
consecuta ? Nihil est , quod in ejusmodi
mulierem non cadere videatur. Audita ,
& percelebrata sermonibus res est : per-
cipitis animis , Judices , jamdudum quid
velim , vel potius , quid nolim dicere :
quod etiam si est factum , certè a Cœlio
non est factum. Quid enim attinebat ? Est
enim ab aliquo fortasse adolescente , non
tam insulso , quàm non verecundo : sin
autem est fictum ; non illud quidem mo-
destum , sed tamen est non inficetum men-

dacium : quod profectò numquam hominum sermo atque opinio comprobasset , nisi omnia , quæ cum turpitudine aliqua dicerentur , in istam quadrare aptè viderentur.

70. Dicta est a me causa , Judices , & perorata. Jam intelligitis , quantum iudicium sustineatis , quanta res sit commissæ vobis. De vi quæritis ; quæ lex ad imperium , ad maiestatem , ad statum patriæ , ad salutem omnium pertinet : quam legem Q. Catulus armatâ dissensione civium , reipublicæ pene extremis temporibus tulit : quæque lex , sedatâ illâ flammâ consulatûs mei , fumantis reliquias conjurationis exstinxit. Hac enim lege Cœlii adolescentia non ad reipublicæ pœnas , sed ad mulieris libidines & delicias deposcitur.

XXX. Atque hoc etiam loco M. Camurti , & C. Eferni damnatio prædicatur. O stultitiamne dicam , an impudentiam singularem ! audetisne , quum ab ea muliere veniatis , facere istorum hominum mentionem ? audetisne excitare tanti flagitii memoriam , non exstinctam illam quidem , sed repressam vetustate ? quo enim illi crimine , peccatoque perierunt ? nempe quòd ejusdem mulieris dolorem , & injuriam Vectiano nefario sunt stupro persecuti. Ergo , ut audiretur Vectii nomen in

causa, ut illa vetus Afrania fabula refrigeretur, idcirco Camurti, & Eserni causa est renovata? qui quamquam lege de vi certè non tenēbantur, eo maleficio tamen erant implicati, ut ex nullius legis laqueis emittendi viderentur.

72. M. verò Cælius cur in hoc iudicium vocatur? cui neque proprium quæstionis crimen obijcitur, nec verò aliquid ejusmodi, quod sit a lege sejunctum, & cum vestra severitate conjunctum: cujus prima ætas dedita disciplinis fuit, iisque artibus, quibus instruimur ad hunc usum forensem; ad capeffendam rempublicam, ad honorem, gloriam, dignitatem: iis autem fuit amicitiiis majorum natu, quorum imitari industriam, continentiamque maximè velit; iis æqualium studiis, ut eundem, quem optimi ac nobilissimi, petere cursum laudis videretur.

73. Quum autem paulum jam roboris accessisset ætati, in Africam profectus est, Q. Pompeio proconsuli contubernalis, castissimo viro, atque omnis officii diligentissimo: in qua provincia quum res erant & possessiones paternæ, tum etiam usus quidam provincialis, non sine causa a majoribus huic ætati tributus: discessit illinc Pompeii iudicio probatissimus, ut ipsius testimonio cognoscetis: voluit vetere instituto,

eorum adolescentium exemplo, qui pòst in civitate summi viri & clarissimi cives exstiterunt, industriam suam a populo Romano ex aliqua illustri accusatione cognosci.

XXXI. Vellem aliò potiùs eum cupiditas gloriæ detulisset : sed abiit hujus tempus querelæ. Accusavit C. Antonium, collegam meum ; cui misero præclari in rempublicam beneficii memoria nihil profuit, nocuit opinio maleficii cogitati. Postea nemini concessit æqualium, plus ut in foro, plus ut in negotiis versaretur, causisque amicorum, plus ut valeret inter suos gratiâ : quæ nisi vigilantes homines, nisi sobrii, nisi industrii, consequi non possunt, omnia labore & diligentia est consecutus.

75. In hoc flexu quasi ætatis (nihil enim occultabo, fretus humanitate ac sapientiâ vestrâ) fama adolescentis paulùm hæsit ad metas notitiâ novâ mulieris, & infelici vicinitate, & insolentiâ voluptatum ; quæ quum inclusæ diutius, & primâ ætate compressæ, & constrictæ fuerunt, subitò se nonnumquam profundunt, atque ejiciunt universæ : qua ex vita, vel dicam, quo ex sermone (nequaquam enim tantum erat, quantum homines loquebantur) verùm ex eo, quidquid erat, emerfit, totumque se ejecit, atque extulit ; tantumque abest ab illius familiaritatis infamia, ut ejusdem

nunc ab sese inimicitias, odiumque propulset.

76. Atque ut iste interpositus sermo deliciarum, desidiæque moreretur (fecit me mehercule invito, & multum repugnante, sed tamen fecit) nomen amici mei de ambitu detulit; quem absolutum insequitur, revocat: nemini nostrum obtemperat: est violentior, quam veilem. Sed ego non loquor de sapientia, quæ non cadit in hanc ætatem: de impetu animi loquor, de cupiditate vincendi, de ardore mentis ad gloriam; quæ studia in his jam ætatibus nostris contractiora esse debent; in adolescentia verò, tamquam in herbis, significant, quæ virtutis maturitas, & quantæ fruges industriæ sint futuræ. Etenim semper magno ingenio adolescentes refrenandi potius a gloria, quam incitandi fuerunt: amputanda plura sunt illi ætati, siquidem efflorescit ingenii laudibus, quam inferenda. Quare, si cui nimium effervisse videtur hujus vel in suscipiendis, vel in gerendis inimicitiis vis, ferocitas, pertinacia: si quem etiam minimorum horum aliquid offendit, si purpuræ genus, si amicorum catervæ, si splendor, si nitor: jam ista deferrent; jam ætas omnia, jam ista dies mitigarit.

XXXII. Conservate igitur reipublicæ,

Judices, civem bonarum artium, bonarum partium, bonorum virorum. Promitto hoc vobis, & reipublicæ spondeo, si modò nos ipsi reipublicæ satisfecimus, numquam hunc a nostris rationibus sejunctum fore: quod quum fretus nostrâ familiaritate promitto, tum quòd durissimis se ipse legibus jam obligarit. Neque enim potest, qui hominem consularem, quòd ab eo rempublicam violatam diceret, in judicium vocarit, ipse esse in republica civis turbulentus: non potest, qui ambitu ne absolutum quidem patitur esse absolutum, ipse impunè umquam esse largitor. Habet a M. Cœlio respublica, Judices, duas accusationes, vel obsides periculi, vel pignora voluntatis.

78. Quare oro, obtestorque vos, Judices, ut qua in civitate paucis his diebus Sex. Clodius absolutus sit, quem vos per biennium aut ministrum seditionis, aut ducem vidistis: qui ædificas sacras, qui censum populi Romani, qui memoriam publicam suis manibus incendit, hominem sine re, sine fide, sine spe, sine fede, sine fortunis: ore, linguâ, manu, vitâ quæ omni inquinatum: qui Catuli monumentum afflixit, meam domum diruit, mei fratris incendit: qui in Palatio, atque in urbis oculis servitia ad cædem, & inflammandam urbem incitavit:

incitavit : in ea civitate ne patiamini illum absolutum muliebri gratiâ ; M. Cœlium , libidini muliebri condonatum : ne eadem mulier cum suo conjuge , & fratre turpissimum latronem eripuisse , & honestissimum adolescentem oppressisse videatur.

79. Quodd quum hujus vobis adolescentiam proposueritis , constituitote vobis ante oculos etiam hujus miseri senectutem , qui hoc unico filio nititur , in hujus spe requiescit , hujus unius casum pertimescit : quem vos supplicem vestræ misericordiæ , servum potestatis , abjectum non tam ad pedes , quàm ad mores , sensusque vestros , vel recordatione parentum vestrorum , vel liberorum jucunditate sustentate ; ut in alterius dolore , vel pietati , vel indulgentiæ vestræ serviatis. Nolite , Judices , aut hunc jam naturâ ipsâ occidentem , velle maturius exstingui vulnere vestro , quàm suo fato ; aut hunc nunc primùm florentem , firmatâ jam stirpe virtutis , tamquam turbine aliquo , aut subitâ tempestate pervertere.

80. Conservate parenti filium , parentem filio ; ne aut senectutem jam propè desperatam contempsisse , aut adolescentiam plenam spei maximæ , non modò non aluisse vos , sed etiam perculisse , atque afflixisse videamini. Quem si vobis , si suis,

434 *ORATIO PRO M. CÆLIO.*

si reipublicæ conservatis, addictum, deditum, obstrictum vobis, ac liberis vestris habebitis ; omniumque hujus nervorum, ac laborum vos potissimum, Judices, fructus uberes, diuturnosque capietis.





I N

L. CALPURNIUM PISONEM.
ORATIO TRIGESIMA SEXTA.

Quum revocati essent ex provinciis Piso & Gabinius sententiâ Ciceronis, quam anno superiore dixerat de Provinciis consularibus; reversus in civitatem Piso. de insectatione Ciceronis in senatu conquestus est, & in eum invectus, fiduciâ maximè Cæsaris generi, qui tum Gallias obtinebat. Pisoni Cicero respondit hac oratione, quam loco sententiæ habuit in senatu, anno Urbis 698. Ciceronis 52. Cneio Pompeio II. M. Crasso II. cons.
ASCONIUS.

T ij

Deest principium.

I. **J**AMNE vides , bellua , jamne sentis , quæ sit hominum querela frontis tuæ ? nemo queritur , Syrum nescio quem de grege novitiorum , factum esse consulem : non enim nos color iste servilis , non pilosæ genæ , non dentes putridi deceperunt : oculi , supercilia , frons , vultus denique totus , qui sermo quidam tacitus mentis est , hic in fraudem homines impulit : hic eos , quibus eras ignotus , decepit , fefellit , induxit. Pauci ista tua lutulenta vitia noveramus ; pauci tarditatem ingenii , stuporem , debilitatemque linguæ : numquam erat audita vox in foro : numquam periculum factum consilii : nullo non modò illustre , sed ne notum quidem factum aut militiæ , aut domi : obrepisti ad honores errore hominum , commendatione fumosarum imaginum ; quarum simile habes nihil , præter colorem.

2. Is mihi etiam gloriabitur , se omnes magistratus sine repulsa affecutum ? mihi ista licet de me vera cum gloria prædicare : omnes enim honores populus Romanus mihi ipsi , homini novo , detulit. Nam , tu quum quæstor es factus , etiam qui te numquam viderant , tamen illum

honorem nomini mandabant tuo. *Ædilis* es factus. *Piso* est a populo Romano factus, non iste *Piso*. *Prætura* item majoribus delata est tuis: noti erant illi mortui: te vivum nondum noverat quisquam. Me quum quæstorem in primis, *ædilem* priorem, *prætorem* primum cunctis suffragiis populus Romanus faciebat; homini ille honorem, non generi; moribus, non majoribus meis; virtuti perspectæ, non auditæ nobilitati deferebat.

3. Nam quid ego de consulatu loquar? parto vis, anne gesto? Miserum me! cum hac me nunc peste, atque labe confero? sed nihil comparandi causâ loquar; attamen ea, quæ sunt longissimè disjuncta, comprehendam. Tu consul es renunciatus (nihil dicam gravius, quàm quod omnes fatentur) impeditis reipublicæ temporibus, dissidentibus consulibus *Cæsare* & *Bibulo*, quum hoc non recusares, quin ii, a quibus dicebare consul, te luce dignum non putarent, nisi nequior quàm *Gabinus*, exstitisses. Me cuncta Italia, me omnes ordines, me universa civitas non prius tabellâ, quàm voce, priorem consulem declaravit.

II. Sed omitto, ut sit factus uterque nostrum: sit sanè *Fors* domina campi: magnificentius est dicere, quemadmodum gesserimus consulatum, quàm quemad-

modum ceperimus. Ego Kalendis Jan. senatum & bonos omnes legis agrariæ, maximarumque largitionum metu libera- vi: ego agrum Campanum, si dividi non oportuit, conservavi; si oportuit, melio- ribus auctoribus reservavi: ego in C. Ra- birio, perduellionis reo, quadraginta an- nis ante me consulem interpositam sena- tûs auctoritatem sustinui contra invidiam, atque defendi: ego adolescentes bonos & fortes, sed usos eâ conditione fortunæ, ut, si essent magistratus adepti, reipubli- cæ statum convulsuri viderentur, meis inimiciis, nullâ senatûs malâ gratiâ, co- mitiorum ratione privavi.

5. Ego Antonium collegam, cupidum provinciæ, multa in republica molientem, patientiâ atque obsequio meo mitigavi; ego provinciam Galliam, senatûs auctori- tate, exercitu & pecuniâ instructam & or- natam, quam cum Antonio communica- vi, quòd ita existimabam tempora reipu- blicæ ferre, in concione deposui, recla- mante populo Romano: ego L. Catili- nam, cædem senatûs, interitum urbis, non obscure, sed palam molientem, egre- di ex urbe jussi; ut, a quo legibus non poteramus, mœnibus tuti esse possemus: ego tela, extremo mense consulatûs mei intenta jugulis civitatis, de conjuratorum nefariis manibus extorsi: ego faces jam

accensas ad hujus urbis incendium comprehendī, protulī, exstinxī.

III. Me, Q. Catulus, princeps hujus ordinis, & auctor publici consilii, frequentissimo senatu, parentem patriæ nominavit: mihi hic vir clarissimus, qui propter te sedet, L. Gellius, his audientibus, civicam coronam deberi a republica dixit: mihi togato senatus, non ut multis bene gesta, sed ut nemini, conservatæ reipublicæ, singulari genere supplicationis, deorum immortalium templa patefecit. Ego quum in concione, abiens magistratu, dicere a tribuno plebis prohiberer, quæ constitueram, quumque is mihi tantummodo ut jurarem permitteret, sine ulla dubitatione juravi, rempublicam atque hanc urbem meâ unius operâ esse salvam.

7. Mihi populus Romanus universus illa in concione non unius diei gratulationem, sed æternitatem immortalitatemque donavit, quum meum jusjurandum tale atque tantum, juratus ipse, unâ voce & consensu approbavit. Quo quidem tempore is meus domum fuit e foro reditus, ut nemo, nisi qui mecum esset, civium esse in numero videretur. Atque ita est a me consulatus peractus, ut nihil sine consilio senatûs, nihil non approbante populo Romano, egerim: ut semper in Ros-

tris curiam , in senatu populum defende-
rim : ut multitudinem cum principibus ,
equestrem ordinem cum senatu conjunxe-
rim. Exposui breviter consulatum meum.

IV. Aude nunc , ô furia , de tuo dice-
re ; cujus fuit initium ludi Compitalitii ,
tum primùm facti post L. Metellum &
Q. Marcium consules , contra auctorige-
tem hujus ordinis : quos Q. Metellus
(facio injuriam fortissimo viro mortuo ,
qui illum , cujus paucos pares hæc civitas
tulit , cum hac importuna bellua confe-
ram) sed ille designatus consul , quum
quidam tribunus plebis suo auxilio magis-
tros ludos contra senatusconsultum facere
jussisset , privatus fieri vetuit ; atque id ;
quod nondum potestate poterat , obtinuit
auctoritate. Tu , quum in Kalendas Ja-
nuarias Compitalitiorum dies incidisset ,
Sex. Clodium , qui numquam antea præ-
textatus fuisset , ludos facere , & prætex-
tatum volitare passus es , hominem impu-
rum , atque non modò facie , sed etiam
oculo tuo dignissimum.

9. Ergo his fundamentis positis consu-
latûs tui , triduo post , inspectante & ta-
cente te , a P. Clodio , fatali portento
prodigioque reipublicæ , lex Ælia & Fu-
fia eversa est , propugnacula murique tran-
quillitatis atque otii : collegia , non ea so-
lùm , quæ senatus sustulerat , restituta

sunt, sed innumerabilia quædam nova, ex omni fæce urbis, ac servitio constituta: ab eodem homine, in stupris inauditis nefariisque versato, vetus illa magistra pudoris & modestiæ, severitas censoria sublata est: quum tu interim, bustum reipublicæ, qui te consulem tum Romæ dicis fuisse, verbo numquam significaris sententiam tuam tantis in naufragiis civitatis.

V. Nondum, quæ feceris, sed quæ fieri passus sis, dico: neque verò multum interest, præsertim in consule, utrùm ipse perniciosus legibus, improbis concionibus rempublicam vexet, an alios vexare patiatur. An potest ulla esse excusatio non dicam malè sentienti, sed sedenti, cunctanti, dormienti in maximo reipublicæ motu consuli? Centum propè annos legem Æliam & Fufiam tenueramus; quadringentos iudicium, notionemque censoriam: quas leges ausus est non nemo improbus, potuit quidem nemo, convelere; quam potestatem minuere, quò minus de moribus nostris quinto quoque anno judicaretur, nemo tam effusè petulans conatus est.

II. Hæc sunt, ô carnifex! in gremio sepulta consulatûs tui. Persequere connexos his funeribus dies. Pro Aurelio tribunali, ne connivente quidem te, quod ip-

fum esset scelus , sed etiam hilarioribus oculis , quàm solitus eras , intuite , delectus fervorum habebatur ab eo , qui nihil sibi umquam nec facere , nec pati turpe esse duxit : arma in templo Castoris (ô proditor templorum omnium !) vidente te , constituebantur ab eo latrone , cui templum illud fuit , te consule , arx civium perditorum , receptaculum veterum Catilinæ militum , castellum forensis latrocinii , bustum legum omnium ac religionum. Erat non solum domus mea , sed totum Palatium senatu , equitibus Romanis , civitate omni , Italiâ cunctâ , refer-tum : quum tu non modò ad eum Ciceronem (mitto enim domestica , quæ negari possunt ; hæc commemoro , quæ sunt palam) non modò , inquam , ad eum , cui primam comitiis tuis dederas tabulam prærogativæ , quem in senatu sententiam rogabas tertium , numquam adspirasti ; sed omnibus consiliis , quæ ad me opprimendum parabantur , non interfuisti solum , verum etiam crudelissimè præfuis-ti.

VI. Mihi verò ipsi coram genero meo , propinquo tuo , quæ dicere ausus es ? eger-e , foris esse Gabinium , sine provincia stare non posse , spem habere a tribuno plebis , si tua consilia cum illo conjunxis-ses ; a senatu quidem desperasse : hujus te cupiditati obsequi , sicuti ego fecissem in

collega meo: nihil esse, quod præsidium consulum implorarem: sibi quemque consulere oportere. Atque hæc dicere vix audeo: vereor, ne qui sit, qui istius insignem nequitiam, frontis involutam integumentis, nondum cernat: dicam tamen: ipse certè agnoscet, & cum aliquo dolore flagitiorum suorum recordabitur.

13. Meministine, cœnum, quum ad te quintâ ferè horâ cum C. Pisone venissem, nescio quo e gurgustio te prodire, involuto capite, soleatum? & quum isto ore foetido teterrimam nobis popinam inhalas-
ses, excusatione te uti valetudinis, quòd diceres, vinolentis te quibusdam medicaminibus solere curari? quam nos causam quum accepissemus (quid enim facere poteramus?) paulisper steterimus in illo ganearum tuarum nidore, atque fumo; unde tu nos, quum improbissimè respondendo, tum turpissimè eructando, ejecisti. Idem illo ferè biduo productus in concionem ab eo, cui sic æquatum præbebas consulat-
um tuum, quum esses interrogatus, quid sentiret de consulatu meo; gravis auctor, Calatinus credo aliquis, aut Africanus, aut Maximus, & non Cæsonius semi-Placentinus Calventius, respondes, altero ad frontem sublato, altero ad mentum depresso supercilio, *Crudelitatem tibi non placere.*

VII. Hic te ille homo dignissimus tuis laudibus collaudavit. Crudelitatis tu, furcifer, senatum consul in concione condemnas? non enim me, qui senatui parui: nam relatio illa salutaris & diligens, fuerat consulis; animadversio quidem & iudicium, senatûs: quæ quum reprehendis, ostendis, qualis tu, si ita fortè accidisset, fueris illo tempore consul futurus. Stipendi q mehercule, & frumento Catilinam esse putasses iuvandum.

15. Quid enim interfuit inter Catilinam, & eum, cui tu senatûs auctoritatem, salutem civitatis, totam rempublicam, provinciæ præmio vendidisti? Quæ enim L. Catilinam conantem consul prohibui, ea P. Clodium facientem consules adjuverunt: voluit ille senatum interficere, vos sustulistis; leges incendere, vos abrogastis; interire patriam, vos adjuvistis. Quid est vobis consulibus gestum sine armis? Incendere illa conjuratorum manus voluit urbem; vos ejus domum, quem propter urbs incensa non est. Ac ne illi quidem, si habuissent vestri similem consulem, de urbis incendio cogitassent: non enim se tectis privare voluerunt; sed his stantibus nullum domicilium sceleri suo fore putaverunt: cædem illi civium, vos servitutem expetistis. Hic vos etiam crudeliores: huic enim populo ita fuerat ante vos consules

libertas insita, ut emori potius, quàm servire, præstaret.

16. Illud verò geminum consiliis Catilinæ, & Lentuli, quòd me domo meâ expulistis, Cn. Pompeium domum suam compulistis: neque enim, me stante & manente in urbis vigilia, neque resistente Cn. Pompeio, omnium gentium victore, unquam se illi rempublicam delere posse duxerunt. A me quidem etiam pœnas expetistis, quibus conjuratorum manes mortuorum expiaretis: omne odium, inclusum nefariis sensibus impiorum, in me profudistis: quorum ego furori nisi cessissem, in Catilinæ busto, vobis ducibus, mactatus essem. Quod autem majus indicium expectatis, nihil inter vos & Catilinam interfuisse, quàm quòd eandem illam manum ex intermortuis Catilinæ reliquiis concitastis? quòd omnes undique perditos collegistis? quòd in me carcerem effudistis? quòd conjuratos armastis? quòd eorum ferro ac furori meum corpus, atque omnium bonorum vitam objicere voluistis? Sed jam redeo ad præclaram illam concionem tuam.

VIII. Tu es ille, cui crudelitas displicet? cui quum senatus luctum ac dolorem suum vestis mutatione declarandum censuisset, quum videres mœrere rempublicam amplissimi ordinis luctu, ô noster

misericors ! quid facis ? quod nulla in barbaria quisquam tyrannus. Omitto enim illud , consulem edicere , ut senatus senatusconsulto ne obtemperet , quò fœdus nec fieri , nec cogitari quidquam potest : ad misericordiam redeo ejus , cui nimis videtur senatus in conservanda patria fuisse crudelis.

18. Edicere est ausus cum illo suo pari , quem tamen omnibus vitis superare cupiebat , ut senatus , contrà quàm ipse censuisset , ad vestitum rediret. Quis hoc fecit ulla in Scythia tyrannus , ut eos , quos luctu afficeret , lugere non sineret ? mœrorem relinquis , mœroris auferis insignia : eripis lacrymas non consolando , sed mirando. Quòd si vestem non publico consilio patres conscripti , sed privato officio , aut misericordiâ mutavissent , tamen id iis non licere per interdicta crudelitatis tuæ , potestatis erat non ferendæ : quum verò id senatus frequens censuisset , ordines reliqui jam antè fecissent ; tu ex tenebricosa popina consul extractus , cum illa saltatrice tonsa , senatum populi Romani occasum , atque interitum reipublicæ lugere vetuisti.

IX. At quærebat etiam paulò antè de me , quid suo mihi opus fuisset auxilio : cur non meis inimicis meis copiis restitisssem. Quasi verò non modò ego , qui mul-

tis sæpe auxilio fuisset, sed quisquam tam inops fuerit umquam, qui, isto non modò propugnatore, tutiorem se, sed advocato, aut adstipulatore, paratiorem fore putaret. Ego istius pecudis, ac putidæ carnis consilio scilicet, aut præsidio niti volebam? ab hoc ejecto cadavere quidquam mihi aut opis, aut ornamenti expetebam? Consulem ego tum requirebam, consulem, inquam, non illum quidem, quem in hoc majali invenire non possem, qui tantam reipublicæ causam gravitate & consilio suo tueretur; sed qui, tamquam truncus atque stipes, si stetisset modò, posset sustinere tamen titulum consulatûs. Quum enim esset omnis causa illa mea consularis, & senatoria; auxilio mihi opus fuerat & consulis, & senatûs: quorum alterum etiam ad perniciem meam erat a vobis consulibus conversum; alterum rei publicæ penitus ereptum. Ac tamen, si consilium exquiris meum; neque ego cessissem, & me ipsa suo complexu patria tenuisset, si mihi cum illo bustuario gladiatore, & tecum, & cum collega tuo decertandum fuisset.

20. Alia enim causa præstantissimi viri, Q. Metelli, fuit; quem ego civem, meo iudicio, cum deorum immortalium laude conjungo: qui C. illi Mario, fortissimo viro, & consuli, & sextum consuli, &

ejus invictis legionibus, ne armis confligeret, cedendum esse duxit. Quod mihi igitur certamen esset hujusmodi? cum C. Mario scilicet, aut cum aliquo pari, an cum altero, barbaro Epicuro, cum altero, Catilinæ laternario? quos neque hercule ego, neque supercilium tuum, neque collegæ tui cymbala, ac crotala fugi: neque tam fui timidus, ut, qui in maximis turbinibus ac fluctibus reipublicæ navem gubernassem, salvamque in portu collocassem, frontis tuæ nubeculam, tum collegæ tui contaminatum spiritum, pertimescerem.

21. Alios ego vidi ventos, alias prospexi animo procellas, aliis impendentibus tempestatibus non cessi, sed his unum me pro omnium salute obtuli. Itaque discessu tuo meo omnes illi nefarii gladii de manibus crudelissimis exciderunt: quum quidem tu, ô vecors & amens, quum omnes boni abditis inclusique mœrerent, templa gemerent, tecta ipsa urbis lugerent, complexus es illud funestum animal ex nefariis stupris, ex civili cruore, ex omnium scelerum importunitate, & flagitiorum impunitate concretum, atque eodem in templo, eodem & loci vestigio & temporis, arbitria non mei solum, sed patriæ funeris abstulisti.

X. Quid ego illorum dierum epulas, quid lætitiâ & gratulationem tuam, quid

cum tuis fordidissimis gregibus intemperantissimas perpotationes prædicem? quis te illis diebus sobrium, quis agentem aliquid, quod esset libero dignum, quis denique in publico vidit? quum collegæ tui domus cantu & cymbalis personaret, quumque ipse nudus in convivio saltaret: in quo ne tum quidem, quum illum suum saltatorium versaret orbem, fortunæ rotam pertimescebat. Hic autem, non tam concinnus helluo, nec tam musicus, jacebat in suo Græcorum fœtore, atque vino: quod quidem istius, in illis reipublicæ luctibus, quasi aliquod Lapitharum, aut Centaurorum convivium ferebatur: in quo nemo potest dicere, utrùm iste plus biberit, an vomuerit, an effuderit.

23. Tu etiam mentionem facies consulatûs tui? aut te fuisse Romæ consulem dicere audebis? quid? tu in lictoribus, in toga prætexta esse consulatum putas? quæ ornamenta etiam in Sex. Clodio, te consule, esse voluisti: hujus tu Clodiani canis insignibus consulatum declarari putas? Animo consulem esse oportet, consilio, fide, gravitate, vigilantia, curâ; toto denique munere consulatûs omni officio tuendo, maximèque, id quod vis nominis præscribit, reipublicæ consulendo. Ego consulem esse putem, qui senatum esse in reipublica non putavit? & sine eo consilia

consulem numerem, sine quo Romæ ne reges quidem esse potuerunt? Etenim illa jam omitto: quum fervorum delectus haberetur in foro; arma in templum Castoris luce & palam comportarentur; id autem templum, sublato aditu, revulsis gradibus, a conjuratorum reliquiis atque a Catilinæ prævaricatore quondam, tum ultore, armis teneretur; quum equites Romani relegarentur, viri boni lapidibus e foro pellerentur, senatui non solum juvare rempublicam, sed ne lugere quidem liceret; quum civis is, quem hic ordo, assentiente Italiâ, cunctisque gentibus, conservatorem patriæ judicaret, nullo judicio, nullâ lege, nullo more, servitio atque armis pelleretur, non dicam auxilio vestro, quod verè licet dicere, sed certè silentio; tum Romæ fuisse consules quisquam existimabit? Qui latrones igitur, si quidem vos consules? qui prædones, qui hostes, qui proditores, qui tyranni nominabuntur?

XI. Magnum nomen est, magna species, magna dignitas, magna majestas consulis: non capiunt angustiae pectoris tui, non recipit levitas ista, non egestas animi: non infirmitas ingenii sustinet, non insolentia rerum secundarum tantam personam, tam gravem, tam severam. Seplasia mehercle, ut dici audiebam, te, ut primùm adspexit, Campanum consulem

repudiavit. Audierat Decios, Magios, & de Taurea illo Jubellio aliquid acceperat; in quibus si moderatio illa, quæ in nostris solet esse consulibus, non fuit, at fuit pompa, fuit species, fuit incessus, saltem Seplasiâ dignus, & Capuâ.

25. Gabinium denique si vidissent duumvirum vestri illi unguentarii, citius agnovissent: erant illi compti capilli, & mardentes cincinnorum fimbriæ, & fluentes cerussatæque buccæ, dignæ Capuâ, sed illâ vetere: nam hæc quidem, quæ nunc est, splendidissimorum hominum, fortissimorum virorum, optimorum civium, mihiq; amicissimorum multitudine redundat: quorum Capuæ te prætextatum nemo adspexit, qui non gerneret desiderio mei, cujus consilio quum universam rempublicam, tum illam ipsam urbem meminertant esse servatam: me inauratâ statuâ donarant, me patronum unum adsciverant: a me se habere vitam, fortunas, liberos arbitrabantur: me & præsentem contra latrocinium tuum suis decretis legisque defenderunt; & absentem, principe Cn. Pompeio referente, & de corpore rei publicæ tuorum scelerum tela revellente, revocarunt.

26. An tu eras consul, quum in Palatio mea domus ardebat, non casu aliquo, sed ignibus injectis, instigante te? Ecquod in

hac urbe majus umquam incendium fuit ; cui non consul subvenerit ? At tu illo ipso tempore apud focum tuam propè a meis ædibus , cujus domum ad meam exhauriendam patefeceras , sedebas , non extinctor , sed auctor incendii , & ardentes faces furiis Clodianis pene ipse consul ministrabas.

XII. An verò reliquo tempore consulem te quisquam duxit ? quisquam tibi paruit ? quisquam in curiam venienti assurrexit ? quisquam consulenti respondendum putavit ? numerandus est ille annus denique in republica , quum obmutuisset senatus , judicia conticuissent , mœrerent boni , vis latrocinii vestri totâ urbe volitaret , neque civis unus ex civitate , sed ipsa civitas tuo , & Gabinii sceleri , furorique cessisset ? At ne tum quidem emersisti , lutulente Cæsoni , ex miserrimis naturæ tuæ sordibus , quum experrecta tandem virtus clarissimi viri , celeriter & verum amicum , & optimè meritum civem , & suum pristinum morem requisivit ; neque est ille vir passus in ea republica , quam ipse decorarat , atque auxerat , diutius vestrorum scelerum pestem morari : quum tamen ille , qualiscumque est , qui est ab uno te improbitate victus , Gabinius , collegit ipse se vix ; sed collegit tamen , & contra suum Clodium , primum simulatè , deinde non libenter , ad

extremum tamen pro Cn. Pompeio verè, vehementerque pugnavit : quo quidem in spectaculo mira populi Romani æquitas erat : uter eorum perisset, tamquam lanista, in ejusmodi pari lucrum fieri putabat ; immortalem verò quæstum, si uterque cecidisset.

28. Sed ille tamen agebat aliquid : tuebatur auctoritatem summi viri : erat ipse sceleratus, erat gladiator : cum scelerato tamen, & cum pari gladiatore pugnat. Tu scilicet, homo religiosus & sanctus, fœdus, quod meo sanguine in pactione provinciarum iceras, frangere noluisti : caverat enim sibi ille sororius adulter, ut, si tibi provinciam, si exercitum, si pecuniam ereptam ex reipublicæ visceribus dedisset, omnium suorum scelerum socium te, adiutoremque præberes. Itaque in illi tumultu fracti fasces : ictus ipse : quotidie tela, lapides, fugæ : deprehensus denique cum ferro ad senatum is, quem ad Cneium Pompeium interimendum collocatum fuisse constabat.

XIII. Et quis audivit non modò actionem aliquam, aut relationem, sed vocem omnino, aut querelam tuam ? Consulem tum te fuisse putas, cujus in imperio, qui rempublicam senatûs auctoritate servarat, is neque in Italia : qui omnes omnium gentium partes tribus triumphis de-

vinxerat, is se in publico tutò statuit esse non posse? An tum eratis consules, quum, quacumque de re verbum facere cœperatis, aut referre ad senatum; cunctus ordo reclamabat, ostendebatque, nihil esse vos acturos, nisi priùs de me retulissetis? quum vos, quamquam fœdere obstricti tenebamini, tamen cupere vos diceretis, sed lege impediri?

30. Quæ lex privatis hominibus esse lex non videbatur, inusta per servos, incisa per vim, imposita per latrocinium, sublato senatu, pulsus e foro bonis omnibus, captâ republicâ contra omnes leges, nullo scripta more; hanc qui se metuere dicerent, hos consules, non dicam animi hominum, sed fasti ulli ferre possunt? Nam, si illam legem non putabatis, quæ erat contra omnes leges, indemnati civis atque integri capitis, bonorumque tribunitia proscriptione; hac tamen obstricti pactione tenebamini; quis vos non modò consules, sed liberos fuisse putet, quorum mens fuerit oppressa præmio, lingua adstricta mercede? sin illam vos soli legem putabatis; quisquam vos consules tunc fuisse, aut nunc esse consulares putet, qui ejus civitatis, in qua in principum numero vultis esse, non leges, non instituta, non jura noritis? An, quum proficiscebamini paludati in provincias vel emptas, vel erep-

tas, consules vos quisquam putavit? Itaque, credo, si minùs frequentia suâ vestrum egressum ornando, atque celebrando, at ominibus saltem bonis, ut consules, non tristissimis, ut hostes, aut proditores prosequerentur.

XIV. Tune etiam, immanissimum ac foedissimum monstrum, ausus es meum discessum illum, testem sceleris & crudelitatis tuæ, maledicti & contumeliæ loco ponere? Quo quidem tempore cepi, Patres conscripti, fructum immortalem vestri in me & amoris, & iudicii; qui non ad murmurationem, sed voce & clamore, abjecti hominis, & semivivi furorem, petulantiamque fregistis.

32. Tu luctum senatûs, tu desiderium equestris ordinis, tu squalorem Italiæ, tu curiæ taciturnitatem annuam, tu silentium perpetuum iudiciorum ac fori, tu cetera illa maledicti loco pones, quæ meus discessus reipublicæ vulnera inflixit? qui si calamitosissimus fuisset, tamen misericordiâ dignior, quàm contumeliâ, & cum gloria potius esse conjunctus, quàm cum probro putaretur; atque ille, dolor meus duntaxat, vestrum quidem scelus, ac dedecus haberetur: quum verò (forsitan hoc, quod dicturus sum, mirabile auditu esse videatur, sed certè id dicam, quod sentio) quum tantis a vobis, Patres conscripti,

beneficiis affectus sim, tantis honoribus; non modò illam calamitatem esse non duco: sed, si quid mihi potest a republica esse sejunctum, quod vix potest; privatim ad meum nomen augendum, optandam duco mihi fuisse illam, expetendamque fortunam.

33. Atque, ut tuum lætissimum diem cum tristissimo meo conferam, utrùm tandem bono viro & sapienti optabilius putas, sic exire a patria, ut omnes sui cives salutem, incolumitatem, reditum precentur, quod mihi accidit; an, quod tibi proficilcenti evenit, ut omnes exsecrarentur, malè precarentur, unam tibi illam viam & perpetuam esse vellent? Mihi, medius fidius, in tanto omnium mortalium odio, justo præsertim & debito, quævis fuga potius, quàm ulla provincia, esset optatior.

XV. Sed perge porrò: nam, si illud meum turbulentissimum tempus profectio- nis, tuo tranquillissimo præstat, quid conferam reliqua, quæ in te dedecoris plena fuerunt, in me dignitatis? Me Kalendis Jan. qui dies post obitum, occasumque nostrum reipublicæ primus illuxit, frequentissimus senatus concursu Italiæ, referente clarissimo atque fortissimo viro, P. Lentulo, consentiente populi Romani atque unâ voce, revocavit: me idem senatus exteris nationibus,

tionibus, me legatis, magistratibusque nostris, auctoritate suâ, consularibus litteris, non, ut tu, Insuber, dicere ausus es, orbatum patriâ, sed ut senatus illo ipso tempore appellavit, civem conservatorem rei publicæ commendavit: ad meam unius salutem senatus auxilium omnium civium cuncta ex Italia, qui rempublicam salvam esse vellent, consulis voce & litteris implorandum putavit: mei capitis servandi causâ Romam uno tempore, quasi signo dato, Italia tota convenit: de mea salute P. Lentuli, præstantissimi viri atque optimi consulis, Cn. Pompeii, clarissimi atque invictissimi civis, ceterorumque principum, celeberrimæ, & gratissimæ conciones fuerunt.

35. De me senatus ita decrevit, Cneio Pompeio auctore, & ejus sententiæ principe, ut, si quis impedisset reditum meum; in hostium numero putaretur: iisque verbis ea de me senatûs auctoritas declarata est, ut nemini sit triumphus honorificentius, quàm mihi salus restitutioque perscripta: de me, quum omnes magistratus promulgassent, præter unum prætorem, a quo non fuit postulandum, fratrem inimici mei, præterque duos de lapide emptos tribunos plebis, legem comitiis centuriatis tulit P. Lentulus consul de collegæ Q. Metelli sententia; quem mecum eadem

respublica, quæ in tribunatu ejus disjunxerat, in consulatu, virtute optimi ac justissimi viri, sapientiâque, conjunxit.

36. Quæ lex quemadmodum accepta sit, quid me attinet dicere? ex vobis audio, nemini civi ullam, quò minùs adesset, satis justam excusationem esse visam: nullis comitiis umquam multitudinem hominum tantam, neque splendidiorē fuisse: hoc certè video, quod indicant tabulæ publicæ, vos rogatores, vos diribitores, vos custodes fuisse tabellarum: &, quod in honoribus vestrorum propinquorum non facitis vel ætatis excusatione, vel honoris, id in salute mea, nullo rogante, vos vestrà sponte fecistis.

XVI. Confer nunc, Epicure noster, ex hara producte, non ex schola, confer, si audes, absentiam tuam cum mea. Obtinisti provinciam consularem finibus iis, quos lex cupiditatis tuæ, non quos lex generi tui pepigerat: nam lege Cæsaris justissimâ, atque optimâ, populi liberi planè & verè erant liberi: lege autem eâ, quam nemo legem, præter te & collegam tuum, putavit, omnis erat tibi Achaia, Thessalia, Athenæ, cuncta Græcia addicta: habebas exercitum tantum, quantum tibi non senatus aut populus Romanus dederat, sed quantum tua libido conscripserat. *Ærarium exhauseras.*

38. Quas res gessisti in imperio, exercitu, provinciâ consulari? quas res gesserit quæro? qui ut venit, statim (nondum commemoro rapinas, nondum exactas pecunias, non captas, non imperatas, non neces sociorum, non cædem hospitum, non perfidiam, non immanitatem, non scelera prædico: mox, si videbitur, ut cum fure, ut cum sacrilego, ut cum sicario, disputabo: nunc meam spoliatam fortunam conferam cum florente fortuna imperatoris) Quis umquam provinciam cum exercitu obtinuit, qui nullas ad senatum litteras miserit? tantam verò provinciam cum tanto exercitu, Macedoniam præsertim, quæ tantis barbarorum gentibus attingitur, ut semper Macedonicis imperatoribus iidem fines provinciæ fuerint, qui gladiatorum, atque pilorum: ex qua aliquot prætorio imperio, consulari quidem nemo rediit, qui incolumis fuerit, quin triumpharit. Est hoc novum: multò illud magis: appellatus est hic vulturius illius provinciæ (si diis placet) imperator.

XVII. Ne tum quidem, Paule noster, tabellas Romam cum laurea mittere audebas? Misi, inquit. Quis umquam recitavit? quis, ut recitarentur, postulavit? nihil enim mea refert, utrùm tu, conscientiam oppressus scelerum tuorum, nihil umquam ausus sis scribere ad eum ordi-

nem , quem despexeras , quem affixeras ; quem deleveras : an amici tui tabellas abdidierint , iidemque silentio suo temeritatem , atque audaciam tuam condemnarint. Atque haud scio , an malim , te videri nullo pudore fuisse in litteris mittendis , amicos tuos plus habuisse & pudoris & consilii , quàm aut te videri pudentiorum fuisse , quàm soles , aut tuum factum non esse condemnatum iudicio amicorum.

40. Quòd si non tuis nefariis in hunc ordinem contumeliis in perpetuum tibi curiam præclusisses ; quid tandem erat actum aut gestum in illa provincia , de quo ad senatum cum gratulatione aliqua scribi abs te oporteret ? vexatio Macedoniae ? an oppidorum turpis amissio ? an sociorum direptio ? an agrorum depopulatio ? an munitio Thessalonicae ? an obsessio militaris viae ? an exercitus nostri interitus , ferro , fame , frigore , pestilentia ? Tu verò , qui ad senatum nihil scripseris , ut in urbe nequior inventus es , quàm Gabinius , sic in provincia paulò tamen , quàm ille , demissior.

41. Nam ille gurgis atque helluo , natus abdomini suo , non laudi atque gloriae ; quum equites Romanos in provincia , quum publicanos , nobiscum & voluntate & dignitate conjunctos , omnes fortunis , multos famâ , vitâque privasset ; quum egisset aliud nihil in illo exercitu , nisi ut

urbes depopularetur, agros vastaret, exhauriret domos; ausus est (quid enim ille non auderet?) a senatu supplicationem per litteras postulare.

XVIII. O dii immortales! tune etiam, atque adeò vos, geminæ voragines scopulique reipublicæ, vos meam fortunam deprimitis? vestram extollitis? quum de me ea senatusconsulta absente facta sint, eæ conciones habitæ, is motus fuerit municipiorum & coloniarum omnium, ea decreta publicanorum, ea collegiorum, ea denique generum, ordinumque omnium, quæ ego non modò optare numquam auderem, sed cogitare non possem? vos autem sempiternas fœdissimæ turpitudinis notas subieritis?

42. An ego, si te & Gabinium cruci suffixos viderem, majore afficerer lætitiâ ex corporis vestri laceratione, quàm afficior ex famæ? Nullum est supplicium putandum, quo affici casu aliquo etiam boni viri, fortesque possunt. Atque hoc quidem etiam isti tui dicunt voluptarii, Græci; quos utinam ita audires, ut erant audiendi! numquam te in tot flagitia ingurgitasses: verum audis in præsepibus; audis in stupris; audis in cibo & vino. Sed dicunt isti ipsi, qui mala dolore, bona voluptate definiunt, sapientem, etiam si in Phalaridis tauro inclusus succensis igni-

bus torreatur, dicturum tamen, suave illud esse, seseque ne tantulum quidem commoveri: tantam virtutis esse vim voluerunt, ut non posset umquam esse vir bonus non beatus. Quæ est igitur pœna? quod supplicium? id, meâ sententiâ, quod accidere nemini potest, nisi nocenti, suscepta fraus, impedita & oppressa mens conscientiâ, bonorum omnium odium, nota iusti senatus, amissio dignitatis.

XIX. Nec mihi ille M. Regulus, quem Carthaginienſes, reſectis palpebris, illigatum in machina, vigilando necaverunt, ſupplicio videtur affectus; nec C. Marius, quem Italia ſervata ab illo, demerſum in Minturnenſium paludibus, Africa deviſta ab eodem, expulſum & naufragum vidit: fortunæ enim iſta tela ſunt, non culpæ; ſupplicium autem eſt pœna peccati. Neque verò ego, ſi umquam vobis mala precarer, quod ſæpe feci, in quo Dii immortales meas preces audiverunt, morbum, aut mortem, aut cruciatum precarer. Thyſtea iſta exſecratio eſt, poetæ, vulgi animos, non ſapientum, moventis:

*Ut tu naufragio expulſus, uſpiam
ſaxis fixus aſperis,*

*Evifceratus latere penderes, ut ait
ille, ſaxa ſpargens tabo,*

Sanie, ſanguine atro.

Non ferrem omnino moleſtè, ſi ita acci-

diffet : sed id tamen esset humanum. M. Marcellus, qui ter consul fuit, summâ virtute, pietate, gloriâ militari, periit in mari; qui tamen ob virtutem gloriæ laude vivit: in fortuna quadam est illa mors, non in pœna, putanda.

44. Quæ est igitur pœna? quod supplicium? quæ saxa? quæ cruces? Ecce, duo duces in provinciis populi Romani habere exercitus, appellari imperatores: horum alterum sic fuisse infirmatum conscientia scelerum & fraudum suarum, ut ex ea provincia, quæ fuerit ex omnibus una maximè triumphalis, nullas sit ad senatum litteras mittere ausus. Ex qua provincia modò vir omni dignitate ornatissimus, L. Torquatus, magnis rebus gestis, me referente, absens imperator sit appellatus: unde his paucis annis Cn. Dolabellæ, C. Curionis, M. Luculli justissimos triumphos vidimus: ex ea, te imperatore, nuntius ad senatum allatus est nullus.

45. Ab altero allatæ litteræ, recitatæ, relatum ad senatum. Dii immortales! idne ego optarem, ut inimicus meus eâ, quâ nemo umquam, ignominiâ notaretur? ut senatus is, qui in eam jam benignitatis consuetudinem venit, ut eos, qui bene rempublicam gesserint, novis honoribus afficiat, & numero dierum, & genere verborum; hujus unius litteris nuntianti-

bus non crederet ? postulantibus dene-
garet ?

XX. His ego rebus pascor , his delecto-
tor , his perfruor ; quòd de vobis hic ordo
opinatur non secus , ac de teterrimis hos-
tibus : quòd vos equites Romani , quòd
ceteri ordines , quòd cuncta civitas odit :
quòd nemo bonus , nemo denique civis
est , qui modò se civem esse meminerit ,
qui vos non oculis fugiat , auribus respuat ,
animo aspernetur , recordatione denique
ipsâ consulatûs vestri perhorrescat.

46. Hæc ego semper de vobis expeti-
vi , hæc optavi , hæc precatus sum : plura
etiam acciderunt , quàm vellem : nam ,
ut amitteretis exercitum , numquam me-
hercule optavi. Illud etiam accidit præter
optatum meum ; sed valde ex voluntate :
mihi enim non venerat in mentem furo-
rem & insaniam optare vobis , in quam
incidistis : atqui fuit optandum : me tamen
fugerat , deorum immortalium has esse in
impios & consceleratos pœnas certissimas
constitutas. Nolite enim putare , Patres
conscripti , ut in scena videris , homines
consceleratos impulsu deorum terri Fur-
iarum tædis ardentibus. Sua quemque
fraus , suum facinus , suum scelus , sua au-
dacia de sanitate ac mente deturbat : hæ
sunt impiorum furiae , hæ flammæ , hæ
faces.

47. Ego te non vecordem, non furiosum, non mente captum, non tragico illo Oreste, aut Athamante dementiorem putem, qui sis ausus primùm facere (nam id est caput) deinde paulò antè, Torquato, gravissimo & sanctissimo viro, premente, confiteri, te provinciam Macedoniam, in quam tantum exercitum transportasses, sine ullo milite reliquisse? Mitto de amissa maxima parte exercitûs; sit hoc infelicitatis tuæ: dimittendi verò exercitûs quam potes afferre causam? quam potestatem habuisti? quam legem? quod senatusconsultum? quod jus? quod exemplum? Quid est aliud furere, non cognoscere homines, non cognoscere leges, non senatum, non civitatem? cruentare corpus suum? major hæc est vitæ, famæ, salutis suæ vulneratio. Si familiam tuam dimisisses, quod ad neminem, nisi ad ipsum te, pertineret, amici te tui constringendum putarent: præsidium tu populi Romani, custodiam provinciæ, injussu populi senatûsque dimisisses, si tuæ mentis compos fuisses?

XXI. Ecce tibi alter, effusâ jam maximâ prædâ, quam ex fortunis publicanorum, ex agris urbibusque sociorum exhausserat, quum partim ejus prædæ profundæ libidines devorassent, partim nova quædam & inaudita luxuries, partim etiam in

illis locis, ubi omnia diripuit, emptiones; partim permutationes ad hunc Tusculanum montem exstruendum: quum jam egeret; quum illa ejus immensa & intolerabilis ædificatio constitisset; se ipsum, fasces suos, exercitum populi Romani, numen interdictumque deorum immortalium, responsa sacerdotum, auctoritatem senatûs, jussa populi, nomen ac dignitatem imperii, regi Ægyptio vendidit.

49. Quum fines provinciæ tantos haberet, quantos voluerat, quantos optaverat, quantos mei capitis pretio, periculoque emerat; his se tenere non potuit: exercitum eduxit ex Syria. Qui licuit extra provinciam? Tribuit se mercenarium comitem regi Alexandrino. Quid hoc turpius? In Ægyptum venit: signa contulit cum Alexandrinis. Quando hoc bellum, aut hic ordo, aut populus susceperat? Cepit Alexandriam. Quid aliud expectamus a furore ejus, nisi ut ad senatum tantis de rebus gestis litteras mittat?

50. Hic si mentis esset suæ, nisi pœnas patriæ diisque immortalibus eas, quæ gravissimæ sunt, furore atque infaniâ penderet; ausus esset (mitto exire de provincia) educere exercitum, bellum suâ sponte gerere, in regnum injussu populi aut senatûs accedere? quæ quum plurimæ leges veteres, tum lex Cornelia majestatis, Julia.

de pecuniis repetundis, planissimè vetant: sed hæc omitto. Ille si non acerrimè fureret, auderet, quam provinciam P. Lentulus amicissimus huic ordini, quum & auctoritate senatûs, & sorte haberet, interpositâ religione, sine ulla dubitatione deposuisset, eam sibi adsciscere, quum etiam si religio non impediret, mos majorum tamen, & exempla, & gravissimæ legum pœnæ vetarent?

XXII. Sed quoniam fortunarum contentionem facere cœpimus; de reditu Gabinii omittamus: quem etsi sibi ipse præcidit, ego tamen os ut videam hominis, exspecto. Tuum, si placet, reditum cum meo conferamus. Ac meus quidem is fuit, ut a Brundisio usque Romam agmen perpetuum totius Italiæ viderem: neque enim regio fuit ulla, neque municipium, neque præfectura, aut colonia, ex qua non publicè ad me venerint gratulatum. Quid dicam adventus meos? quid effusiones hominum ex oppidis? quid concursum ex agris patrumfamiliâs cum conjugibus ac liberis? quid eos dies, qui quasi deorum immortalium festi ac solennes, sunt adventu meo, redituque celebrati?

52. Unus ille dies mihi quidem immortalitatis instar fuit, quo in patriam redii, quum senatum egressum vidi, populumque Romanum universum; quum mihi ipsa Ro-

ma propè convulsa sedibus suis, ad complectendum conservatorem suum procedere visa est : quæ me ita accepit, ut non modò omnium generum, ætatum, ordinum omnes viri ac mulieres, omnis fortunæ ac loci, sed etiam mœnia ipsa viderentur, & tecta urbis, ac templa lætari. Me consequentibus diebus in ea ipsa domo, quâ tu me expuleras, quam expilaras, quam incenderas, pontifices, consules, patres conscripti collocaverunt, mihique, quod ante me nemini, pecuniâ publicâ ædificandam domum censuerunt.

53. Habes redditum meum. Confer nunc vicissim tuum, quandoquidem, amisso exercitu, nihil incolume domum, præter os illud pristinum tuum, retulisti : qui primum, quâ veneris cum laureatis tuis licitoribus, quis scit ? quos tum Mæandros, dum omnes solitudines persequeris, quæ diverticula flexionesque quæsisti ? quod te municipium vidit ? quis amicus invitavit ? quis hospes adspexit ? nonne tibi nox erat pro die ? non solitudo pro frequentia ? caupona pro oppido ? non ut redire ex Macedonia nobilis imperator, sed ut mortuus infamis referri videretur ? Romam verò ipsam fœdavit adventus tuus.

XXIII. O familiæ non dicam Calpurniæ, sed Calventiæ ; neque hujus urbis, sed Placentini municipii ; neque paterni

generis, sed braccatæ cognationis dedecus! quemadmodum venisti? quis tibi, non dicam horum, aut civium ceterorum, sed tuorum legatorum obviam venit? Mecum enim tum L. Flaccus, vir tuâ legatione indignissimus, atque iis consiliis, quibus mecum in consulatu meo conjunctus fuit ad conservandam rempublicam, dignior, mecum fuit tum, quum te quidam non longè a porta cum lictoribus errantem visum esse narrabat: scio item virum fortem in primis, belli ac rei militaris peritum, familiarem meum, Q. Marcium, quorum tu legatorum prælio imperator appellatus eras, quum non longè abfuisses, adventu isto tuo domi fuisse otiosum.

55. Sed quid ego enumero, qui tibi obviam non venerint, qui dico venisse pene neminem, ne de officiosissima quidem natione candidatorum, quum vulgò essent & illo ipso, & multis antè diebus admoniti, & rogati. Togulæ lictoribus ad portam præstò fuerunt; quibus illi acceptis, sagula rejecerunt, & catervam imperatori suo novam præbuerunt. Sic iste, tanto exercitu, tantâ provinciâ, triennio pòst Macedonicus imperator, in urbem se intulit, ut nullius negotiatoris obscurissimi reditus umquam fuerit desertior: in quo me tamen, qui esset paratus ad se defendendum, reprehendit: quum ego. Cœli-

montanâ portâ introisse dixissem, sponsione me, ni Esquilinâ introisset, homo promptissimus laccessivit : quasi verò id aut ego scire debuerim, aut vestrûm quispiam audierit ; aut ad rem pertineat, quâ tu portâ introieris, modò ne triumphali ; quæ porta Macedonicis semper proconsulibus ante te patuit : tu inventus es, qui consulari imperio præditus, ex Macedonia non triumphares.

XXIV. At audistis, Patres conscripti, philosophi vocem : negavit, se triumphi cupidum umquam fuisse. O scelus, ô pestis, ô labe ! quum exstinguebas senatum, vendebas auctoritatem hujus ordinis, addicebas tribuno plebis consulatum tuum, rempublicam evertebas, prodebas caput & salutem meam unâ mercede provinciæ : si triumphum non cupiebas, cujus tandem rei te cupiditate arsisse defendes ? sæpe enim vidi, qui & mihi, & ceteris cupidiores provinciæ viderentur, triumphi nomine tegere, atque velare cupiditatem suam. Hoc modò D. Silanus consul in hoc ordine, hoc meus etiam collega dicebat : neque enim quisquam potest exercitum cupere, apertèque petere, ut non prætexat cupiditatem triumphi.

57. Quòd si te senatus, populusque Romanus aut non appetentem, aut etiam recusantem bellum suscipere, exercitum

ducere coegisset; tamen erat angusti animi atque demissi, iusti triumphi honorem atque dignitatem contemnere: nam, ut levitatis est, inanem aucupari rumorem; ut omnes umbras etiam falsæ gloriæ confectari: sic levis est animi, lucem splendoremque fugientis, justam gloriam, quæ est fructus veræ virtutis honestissimus, repudiare. Quum verò non modò non postulante atque cogente, sed invito atque oppresso senatu, non modò nullo populi Romani studio, sed nullo ferente suffragium libero, provincia tibi ista manupretium fuerit non everfæ per te, sed proditæ civitatis: quumque omnium tuorum scelerum hæc pactio exstiterit, ut, si tu totam rempublicam nefariis latronibus tradidisses, Macedonia tibi ob eam rem, quibus tu finibus velles, redderetur: quum exhauriebas ærarium: quum orbabas Italiam juventute: quum mare vastissimum hieme transibas: si triumphum contemnebas, quæ te, prædo amentissime, nisi prædæ ac rapinarum cupiditas tam cæca rapiebat?

58. Non est integrum Cneio Pompeio, consilio jam uti tuo: erravit enim: non gustarat istam tuam philosophiam: ter jam homo stultus triumphavit. Crasse, pudet me tui: quid est, quòd confecto per te formidolosissimo bello, coronam illam

lauream tibi tantopere decerni volueris a senatu? P. Servili, Q. Metelle, C. Curio, P. Africane, cur non hunc audistis tam doctum hominem, tam eruditum, prius quàm in istum errorem induceremini? C. ipsi Pomptino, necessario meo, jam non est integrum: religionibus enim susceptis impeditur. O stultos Camillos, Curius, Fabricios, Calatinos, Scipiones, Marcellos, Maximos! ô amentem Paulum! rusticum Marium! nullius consilii patres istorum amborum consulum, qui triumpharunt!

XXV. Sed, quoniam præterita mutare non possumus, quid cessat hic homullus, ex argilla & luto fictus Epicureus, dare hæc præclara præcepta sapientiæ, clarissimo & summo imperatori, genero suo? fertur ille vir, mihi crede, gloriâ: flagrat, ardet cupiditate justî & magni triumphî: non didicit eadem ista, quæ tu: mitte ad eum libellum: sed jam, si ipse coram congregari poteris, meditare, quibus verbis incensam illius cupiditatem comprimas, atque restringas: valebis apud hominem volitantem gloriæ cupiditate, vir moderatus & constans; apud indoctum eruditus; apud generum focer: dices enim, ut es homo facetus, ad persuadendum concinnus, perfectus, politus e schola: Quid est, Cæsar, quòd te supplicationes toties decre-

tæ, tot dierum, tantopere delectent? in quibus homines errore ducuntur: quas dii negligunt, qui (ut noster ille divinus dixit Epicurus) neque propitii cuiquam esse solent, neque irati. Non facies fidem scilicet, quum hæc disputabis: tibi enim & esse, & fuisse deos videbit iratos.

60. Vertes te ad alteram scholam: diseres de triumpho. Quid tandem habet iste currus? quid vincti ante currum duces? quid simulacra oppidorum? quid aurum? quid argentum? quid legati in equis, & tribuni? quid clamor militum? quid tota illa pompa? inania sunt ista, mihi crede, delectamenta pene puerorum, captare plausus, vehi per urbem, conspici velle: quibus ex rebus nihil est, quod solidum tenere; nihil quod referre ad voluptatem corporis possis.

61. Quin tu me vides, qui, ex qua provincia T. Flamininus, L. Paulus, Q. Metellus, T. Didius, innumerabiles alii, levi cupiditate commoti, triumpharunt, ex ea sic redii, ut ad portam Esquilinam, Macedonicam lauream conculcarim: ipse cum hominibus quindecim malè vestitis ad portam Cœlimontanam sitiens pervenerim: quo in loco mihi libertus, præclaro imperatori, domum ex hac die bi-duo antè conduxerat: quæ vacua si non fuisset, in campo Martio mihi tabernacu-

lum collocaſſem : nummus interea mihi, Cæſar, neglectis vehiculis triumphalibus, domi manet, & manebit : rationes ad ærarium retuli continuò, ſicut tua lex jubebat ; neque alia ulla in re legi tuæ parui : quas rationes ſi cognoris, intelliges, nemini plus, quàm mihi, litteras profuiſſe : ita enim ſunt perſcriptæ ſcitè, & litteratè, ut ſcriba, ad ærarium qui eas retulit, perſcriptis rationibus, ſecum ipſe, caput ſiniſtrâ manu perfricans, commurmuratus ſit, *Ratio quidem hercle apparet, argentum òixerai.* Hac tu oratione non dubito, quin illum jam adſcendentem in currum poſſis revocare.

XXVI. O tenebræ, ô lutum, ô fordes, ô paterni generis oblite, materni vix memor ! ita nescio quid iſtuc fractum, humile, demiſſum, ſordidum, inferius etiam eſt, quàm ut Mediolanenſi præcone, avo tuo, dignum eſſe videatur. L. Crasſus, homo ſapientiſſimus noſtræ civitatis, ſpiculis propè ſcrutatus eſt Alpes ; ut, ubi hoſtis non erat, ibi triumphi cauſam aliquam quæreretur : eadem cupiditate vir ſummo ingenio præditus, C. Cotta, nullo certo hoſte, flagravir : eorum neuter triumphavit, quòd alteri illum honorem collega, alteri mors ademir. Irrifa eſt abs te paulò antè M. Piſonis cupiditas triumphandi, a qua te longè dixiſti abhorrere :

qui, etiam si minùs magnum bellum gesserat, ut abs te dictum est, tamen istum honorem contemnendum non putavit. Tu eruditior, quàm Piso; prudentior, quàm Cotta; abundantior consilio, ingenio, sapientiâ, quàm Crassus, ea contemnis, quæ illi idiotæ, ut tu appellas, præclara duxerunt.

63. Quòd si reprehendis, quòd cupidi laureæ fuerint, quum bella aut parva, aut nulla gessissent; tu, tantis nationibus subactis, tantis rebus gestis, minimè fructum laborum tuorum, præmia periculorum, virtutis insignia contemnere debuisti. Neque verò contempsisti, licet sis Themistâ sapientior, sed os tuum ferreum senatûs convicio verberari noluidisti. Jam vides, quandoquidem ita mihimet fui inimicus, ut me tecum compararem, & digressum meum, & absentiam, & redditum ita longè tuo præstitisse, ut mihi illa omnia immortalem gloriam dederint, tibi sempiternam turpitudinem inflixerint. Nunc etiam in hac quotidiana, assidua, urbanaque vita splendorem tuum, gratiam, celebritatem domesticam, operam forensẽ, consilium, auxilium, auctoritatem, sententiam senatoriam, nobis, aut, ut verius dicam, cuiquam es infirmissimo, ac desperatissimo antelaturus?

XXVII. Age, senatus odit te, quod

eum tu facere jure concedis, afflicto rem, & perditorem non modò dignitatis, & auctoritatis, sed omnino ordinis, ac nominis sui: videre equites Romani non possunt, quo ex ordine vir præstantissimus & ornatissimus, L. Ælius est, te consule, relegatus: plebs Romana perditum cupit, in cujus tu infamiam ea, quæ per latrones & per servos de me egeras, contulisti: Italia cuncta exsecratur, cujus idem tu superbissimè decreta & preces repudiaſti.

65. Fac hujus odii tanti, ac tam universi periculum, si audes. Instant post hominum memoriam apparatusissimi, magnificentissimique ludi, quales non modò numquam fuerunt, sed ne quomodo fieri quidem posthac possint, possum ullo pacto suspicari. Da te populo, committe ludis. Sibilum metuis? ubi sunt vestræ scholæ? Ne acclametur? ne id quidem est curare philosophi. Manus tibi ne afferantur times: dolor enim est malum, ut disputas: existimatio, dedecus, infamia, turpitudine, verba sunt atque ineptiæ. Sed de hoc non dubito: non audebit accedere ad ludos: convivium publicum non dignitatis gratiâ inibit (nisi fortè, ut cum patribus conscriptis, hoc est, cum amoribus suis, cœnet) sed planè animi sui causâ.

66. Ludos nobis idiotis relinquet: solet

enim in disputationibus suis, oculorum & aurium delectationi abdominis voluptates anteferre: nam, quòd vobis iste tantummodo improbus, crudelis olim furunculus, nunc verò etiam rapax, quòd fordidus, quòd contumax, quòd superbus, quòd fallax, quòd perfidiosus, quòd impudens, quòd audax esse videatur; nihil scitote esse luxuriosius, nihil libidinosius, nihil posterius, nihil nequius.

67. Luxuriam autem in isto nolite hanc cogitare: est enim quædam, quamquam omnis est vitiosa atque turpis, tamen ingenuo ac libero dignior. Nihil apud hunc lautum, nihil elegans, nihil exquisitum (laudabo inimicum) ne magnopere quidem quidquam, præter libidines, sumptuosum: toreuma nullum: maximi calices, & hi, ne contemnere suos videatur, Placentini: exstructa mensa, non conchyliis, aut piscibus, sed multâ carne subrancidâ: servi sordidati ministrant; nonnulli etiam senes: idem coquus, idem atriensis: pistor domi nullus, nulla cella: panis, & vinum a propola, atque de cupa: Græci stipati, quini in lectulis, sæpe plures; ipse solus: bibitur usque eò, dum de folio ministretur: ubi galli cantum audit, avum suum revixisse putat: mensam tolli jubet.

XXVIII. Dicet aliquis, Unde tibi hæc

nota sunt? Non mehercule, contumeliæ causâ describam quemquam, præsertim ingeniosum hominem, atque eruditum, cui generi ego esse iratus, ne si cupiam quidem, possum. Est quidam Græcus, qui cum isto vivit, homo, verè ut dicam (sic enim cognovi) humanus, sed tamdiu, quamdiu cum aliis est, aut ipse secum: is quum istum adolescentem jam tum cum hac diis irata fronte vidisset, non fugit ejus amicitiam, quum esset præsertim appetitus: dedit se in consuetudinem, sic ut prorsus unà viveret, nec ferè ab isto umquam discederet. Non apud indoctos, sed, ut ego arbitror, in hominum eruditissimorum & humanissimorum cœtu loquor. Audistis profectò dici, philosophos Epicureos omnes res, quæ sunt homini expetendæ, voluptate metiri: rectè, an secus, nihil ad nos; aut, si ad nos, nihil ad hoc tempus: sed tamen lubricum genus orationis, adolescenti non acriter intelligenti sæpe præceps.

69. Itaque admissarius iste, simulatque audivit, a philosopho voluptatem tantopere laudari, nihil expiscatus est: sic suos sensus voluptarios omnes incitavit, sic ad illius hanc orationem adhinniit, ut non magistrum virtutis, sed auctorem libidinis a se illum inventum arbitraretur. Græcus primò distinguere, atque dividere illa,

quemadmodum dicerentur : iste claudus (quomodo aiunt) pilam retinere ; quod acceperat , testificari ; tabulas obsignare velle : Epicurum disertim dicere. Est tamen : dicit , ut opinor , se nullum bonum intelligere posse , demptis corporis voluptatibus. Quid multa ? Græcus facilis & valde venustus , nimis pugnax contra senatorem populi Romani esse noluit.

XXIX. Est autem hic , de quo loquor , non philosophiâ solum , sed etiam litteris , quod ferè ceteros Epicureos negligere dicunt , perpolitus. Poema porrò facit ita festivum , ita concinnum , ita elegans , nihil ut fieri possit argutius : in quo reprehendat eum licet , si qui volet , modò leviter , non ut impurum , non ut improbum , non ut audacem , sed ut Græculum , ut assentatorem , ut poetam : devenit , aut potius incidit in istum eodem deceptus supercilio Græcus , atque advena , quo tam sapiens & tanta civitas : revocare se non poterat , familiaritate implicatus ; & simul inconstantiae famam verebatur : rogatus , invitatus , coactus , ita multa ad istum , de isto quoque scripsit , ut omnes libidines , omnia stupra , omnia cœnarum conviviorumque genera , adulteria denique ejus , delicatissimis versibus exprefferit.

71. In quibus , si quis velit , possit istius tamquam in speculo vitam intueri :

ex quibus multa a multis lecta, & audita recitarem, nisi vererer, ne hoc ipsum genus orationis, quo nunc utor, ab hujus loci more abhorreret; & simul de ipso, qui scripsit, detrahi nolo: qui si fuisset in discipulo comparando meliore fortunâ, fortasse austerior & gravior esse potuisset: sed eum casus in hanc consuetudinem scribendi induxit, philosopho valde indignam; si quidem philosophia, ut fertur, virtutis continet, & officii, & bene vivendi disciplinam: quam qui profitetur, gravissimam mihi sustinere personam videtur.

72. Sed idem casus illum ignarum quid profiteretur, quum se philosophum esse diceret, istius impurissimæ atque intemperantissimæ pecudis cœno & sordibus inquinavit: qui modò quum res gestas consulatûs mei collaudasset; quæ quidem laudatio hominis turpissimi mihi ipsi erat pene turpis; *Non ulla tibi, inquit, invidia nocuit, sed versus tui.* Nimis magna pœna, te consule, constituta est, sive malo poëtæ, sive libero. Scripsisti enim, *Cedant arma togæ.* Quid tum? Hæc res tibi fluctus illos excitavit. At hoc nusquam opinor scriptum fuisse in illo elogio, quod, te consule, in sepulcro reipublicæ incisum est, *Velitis, jubeatis, ut, quòd M. Cicero versum fecerit, sed, quòd vindicarit.*

XXX. Verumtamen, quoniam te non Aristarchum,

Aristarchum, sed Phalarim grammaticum habemus, qui non notam apponas ad malum versum, sed poetam armis persequare: scire cupio, quid tandem isto in versu reprehendas, *Cedant arma togæ*. Tuæ dicis, inquit, togæ summum imperatorem esse cessurum. Quid nunc te, asine, literas doceam? non opus est verbis, sed fustibus: non dixi hanc togam, quâ sum amictus; nec arma, scutum & gladium unius imperatoris: sed quòd pacis est insigne & otii, toga; contrà autem arma, tumultûs atque belli; more poetarum locutus, hoc intelligi volui, bellum ac tumultum paci atque otio concessurum. Quære ex familiari tuo, Græco illo poeta: probabit genus ipsum, & agnoscet, neque te nihil sapere mirabitur.

74. At in illo altero, inquit, hæres, *Concedat laurea laudi*. Immo mehercule, habeo tibi gratiam: hærerem enim, nisi tu expedisses: nam quum tu timidus ac tremens tuis ipse furacissimis manibus detractam e cruentis fascibus lauream ad portam Esquilinam abjecisti; indicasti, non modò amplissimæ, sed etiam minimæ laudi lauream concessisse. Atque istâ ratione hoc tamen intelligi, scelerate, vis, Pompeium inimicum mihi isto versu esse factum; ut, si versus mihi nocuerit, ab eo, quem is versus offenderit, videatur

mihi pernicies esse quæsita. Omitto, nihil istum versum pertinuisse ad illum: non fuisse meum, quem, quantum potuissem, multis sæpe orationibus scriptisque decorassem, hunc uno violare versu. Sed sit offensus: primò nonne compensabit cum uno versiculo tot mea volumina laudum suarum? Quòd si est commotus, ad perniciemne non dicam amicissimi, non ita de sua laude meriti, non ita de republica, non consularis, non senatoris, non civis, non liberi: in hominis caput ille tam crudelis propter versum fuisset?

XXXI. Tu quid, tu apud quos, tu de quo dicas, intelligis? complecteris amplissimos viros ad tuum, & Gabinii scelus, neque id occultè: nam paulò antè dixisti, me cum iis configere, quos despicere; non attingere eos, qui plus possent, quibus iratus esse deberem. Quorum quidem (quis enim non intelligit, quos dicas?) quamquam non est una causa omnium, tamen est omnium mihi probata.

76. Me Cn. Pompeius, multis obsistentibus ejus erga me studio atque amorì, semper dilexit, semper suâ conjunctione dignissimum judicavit, semper non modò incolumem, sed etiam amplissimum, atque ornatissimum voluit esse: vestræ fraudes, vestrum scelus, vestræ criminationes insidiarum mearum, illius periculorum,

nefariè fictæ, simul eorum, qui familiaritatis licentiâ, suorum improbissimorum sermonum domicilium in auribus ejus, impulsu vestro, collocaverunt, vestræ cupiditates provinciarum effecerunt, ut ego excluderer, omnesque, qui me, qui illius gloriam, qui rempublicam salvam esse cupiebant, sermone atque aditu prohiberentur.

77. Quibus rebus est perfectum, ut illi planè suo stare judicio non liceret, quum certi homines non studium ejus a me alienassent, sed auxilium retardassent. Nonne ad te L. Lentulus, qui tum erat prætor, non Q. Sanga, non L. Torquatus pater, non M. Lucullus venit? qui omnes ad eum, multique mortales oratum in Albanum, obsecratumque venerant, ne meas fortunas defereret, cum reipublicæ salute conjunctas: quos ille ad te, & ad tuum collegam remisit, ut causam publicam susciperetis, ut ad senatum referretis: se contra armatum tribunum plebis sine consilio publico decertare nolle: consulibus ex senatusconsulto rempublicam defendentibus, se arma sumpturum.

78. Ecquid infelix recordaris, quid responderis? in quo illi omnes quidem, sed Torquatus præter ceteros, furebat contumaciâ responsi tui, te non esse tam fortem, quàm ipse Torquatus in consulatu

fuiſſet , aut ego : nihil opus eſſe armis ; nihil contentione : me poſſe iterum rempublicam ſervare , ſi ceſſiſſem : infinitam cædem fore , ſi reſtitiſſem : deinde ad extremum , neque ſe , neque generum , neque collegam ſuum , tribuno plebis defuturum. Hic tu , hoſtis , ac proditor , aliis me inimiciorem , quàm tibi , debere eſſe dicis ?

XXXII. Ego C. Cæſarem non eadem de republica ſenſiſſe , quæ me , ſcio : ſed tamen , quod jam de eo , his audientibus , ſæpe dixi , me ille ſui totius conſulatûs , eorumque honorum , quos cum proximis communicavit , ſocium eſſe voluit , detulit , invitavit , rogavit. Non ſum ego , propter nimiam fortasſe conſtantiaë cupiditatem , adductus ad cauſam : non poſtulabam , ut ei cariſſimus eſſem , cujus ego ne beneficiis quidem ſententiam meam tradidiſſem. Adducta res in certamen , te conſule , putabatur , utrùm , quæ ſuperiore anno ille gessiſſet , manerent , an reſcinderentur. Quid loquar plura ? ſi tantum ille in me eſſe uno roboris & virtutis putavit , ut ea , quæ ipſe geſſerat , conciderent , ſi ego reſtituſſem ; cur ei non ignoſcam , ſi antepoſuit ſuam ſalutem meæ ?

80. Sed præterita omitto. Me ut Cneius Pompeius omnibus ſuis ſtudiis , laboribus ,

vitæ periculis complexus est, quum municipia pro me adiret, Italiæ fidem imploraret, P. Lentulo consuli, auctori salutis meæ, frequens assideret, senatui sententiam præstaret, in concionibus non modò se defensorem salutis meæ, sed etiam supplicem pro me profiteretur; hujus voluntatis eum, quem multum posse intelligebat, mihi non inimicum esse cognorat, socium sibi & adiutorem C. Cæsarem adjunxit. Jam vides, me tibi non inimicum, sed hostem; illis, quos describis, non modò non iratum, sed etiam amicum esse debere: quorum alter, id quod meminero semper, æquè mihi fuit amicus, ac sibi; alter, id quod obliviscar aliquando, sibi amicior, quàm mihi. Deinde hoc ita fit, ut viri fortes, etiamsi ferro inter se cominus decertarint, tamen illud contentionis odium simul cum ipsa pugna, armisque ponant. Atque me ille odisse numquam potuit, ne tum quidem, quum dissidebamus. Habet hoc virtus (quam tu ne de facie quidem nosti) ut viros fortes species ejus, & pulchritudo etiam in hoste posita delectet.

XXXIII. Equidem dicam ex animo, Patres conscripti, quod sentio, & quod vobis audientibus sæpe jam dixi. Si mihi numquam amicus C. Cæsar fuisset, sed semper iratus: si aspernaretur amicitiam

meam, seseque mihi implacabilem, inexpiabilemque præberet, tamen ei, quum tantas res gessisset, gereretque quotidie, non amicus esse non possem; cujus ego imperio non Alpium vallum contra adscensum transgressionemque Gallorum, non Rheni fossam, gurgitibus illis redundantem, Germanorum immanissimis gentibus objicio, & oppono.

82. Perfecit ille, ut, si montes resedissent, amnes exaruisissent, non naturæ præsidio, sed victoriâ suâ, rebusque gestis Italiam munitam haberemus. Sed, quum me expetat, diligat, omni laude dignum putet, tu me a tuis inimiciis ad simultatem revocabis? sic tuis sceleribus reipublicæ præterita fata refricabis? quod quidem tu, qui bene nosse conjunctionem meam & Cæsaris, eludebas, quum a me trementibus omnino labris, sed tamen, cur tibi nomen non deferrem, requirebas. Quamquam, quod ad me attinet:

Numquam istam imminuam curam infuturo tibi:

tamen est mihi considerandum, quantum illi, tantis reipublicæ negotiis, tantoque bello impedito, ego homo amicissimus, sollicitudinis atque oneris imponam: nec despero tamen, quamquam languet juvenus, nec perinde, ac debebat, in laudis & gloriæ cupiditate versatur, futuros

aliquos, qui abjectum hoc cadaver consularibus spoliis nudare non nolint, præsertim tam afflicto, tam infirmo, tam enervato reo: qui te ita gesseris, ut timeres, ne indignus beneficio videreris, nisi ejus, a quo missus eras, simillimus existisses.

XXXIV. An verò tu parum putas investigatas esse a nobis labes imperii tui, stragesque provinciæ? quas quidem nos non vestigiis odorantes ingressus tuos, sed totis volutionibus corporis, & cubilibus persecuti sumus. Notata a nobis sunt & prima illa scelera in adventu, quum, acceptâ pecuniâ a Dyrrhachinis ob necem hospitis tui Platoris, ejus ipsius domum evertisti, cujus sanguinem addixeras; eumque, servis symphoniacis, & aliis muneribus acceptis, timentem, multumque dubitantem confirmasti, & Thesalonicam fide tuâ venire jussisti: quem ne majorum quidem more supplicio affecisti, quum miser ille securibus hospitis sui cervices subjicere gestiret; sed ei medico, quem tecum eduxeras, imperasti, ut venas hominis incideret.

84. Tum quidem tibi etiam accessio fuit ad necem Platoris, Pleuratus ejus comes; quem necasti verberibus, summâ senectute confectum. Idemque tu Rabocentum, Bessicæ gentis principem, quum te

trecentis talentis regi Cotto vendidisses , securi percussisti ; quum ille ad te legatus in castra venisset , & tibi magna præsidia & auxilia , a Bessis , peditum equitumque polliceretur : neque eum solùm , sed etiam ceteros legatos , qui simul venerant ; quorum omnium capita regi Cotto vendidisti. Densetis , quæ natio semper obediens huic imperio , etiam in illa omnium barbarorum defectione Macedonica , C. Sentium prætorem tutata est , nefarium bellum & crudele intulisti ; eisque quum fidelissimis sociis uti posses , hostibus uti acerrimis maluisti : ita perpetuos defensores Macedoniae , vexatores ac perditores effecisti : vestigalia nostra perturbarunt , urbes ceperunt , vastarunt agros , socios nostros in servitutem abduxerunt , familias abriperunt , pecus abegerunt ; Thessalonicenses , quum oppido desperassent , munire arcem coegerunt.

XXXV. A te Jovis Urii fanum antiquissimum barbarorum , sanctissimumque direptum est : tua scelera dii immortales in nostros milites expiaverunt ; qui quum uno genere morbi affligerentur , neque se recreare quisquam posset , qui semel incidisset ; dubitabat nemo , quin violati hostes , legati necati , pacati atque socii nefario bello lacerati , fana vexata , hanc tantam efficerent vastitatem. Cognoscis

ex particula parva, scelerum & crudelitatis tuæ genus universum.

86. Quid avaritiæ, quæ criminibus infinitis implicata est, summam nunc explicem? Generatim ea, quæ maximè nota sunt, dicam. Nonne festertium centies & octogies, quod, quasi vasarii nomine, in venditione mei capitis adscripseras, ex ærario tibi attributum, Romæ in quæstu reliquisti? nonne quum cc. talenta tibi Apolloniatae Romæ dedissent, ne pecunias creditas solverent, ultro Fufidium, equitem Romanum, hominem ornatissimum, creditorem, debitoribus suis addixisti? nonne, hiberna quum legato præfectoque tradidisses, evertisti miseras funditus civitates; quæ non solum bonis sunt exhaustæ, sed etiam nefarias libidinum contumelias, turpitudinesque subierunt? Qui modus tibi fuit frumenti æstimandi? qui honorarii? si quidem potest vi & metu extortum, honorarium nominari: quod quum peræquè omnes, tum acerbissimè Bœotii & Byzantii, Cherronenses, Thessalonica sensit: unus tu dominus, unus æstimator, unus venditor, tota in provincia, per triennium, frumenti omnis fuisti.

XXXVI. Quid ego rerum capitalium quæstiones, reorum pactiones, redemptiones, acerbissimas damnationes, libidinosissimas liberationes proferam? tantum lo-

cum aliquem quum mihi notum senferis; tecum ipse licebit, quot in eo genere, & quanta sint crimina, recordere. Quid? illam armorum officinam ecquid recordaris, quum omni totius provinciæ pecore compulso, pellium nomine, omnem quæstum illum domesticum paternumque renovasti? videras enim grandis jam puer; bello Italico, repleti quæstu vestram domum; quum pater armis faciendis tuus præfuiſſet. Quid? vectigalem provinciam, singulis rebus, quæcumque venirent, certo portorio imposito, ſervis tuis publicanis a te factam eſſe meministi?

88. Quid? centuriatus palam venditos? quid? per tuum ſervulum ordines assignatos? quid? ſtipendium militibus per omnes annos a civitatibus, mensis palam propositis, eſſe numeratum? Quid illa in Pontum profectio, & conatus tuus? quid debilitatio, atque abjectio animi tui, Macedoniâ prætoriâ nuntiata, quum tu non ſolum, quodd tibi ſuccederetur, ſed quodd Gabinio non ſuccederetur, exſanguis & mortuus concidiſti? quid quæſtor ædilitius rejectus? præpoſitus legatorum tuorum optimus, abs te quiſque violatus? tribuni militum non recepti? M. Bæbius, vir fortis, interfectus juffu tuo?

89. Quid, quodd tu toties diffidens ac desperans rebus tuis, in ſordibus, lamen-

tis, luctuque jacuisti? quòd populari illi sacerdoti sexcentos ad bestias amicos, sociosque misisti? quid, quòd, quum sustentare vix posses mœrorem tuum, doloremque decessionis, Samothraciam te primum, pòst inde Thasum cum tuis teneris saltatoribus, & cum Autobulo, Athamante, & Timocle, formosis fratribus, contulisti? quid, quòd, quum inde te recipiens, in villa Leucadia, quæ fuit uxoris Ægisthi, jacuisti mœrens aliquot dies; atque inde obsoletus Theffalonicam, omnibus inscientibus, noctuque venisti? qui quum concursum plorantium, ac tempestatem quærelarum ferre non posses, in oppidum deviam Berœam profugisti: quo in oppido quum tibi spe falsâ, quòd Q. Ancharium non esse successurum putares, animos rumor inflasset; quo te modo ad tuam intemperantiam, scelerate, innovasti?

XXXVII. Mitto aurum coronarium, quod te diutissime torsit, quum modò velles, modò nolles: lex enim generi tui & decerni, & accipere vetabat, nisi decreto triumpho. In quo tu, acceptâ tamen, & devoratâ pecuniâ, ut in Achæorum centum talentis, evomere non poteras: vocabula tantum pecuniarum, & genera mutabas. Mitto diplomata tota in provincia passim data: mitto numerum navium,

summamque prædæ : mitto rationem exacti, imperatique frumenti : mitto ereptam libertatem populis, ac singulis, qui erant affecti præmiis nominatim, quorum nihil est, quod non sit lege Juliâ, ne fieri liceat, sancitum diligenter.

91. Ætoliâ, quæ procul a barbaris disjuncta gentibus in sinu pacis posita, medio ferè Græciæ gremio continetur (ô pœna, ô furia sociorum!) decedens, miseram perdidisti. Arsinoam, Stratum, Nau-pactum, ut modò tute indicasti, nobiles urbes, atque plenas, fateris ab hostibus esse captas : quibus autem hostibus? nempe iis, quos tu Ambraciæ sedens, primo tuo adventu ex oppidis Agrianum, atque Dolopum demigrare, & aras, & focos relinquere coegisti. Hoc tu in exitu, præclare imperator, quum tibi ad pristinas clades accessio fuisset Ætoliæ repentinus interitus, exercitum dimisisti : neque ullam pœnam, quæ tanto facinori deberetur, non maluisti subire, quàm numerum tuorum militum, reliquiasque cognoscere.

XXXVIII. Atque ut duorum Epicureorum similitudinem in re militari, imperioque videatis : Albucius, quum in Sardinia triumphasset, Romæ damnatus est : hic, quum similem exitum spectaret, in Macedonia tropæa posuit; eaque, quæ bellicæ laudis, victoriæque omnes gentes

insignia & monumenta esse voluerunt, noster hic præposterus imperator, amissorum oppidorum, cæsarum legionum, provinciæ præsidio & reliquis militibus orbatæ, ad sempiternum dedecus sui generis & nominis, funesta indicia constituit: idemque, ut esset, quod in basi tropæorum incidi inscribique posset, Dyrrachium, ut venit, decedens, obsessus est ab iis ipsis militibus, quos paulò antè Torquato respondit beneficii causâ ab se esse dimissos: quibus quum juratus affirmasset, se, quæ deberentur, postero die persoluturum, domum se abdidit: inde nocte intempestâ, crepidatus, veste servili, navem conscendit, Brundisiumque vitavit, & ultimas Adriatici maris oras petivit.

93. Quum interim Dyrrachii milites domum, in qua istum esse arbitrabantur, obsidere cœperunt, &, quum latere hominem putarent, ignes circumdederunt: quo metu commoti Dyrrachini, profugisse noctu crepidatum imperatorem indicaverunt. Illi autem statuam, istius persimilem, quam stare celeberrimo in loco voluerat, ne suavissimi hominis memoria moreretur, deturbant, affligunt, comminuunt, dissipant: sic odium, quod in ipsum attulerant, id in ejus imaginem ac simulacrum profuderunt.

94. Quæ quum ita sint, non dubito,

quin, quum hæc, quæ excellunt, me nosse videas, non existimes, mediam illam partem & turbam flagitiorum tuorum mihi esse inauditam. Nihil est, quod me hortere; nihil est, quod invites: admoneri me satis est: admonebit autem nemo alius, nisi reipublicæ tempus; quod mihi quidem magis videtur, quam tu umquam arbitratus es, appropinquare.

XXXIX. Ecquid vides, ecquid sentis, lege judiciariâ latâ, quos posthac iudices simus habituri? non æquè legetur quisquis voluerit; nec, quisquis noluerit, non legetur: nulli conjiçientur in illum ordinem, nulli eximentur: non ambitio ad gratiam, non iniquitas ad similitudinem conjiçietur: iudices judicabunt ii, quos lex ipsa, non quos hominum libido delegerit. Quod quum ita sit, mihi crede, neminem invitus invitabis: res ipsa, & reipublicæ tempus aut me ipsum, quod nolim, aut alium quempiam, aut invitabit, aut dehortabitur.

95. Equidem, ut paulò antè dixi, non eadem supplicia esse in hominibus existimo, quæ fortasse plerique, damnationes, expulsionones, necesse: denique nullam mihi pœnam videtur habere id, quod accidere innocenti, quod forti, quod sapienti, quod bono viro & civi potest. Damnatio ista; quæ in te flagitatur, obtigit P. Rutilio;

quod specimen habuit hæc civitas innocentiae : major mihi iudicum , & reipublicae poena illa visa est , quàm Rutilii. L. Optimus ejectus est e patria , is , qui praetor & consul , maximis rempublicam periculis liberarat : non in eo , cui facta est injuria , sed in iis , qui fecerunt , sceleris ac conscientiae poena permansit. At contra bis Catilina absolutus : emissus etiam ille auctor tuus provinciae , quum stuprum Bonae deae pulvinaribus intulisset. Quis fuit in tanta civitate , qui illum incesto liberatum , non eos , qui ita judicarunt , pari scelere adstrictos arbitraretur ?

XL. An ego exspectem , dum de te quinque & septuaginta tabellae diribeantur , de quo jampridem omnes mortales omnium generum , ætatum , ordinum ; judicaverunt ? quis enim te aditu , quis ullo honore , quis denique communi salutatione dignum putet ? omnes memoriam confusulatus tui , facta , mores , faciem denique , ac nomen a republica detestantur : legati , qui unà fuere , alienati : tribuni militum inimici : centuriones , & si qui ex tanto exercitu reliqui milites existunt , non dimissi abs te , sed dissipati , te oderunt , tibi pestem exoptant , te execrantur. Achaia exhausta : Thessalia vexata : laceratae Athenae : Dyrrachium , & Apollonia exinanita : Ambracia direpta : Parthini , & Bullidenses

illusi : Epirus excisa : Locri, Phocii, Bœotii, exusti : Acarnania, Amphilochia, Perhæbia, Athamanumque gens, vendita : Macedonia condonata barbaris : Ætolia amissa : Dolopes, finitimique montani oppidis atque agris exterminati : cives Romani, qui in iis locis negotiantur, te unum, solum, suum depeculatorem, vexatorem, prædonem, hostem, venisse senserunt.

97. Ad horum omnium judicia tot, atque tanta, domesticum iudicium accessit sententiæ damnationis tuæ : occultus adventus, furtivum iter per Italiam, introitus in urbem desertus ab amicis, nullæ ad senatum e provincia litteræ, nulla extrinis æstivis gratulatio, nulla triumphimentionis : non modò quid gesseris, sed ne quibus in locis quidem fueris, dicere audes. Ex illo fonte & seminario triumphorum, quum arida folia laureæ retulisses, quum ea abjecta ad portam reliquisti, tum tu ipse de te *fecisse videri*, pronuntiavisti : qui si nihil gesseras dignum honore, ubi exercitus ? ubi sumptus ? ubi imperium ? ubi illa uberrima supplicationibus, triumphisque provincia ? sin autem aliquid sperare volueras, si cogitaras id, quod imperatoris nomen, quod laureati fasces, quod illa tropæa, plena dedecoris & risûs, te commentatum esse declarant, quis

te miserior, quis te damnator, qui neque scribere ad senatum, a te bene rempublicam esse gestam, neque præsens dicere ausus es?

XLI. An tu mihi, cui semper ita persuasum fuerit, non eventis, sed factis, cuiusque fortunam ponderari, dicere audes, neque in tabellis paucorum judicum, sed in sententiis omnium civium, famam nostram, fortunamque pendere? te indemnatum videri putas, quem socii, quem fœderati, quem liberi populi, quem stipendiarii, quem negotiatores, quem publicani, quem universa civitas, quem legati, quem tribuni militares, quem reliqui milites, qui ferrum, qui famem, qui mortem effugerunt, omni cruciatu dignissimum putant? cui non apud senatum, non apud ullum ordinem, non apud equites Romanos, non in urbe, non in Italia, maximorum scelerum venia ulla ad ignoscendum dari possit? qui se ipse oderit, qui metuat omnes, qui suam causam nemini committere audeat, qui se ipse condemnet?

99. Numquam ego sanguinem expetivium: numquam illud extremum, quod posset esse improbis & probis commune, supplicium legis ac iudicii, sed abjectum, contemptum, despectum a ceteris, a te ipso desperatum & relictum, circumspec-

498 *ORATIO IN L. PISONEM.*

tantem omnia; quidquid increpuisset, pertimescentem; diffidentem tuis rebus; sine voce, sine libertate, sine auctoritate, sine ulla specie consulari; horrentem, trementem, adulantem omnes, videre te volui: vidi. Quare, si tibi evenerit, quod metuis, ne accidat; equidem non molestè feram: sin id tardius fortè fiet, fruar tamen tuâ indignitate; nec minùs libenter metuentem videbo, ne reus fias, quàm reum; nec minùs lætabor, quum te semper sordidum, quàm si paulisper sordidatum viderem.





PRO CN. PLANCIO.

ORATIO TRIGESIMA SEPTIMA.

Quum ædilitatem simul peterent Cneius Plancius & M. Juventius Laterensis, creatus ædilis est Plancius, Laterensis præteritus: quâ ille repulsâ commotus, Plancium de sodalitiis accusavit, quod inter ambitûs crimina, gravissimum erat, ut inter majestatis crimina, perduellio. Patrocinium Cicero suscepit, egitque causam diligenter, memor ejus temporis, quo quæstor in Macedonia Plancius, ejectum lege Clodiâ complexus est, fovitque omni genere officii. Acta causa est L. Domitio, Appio Claudio coff. anno urbis 699. Ciceronis 53. In ea quæstor fuit C. Flavius ab accusatore editus, & ipsi quoque judi-

ces edititii : hanc enim Licinia lex facultatem accusatori dabat in crimine de sodalitiis. MANUTIUS.

I. **Q**UUM propter egregiam & singularem Cn. Plancii, Judices, in mea salute custodienda fidem, tam multos & bonos viros ejus honori viderem esse fautores; capiebam animo non mediocrem voluptatem, quòd cujus officium mihi saluti fuisset, ei meorum temporum memoriam suffragari videbam. Quum autem audirem, meos partim inimicos, partim invidos, huic accusationi esse fautores, eamdemque rem adversariam esse in judicio Cn. Plancio, quæ in petitione fuisset adjutrix; dolebam, Judices, & acerbè ferebam, si hujus salus ob eam ipsam causam esset infestior, quòd is meam salutem atque vitam suâ benevolentia, præsidio, custodiaque texisset.

2. Nunc autem vester, Judices, conspectus, & confessus iste reficit, & recreat mentem meam, quum intueor & contemplor unumquemque vestrum: video enim hoc in numero neminem, cui mea salus cara non fuerit; cujus non exstet in me summum meritum; cui non sim obstrictus memoriâ beneficii sempiternâ. Itaque non extimesco, ne Cn. Plancio custodia meæ

salutis apud eos obsit, qui me ipsum maximè saluum videre voluerunt; sæpiusque, Judices, mihi venit in mentem, admirandum esse, M. Laterensem, hominem studiosissimum & dignitatis, & salutis meæ, reum sibi hunc potissimum delegisse, quàm metuendum, ne vobis id ille magnâ ratione fecisse videatur.

3. Quamquam mihi non fumo tantum, Judices, neque arrogo, ut Cn. Plancium suis erga me meritis impunitatem consecuturum putem: nisi ejus integerrimam vitam, modestissimos mores, summam fidem, continentiam, pietatem, innocentiam, ostendero; nihil de pœna recusabo: sin omnia præstitero, quæ sunt a bonis viris expetenda; petam a vobis, Judices, ut, cujus misericordiâ salus mea custodita sit, ei vos vestram misericordiam, me deprecante, tribuatis. Equidem ad reliquos labores, quos in hac causa majores suscipio, quàm in ceteris, etiam hanc molestiam assumo, quòd mihi non solum pro Cn. Plancio dicendum est, cujus ego salutem non secus ac meam tueri debeo; sed etiam pro me ipso, de quo accusatores plura pene, quàm de re, reoque dixerunt.

II. Quamquam, Judices, si quid est in me ipso ita reprehensum, ut id ab hoc sejunctum sit, non me id magnopere conturbet: non enim timeo, ne, quia per-

raro grati homines reperiantur, idcirco, quum me nimium gratum illi esse dicant, id mihi criminofum esse possit: quæ verò ita sunt agitata ab illis, ut aut merita Cneii Plancii erga me minora esse dicerent, quàm a me ipso prædicarentur, aut, si essent summa, negarent ea tamen ita magni, ut ego putarem, ponderis apud vos esse debere; hæc mihi sunt tractanda, Judices, & modicè, ne quid ipse offendam; & tum denique, quum respondero criminibus, ne non tam innocentia reus suâ, quàm recordatione meorum temporum, defensus esse videatur.

5. Sed mihi in causa facili, atque explicatâ, perdifficilis, Judices, & lubrica defensionis ratio proponitur: nam, si tantummodo mihi necesse esset contra Latensensem dicere, tamen id ipsum esset in tanto usu nostro, tantaque amicitia molestum: vetus enim est lex illa justæ, veræque amicitiae, quæ mihi cum illo jamdiu est, ut idem amici semper velint; neque est ullum certius amicitiae vinculum, quàm consensus, & societas consiliorum, & voluntatum. Mihi autem non modò id est in hac re molestissimum, contra illum dicere, sed multò illud magis, quòd in ea causa contrà dicendum est, in qua quædam hominum ipsorum videtur facienda esse contentio.

6. Quærit enim Laterensis, atque hoc uno maximè urget, quâ se virtute, quâ laude Plancius, quâ dignitate superarit. Ita, si cedo illius ornamentis, quæ multa & magna sunt, non solum hujus dignitatis jactura facienda est, sed etiam largitionis recipienda suspicio est: sin hunc illi antepono; contumeliosa habenda est oratio, & dicendum est id, quod ille me flagitat, Laterensem a Plancio dignitate esse superatum. Ita aut amicissimi hominis existimatio offendenda est, si illam accusationis conditionem sequar, aut optimè de me meriti salus deferenda est.

III. Sed ego, Laterensis, cæcum me, & præcipitem ferri confitear in causa, si te aut a Plancio, aut ab ullo, dignitate potuisse superari dixerò. Itaque discedam ab ea contentione, ad quam tu me vocas, & veniam ad illam, ad quam me causa ipsa deducit. Quid tu? an dignitatis judicem putas esse populum? Fortasse nonnumquam est. Utinam verò semper esset! sed est perrarò; & si quando est, in iis magistratibus est mandandis, quibus salutem suam committi putat: his levioribus comitiis, diligentia & gratia petitorum honos paritur; non iis ornamentis, quæ esse in te videmus. Nam, quod ad populum pertinet, semper dignitatis iniquus judex est, qui aut invidet, aut favet.

8. Quamquam nihil potes in te, Laterensis, constituere, quod sit proprium laudis tuæ, quin id tibi sit commune cum Plancio. Sed hoc totum agetur alio loco: nunc tantum disputo de jure populi, qui & potest, & solet nonnumquam dignos præterire, nec, si a populo præteritus est, quem non oportuit, a iudicibus condemnandus est, qui præteritus non est. Nam si ita esset; quod patres apud majores nostros tenere non potuerunt, ut reprehensores essent comitiorum, id haberent iudices; vel quod multò etiam minùs est ferendum: tum enim magistratum non gerebat is, qui ceperat, si patres auctores non erant facti; nunc postulatur a vobis, ut ejus exsilio, qui creatus sit, iudicium populi Romani reprehendatis. Itaque quamquam, quâ nolui, januâ sum ingressus in causam, sperare videor, tantum abfuturam esse orationem meam a minima suspitione offensionis tuæ, te ut potius objurgem, quòd iniquum in discrimen adducas dignitatem tuam, quàm ut ego eam ullâ contumeliâ coner attingere.

IV. Tu continentiam, tu industriam, tu animum in rempublicam, tu virtutem, tu innocentiam, tu fidem, tu labores tuos, quòd ædilis non sis factus, fractos esse, & abjectos, & repudiatos putas? Vide tandem, Laterensis, quantum ego a te dissentiam.

disſentiam. Si, medius fidiuſ, decem ſoli eſſent in civitate viri boni, ſapientes, juſti, graves, qui te indignum ædilitate judicaviſſent, graviuſ de te judicatum putarem, quàm eſt hoc, quod tu metuiſ, ne a populo judicatum eſſe videatur: non enim comitiuſ judicat ſemper populuſ, ſed movetur plerumque gratiâ, cedit precibuſ; facit eoſ, a quibuſ eſt maximè ambituſ: denique, ſi judicat, non delectu aliquo, aut ſapientiâ ducitur ad judicandum, ſed impetu nonnumquam, & quadam etiam temeritate. Non eſt enim conſilium in vulgo, non ratio, non diſcrimen, non diligentia; ſemperque ſapienteſ ea, quæ populuſ feciſſet, ferenda, non ſemper laudanda duxerunt. Quare quum te ædilem fieri oportuiſſe dicuſ, populi culpam, non competitoriſ, accuſaſ.

10. Ut fueriſ dignior, quàm Planciſ; de quo ipſo ita tecum contendam paulò poſt, ut conſervem dignitatem tuam: ſed, ut fueriſ dignior, non competitor, a quo eſ victuſ, ſed populuſ, a quo eſ præterituſ, in culpa eſt. In quo primùm illud debeſ putare, comitiuſ, præſertim ædilitiſ, ſtudiuſ eſſe populi, non judiciuſ; eblandita illa, non enucleata eſſe ſuffragia; eoſ, qui ſuffragiuſ ferant, quid cuique ipſi debeant, conſiderare ſæpiuſ, quàm quid cuique a republica videatur de-

beri: sin autem mavis esse iudicium; non tibi id rescindendum est, sed ferendum.

11. Malè iudicavit populus: at iudicavit. Non debuit: at potuit. Non fero: at multi clarissimi & sapientissimi cives tulerunt: est enim hæc conditio liberorum populorum, præcipuéque hujus principis populi, & omnium gentium domini, ac victoris, posse suffragiis vel dare, vel detrudere, quod velit, cuique: nostrum est autem, qui in hac tempestate populi jactemur ac fluctibus, ferre modicè populi voluntates, allicere alienas, retinere partas, placare turbatas: honores si magni non putemus, non fervire populo; sin eos expetamus, non defatigari supplicando.

V. Venio nunc ad ipsius populi partes, ut illius contra te oratione potius, quàm meâ, disputem; qui si tecum congredia-
tur, & si unâ voce loqui possit, hæc dicat: Ego tibi, Laterensis, Plancium non anteposui; sed, quum essetis æquè boni viri, meum beneficium potius ad eum detuli, qui a me contenderat, quàm ad eum, qui mihi non nimis submisit supplicat. Respondebis, credo, te splendore & vetustate familiæ fretum, non valde ambiendum putasse: at verò te ille ad sua instituta, suorumque majorum exempla revocabit: semper se dicet rogari, semper sibi supplicari voluisse: M. Sejum, qui ne

equestrem quidem splendorem incolumem a calamitate iudicii retinere potuisset, homini nobilissimo, innocentissimo, eloquentissimo, M. Pisoni, prætulisse: præposuisse se Q. Catulo, summa in familia nato, sapientissimo & sanctissimo viro, non dico C. Seranum non stultissimum hominem (fuit enim & animi satis magni, & consilii) sed Cn. Manlium, non solum ignobilem, verum sine virtute, sine ingenio, vitâ etiam contemptâ ac sordidâ.

13. Desiderarunt te, inquit, oculi mei, quum tu esses Cyrenis: me enim, quàm socios, tuâ frui virtute malebam; &, quò plus intererat, eò plus aberas a me; certè non videbam. Deinde sitientem me virtutis tuæ deseruisti, ac dereliquisti: cœperas enim petere tribunatum plebis temporibus iis, quæ istam eloquentiam & virtutem requirebant; quam petitionem quum reliquisses, si hoc iudicasti, tanta in tempestate te gubernare non posse; de virtute tua dubitavi: si nolle; de voluntate: sin, quod magis intelligo, temporibus te aliis reservasti; ego quoque, inquam, & respublica ad ea te tempora revocavi, ad quæ tu te ipse servaras. Pete igitur eum magistratum, in quo mihi magnæ utilitati esse possis: ædiles quicumque erunt, iidem mihi sunt grati: tribuni plebis permagni interest, qui sint: quare aut redde mihi,

quod ostenderas ; aut si , quod mea minùs interest , id te magis fortè delectat , reddam tibi istam ædilitatem , etiam negliger petenti : sed amplissimos honores , ut pro dignitate tua consequare , condiscas censeo mihi paulò diligentius supplicare.

• VI. Hæc populi oratio est , mea verò , Laterensis , hæc : Quare victus sis , non debere judicem quærere , modò ne largitione sis victus : nam , si , quotiescumque præteritus erit is , qui non debuerit præteriri , toties oportebit , eum , qui factus erit , condemnari ; nihil jam est , quòd populo supplicetur ; nihil , quòd diribitio , nihil quòd supplicatio magistratum , renuntiatio suffragiorum expectetur : simul ut qui sint professi videro , dicam.

15. Hic familiâ consulari est , ille prætoriâ : reliquos video esse ex equestri loco : sunt omnes sine macula , sunt æquè boni viri , atque integri ; sed servari necesse est gradus : cedat consulari generi prætorium , nec contendat cum prætorio equester locus. Sublata sunt studia , extinctæ suffragationes , nullæ contentiones , nulla libertas populi in mandandis magistratibus , nulla expectatio suffragiorum : nihil , ut plerumque evenit , præter opinionem accidet : nulla erit posthac varie-

tas comitiorum. Sin hoc persæpe accidit, ut & factos aliquos, & non factos esse miremur: si campus, atque illæ undæ comitiorum, ut mare profundum & immensum, sic effervescent quodam quasi æstu, ut ad alios accedant, ab aliis autem recedant; in tanto nos impetu studiorum, & motu temeritatis, modum aliquem, & consilium, & rationem requiramus?

16. Quare noli me ad contentionem vestram revocare, Laterensis. Etenim, si populo grata est tabella, quæ frontes aperit hominum, mentes tegit; datque eam libertatem, ut, quod velint, faciant; promittant autem, quod rogentur: cur tu id in iudicio ut fiat exprimis, quod non fit in campo? Hic, quàm ille, dignior, perquam grave est dictu. Quomodo igitur est æquius? Sic, credo, quod agitur, quod satis est iudici; hic factus est. Cur iste potius, quàm ego? Vel nescio, vel non dico, vel denique, quod mihi gravissimum esset sic dicere, sed impunè tamen deberem dicere: Non rectè. Nam quid assequer, si illâ extremâ defensione uterer, populum, quod voluisset, fecisse, non quod debuisset?

VII. Quid, si populi quoque factum defendo, Laterensis, & doceo, Cneium Plancium non obrepsisse ad honorem, sed eo venisse cursu, qui semper patuerit ho-

minibus ortis hoc nostro equestri loco ? possumne eripere orationi tuæ contentionem vestram , quæ tractari sine contumelia non potest , & te ad causam aliquando , crimenque deducere ? Si , quòd equitis Romani filius est , inferior esse debuit , omnes tecum equitum Romanorum filii petiverunt : nihil dico amplius. Hoc tamen miror , cur tu huic potissimum irascare , qui longissimè a te abfuit. Equidem , si quando , ut fit , jactor in turba , non illum accuso , qui est in summa sacra via , quum ego ad Fabium fornicem impellor ; sed eum , qui in me ipsum incurrit , atque incidit. Tu neque Q. Pedio , forti viro , succenses , neque huic A. Plotio , ornatissimo homini , familiari meo ; & ab eo , qui hos dimovit , potiùs , quàm ab iis , qui in te ipsum incubuerunt , te depulsum putas.

18. Sed tamen hæc tibi est prima cum Plancio generis vestri , familiæque contentio , quâ abs te vincitur : cur enim non confitear , quod necesse est ? sed non hic magis , quàm ego a meis competitoribus , & aliàs , & in consulatûs petitione vincebar. Sed vide , ne hæc ipsa , quæ despicias , huic suffragata sint. Sic enim conferamus. Est tuum nomen utrâque familiâ consulare. Num dubitas igitur , quin omnes , qui favent nobilitati , qui id pu-

PRO CN. PLANCIO. 511

tant esse pulcherrimum, qui imaginibus, qui nominibus vestris ducuntur, te ædilem fecerint? Equidem non dubito. Sed, si parum multi sunt, qui nobilitatem ament; num ista est nostra culpa? etenim ad caput, & ad fontem utriusque generis veniamus.

VIII. Tu es ex municipio antiquissimo Tusculano, ex quo plurimæ familiæ sunt consulares; in quibus est etiam Juventia: tot e reliquis municipiis omnibus non sunt. Hic est e præfectura Atinati, non tam priscâ, non tam honoratâ, non tam suburbanâ. Quantum interesse vis ad rationem petendi? Primum, utrùm magis favere putas Atinates, an Tusculanos, suis? alteri (scire enim hoc propter vicinitatem facile possum) quum hujus ornatissimi atque optimi viri, Cn. Saturnini, patrem ædilem, quum prætorem viderunt, quòd primus ille non modò in eam familiam, sed etiam in præfecturam illam, fellam curulem attulisset; mirandum in modum lætati sunt: alteros (credo, quia refertum est municipium consularibus; nam malevolos non esse certò scio) numquam intellexi vehementiùs municipum suorum honore lætari.

20. Habemus hoc nos: habent nostra municipia. Quid ego de me, de fratre meo loquar? quorum honoribus agri pro-

pè dicam ipsi, montesque faverunt. Num quando vides Tusculanum aliquem de M. Catone illo in omni virtute principe, num de T. Coruncanio, municipe suo, num de tot Fulviis gloriari? verbum nemo facit. At, in quemcumque Arpinatem incideris, etiam si nolis, erit tamen tibi fortasse etiam de nobis aliquid, aliquid sed certè de Caio Mario audiendum. Primùm igitur hic habuit studia suorum ardentia; tu tanta, quanta in hominibus jam saturatis honoribus esse potuerunt.

21. Deinde tui municipes sunt illi quidem splendidissimi homines; sed tamen pauci, si quidem cum Atinatibus conferantur: hujus præfectura, plena virorum fortissimorum, sic ut nulla totâ Italiâ frequentior dici possit: quam quidem nunc multitudinem videtis, Judices, in squalore & luctu supplicem vobis. Hi tot equites Romani, tot tribuni ærarii (nam plebem a judicio dimisimus, quæ cuncta comitiis adfuit) quid roboris, quid dignitatis hujus petitioni attulerunt? non enim tribum Terentinam, de qua dicam alio loco, sed dignitatem, sed oculorum conjectum, sed solidam, & robustam, & assiduam frequentiam præbuerunt. Jam municipia conjunctione etiam vicinitatis vehementer moventur.

IX. Omnia, quæ dico de Plancio, dico expertus in nobis: sumus enim finitimi Atinatibus. Laudanda est, vel etiam amanda vicinitas, retinens veterem illum officii morem, non infuscata malevolentia, non assueta mendaciis, non fucata, non fallax, non erudita artificio simulationis, vel suburbano, vel etiam urbano: nemo Arpinas non Plancio studuit, nemo Soranus, nemo Casinas, nemo Aquinas: totus ille tractus celeberrimus, Venafranus, Allifanus; tota denique nostra illa aspera, & montuosa, sed fidelis, & simplex, & faultrix suorum regio, se hujus honore ornari, se augeri dignitate arbitrabatur: iisdemque nunc a municipiis adsunt equites Romani publice, cum legationis testimonio; nec minore sunt sollicitudine, quàm tum erant studio: etenim est gravius spoliari fortunis, quàm non augeri dignitate. Ergo ut alia in te erant illustriora, Laterensis, quæ tibi majores tui reliquerant; sic te Plancius hoc non solum municipii, verùm etiam vicinitatis genere vincebat: nisi fortè te Lavicana, aut Bovillana, aut Gabina civitas adjuvabat; quibus e municipiis vix jam, qui carnem Latinis petant, inveniuntur.

23. Adjungam, si vis, id, quod tu etiam huic obesse putas, patrem publicanum: qui ordo quanto adjumento sit in

honore, quis nescit? flos enim equitum Romanorum, ornamentum civitatis, firmentum reipublicæ, publicanorum ordine continetur. Quis est igitur, qui neget, ordinis ejus studium fuisse in honore Plancii singulare? neque injuriâ: vel quòd erat pater is, qui est princeps jamdiu publicanorum; vel quòd is ab sociis unicè diligebatur; vel quòd diligentissimè rogabat; vel quia pro filio supplicabat; vel quia hujus ipsius in illum ordinem summa officia quæsturæ, tribunatûsque constabant; vel quòd illi in hoc ornando ordinem se ornare, & consulere liberis suis arbitrabantur.

X. Aliquid præterea (timidè dico, sed tamen dicendum est) non enim opibus, non invidiosâ gratiâ, non potentiâ vix ferendâ, sed commemoratione beneficii, sed misericordiâ, sed precibus aliquid attulimus etiam nos: appellavi populum, tribubus submisi me, & supplicavi: ultro mehercules se mihi etiam offerentes, ultro pollicentes rogavi: valuit causa rogandi, non gratia.

25. Nec, si vir amplissimus, cui nihil est, quod roganti concedi jure non possit, de aliquo, ut dicis, non impetravit, ego sum arrogans, quòd me valuisse dico. Nam, ut omittam illud, quòd ego pro eo laborabam, qui valebat ipse per sese;

PRO CN. PLANCIO. 515

rogatio ipsa semper est gratiosissima, quæ est officio necessitudinis conjuncta maxime: neque enim ego sic rogabam, ut petere viderer, quia familiaris esset meus, quia vicinus, quia hujus parente semper plurimum essem usus; sed ut quasi parenti, & custodi meo: non potentia mea, sed causa rogationis fuit gratiosa: nemo meam restitutione lætatus est, nemo injuriâ doluit, cui non hujus in me misericordiæ grata fuerit.

26. Etenim, si ante reditum meum Cn. Plancio se vulgò viri boni, quum hic tribunatum peteret, ultro offerebant; cui nomen meum absentis honori fuisset, ei meas præsentis preces non putas profuisse? An Minturnenses coloni, quòd C. Marium ex civili errore, atque ex impiis manibus eripuerunt; quòd tecto receperunt; quòd fessum inediâ, fluctibusque, recrearunt; quòd viaticum congesserunt; quòd navigium dederunt; quòd eum linquentem terram eam, quam servaverat, votis, omnibus, lacrymisque profecuti sunt, æterna in laude versantur; Plancio, quòd me, vel vi pulsum, vel ratione cedentem, receperit, juverit, custodierit; his, & senatui, populoque Romano, ut haberent quem reducerent, conservarit; honori hanc fidem, misericordiam, virtutem fuisse miraris?

XI. Vitia mehercule, res hæ, Cneii Plancii, de quibus dixi, tegere potuerunt; ne tu in ea vita, de qua jam dicam, tot & tanta adjumenta huic honori fuisse mirere. Hic est enim, qui adolescentulus cum A. Torquato profectus in Africam, sic ab illo gravissimo & sanctissimo, atque omni laude & honore dignissimo viro dilectus est, ut & contubernii necessitudo, & adolescentuli modestissimi pudor postulabat: qui, si adesset, non minùs ille declararet, quàm hic illius frater patruelis, & focer T. Torquatus, illi omni virtute & laude par: qui est quidem cum illo maximis vinculis, & propinquitatis, & affinitatis conjunctus, sed ita magni amoris, ut illæ necessitudinis causæ leves esse videantur. Fuit in Creta postea contubernalis Saturnini, propinqui sui, miles hujus Q. Metelli: quibus quum fuerit probatissimus, hodieque sit, omnibus esse se probatum debet sperare. In ea provincia legatus fuit C. Sacerdos, quâ virtute, quâ constantiâ vir? L. Flaccus, qui homo? qui civis? qualem hunc putent, assiduitate, testimonioque declarant.

28. In Macedonia tribunus militum fuit: in eadem provincia postea quæstor. Primum Macedonia sic eum diligit, ut indicant hi principes civitatum suarum; qui quum missi sint ob aliam causam, tamen

hujus repentino periculo commoti, huic assident, pro hoc laborant: huic si præstò fuerint, gratiùs se civitatibus suis facturos putant, quàm si legationem & mandata sua confecerint. L. verò Apuleius hunc tanti facit, ut morem illum majorum, qui præscribit, in parentum loco quæstoribus suis prætores esse oportere, officiis, benevolentiaque superarit. Tribunus plebis fuit non fortasse tam vehemens, quàm isti, quos tu jure laudas; sed certè talis, quales si omnes semper fuissent, numquam desideratus vehemens esset tribunus.

XII. Omitto illa, quæ si minùs in scena sunt, at certè, quum sunt prolata, laudantur; ut vivat cum suis: primùm cum parente (nam meo judicio pietas fundamentum est omnium virtutum) quem veretur, ut deum (neque enim multò secus parens liberis) amat verò, ut sodalem, ut fratrem, ut æqualem. Quid dicam cum patruo? cum affinibus? cum propinquis? cum hoc Cn. Saturnino, ornatissimo viro? cujus quantam honoris hujus cupiditatem fuisse creditis, quum videatis luctûs societatem? Quid de me dicam? qui mihi in hujus periculo reus esse videor? quid de his tot viris talibus, quos videtis veste mutata? Atqui hæc sunt indicia solida, Judices, & expressa; hæc signa probitatis, non fucata forensi specie, sed domesticis.

inuſta notis veritatis : facilis eſt illa occurſatio , & blanditia popularis : adſpicitur , non attrectatur : procul apparet , non excutitur : non in manus ſumitur.

30. Omnibus igitur rebus ornatum hominem , tam externis , quàm domesticis ; nonnullis rebus inferiorem , quàm te , generis & nominis , dico ; ſuperiorem aliis , municipum , vicinorum , ſocietatum ſtudio , temporum meorum memoriâ ; parem virtute , integritate , modeſtiâ , ædilem factum eſſe miraris ? Hunc tu vitæ ſplendorem maculis aſpergis iſtis ? Jacis adulteria , quæ nemo non modò nomine , ſed ne ſuſpitione quidem poſſit agnoſcere. Bimaritum appellas , ut verba etiam ſingas , non ſolùm crimina. Ductum eſſe ab eo in provinciam aliquem dicis libidiniſ cauſâ : quod non crimen eſt , ſed impunitum in maledicto mendacium. Raptam eſſe mimulam : quod dicitur Atinæ factum a juvene , veteri quodam in ſcenicos jure , maximèque oppidano. O adoleſcentiam traductam eleganter ! cui quidem quum , quod licuerit , objiciatur , tamen id ipſum falſum repèriatur. Emiſſus aliquis e carcere , & quidem emiſſus per imprudentiam , emiſſus (ut cognôſtis) neceſſarii hominis , optimique adoleſcentis rogatu : idem poſtea prætoris mandatu requiſitus. Atque hæc , nec ulla alia , ſunt conjecta maledicta in

ejus vitam , de cujus vos pudore , religione , integritate dubitetis.

XIII. Pater verò , inquit , etiam obesse filio debet. O vocem duram , atque indignam tuâ probitate , Laterensis ! Pater ut in judicio capitis , pater ut in dimicatione fortunarum , pater ut apud tales viros obesse filio debeat ? qui si esset turpissimus , si sordidissimus , tamen ipso nomine patrio valeret apud clementes iudices , & misericordes ; valeret , inquam , communi sensu omnium , & dulcissimâ commendatione naturæ.

32. Sed quum sit Cn. Plancius is eques Romanus , eâ primùm vetustate equestris ordinis , ut pater , ut avus , ut majores ejus omnes , equites Romani fuerint , summum in præfectura florentissima gradum tenuerint , & dignitatis , & gratiæ ; deinde ut ipse in legionibus P. Crassi , imperatoris , inter ornatissimos homines , equites Romanos , summo splendore fuerit ; ut postea princeps inter suos , plurimarum rerum sanctissimus & justissimus judex , maximarum societatum auctor , plurimarum magister : si non modò in eo nihil umquam reprehensum , sed laudata sunt omnia , tamen is oberit honestissimo filio. pater , qui vel minùs honestum , & alienum tueri , vel auctoritate suâ , vel gratiâ possit ?

33. Asperius, inquit, locutus est aliquid aliquando. Immo fortasse liberiùs. At id ipsum, inquit, non est ferendum. Ergo hi ferendi sunt, qui queruntur, libertatem equitis Romani se ferre non posse? ubinam ille mos? ubi illa æquitas juris? ubi illa antiqua libertas, quæ malis oppressa civilibus extollere jam caput, & aliquando recreata, se erigere debebat? equitum ego Romanorum etiam in homines nobilissimos maledicta, publicanorum in Q. Scævola, virum omnibus ingenio, justitiâ, integritate præstantem, asperè, & ferociter, & liberè dicta commemorem?

XIV. Consuli P. Nasicæ præco Granius, medio in foro, quum ille, edicto justitio, domum descendens rogasset Granium, quid tristis esset; an quòd rejectæ auctiones essent? Immo verò, inquit, quòd legationes. Idem tribuno plebis, potentissimo homini, M. Druso, sed multa in rempublicam morienti, quum ille eum salutasset, ut sit, dixissetque, Quid agis, Grani? Respondit, Immo verò, tu Druse, quid agis? Ille L. Crassi, ille M. Antonii voluntatem asperioribus facetiis sæpe perstrinxit impune. Nunc usque eò oppressa vestra arrogantia civitas est, ut, quæ fuit olim præconi in ridendo, nunc equiti Romano inplorando, non sit concessa libertas.

34. Quæ enim unquam fuit Plancio vox contumeliæ potius, quàm doloris? quid est autem unquam questus, nisi quum a fociis, & a se injuriam propulsaret? Quum senatus impediretur, quò minùs, id quod hostibus semper erat tributum, responsum equitibus Romanis redderetur; omnibus illa injuria dolori publicanis fuit; sed eum ipsum dolorem hic tulit paulò apertius: communis ille sensus in aliis fortasse latuit; hic, quod cum ceteris animo sentiebat, id magis, quàm ceteri, & vultu promptum habuit, & linguâ.

35. Quamquam, Judices (agnosco enim ex me) permulta in Plancium, quæ ab eo numquam dicta sunt, conferuntur. Ego quia dico aliquid aliquando, non studio adductus, sed contentione dicendi, aut laccessitus, & quia, ut fit in multis, exit aliquando aliquid, si non perfacetum, atamen fortasse non rusticum: quod quisque dixit, me id dixisse dicunt. Ego autem, si quid est, quod mihi scitum esse videatur, & homine ingenuo dignum atque docto, non aspernor: stomachor verò, quum aliorum non me digna in me conferuntur. Nam quòd primus scivit legem de publicanis, tum, quum vir amplissimus consul id illi ordini per populum dedit, quod per senatum, si licuisset, dedisset; si in eo crimen est, quia suffra-

gium tulit; quis non tulit publicanus? si, quia primus scivit; utrùm id fortis esse vis, an ejus, qui illam legem ferebat? si fortis; nullum crimen est in casu: si consulis; splendor etiam Plancii, hunc a summo viro principem esse ordinis judicatum.

XV. Sed aliquando veniamus ad causam: in qua tu nomine legis Liciniæ, quæ est de sodalitiis, omnes ambitus leges complexus es: neque enim quidquam aliud in hac lege, nisi edititios judices, es secutus: quod genus judiciorum si est æquum ulla in re, nisi hac tribuariâ; non intelligo, quamobrem senatus hoc uno in genere tribus edi voluerit ab accusatore, neque eandem editionem transtulerit in ceteras causas: in ipso denique ambitu, rejectionem fieri voluerit judicum alternorum; quumque nullum genus acerbitalis prætermitteret, hoc tamen unum prætereundum putarit.

37. Quid? hujus rei obscura causa est? an & agitata, quum ista in senatu res agebatur, & disputata hesternò die copiosius a Q. Hortensio? cui tum est senatus assensus. Hoc igitur sensimus: cujuscumque tribus largitor esset, & per hanc consensionem, quæ magis honestè quàm verè sodalitas nominaretur, quam quisque tribum turpi largitione corrumpere, eum maxime iis hominibus, qui ejus tribus essent,

esse notum. Ita putavit senatus, quum reo tribus ederentur eæ, quas is largitione devinctas haberet, eosdem fore testes, & judices. Acerbum omnino genus judicii; sed tamen, si vel sua, vel ea, quæ maxime esset cuique conjuncta, tribus ederetur, vix recusandum.

XVI. Tu autem, Laterensis, quas tribus edidisti? Terentinam, credo: fuit id æquum, & certè expectatum est, & fuit dignum constantiâ tuâ: cujus tu tribus venditorem, & corruptorem, & sequestrem Plancium fuisse clamitas; eam tribum profectò, severissimorum præsertim hominum & gravissimorum, edere debuisti. At Volatiniam: libet enim tibi nescio quid etiam de illa tribu criminari: hanc igitur ipsam cur non edidisti? quid Plancio cum Lemonia? quid cum Vejentina? quid cum Crustumina? nam Metiam, non quæ judicaret, sed quæ rejiceretur, esse voluisti.

39. Dubitatis igitur, Judices, quin vos M. Laterensis suo judicio, non ad sententiam legis, sed ad suam spem aliquam de civitate delegerit? dubitatis, quin eas tribus, in quibus magnas necessitudines habet Plancius, quum ille non ediderit, judicari officiis ab hoc observatas, non largitione? Quid enim potest dicere, cur ista editio non summam habeat acerbitatem, remotâ ratione illâ, quam in decernendo secuti sumus?

40. Tu deligas ex omni populo aut amicos tuos, aut inimicos meos, aut denique eos, quos inexorabiles, quos inhumanos, quos crudeles existimes? Tu, me ignaro, nec opinante, inscio, notes & tuos, & tuorum necessarios, vel inimicos meos, vel etiam defensorum meorum? eodemque adjungas, quos naturâ putes asperos, atque omnibus iniquos? deinde effundas repentè, ut antè confessum eorum judicium videam, quàm potuerim, qui essent futuri, suspicari? apud eosque me, ne quinque quidem rejectis, quod in proximo reo de consilii sententia constitutum est, cogas causam de fortunis omnibus dicere? Non enim, si aut Plancius ita vixit, ut offenderet sciens neminem, aut tu ita errasti, ut eos ederes imprudens, ut nos, invito te, tamen ad iudices, non ad carnifices veniremus, idcirco ista editio per se non acerba est.

XVII. An verò nuper clarissimi cives nomen editi iudicis non tulerunt, quum ex CXXV iudicibus, principibus equestris ordinis, quinque & LXX reus rejiceret, quinquaginta referret, omniaque potius permiscuerunt, quàm ei legi conditionique parerent; nos neque ex delectis iudicibus, sed ex omni populo, neque editos ad rejiciendum, sed ab accusatore constitutos iudices ita feremus, ut neminem rejiciamus?

42. Neque ego nunc legis iniquitatem queror, sed factum tuum a sententia legis doceo discrepare; & illud acerbum iudicium, si, quemadmodum senatus censuit, populusque jussit, ita fecisses, ut in hunc & suam, & ab hoc observatas tribus ederes; non modò non quererem, sed hunc, iudicibus editis, qui testes iidem esse possent, absolutum putarem: neque nunc multò secus existimo: quum enim has tribus edidisti; ignotis te iudicibus uti malle, quàm notis, indicavisti: fugisti sententiam legis: æquitatem omnem rejecisti: in tenebris, quàm in luce, causam versari maluisti.

43. Voltinia tribus ab hoc corrupta: Terentinam habuerat venalem. Quid diceret apud Voltinienses, aut tribules suos iudices? immo verò tu quid diceres? quem iudicem ex illis aut tacitum testem haberes, aut verò etiam excitares? Etenim, si reus tribus ederet, Voltiniam fortasse Plancius, propter vicinitatem ac necessitudinem suam, non edidisset; &, si quæsitore edendus fuisset, quem tandem potius, quàm hunc C. Flavium, quem habet, cui notissimus esse debet, vicinum, tribulem, gravissimum hominem, justissimumque edidisset? cujus quidem æquitas, & meæ similis voluntas erga Cn. Plancii salutem, quam ille sine ulla cupiditatis sus-

picione præ se fert, facile declarat, non fuisse fugiendos tribules huic iudices, cui quæsitorem tribulem exoptandum fuisse videatis.

XVIII. Neque ego nunc consilium reprehendo tuum, quod non eas tribus, quibus hic maximè notus erat, edideris, sed a te doceo consilium non servatum senatûs. Etenim quis te tum audiret illorum? aut quid diceres? sequestremne Plancium? respuerent aures, nemo agnosceret, repudiaretur: an gratiosum? illi libenter audirent; nos non timidè confiteremur: noli enim putare, Laterensis, legibus istis, quas senatus de ambitu sancire voluerit, id esse actum, ut suffragatio, ut observantia, ut gratia tolleretur: semper fuerunt boni viri, qui apud tribules suos gratiosi esse vellent.

45. Neque verò tam durus in plebem noster ordo fuit, ut eam coli nostrâ modicâ liberalitate noluerit: neque hoc liberis nostris interdendum est, ne observent tribules suos, ne diligant, ne conficere necessariis suis suam tribum possint, ne par ab iis munus in sua petitione respectent: hæc enim plena sunt officii, plena observantiæ, plena etiam antiquitatis. Isto in genere & fuimus ipsi, quum ambitionis nostræ tempora postulabant, & clarissimos viros esse vidimus, & hodie

esse videmus quamplurimos gratiosos. Decuriatio tribulium, descriptio populi, suffragia largitione devincta, severitatem senatus, & bonorum omnium vim ac dolorem excitarunt: hæc doce, hæc profer, huc incumbe, Laterensis, decuriasse Plancium, conscripsisse, sequestrem fuisse, pronuntiasse, divisisse; tum mirabor, te iis armis uti, quæ tibi lex dabat, noluisse: tribulibus enim iudicibus, non modò severitatem illorum, si ista vera sunt, sed ne vultus quidem ferre possemus. Hanc tu rationem quum fugeris, quumque eos iudices habere nolueris, quorum in hujus delicto quum scientia certissima, tum dolor gravissimus esse debuerit; quid apud hos dices, qui abs te taciti requirunt, cur hoc sibi oneris imposueris, cur se potissimum delegeris, cur denique se divinare malueris, quàm eos, qui scirent, judicare?

XIX. Ego Plancium, Laterensis, & ipsum gratiosum esse dico, & habuisse in petitione multos cupidos sui, gratiosos; quos tu si sodales vocas, officiosam amicitiam, nomine inquinans criminoso: sin, quia gratiosi sunt, accusandos putas; noli mirari, te id, quod tua dignitas postularit, repudiandis gratiosorum amicitiiis non esse assecutum.

47. Jam, ut ego doceo, gratiosum esse

tribulibus Plancium , quòd multis benignè fecerit , pro multis sponderit , in operas plurimos patris auctoritate & gratiâ miserit ; quòd denique omnibus officiis per se , per patrem , per majores suos totam Atinatem præfecturam comprehenderit : sic tu doce , sequestrem fuisse , largitum esse , conscripsisse , tribules decuriasse : quod si non potes ; noli tollere ex ordine nostro liberalitatem , noli maleficium putare esse gratiam , noli observantiam sancire poenâ. Itaque hæsitantem te in hoc sodalitiis tribuario crimine , ad communem ambitûs causam contulisti , in qua desinamus aliquando (si videtur) vulgari & pervagatâ declamatione contendere : sic enim tecum ago.

48. Quam tibi commodum est , unam tribum delige tu ; doce id , quod debes , per quem sequestrem , quo divisore corrupta sit : ego , si id facere non potueris , quod , ut opinio mea fert , ne incipies quidem , per quem tulerit , docebo. Estne hæc vera contentio ? placetne sic agi ? non possum magis pedem conferre , ut aiunt , aut propius accedere. Quid taces ? quid dissimulas ? quid tergiversaris ? etiam atque etiam insto , atque urgeo , infector , posco , atque adeo flagito crimen : quamcumque tribum , inquam , delegeris , quam tulerit Plancius , tu ostendito,

dito, si poteris, vitium; ego, quâ ratione tulerit, docebo: nec erit hæc alia ratio Plancio, ac Laterensi: nam, ut quas tribus tu tulisti, si jam ex te requiram, possis, quorum studio tuleris, explicare; sic ego hoc contendo, me tibi ipsi adversario, cujuscumque tribûs rationem poposceris, redditurum.

XX. Sed cur ego sic ago? quasi non comitiis jam superioribus sit Plancius designatus ædilis: quæ comitia primùm habere cœpit consul quum omnibus in rebus summâ auctoritate, tum harum ipsarum legum ambitûs auctor: deinde habere cœpit subitò, præter opinionem omnium; ut ne, si cogitasset quidem quispiam largiri, daretur spatium comparandi. Vocatæ tribus: latum suffragium: descriptæ, renuntiatae. Longè plurimùm valuit Plancius: nulla largitionis nec fuit, nec esse potuit suspicio. An tandem una centuria prærogativa tantum habet auctoritatis, ut nemo umquam prior eam tulerit, quin renuntiatus sit; tu aut his ipsis comitiis consularibus, aut certè in illum annum ædilem Plancium factum miraris, in quo non exigua pars populi, sed universus populus voluntatem suam declararit? cujus in honore non unius tribûs pars, sed comitia tota comitiis fuerint prærogativa?

50. Quo quidem tempore, si id, La-
Tomus VI. Z

terensis, facere voluisses, aut si gravitatis esse putasses tuæ, quod multi nobiles sæpe fecerunt, ut, quum minùs valuissent suffragiis, quàm putassent, postea, prolatis comitiis, prosternerent se, & populo Romano, fracto animo atque humili supplicarent; non dubito, quin omnis ad te conversura se fuerit multitudo. Numquam enim nobilitas, integra præsertim, atque innocens, a populo Romano supplex repudiata fuit. Sed, si tibi gravitas tua, & magnitudo animi pluris fuit, sicut esse debuit, quàm ædilitas; noli, quum habeas id, quod malueris, desiderare id, quod minoris putâris. Equidem primum ut honore dignus essem, maximè semper laboravi: secundò, ut existimarer: tertium mihi fuit illud, quod plerisque primum est, ipse honos: qui iis denique debet esse jucundus, quorum dignitati populus Romanus testimonium, non beneficium ambitioni dedit.

XXI. Quæris etiam, Laterensis, quid imaginibus tuis, quid ornatissimo atque optimo viro, patri tuo, respondeas mortuo. Noli ista meditari; atque illud cave potius, ne tua ista querela, dolorque nimius ab illis sapientissimis viris reprehendatur: vidit enim pater tuus, Appium Claudium, nobilissimum hominem, vivo patre suo, potentissimo & clarissimo ci-

ve, C. Claudio, ædilem non esse factum, & eundem sine repulsa factum esse consulem: vidit, hominem sibi maximè conjunctum; egregium virum, L. Volcatium; vidit, M. Pisonem in ista ædilitate, offensiunculâ acceptâ, summos a populo Romano esse honores adeptos. Avus verò tuus, & P. Nasicæ tibi ædilitiam prædicaret repulsam, quo cive neminem ego statuo in hac republica fortiozem; & C. Marii, qui duabus ædilitatis acceptis repulsis, septies consul est factus; & L. Cæsaris, Cn. Octavii, M. Tullii, quos omnes scimus ædilitate præteritos, consules esse factos.

52. Sed quid ego ædilitias repulsas colligo? quæ sæpe ejusmodi habitæ sunt, ut iis, qui præteriti essent, benignè a populo factum videretur. Tribunus militum, Lucius Philippus, summâ nobilitate & eloquentiâ; quæstor C. Coelius, clarissimus ac fortissimus adolescens; tribuni plebis P. Rutilius Rufus, C. Fimbria, C. Cassius, Cn. Orestes, facti non sunt: quos tamen omnes consules factos scimus esse. Quæ tibi ultro patet, & majores tui non consolandi tui gratiâ dicerent; neque verò quò te liberent aliquâ culpâ, quam tu vereris, ne a te suscepta videatur; sed ut te ad cursum istum tenendum, quem a prima ætate suscepisti, cohortentur: nihil

est enim , mihi crede , Laterensis , de te detractum : detractum dico ? si mehercules verè , quod accidit , interpretari velis , est aliquid etiam de virtute significatum tua.

XXII. Noli enim existimare , non magnum quemdam motum fuisse illius petitionis tuæ , de qua ne aliquid jurares , destitisti. Denuntiaſti ; homo adolescens , quid de summa reipublicæ sentires : fortius tu quidem , quàm nonnulli defuncti honoribus , sed apertius , quàm vel ambitionis , vel ætatis tuæ ratio postulabat. Quamobrem in dissentiente populo noli putare , nullos fuisse , quorum animos tuus ille fortis animus offenderet : qui te incautum fortasse nunc tuo loco demovere potuerunt , providentem antè , & præcaventem numquam certè movebunt. An te illa argumenta duxerunt ? Dubitabis , inquit , quin coitio facta sit , quum tribus plerasque cum Plotio tulerit Plancius ? An unà fieri potuerunt , si unà tribus non tulissent ? At nonnullas punctis pene totidem. Quippe quum facti jam propè superioribus cõitiis , declaratique venissent : quamquam ne id quidem suspicionem coitionis habuerit ; neque enim umquam majores nostri sortitionem constituisſent ædilitiam , nisi viderent accidere posse , ut competitores pares suffragiis essent.

PRO CN. PLANCIO. 533

54. Et ais , prioribus comitiis Aniensem a Plotio , Terentinam a Plancio tibi esse concessam ; nunc ab utroque eas avulsas , ne in angustum venirent. Quàm convenit , nondum cognitâ populi voluntate , hos , quos jam tum conjunctos fuisse dicis , jacturam suarum tribuum , quò vos adjuvaremini , fecisse ; eosdem , quum jam essent experti , quid valerent , restrictos , & tenaces fuisse ? Etenim verebantur , credo , angustias : quasi res in contentionem , aut in discrimen aliquod posset venire. Sed tamen tu an Plotium , virum ornatissimum , in idem crimen vocandum judicas ? an dicis , eum te arripuisse , a quo non sis rogatus ? Nam quòd questus es , plures te testes habere de Voltinia , quàm quot in ea tribu puncta tuleris ; indicas , aut eos testes te adducere , qui , quia nummos acceperint , te præterierint ; aut , te ne gratuita quidem eorum suffragia tulisse.

XXIII. Illud verò crimen de nummis , quos in circo Flaminio deprehensos esse dixisti , caluit re recenti ; nunc in causa refrixit : neque enim , qui illi nummi fuerint , nec , quæ tribus , nec , qui divisor , ostenderis. Atque is quidem eductus ad consules , qui tum in crimen vocabatur , se iniquè a tuis jactatum graviter querebatur : qui si erat divisor , præsertim ejus ,

quem tu habebas reum, cur abs te reus non est factus? cur non ejus damnatione aliquid ad hoc judicium præjudicii comparasti? Sed neque tu habes hæc, neque eis confidis: alia te ratio, alia cogitatio ad spem hujus opprimendi excitavit: magnæ sunt in te opes: latè patet gratia: multi amici, multi cupidi tui, multi fautores laudis tuæ: multi huic invident: multis etiam pater, optimus vir, nimium retinens equestris juris & libertatis videtur: multi etiam communes inimici reorum omnium; qui ita semper testimonium de ambitu dicunt, quasi aut moveant animos judicum suis testimoniis, aut gratum populo Romano sit, aut ab eo facilius ob eam causam, dignitatem, quam volunt, consequantur.

56. Quibuscum me, Judices, pugnantem meo more pristino non videbitis: non quò mihi fas sit quidquam defugere, quod salus Plancii postulet; sed quia neque necesse est, me id persequi voce, quod vos mente videatis; & quòd ita de me meriti sunt illi ipsi, quos ego testes video paratos, ut eorum reprehensionem vos vestræ prudentiæ assumere, meæ modestiæ remittere debeatis. Illud unum vos magnopere oro, atque obsecro, Judices, quum hujus, quem defendo, tum communis periculi causâ, ne fictis auditioni-

bus, ne disseminato, dispersoque sermoni fortunas innocentium subjiendas putetis.

57. Multi amici accusatoris, nonnulli etiam nostri iniqui, multi communes obrectatores atque omnium invidi, multa finxerunt. Nihil est autem tam volucre, quàm maledictum: nihil facilius emittitur, nihil citius excipitur, nihil latius dissipatur. Neque ego, si fontem maledicti reperietis, ut aut negligatis, aut dissimuletis, umquam postulabo: sed, si quid sine capite manabit, aut si quid erit ejusmodi, ut non exstet auctor, qui audierit; aut ita negligens vobis esse videbitur, ut, unde audierit, oblitus sit; aut ita levem habebit auctorem, ut memoriâ dignum non putarit: hujus illa vox vulgaris, *audivi*, ne quid reo innocenti noceat, oramus.

XXIV. Sed venio jam ad L. Cassium, familiarem meum, cujus ex oratione ne illum quidem Juventium tecum expostulavi; quem ille omni & virtute, & humanitate ornatus adolescens, primum de plebe ædilem curulem factum esse dixit. In quo, Cassi, si ita tibi respondeam, nescisse id populum Romanum, neque fuisse qui id nobis narraret, præsertim mortuo Longino; non, ut opinor, admirere, quum ego ipse non abhorrens a studio antiquitatis, me hic id ex te primum audisse confitear. Et, quoniam tua fuit perelegans,

ac perfubtilis oratio , digna equitis Romani vel studio , vel pudore ; quoniamque sic ab his es auditus , ut magnus honos , & ingenio , & humanitati tuæ tribueretur ; respondebo ad ea , quæ dixisti ; quæ pleraque de ipso me fuerunt : in quibus ipsi aculei , si quos habuisti in me reprehendendo , tamen mihi non ingrati acciderunt.

59. Quæsisti , utrùm mihi putarem , equitis Romani filio , faciliorem fuisse ad adipiscendos honores viam , an futuram esse filio meo , qui esset familiâ consulari. Ego verò , quamquam illi omnia malo , quàm mihi ; tamen illi honorum aditus numquam faciliores optavi , quàm mihi fuerunt : quin etiam , ne fortè ille sibi me potius peperisse jam honores , quàm iter demonstrasse adipiscendorum putet , hæc illi soleo præcipere (quamquam ad præcepta ætas non est gnati) quæ ille a Jove ortus suis præcipit filiis :

Vigilandum est semper : multæ insidiæ sunt bonis.

Nostis cetera.

Non te id quod multi invideant. . .

Quæ scripsit gravis ille & ingeniosus poëta , scripsit , non ut illos regios pueros , qui jam nusquam erant , sed ut nos , & nostros liberos ad laborem & laudem excitaret. Quæris , quid potuerit amplius

PRO CN. PLANCIO. 537

assequi Plancius, si Cn. Scipionis fuisset filius. Magis ædilis fieri non potuisset; sed hoc præstare, quòd ei minùs invideretur. Etenim honorum gradus summis hominibus & infimis sunt pares; gloriæ dispares.

XXV. Quis nostrum se dicit M'. Curio, quis C. Fabricio, quis P. Duellio parem? quis Atilio Calatino? quis Cn. & P. Scipionibus? quis Africano, Marcello, Maximo? tamen eosdem sumus honorum gradus, quos illi, assecuti. Est enim in virtute multis adscensus; ut is gloriâ maximè excellat, qui virtute plurimum præstet: honorum populi finis est consulatus; quem magistratum jam octingenti ferè consecuti sunt: horum, si diligenter quæras, vix decimam partem reperias gloriâ dignam: sed nemo umquam sic egit, ut tu: Cur iste fit consul? quid potuit ampliùs, si L. Brutus esset, qui civitatem dominatu regio liberavit? honore nihil ampliùs, laude multum. Sic igitur Plancius nihilominus quæstor est factus, & tribunus plebis, & ædilis, quàm si esset summo loco natus: sed hæc, pari loco orti, sunt innumerabiles alii consecuti.

61. Profers triumphos Titi Didii, & C. Marii; & quæris, quid simile in Plancio. Quasi verò isti, quos commemoras, propterea magistratus ceperint, quòd

triumpharant, & non, quia commissi sunt iis magistratus, in quibus re bene gestâ triumpharent. Rogas, quæ castra viderit: qui & miles in Creta, Metello hoc imperatore, & tribunus in Macedonia militum fuerit, & quæstor tantum ex re militari detraxerit temporis, quantum in me custodiendum transferre maluerit.

62. Quæris, num disertus sit? Immo, id quod secundum est, ne sibi quidem videtur. Num jurisconsultus? Quasi quisquam sit, qui sibi hunc falsum de jure respondisse dicat. Omnes enim istiusmodi artes in iis reprehenduntur, qui quum professi fuerint, satisfacere non possunt; non in iis, qui se abfuisse ab istis studiis contentur. Virtus, probitas, integritas in candidato, non linguæ volubilitas, non ars, non scientia requiri solet. Ut nos in mancipiis parandis, quamvis frugi hominem si pro fabro, aut pro textore emimus, ferre molestè solemus, si eas artes, quas in emendo secuti sumus, fortè nesciverit; sin autem emimus, quem villicum imponderemus, quem pecori præficeremus, nihil in eo, nisi frugalitatem, laborem, vigilantiam esse curamus: sic populus Romanus deligit magistratus, quasi reipublicæ villicos: in quibus si qua præterea est ars, facile patitur; sin minùs, virtute eorum & innocentia contentus est. Quotus enim quis-

que disertus? quotus quisque juris peritus est? ut eos numeres, qui volunt esse: quòd si præterea honore dignus nemo, quidnam tot optimis & ornatissimis civibus est futurum?

XXVI. Jubes Plancium de vitiis Laterensis dicere. Nihil potest, nisi eum nimis in se iracundum putabis fuisse. Idem effers Laterensem laudibus. Facile patior, id te agere multis verbis, quod ad judicium non pertineat; & id te accusantem tamdiu dicere, quod ego defensor sine periculo possim confiteri. Atqui non modò confiteor summa in Laterense ornamenta esse; sed te etiam reprehendo, quòd ea non enumeres; alia quædam inania, & levia conquiras. Præneste fecisse ludos. Quid? alii quæstores nonne fecerunt? Cyrenis liberalem in publicanos, justum in socios fuisse. Quis negat? Sed ita multa Romæ geruntur, ut vix ea, quæ sunt in provinciis, audiantur.

64. Non vereor, ne mihi aliquid, Judices, videar arrogasse, si de quæstura mea dixero: quamvis enim illa floruerit, tamen eum me postea fuisse in maximis rebus arbitror, ut non ita mihi multum sit ex quæsturæ laude repetendum: sed tamen non vereor, ne quis audeat dicere, ullius in Sicilia quæsturam, aut gratiorem, aut clariorem fuisse. Verè mehercules hoc di-

cam : sic tum existimabam , nihil homines aliud Romæ , nisi de quæstura mea , loqui. Frumenti in summa caritate maximum numerum miseram : negotiatoribus comis , mercatoribus justus , municipibus liberalis , fociis abstinens , omnibus eram visus in omni officio diligentissimus : excogitati quidem erant a Siculis honores in me inauditi.

65. Itaque hac spe decedebam , ut mihi populum Romanum ultrò omnia delaturum , putarem. At ego , quum casu diebus iis , itineris faciendi causâ , decedens e provincia , Puteolos fortè venissem , quum plurimi , & lautissimi solent esse in iis locis ; concidi pene , Judices , quum ex me quidam quæsisset , quo die Româ exissem , & num quid in ea esset novi : cui quum respondissem , me e provincia decedere : Etiam mehercules , inquit , ut opinor , ex Africa.

XXVII. Huic ego jam stomachans , fastidiosè , Immo ex Sicilia , inquam. Tum quidam , quasi qui omnia sciret , Quid ? tu nescis , inquit , hunc Syracusis quæstorem fuisse ? Quid multa ? destiti stomachari , & me unum ex iis feci , qui ad aquas venissent. Sed ea res , Judices , haud scio an plus mihi profuerit , quàm si mihi tum essent omnes congratulati : nam posteaquam sensi , populum Romanum aures he-

betiores, oculos acres atque acutos habere, destiti, quid de me audituri essent homines, cogitare; feci, ut postea quotidie me præsentem viderent: habitavi in oculis: pressi forum: neminem a congressu meo, neque janitor meus, neque somnus absterruit. Ecquid ego dicam de occupatis meis temporibus, cui fuerit ne otium quidem umquam otiosum? nam, quas tu commemoras, Cassi, legere te solere orationes, quum otiosus sis, has ego scripsi ludis & feriis, ne omnino umquam essem otiosus. Etenim M. Catonis illud, quod in principio scripsit Originum suarum, semper magnificum & præclarum putavi, *Clarorum virorum, atque magnorum; non minus otii, quàm negotii rationem exstare oportere.* Ita, si quam habeo laudem, quæ quanta sit, nescio, parta Romæ est, quæsita in foro: meaque privata consilia publici quoque casus comprobaverunt, ut etiam summa respublica mihi domi fuerit gerenda, & urbs in urbe servanda.

67. Eadem igitur, Cassi, via munita Laterensi est, idem virtutis cursus ad gloriam; hoc facilius fortasse, quod ego huc a me ortus, & per me nixus, adscendi; istius egregia virtus adjuvabitur commendatione majorum. Sed, ut redeam ad Plancium, numquam ex urbe absuit, nisi forte, lege, necessitate: non valuit rebus

iisdem, quibus fortasse nonnulli; at valuit assiduitate, at valuit observandis amicis, valuit liberalitate: fuit in oculis: petivit: eâ est usus ratione, quâ, minimâ invidiâ, novi homines plurimi eosdem honores consecuti sunt.

XXVIII. Nam, quod ais, Cassi, non plus me Plancio debere, quàm bonis omnibus, quòd iis æquè mea salus cara fuerit; ego me debere bonis omnibus fateor: sed etiam hi, quibus ego debeo, boni viri & cives, ædilitiis comitiis, aliquid meo se nomine debere Plancio dicebant. Verùm fac me multis debere, & in iis Plancio: utrùm igitur me conturbare oportet? an ceteris, quum cujusque dies venerit; hoc nomen, quod urget, nunc quum petitur, dissolvere? Quamquam dissimilis est pecuniæ debitio, & gratiæ: nam qui pecuniam dissolvit, statim non habet id, quod reddidit; qui autem debet, æs retinet alienum: gratiam autem & qui refert, habet; & qui habet, in eo ipso quod habet, refert: neque ego nunc Plancio desinam debere, si hoc solvero; nec minùs ei redderem voluntate ipsâ, si hoc molestiæ non accidisset.

69. Quæris a me, Cassi, quid pro fratre meo, qui mihi est carissimus, quid pro meis liberis, quibus nihil potest esse jucundius, ampliùs, quàm quod pro Plan-

cio facio, facere possim; nec vides, istorum ipsorum caritate ad hujus salutem defendendam maximè stimulari me, atque excitari. Nam neque illis hujus salute, a quo meam sciunt esse defensam, quidquam est optatius; & ego ipse numquam illos adspicio, quin per hunc me his conservatum esse meminerim, hujusque meriti in me recorder. Opimium damnatum esse commemoras, servatorem ipsum reipublicæ: Calidium adjungis, cujus lege Q. Metellus in civitatem sit restitutus: reprehendis meas pro Plancio preces, quòd nec Opimius suo nomine liberatus sit, nec Quinti Metelli Calidius.

XXIX. De Calidio tibi tantum respondeo, quod ipse vidi; Q. Metellum Pium, consulem, prætoris comitiis, petente Q. Calidio, populo Romano supplicasse, quum quidem non dubitaret & consul, & homo nobilissimus, patronum illum esse suum, & familiæ suæ nobilissimæ dicere. Quo loco quæro ex te, num id in judicio Calidii putes, quod ego in Plancii facio, aut Metellum Pium, si Romæ esse potuisset, aut patrem ejus, si vixisset, non fuisse facturum. Nam Opimii quidem calamitas utinam ex hominum memoria posset evelli! vulnus illud reipublicæ, dedecus hujus imperii, turpitudine populi Romani, non judicium putandum est. Quam

enim illi judices, si judices, & non par-
ricidæ patriæ nominandi sunt, gravio-
rem reipublicæ infligere securim,
quàm, quum illum e civitate ejecerunt,
qui prætor finitimo, consul domestico
bello rempublicam liberarat?

71. At enim nimis ego magnum bene-
ficio Plancio facio, &, ut ais, id ver-
bis exaggero: quasi verò me tuo arbitra-
tu, & non meo, gratum esse oporteat.
Quod istius tantum meritum, inquit? an
quia te non jugulavit? immo verò, quia
jugulari passus non est. Quo quidem tu
loco, Cassi, etiam purgasti inimicos meos,
meæque vitæ nullas ab illis insidias fuisse
dixisti. Posuit hoc idem Laterensis. Quam-
obrem de isto paulò pòst plura dicam: de
te tantum requiro, utrùm putes odium in
me mediocri inimicorum fuisse. Quod fuit
ullorum umquam barbarorum tam imma-
niæ, ac tam crudele in hostem? an fuisse
in iis aliquem aut famæ metum, aut pœ-
næ, quorum vidisti toto illo anno ferrum
in foro, flammam in delubris, vim in tota
urbe versari? nisi fortè existimas, eos id-
circo vitæ meæ pepercisse, quòd de re-
ditu meo non timerent. Et quemquam
putas fuisse tam excordem, qui, vivis his,
stante urbe & curiâ, rediturum me, si
viverem, non putaret? Quamobrem non
debet is homo, & is civis prædicare, vi-

tam meam, quæ fidelitate amicorum conservata sit, inimicorum modestiâ non esse appetitam.

XXX. Respondebo tibi nunc, Laterensis, minùs fortasse vehementer, quàm abs te sum provocatus; sed profectò nec consideratè minùs, nec minùs amicè: nam primùm illud fuit asperius, me, quæ de Plancio dicerem, mentiri, & temporis causâ fingere. Scilicet homo sapiens excogitavi, quamobrem viderer maximis beneficii vinculis obstrictus, quum liber essem, & solutus. Quid enim? mihi ad defendendum Plancium parum multæ, parum justæ necessitudines erant familiaritatis, vicinitatis, patris amicitiae? quæ si non essent, vererer, credo, ne turpiter facerem, si hoc splendore & hac dignitate hominem defenderem: fingenda fuit mihi videlicet causa peracuta, ut ei, quem mihi debere oporteret, ego me omnia debere dicerem. At id etiam gregarii milites faciunt inviti, ut coronam dent civicam, & se ab aliquo servatos esse fateantur: non quò turpe sit, protectum in acie, hostium manibus eripi; nam id accidere, nisi forti viro, & pugnanti cominus, non potest: sed onus beneficii reformidant, quòd permagnum est, alieno debere idem, quod parenti.

73. Ego, quum ceteri vera beneficia,

etiam minora , dissimulent , ne obligati esse videantur ; eo me beneficio obstrictum esse ementiar , cui ne referri quidem gratia posse videatur ? An hoc tu , Laterensis , ignoras ? qui , quum mihi esses amicissimus ; quum vel periculum vitæ tuæ mecum sociare voluisses ; quum me in illo tristi & acerbo luctu , atque discessu , non lacrymis solum tuis , sed animo , corpore , copiis prosecutus esses ; quum meos liberos , & uxorem , me absente , tuis opibus , auxilioque defendisses : sic mecum semper egisti , te mihi remittere , atque concedere , ut omne studium meum in Cn. Plancii honorem consumerem , quod ejus in me meritum tibi etiam ipsi gratum esse dicebas.

74. Nihil autem me novi , nihil temporis causâ dicere , nonne etiam illa testis est oratio , quæ est a me prima habita in senatu ? in qua quum perpaucis nominatim egissem gratias , quod omnes enumerari nullo modo possent , scelus autem esset quemquam præteriri ; statuissemque eos solum nominare , qui causæ nostræ duces , & quasi signiferi fuissent ; in his Plancio gratias egi. Recitetur oratio , quæ propter rei magnitudinem dicta de scripto est : in qua ego homo astutus ei me dedebam , cui nihil magnopere deberem , & hujus tanti officii servitutem adstringebam testimo-

nio sempiterno. Nolo cetera, quæ a me mandata sunt litteris, recitare: prætermitto illa, ne aut proferre videar ad tempus, aut eo genere uti litterarum, quod meis studiis aptius, quàm consuetudini judiciorum, esse videatur.

XXXI. Atque etiam clamitas, Late-
rensis: *Quousque ista dicis? nihil in Cispio profecisti: absolutæ jam sunt preces tuæ.* De Cispio mihi tu objicies, quem ego de me bene meritum quia te teste cognove-
ram, te eodem auctore defendi? & mihi dices, *Quousque*, quem negas, quod pro Cispio contenderim, impetrare potuisse? Nam istius verbi, *Quousque*, hæc poterat esse invidia, Datus est tibi ille: condonatus ille: non facis finem: ferre non possumus. Ei quidem, qui pro uno laborarit, & ipsum id non obtinuerit, dici, *Quousque*, iridentis magis est, quàm reprehendentis: nisi fortè ego unus ita me gessi in judiciis; ita & cum his, & inter hos vixi; is in causis patronus, is in re publica civis & sum, & semper fui, solus ut a te constituar, qui nihil a iudicibus debeam umquam impetrare.

76. Et mihi lacrymulam Cispiani iudicii objectas: sic enim dixisti: *Vidi ego tuam lacrymulam.* Vide, quàm me verbi tui pœniteat: non modò lacrymulam, sed multas lacrymas, & fletum cum singultu vi-

dere potuisti. An ego , qui meorum lacrymis , me absente , commotus , similitates , quas mecum habebat , deposuisset , meæque salutis non modò non oppugnatore (ut inimici mei putarant) sed etiam defensor fuisset , hujus in periculo non dolorem meum significarem ? Tu autem , Laterensis , qui tum lacrymas meas gratas esse dicebas , nunc easdem vis invidiosas videri.

XXXII. Negas , tribunatum Plancii quidquam attulisse adjumenti dignitati meæ ; atque hoc loco (quod verissimè facere potes) L. Racilii , fortissimi & constantissimi viri , divina in me merita commemoras : cui quidem ego , sicut in Plancio , numquam dissimulavi me plurimum debere , semperque præ me feram : nullas enim sibi ille neque contentiones , neque inimicitias , neque vitæ dimicationes , nec pro republica , nec pro me defugiendas putavit. Atque utinam , quàm ego sum in illum gratus , tam licuisset per hominum vim , & injuriam prætoris , ei gratiam referri ! Sed , si non eadem contendit in tribunatu Plancius ; existimare debes , non huic voluntatem defuisse , sed me , quum tantum jam Plancio deberem , Racilii beneficiis fuisse contentum.

78. An verò putas , iudices idcirco minus meâ causâ facturos , quòd me esse

PRO CN. PLANCIO. 549

gratum crimineris? An, quum populus Romanus illo senatusconsulto, quod in monumento Marii factum est, quo mea salus omnibus est gentibus commendata, uni Cn. Plancio gratias egerit (unus enim fuit de magistratibus, defensor salutis meæ, cui senatus pro me gratias agendas putavit) ei ego a me referendam gratiam non putem? Atqui, eum quum vides, quo me tandem animo in te putas esse, Laterensis? ullum esse tantum periculum, tantum laborem, tantam contentionem, quam ego non modò pro salute tua, sed etiam pro dignitate defugerem? Quo quidem etiam magis sum, non dicam miser (nam hoc quidem abhorret a virtute verbum) sed certè exercitus: non quia multis debeo; leve enim onus, beneficii gratia: sed quia sæpe concurrat propter aliquorum de me meritorum inter ipsos contentiones, ut eodem tempore in omnes verear ne vix possim gratus videri. Sed ego hoc meis ponderibus examinabo, non solùm quid cuique debeam, sed etiam quid cuiusque intersit, & quid a me cuiusque tempus poscat.

XXXIII. Agitur studium tuum, vel etiam, si vis, existimatio, laus, ædilitas: at Cn. Plancii salus, patria, fortunæ. Salvum tu me esse cupisti; hic fecit etiam, ut esse possem: distineor tamen, & divel-

lor dolore, & in causa dispari offendi te a me, doleo: sed, medius fidius, multò citiùs meam salutem pro te abjecero, quàm Cn. Plancii salutem tradidero contentioni tuæ.

80. Etenim, Judices, quum omnibus virtutibus me affectum esse cupiam, tamen nihil est, quod malim, quàm me & gratum esse, & videri. Hæc est enim una virtus non solùm maxima, sed etiam mater virtutum omnium reliquarum. Quid est pietas, nisi voluntas grata in parentes? qui sunt boni cives, qui belli, qui domi de patria benè merentes, nisi qui patriæ beneficia meminerunt? qui sancti, qui religionum colentes, nisi qui meritam diis immortalibus gratiam justis honoribus, & memori mente persolvunt? Quæ potest esse jucunditas vitæ, sublatiis amicitiiis? quæ porro amicitia potest esse inter ingratos?

81. Quis est nostrum liberaliter educatus, cui non educatores, cui non magistri sui, atque doctores, cui non locus ille mutus, ubi ipse alitus aut doctus est, cum grata recordatione in mente versetur? Cujus opes tantæ esse possunt, aut umquam fuerunt, quæ sine multorum amicorum officiis stare possint? quæ certè, sublatâ memoriâ, & gratiâ, nulla exstare possunt. Equidem nihil tam proprium ho-

minis existimo, quàm non modò beneficio, sed etiam benevolentiae significatione alligari; nihil porrò tam inhumanum, tam immane, tam ferum, quàm committere, ut beneficio non dicam indignus, sed victus esse videare.

82. Quæ quum ita sint, jam succumbam, Laterensis, isti tuæ orationi; in eo ipso, in quo nihil potest esse nimium, quoniam ita tu vis, nimium me gratum esse concedam: petamque a vobis, Iudices, ut eum beneficio complectamini, quem qui reprehendit, in eo reprehendit, quòd gratum præter modum dicat esse. Neque enim ad negligendam meam gratiam debet valere, quod dixit idem, vos nec nocentes, nec litigiosos esse, quò minus me apud vos valere oporteret. Quasi verò in amicitia mea non hæc præsidia (si qua fortè sunt in me) parata semper amicis esse maluerim, quàm necessaria. Etenim ego de me tantum audeo dicere, amicitiam meam voluptati pluribus, quàm præsidio fuisse: meque vehementer vitæ meæ poeniteret, si in mea familiaritate locus esset nemini, nisi litigioso, aut nocenti.

XXXIV. Sed hoc nescio quomodo frequenter in me conguessisti, sanèque in eo creber fuisti, te idcirco in ludos causam conjicere noluisse, ne ego meâ consuetu-

dine aliquid de thensis misericordiæ causâ dicerem : quod in aliis ædilibus antè fecissem. Nonnihil egisti hoc loco : nam mihi eripuisti ornamentum orationis meæ : deridebor , si mentionem thenfarum fecero , quum tu id prædixeris : sine thensis autem quid potero dicere ?

84. Hic etiam addidisti , me idcirco meâ lege ex isto ambitu traxisse , ut miserabiliores epilogos possem dicere. Non vobis videor cum aliquo declamatore , non cum laboris & fori discipulo disputare ? Rhodi enim , inquit , non fui. Me vult fuisse : sed fui , inquit , Nicæis (putabam in Vaccæis dicturum) bis in Bithynia. Si locus habet reprehensionis ansam aliquam , nescio cur severiorem Nicæam putes , quàm Rhodum : si spectanda causa est ; & tu in Bithynia summa cum dignitate fuisti , & ego Rhodi non minore. Nam , quod in eo me reprehendisti , quod nimium multos defenderim ; utinam & tu , qui potes , & ceteri , qui defugiunt , vellent me labore hoc levare ! sed fit vestrâ diligentia , qui in causis ponderandis omnes ferè repudiatis , ut ad nos pleræque confluant , qui miseris & laborantibus nihil negare possumus.

85. Admonuisti etiam , quod in Creta fuisses , dictum aliquod in petitione tua dici potuisse : me id perdidisse. Uter igitur nostrum

nostrum est cupidior dicti? egone, qui, quod dici potuit, non dixerim; an tu, qui etiam ipse in te dixeris? Te aiebas de tuis rebus gestis nullas litteras misisse, quod mihi meae, quas ad aliquem misissem, obfuisent: quas ego mihi obfuisse non intelligo; reipublicae video prodesse potuisse.

XXXV. Sed sunt haec leviora: illa vero graviora, atque magna, quod meum discessum, quem saepe defleras, nunc quasi reprehendere, & subaccusare voluisti: dixisti enim, non auxilium mihi, sed me auxilio defuisse. Ego vero fateor mehercule, quod viderim mihi auxilium non deesse, idcirco me illi auxilio pepercisse: qui enim status, quod discrimen, quae fuerit in republica tempestas illa, quis nescit? Tribunitius me terror, an consularis furor movit? decertare mihi ferro magnum fuit cum reliquiis eorum, quos ego florentes atque integros sine ferro viceram? Consules post hominum memoriam teterrimi, atque turpissimi, sicut & illa principia, & hi recentes rerum exitus declararunt; quorum alter exercitum perdidit, alter vendidit; emptis provinciis, a senatu, a republica, a bonis omnibus defecerant: qui exercitibus, qui armis, qui opibus plurimum poterant, quum, quid sentirent, nesciretur, furialis illa vox nefariis stupris, religiosis altaribus effemi-

nata, secum & illos, & consules facere; acerbissimè personabat: egentes in locupletes, perditi in bonos, servi in dominos armabantur.

87. Aderat mecum senatus, & quidem veste mutatâ; quod pro me uno, post hominum memoriam, publico consilio susceptum est. Sed recordare, qui tum fuerint consulum nomine hostes, qui soli in hac urbe senatum senatui parere non siverint; edictoque suo non luctum patribus conscriptis, sed luctûs indicia ademerrint. Aderat mecum cunctus equester ordo, quem quidem in concionibus saltator ille Catilinæ consul proscriptionis denuntiatione terrebat: ac tota Italia convenerat; cui quidem belli intestini, & vastitatis metus inferebatur.

XXXVI. Hisce ego auxiliis studentibus, atque incitatis, uti me, Laterensis, potuisse confiteor; sed erat non jure, non legibus, non disceptando decertandum (nam profectò, præsertim tam bona in causa, numquam, quo ceteri abundarunt, id mihi ipsi auxilium meum defuisset) armis fuit, armis, inquam, fuit dimicandum; quibus a servis, atque a fervorum ducibus cædem fieri senatûs, & bonorum, reipublicæ exitiosum fuisset. Vinci autem improbos a bonis, fateor fuisse præclarum, si finem eum vincendi viderem; quem profectò non videbam. Ubi enim præstò

fuiſſet mihi aut tam fortis conſul, quàm L. Opimius? quàm C. Marius? quàm Lucius Flaccus? quibus ducibus improbos ci-
ves reſpublica vicit armatis: aut, ſi minùs fortes, attamen tam juſti, quàm P. Mu-
cius, qui arma, quæ privatus P. Scipio ſumpſerat, ea, Tib. Graccho interempto,
jure optimo ſumpta eſſe defendit? Eſſet
igitur pugnandum cum conſulibus: nihil
ampliùs dico, niſi illud, Victoriæ noſtræ
graves adverſarios paratos; interitùs nul-
los ultores eſſe videbam.

89. Hiſce ego auxiliis ſalutis meæ ſi id-
circo defui, quia nolui dimicare; fatebor,
id quod vis, non mihi auxilium, ſed me
auxilio deſuiſſe: ſin autem, quò majora
ſtudia in me bonorum fuerunt, hòc iis
magis conſulendum, & parcendum puta-
vi; tu id in me reprehendis, quod Quinto
Metello laudi datum eſt, hodieque eſt, &
ſemper erit maximæ gloriæ? quem, ut
potes ex multis audire, qui tum affuerunt,
conſtat invitiffimis viris bonis ceſſiſſe; nec
fuiſſe dubium, quin contentione & armis
ſuperior poſſet eſſe. Ergo ille, quum
ſuum, non quum ſenatùs factum defende-
ret; quum perſeſverantiam ſententiæ ſuæ,
non ſalutem reipublicæ retinuiſſet; tamen
ob illam, quòd illud voluntarium vulnus
accepit, juſtiſſimos omnium Metellorum
& clariſſimos triumphos gloriæ laude ſu-
peravit, quòd & illos ipſos improbiffimos

cives interfici noluit, &, ne quis bonus interiret in eadem cæde, providit: ego, tantis periculis propositis, quum si victus essem, interitus reipublicæ; si vicissem, infinita dimicatio pararetur; committerem, ut idem perditor reipublicæ nominarer, qui servator fuisset?

XXXVII. Mortem me timuisse dicis. Ego verò ne immortalitatem quidem contra rempublicam accipiendam putarem, nedum emori cum perniciæ reipublicæ vellem: nam, qui pro republica vitam ediderunt (licet me desipere dicatis) nunquam mehercule eos mortem potius, quàm immortalitatem assecutos putavi. Ego verò, si tum illorum impiorum ferro ac manu concidissem, in perpetuum respublica civile præsidium salutis suæ perdidisset. Quin etiam, si me vis aliqua morbi, aut natura ipsa consumpsisset, tamen auxilia posteritatis essent imminuta, quòd peremptum esset meâ morte id exemplum, qualis futurus in me retinendo fuisset senatus, populusque Romanus. An, si umquam in me vitæ cupiditas fuisset, ego mense Decembri mei consulatûs, omnium parricidarum tela commôsssem? quæ, si viginti quiessem dies, in aliorum jugulum consulum recidissent. Quamobrem, si vitæ cupiditas contra rempublicam est turpis, certè multò mortis cupiditas mea turpior fuisset cum perniciæ civitatis.

XXXVIII. Nam quòd te in republica liberum esse gloriatus es, id ego & fa-
teor, & lætor, & tibi etiam in hoc gra-
tulator: quòd me autem negasti, in eo ne-
que te, neque quemquam diutius patiar
errare. Nam, si quis idcirco aliquid de li-
bertate mea deminutum putat, quòd non
ab omnibus eisdem, a quibus antea solitus
sum dissentire, dissentiam; primùm, si
bene de me meritis gratum me præbeo,
non desino incurrere in crimen hominis
nimium memoris, nimiumque grati: sin
autem sine ullo reipublicæ detrimento,
respicio etiam aliquando salutem tum
meam, tum meorum; certè non modò
non sum reprehendendus, sed etiam, si
ruere vellem, boni viri me, ut id ne fa-
cerem, rogarent.

92. Res verò ipsa publica, si loqui pos-
set, ageret mecum, ut, quoniam sibi ser-
vissem semper, numquam mihi; fructus
autem ex sese non, ut oportuisset, lætos
& uberes, sed magnâ acerbitate permix-
tos tulissem, ut jam mihi servirem, con-
fulerem meis: se non modò satis habere a
me, sed etiam vereri, ne parum mihi pro
eo, quod tum a me haberet, reddidisset.

93. Quid, si horum ego nihil cogito?
& idem sum in republica, qui fui sem-
per? tamenne tu libertatem requires
meam? quam tu ponis in eo, si semper
cum iis, quibuscum aliquando contendi-

mus, depugnemus: quod est longè secus. Stare enim omnes debemus, tamquam in orbe aliquo reipublicæ, qui quoniam ver-
setur, eam deligere partem, ad quam nos illius utilitas, salusque converterit.

XXXIX. Ego autem Cn. Pompeium, non dico auctorem, ducem, defensorem salutis meæ (nam hæc privatim fortasse officiorum memoriam, & gratiam quæ-
runt) sed dico hoc, quod ad salutem rei-
publicæ pertinet: ego eum non tuear, quem omnes in republica principem esse concedunt? ego C. Cæsaris laudibus desim, quas primùm populi Romani, nunc etiam senatûs, cui me semper addixi, plurimis atque amplissimis judiciis videam esse celebratas? Tum hercule me confitear non iudicium aliquod habuisse de reipublicæ utilitate, sed hominibus amicum, aut inimicum fuisse.

94. An, quum videam navem secundis ventis cursum tenentem suum, si non eum petat portum, quem ego aliquando probavi, sed alium non minùs tutum atque tranquillum, cum tempestate pugnem periculosè potius, quàm illi, salute præfer-
tim propositâ, obtemperem, & paream? Neque enim inconstantis puto, senten-
tiam, tamquam aliquod navigium, atque cursum, ex reipublicæ tempestate moderari. Ego verò hæc didici, hæc vidi, hæc scripta legi: hæc de sapientissimis & cla-

rissimis viris, & in hac republica, & in aliis civitatibus monumenta nobis litteræ prodiderunt: non semper easdem sententias ab iisdem, sed, quascumque reipublicæ status, inclinatio temporum, ratio concordiæ postularet, esse defendendas: quod ego & facio, Laterensis, & semper faciam; libertatemque, quam in me requiris, quam ego neque dimisi umquam, neque dimittam, non in pertinacia, sed in quadam moderatione positam putabo.

XL. Nunc venio ad illud extremum, quod dixisti, dum Plancii in me meritum verbis extollerem, me arcem facere ex cloaca, lapidemque e sepulcro venerari pro deo; neque enim mihi insidiarum periculum ullum, neque mortis fuisse. Cujus ego temporis rationem explicabo brevi, neque invitus: nihil enim ex meis est temporibus, quod minùs pervagatum, quodque minùs aut meâ commemoratione celebratum sit, aut hominibus auditum, atque notum. Ego enim, Laterensis, ex illo incendio legum, juris, senatûs, bonorum omnium, cedens, quum mea domus ardore suo deflagrationem urbi, atque Italiæ toti minaretur, nisi quievissem, Siciliam petivi animo, quæ & ipsa erat mihi, sicut domus una, conjuncta; & obtinebatur a C. Virgilio, quocum me uno vel maximè quum vetusta amicitia, tum mei

fratris collegia, tum respublica sociarat.

96. Vide nunc caliginem temporum illorum. Quum ipsa pene insula mihi sese obviam ferre vellet, prætor ille, ejusdem tribuni plebis concionibus propter eandem reipublicæ causam sæpe vexatus, nihil ampliùs dico, nisi me in Siciliam venire noluit. Quid dicam? C. Virgilio, tali civi & viro, benevolentiam in me, memoriam communium temporum, pietatem, humanitatem, fidem defuisse? Nihil, Judices, est eorum: sed, quam tempestatem nos vobiscum non tulissemus, metu, ut eam ipse posset opibus suis sustinere. Tum consilio repentè mutato, iter a Vibone Brundisium terrâ petere contendendi: nam maritimos cursus præcludebat hiemis magnitudo.

XLI. Quum omnia illa municipia, quæ sunt a Vibone Brundisium, in fide mea, Judices, essent; iter mihi tutum, multis minitantibus, magno cum suo metu præstiterunt. Brundisium veni, vel potiùs ad mœnia accessi: urbem unam mihi amicissimam declinavi, quæ se vel potiùs exscindi, quàm e suo complexu ut eriperer, facillè pateretur. In hortos me M. Lenii Flacci contuli: cui quum omnis metus, publicatio bonorum, exsilium, mors proponeretur, hæc perpeti, si acciderent, maluit, quàm custodiam mei capitis dimittere. Hujus ego, & parentis ejus, pru-

dentissimi atque optimi senis, & utriusque filiorum manibus; in navi tuta ac fideli collocatus, eorumque preces & vota de meo reditu exaudiens, Dyrrhachium, quod erat in fide mea, petere contendi.

98. Quòd quum venissem, cognovi, id quod audieram, refertam esse Græciam sceleratissimorum hominum, ac nefariorum, quorum impium ferrum, ignesque pestiferos meus ille consulatus e manibus extorserat: qui antequam de meo adventu audire potuissent, quum tum abessent aliquot dierum viam, in Macedoniam, ad Planciumque perrexì. Hic verò simul atque me mare transisse cognovit (audi, audi, atque attende, Laterensis, ut scias, quid ego Plancio debeam, confiteareque aliquando, quod faciam, me & gratè, & piè facere: huic, quæ pro salute mea fecerit, si minùs profutura sint, obesse certè non oportere) nam simul ac me Dyrrhachium attigisse audivit; statim ad me, lictoribus dimissis, insignibus abjectis, veste mutatâ, profectus est.

99. O acerbam mihi, Iudices, memoriam temporis illius, & loci, quum hic in me incidit, complexus est, conspersitque lacrymis, nec loqui præ mœrore potuit! ô rem quum auditu crudelem, tum visu nefariam! ô reliquos omnes dies, noctesque eas, quibus iste a me non recedens, Thessalonicam me, in quæsto-

riumque perduxit ! Hic ego nunc de præ-
tore Macedoniae nihil dicam amplius , ni-
si , eum & civem optimum semper , &
mihi amicum fuisse , sed eadem timuisse ,
quæ ceteros : Cn. Plancium fuisse unum ,
non , qui minus timeret , sed , si accide-
rent ea , quæ timerentur , mecum ea sub-
ire , & perpeti vellet.

100. Qui , quum ad me L. Tubero ,
meus necessarius ; qui fratri meo legatus
fuisset , decedens ex Asia venisset , eas-
que insidias , quas mihi paratas ab exsu-
libus conjuratis audierat , animo amicissi-
mo detulisset ; in Asiam me ire , propter
ejus provinciæ mecum & cum meo fratre
necessitudinem , comparantem , non est
passus : vi me , vi me , inquam , Plancius ,
& complexu suo retinuit , multosque men-
ses a capite meo non discessit , abjectâ
quæstoriâ personâ , comitisque sumptâ.

XLII. O excubias tuas , Cn. Planci ,
miseras ! ô flebiles vigilias ! ô noctes acer-
bas ! ô custodiam etiam mei capitis infel-
licem ! si quidem ego tibi vivus non pro-
fum , qui fortasse mortuus profuissem. Me-
mini enim , memini , neque umquam obli-
viscar noctis illius , quum tibi vigilantii ,
assidenti , mœrenti , vana quædam miser ,
atque inania , falsâ spe inductus , pollice-
bar ; me , si essem in patriam restitutus ,
præsentem tibi gratiam relaturum : sin au-
tem vitam mihi fors ademisset , aut vis ali-

qua major reditum peremisset; hos, hos (quos enim ego tum alios animo intuebar?) omnia tibi illorum laborum præmia pro me persoluturos. Quid me adspicias? quid mea promissa repetis? quid meam fidem imploras? nihil tibi ego tum de meis opibus pollicebar, sed de horum erga me benevolentia promittebam: hos pro me lugere, hos gemere, hos decertare pro meo capite, vel vitæ periculo velle videbam: de eorum desiderio, luctu, querelis quotidie aliquid tecum simul audiebam: nunc timeo, ne nihil tibi, præter lacrymas, queam reddere, quas tu in meis acerbitatibus plurimas effudisti.

102. Quid enim possum aliud, nisi mœrere? nisi flere? nisi te cum salute mea complecti? salutem tibi iidem dare possunt, qui mihi reddiderunt. Te tamen, exsurge quæso, retinebo, & complectar; nec me solum deprecatores fortunarum tuarum, sed comitem, sociumque profitebor: atque (ut spero) nemo erit tam crudeli animo, tamque inhumano, nec tam immemor, non dicam meorum in bonos meritorum, sed bonorum in me, qui a me mei servatorem capitis divellat, ac distrahat. Non ego meis ornatum beneficiis a vobis deprecor, Iudices, sed custodem salutis meæ: non opibus contendo, non auctoritate, non gratiâ; sed precibus, sed lacrymis, sed misericordiâ: me-

564 *OR. PRO CN. PLANCIO.*

cumque vos simul hic miserrimus & optimus obtestatur parens, & pro uno filio duo patres deprecamur.

103. Nolite, Iudices, per vos, per fortunas, per liberos vestros, inimicis meis, his præsertim, quos ego pro vestra salute suscepi, dare lætitiā, gloriantibus vos jam oblitos mei, salutisque ejus, a quo mea salus conservata est, hostes exstitisse: nolite animum meum debilitare tum luctu, tum etiam metu commutatæ vestræ voluntatis erga me: sinite me, quod vobis fretus huic sæpe promisi, id a vobis ei persolvere.

104. Teque, C. Flavi, oro & obtestor, qui meorum consiliorum in consulatu socius, periculorum particeps, rerum, quas gessi, adjutor fuisti, meque non modò salvum semper, sed etiam ornatum, florentemque esse voluisti; ut mihi per hos conserves eum, per quem me tibi & his conservatum vides. Plura ne dicam, tuæ me etiam lacrymæ impediunt, vestræque, Iudices, non solum meæ: quibus ego, magno in metu meo, subito inducor in spem, vos eosdem in hoc conservando futuros, qui fueritis in me; quoniam istis vestris lacrymis de illis recordor, quas pro me sæpe & multum profudistis.

F I N I S.

NOTANDA ET CORRIGENDA.

*Numerus alter paginam , alter lineam
indicat.*

P. 2 , L. 11. *Complecti orando.* Pythœanus liber & unus e nostris habent *complecti ornando* , quam lectionem præstare vulgatæ censet Grævius.

3 , 30. L. *Mummio.* Ita dedimus e codicibus nostris , in quibus scibitur *Mumio*. Turnebus ex Dione reposuit *Ninnio* , quod servant plerique vulgati.

8 , 3. *Nec tueri.* Ita Turnebi codices & nostri , idque præferendum duximus vulgato , *nec intueri*.

9 , 3. *Quàm quodd.* Particulam *quodd.* , ut inculcatam contra decus linguæ Latinæ , debebat J. F. Gronovius , & huic quidem in uno e nostris mss. subjiciuntur puncta tamquam delendæ.

12 , 6. *Is me quidem minimè (cognoram enim... quamquam longè hunc &c.* Ita e vestigiis codicum & editorum restituit locum Grævius , qui tamen in sequentibus pro *cognatio* , mallet *contagio*. Vulgati nullo sensu , nec ullis mss. auctoribus , *is me (quamquam equidem non : cognoram enim...quàm longè hunc &c.*

Ibid. 30. *Sed ne vultu quidem.* Sequimur cum Grævio codices Pythœanum & Erfurtensem. Vulgati habent *luctu* , quæ vox hic otiosa est , quum sequatur *vestitu*.

17 , 6. *Proditores meos non indicem ; dolorem profectionis meæ redditus dignitate consoler.* Ita plerique Gruteri codices , & duo e nostris :

alii vitiosè cum vulgatis , *proditoribus meis non indicem dolorem profectionis meae : defensores redditus dignitate consoler.*

19 , 6. *Molestus omnibus sanè , ipsi ne luctuosus quidem visus est.* Ita dedit Grævius , & sic habet , teste Grutero , Palatinus nonus : idque præstat vulgatæ lectioni , *honestus ipsi , omnibus luctuosus tandem visus est.*

20 , 10. *Quid denique ille dies.* Ita duo codices e nostris ; tertius habet , *qui denique illo die* , unde videtur legendum , *qui denique ille dies* , pro vulgato , *quid denique illo die.*

21 , 4. *Apud universum populum salutem populi Romani.* Ita Grævii codex Erfurtensis & duo e nostris , acrius & venustius , quàm vulgati , *apud universum populum Romanum salutem reipublicæ.*

23 , 19. *Alter consul , ut me...non modò desererent , sed...proderent , passionibus eos...obligarat.* Ita mendosè vulgati , nullò sensu. Locum Grævius emendavit , ut dedimus , & favent codices nostri , in quibus constanter scribitur *desereret* , & *proderet.*

25 , 7. *Remanendum ampliùs putavi.* Vocem mediam , quàm ignorant codices nostri , delevimus.

26 , 25. *Metellarum filii.* Ita cum Turnebo & Manutio dedimus. Vulgati mendosè *Metellorum.* Vide in ea , quæ sequitur , oratione n. 6.

32 , 1. *Sed sicut.* Plures mss. addunt *tamquam* , quæ vox interpretatio est præcedentis , nec debuit , priore expulsâ , locum alienum occupare , ut in plerisque editis.

33 , 23. *Tantum...universum cuncto populo.* Ita codices nostri , ut voluit Turnebus. Vulgò *universum.* Vocem *cuncto* debebat Grævius.

34, 29. *Fratriſque mei*. Codices non agnos-
cunt vocem *mei*, quam cum Grævio delevimus.

35, 11. *Pro eodam me*. Abest a mss. vox me-
dia : & paulò post, *unus hic, qui domi*. Posterio-
res voces, quas ignorant iidem codices, cum Græ-
vio delevimus. Pro his unus e nostris habet, *unus
hic, qui quidem in foro &c.*

36, 8. *Non modò nan*. Alterum *non* ignorant
Grævii codex Dresdensis, & plures e nostris,
ut etiam prima editio. Additum videtur ab iis,
qui ignoratunt, *non modò sæpe poni pro non
modò nan.*

37, 31. *Voluntate tamen perfecta senatûs*. Ita
codices nostri, ut edidit Victorinus & Grævius.
Alii, *voluntate tamen perspectâ senatûs.*

38, 8. *Cui parti*. Ita Græviani codices & nos-
tri, ut & editio princeps. Vulgò *cujus partis*.

Ibid. 26. *Quod potui*. Has voces, quas ser-
vant codices nostri, restituit e suis Grævius,
omissas in vulgatis.

45, 12. *Atque in officio persolvendo dissimi-
lis est ratio & pecunia debita*. Ita duo codices, &
nostri : tertius cum duobus Grævianis, & edi-
tione princeps, omittit totam hanc periodum ad
finem usque numeri, translatam fortasse huc pa-
rum commodè ex Planciana 68. aut ex libro II.
de Officiis 69.

51, 17. *Armatoſ etiam*. Abest a nostris mss.
vox *etiam*, quam Grævius addidit.

53, 5. *Illi non item*. Ita e Bargæi codice
Manutius, ut sensus postulat. Vulgò *illuc irem*.

54, 14. *Quæ vis, quæ causa*. Ita Grævii co-
dices & nostri, pro vulgato, *quæ res, quæ causa*.

Ibid. 23. *Propter varietatem venditorum*. Forè
propteravaritiam, idque mallet Grævius.

58, 6. *Possẽm aliquid in ea regeneratio non habebatur.* Ita vitiosè codex S. Victoris, & unus e nostris; quibus e vestigiis Grævius eam concinnavit lectionem, quam secuti sumus. Nihil sanè potest elici aut ex aliis codicibus, qui corruptissimi; aut ex vulgata lectione, *quasi possẽm aliquid in ea re gerenda; non habebatur.*

60, 20. *Ratione vitæ mirabili.* Ita veteres editi, & plerique codices. Gruterus maluit, *ratione; vitâ mirabili.*

61, 30. *Ex Caesaris rebus actis.* Vox ultima quid sibi velit nescire se fatetur Grævius. Hac fortasse voluit aliquis interpretari præcedentem.

62, 19. *Constitui per senatum, decretâ lege sanxit.* Lectio minùs sana. Fortè, *constitui per senatus decretum, lege sanxit.*

66, 31. *Idemque quum dixisset.* Videntur deesse vocès, *in contione.*

68, 21. *Hoc dico, esse patricium.* Ita cum Manutio & Grævio duo codices e nostris, ut sensus postulat. Tertius vitiosè scribit *patricidium*, unde vulgatum, *hoc dico esse parricidium.*

70, 2. *Patris loco.* Has voces, omissas in vulgatis, revocavit Grævius e Francii 1. & editione principe.

77, 16. *In prædæ sectione.* Ita Pythæus & Grævius reposuerunt, pro vulgato, *in prædæ societate.* Quid enim est *adhibere socium in societate?*

Ibid. 22. *Per medium cohortis popularis.* Ita Grævius emendavit e Francii primo, & eodem alludunt plerique codices, quorum nullo adstruitur vulgata lectio, *per medium forum popularis* &c.

78, 21. *Uno scitu tulisti.* Veram lectionem

restituit Grævius. Vulgò , uno sortitu retulisti. Infra post *stuprorum omnium* , addebat Hotomanus *principem* , quæ vox aut alia similis deesse videtur.

81 , 19. *Terrore complerent*. Ita Grævius e conjectura. Deest in vulgatis vox *terrore* , quam sensus postulat.

Ibid. 26. *Quid igitur ego cessi*. Ita Manutius & Pantagathus , pro vulgato , *quid igitur ego gessi*.

83 , 2. *Nova manus*. Vulgò *nova vis*. Mutavit Grævius e Francii primo , & eodem ducunt alii codices , in quibus vitiosè scribitur *novatos nos*.

84 , 19. *Bellum interneciyum*. Ita Gruterus , probatque Grævius , pro vulgato *intestlinum* , cui vocis nullus hic locus.

85 , 1. *Senatum consules vetabant*. Grævius expressit , quod erat in Erfurtensi codice , *senatus-consulta volabant*.

86 , 11. *Ego....dubitarem ? hòc meliore conditione , quàm Decii , quòd &c.* Ita nostri codices & veteres editi , idque præstat Gruterianæ lectioni , *ego....dubitarem hòc meliore conditione esse , quàm Decii , quòd &c.*

Ibid. 22. *Non erat , ut , qui modus moribus fuerat*. Hæc est lectio mss. & veterum editorum , nisi quòd quidam habent , *modus omnibus moribus* : sed mediam vocem ignorant codices nostri.

88 , 8. *Nihil esse jure scitum*. Ita Manutius & Pantagathus , probante Ursino. Vulgò , *nihil esse inscriptum* , alieno planè sensu.

90 , 19. *Quum tantis sceleribus esses*. Addunt vulgati , & *factis* : quas voces rectè delevit Grævius.

95 , 12. *Qui....confirmat*. Sic habent Græ-

viani & nostri codices , pro vulgato , *confirmavit*.

Ibid. 15. *Qui in æs ejus nomen incideris*. Ita Pantagathus , probantibus Faerno & Ursino. Alii omittunt voculam *æs* , quæ abesse non posse videtur.

102 , 13. *Non tam insolens sum , quòd...quàm eruditus*. Ita Victorius & editio Veneta , quibus accedit codex unus e nostris. Codex alius habet , ut voluit Ursinus , *non tam insolens sum , qui Jovem esse me dicam ; non tam ineruditus , qui Minervam Jovis sororem esse existimem*. Sed hæc manum correctoris sapiunt.

Ibid. 20. *Non tam sum existimandus de rebus gestis gloriari , quàm de objectis non confiteri*. Alterutram negationem sensus respuit. Nos priorem delevimus. Alterâ deletâ , exsurget alia sententia non indigna Cicerone : *non tam sum existimandus de rebus gestis gloriari , quàm de objectis confiteri* : idque habet codex unus e nostris.

105 , 25. *Atque ita , ut quum dolenter absis*. Voculam *quum* omittunt vulgati , quam servant Grævii codices & nostri. *Non tam sapiens*. Post hæc verba videtur excidisse *vix , ducaris , existimeris*.

107 , 17. *Melii pœna comprobata est*. Ita conjecturâ certissimâ Grævius emendavit vitiatam editorum lectionem , *stultitia pœnâ comprobata est*.

110 , 30. *Concitate*. Lege *concitados*.

115 , 23. *Monumentum iste unquam...excogitavit* ? Ita locus legitur in Grævii codicibus & nostris , & in veteribus editis. Recentiores dederunt , *monumentum iste numquam...excogitavit*.

Ibid. 29. *Ut sibi domum venderet*. Ita codex unus e nostris. Alii cum vulgatis vitiosè , *ut Q. Postumius &c*. Quæ nomina Seji , ad oram

libri scripta, malè in ipsum textum migrarunt.

118, 6. *Verbone pontificis putatis, si is &c.* Ita duo codices e nostris, ut legendum conjece-
runt Ursinus & J. F. Gronovius. Vulgati ha-
bent, *verbone*, aut *ergone*, *Pontifices*, *putatis*,
si is &c. sensu aut impedito, aut nullo.

123, 7. *Ipso si loco.* Dele cum Grævio pri-
mam vocem. *Si loco*, id est, si jure & legitime
essent consecrata.

124, 4. *Imperia adscribebantur novæ juven-
tuti.* Locus contaminatus, quem sanari non posse
sine libri melioris ope censet Grævius. Nihil va-
riant nostri.

129, 18. *Sublatoque Q. Catuli nomine.* Vi-
detur excidisse vox, *tuum incideris.*

132, 27. *Omnes hi suum...studium...commis-
sum...arbitrantur.* Ita Grævius locum restituit e
suis codicibus, quibus accedunt nostri, in quibus
tantum scribitur *omnes hi tum*, pro *suum*. Vitiosa
vulgata lectio, *omne vobis...studium...commisum...
arbitrantur.*

143, 1. *Quum mihi tacenti stans minaretur.*
Ita e conjectura Grævius. In mss. voces *tacenti*
& *stans* sunt oscitantia librariorum invicem per-
mutatae, *quum mihi stanti tacens.*

145, 15. *Sexti Clodii ore tincto.* Ita Grute-
riani codices, & duo e nostris. Vulgati, omissis
vocibus *ore tincto*, habent tantum *Sextus Clodius*
conscripsisset.

146, 15. *Q. Scipio.* In oratione pro Domo
123. dicitur *P. Scipio.*

149, 6. *In Velia publicè.* Vulgata lectio, *in villa*
publica, quin corrupta sit, nemo dubitat: itaque
cum Grævio sequimur emendationem Palmerii &
Rubenii, auctoritate nixam Varronis & Livii.

151, 11. *Prædixerit*. Scilicet Etruscorum disciplina. Ita Grævius; malleus tamen cum vulgatis, *prædixerint*.

153, 19. *Mater Idea*. Ita rectè emendavit Faernus, probantque Ursinus & Grævius, pro vulgato *mater Dea*. Infra, *cujus ab avia manibus*. Ita quidem codices: sed videtur legendum cum Fabricio & Manutio, *cujus ab atavi manibus*, scil. Scipionis illius Nasicæ, qui optimus a senatu judicatus, matrem Ideam hospitio excepit. Ab eo Lentulus maternum genus trahebat.

161, 19. *Omnes indices...e carcere in forum effudit*. Eodem sensu dixit in Pisonem 16. *in me carcerem effudistis*. Vulgò editur *judices*, nullo sensu. De voce *indices* vide pro Murena 49. pro Sulla 70. & pro Sextio 95.

165, 3. *Somnium matricidarum*. Ita quidem vulgati: sed pro *somnium*, Gruteri & Grævii codices, ut etiam duò e nostris præferunt *senium*. Est autem *senium* mæstitia, angor, & cruciatus animi, quo conficiuntur, qui nec se, nec alios pati possunt.

169, 20. *Principi...dicenti*. Lege omnino cum Manutio *principe...dicente*. Contra Clodium sententiam dixerat Pompeius.

170, 24. *Ut...modò se venditet illis*. Ita, Ursino teste, liber mss. sed explendæ sententiæ deest, *modò his*, quas voces cum Panthagatho & Grævio addidimus. Vulgati tantum habent, *ut modò se vendat illis*.

171, 13. *Alienatione a quibusdam, hærent ea tela &c.* Ita perlevi mutatione correximus vitiatam mss. & editorum lectionem. *Alienatione, & quibusdam hærentia tela &c.* quibus ex verbis nihil se extricare posse fatetur Grævius.

175, 31. *Etiam, ne...res recidat.* Dele cum Grævio primam vocem, quam ignorat codex Erfurtensis.

178, 25. *Deorum ignes, folia, mensas.* Ita codex e nostris optimus, cum pluribus aliis Grutero & Grævio excussis, quæ lectio præstat vulgatæ, *Deorum ignes, solennes mensas.*

185, 22. *Quia quâ voce.* Ita codices nostri cum Hotomano. Primam vocem omittunt vulgati.

190, 4. *Ut jam virilis tua vox.* Ita Grævii codices & nostri. Gruterus dedit ex conjectura Ursini, *ut jam puerilis tua vox.*

191, 19. *Non excellens animo & amore reipublicæ* (Addunt editi recentiores, *non præstans in reipublica*) *virtus* : quas voces rectè delevit Grævius.

194, 15. *Inauditâ libidine insani.* Ita codices nostri cum Grævianis, & editis veteribus, idque significantius videtur vulgato *infamis.*

195, 4. *Fœneratorum gregibus inflatus.* Ultima vox corrupta. Grævius ex conjectura reponerat *infestatus.*

202, 22. *Aut edicto.* Vel legendum cum Pantagatho, *suo edicto*, vel duo hæc verba cum Manutio, Lambino, Grævio delenda.

204, 31. *Nemone mutavit?* Videtur legendum, *mutabit*, ut innuat Pisonem, ubi ex Macedonia decesserit, quam tum imperio consulari regebat, reum fore.

211, 23. *Et effusam illam ac superatam.* Guilielmus legebat, & *fusam illam*, deletis vocibus *ac superatam*, quas, Grutero teste, ignorant duo codices & editio princeps.

212, 16. *Plaga mihi sanabilis, illis mortifera, qui eam inposuissent.* Ita Lambinus & Gruterus,

proximè ad codices, in quibus vitiosè scribitur, *mihi sanabilis, illi mortifera, quam ei imposuisset. Victorius & Manutius dederunt, mihi insanabilis, reipublica mortifera, quam ei imposuissem.*

217, 23. *Et ad reipublica statum.* Hæc corrupta esse nemo non videt. Emendabat Grævius, *ad incertissimam spem recuperandi statum suum.*

220, 17. *Inter meum discrimen & eorum prædam.* Ita quidem codices nostri & editi veteres: sed Palatini plerique habent, teste Grutero, *inter meum casum & suam prædam.*

223, 28. *Tulit, gessit.* Apertum mendum. Lambinus affirmat in codice Memmiano scriptum reperiri, *Tigranes igitur, qui & ipse &c.*

227, 6. *Quamquam quis audiret, si maximè queri vellent.* Ita codex e nostris optimus, ut voluere Pantagathus, Ursinus, Lambinus. Mendosa lectio vulgata, *quamquam quis auderet, si maximè queri vellet.*

232, 8. *Ex deserto Gavii Capionis horreo.* Ita locum emendavit Perizonius Animad. historicis, pp. 30. & sequentibus. Fuere iis temporibus *Gavii Capiones*, nulli *Gavii Oleli*, quomodo habent vulgati. Codices nostri corruptè, *Gavi Liorea.*

233, 2. *Magnâ rerum permutatione.* Vulgò *perturbatione.* Grævii codices & nostros sequimur.

241, 4. *Vos taciti mærebatis.* Ita codices nostri cum Grævianis. Vulgò *mirabamini* aut *mærebamini.*

242, 8. *Hominum sceleribus.* Vulgò *sceleri.* Alterum habent Grævii codices & nostri.

244, 5. *Quis umquam tam propriè... id umquam esse facturum.* Hæc corrupta sine libris melioribus sanari non possunt. Cogitabat Græ-

vius, quis umquam tam promptè...id esset facturus.

245, 3. *Jure præsidium comparat*? Hæc priora Milonem spectant, quem laudabat accusator Sextii, sequentia ad ipsum Sextium pertinent. Veram lectionem servarunt duo e nostris codicibus, ex quibus etiam infra dedimus *monetur*, pro vulgato *movetur*. Vitiosè vulgati, *qui vitæ præsidium comparat*, sine distinctione Milonis & Sextii; qua ex lectione ut sensum aliquem eliceret Manutius, addebat, *eum laudas*? Loci depravandi occasio fuit frequens repetitio vocis *qui*.

218, 3. *Indicibus*. Reponit Lambinus *audacibus*. Sed vide de voce *indices* Orat. de aruspicum responsis, n. 34.

249, 19. *Ut hi sint optimates*. Ita cum Ursini libro unus e nostris. Vulgati omittunt *optimates*.

262, 1. *Ore ipsi*. Lambinus dedit ex conjectura Memmii auctori *ipsi*.

265, 21. *Siflis pelli*. Ita scribunt Grævii codices & nostri. Vulgò *sivistis*.

270, 30. *Et ad Numidici illius Metelli casum*. Ita Manutius locum emendavit ex oratione post reditum in senatu, n. 25. Vitiosè codices & editi, & *ad unum dicto citius Metelli casum*.

272, 28. *Aliquid defecti*. Vox corrupta, pro qua Manutius reponebat *aliquid de me fidi*.

275, 30. *Ab universo populo*. Lege cum Hotomano, *ex universo populo*. Hanc emendationem flagitant verba, quæ sequuntur.

285, 12. *Ut mihi renovatus ille tuus in te ****. Turnebus vidit hic in mss. vacantem totam paginam.

288, 21. *Sed tamen ne me cum his principibus, qui adsunt P. Sextio, sed ut tecum, homine uno impudentissimo atque infimo*. Ita Lambinus ex

duobus mss. & Grævius ex Erfurtensi locum integrarunt, qui in vulgatis mutilus & mendosus sic legitur: & ut ne me cum homine uno non solum impudentissimo atque infimo, contra mentem oratoris.

300, 10. *Collocatam*. Nempe filiam. Vulgò *collocatas*. Grævii codicem Erfurtensem, & e nostris duo sequimur.

303, 14. *Urnas delegerit*. Ita constanter Gruteri & Grævii codices. & duo e nostris, pro *dejecerit*. Est autem *deligere*, ut viri docti observarunt ex Nonio, ejicere, eliminare.

310, 12. *Ostendam alio loco*. Ita codex optimus e nostris: in vulgatis deest verbum *ostendam*, omissum a librariis, quia præcessit vox *debeam*.

312, 22. *Cetera accusator fatetur*. Ita Gruteri & Grævii codices, & unus e nostris, idque præstat, vulgato *ceterum*.

Ibid. 30. *Et Duriensi*. Probat Isaacus Vossius in notis ad Pomponii Melæ 11, 6. legendum non *Duriensi*, sed *Turiensi*, a fluvio *Turia* qui Valentiam præterfluit, nunc *Guadalaxar*.

315, 5. *Quem exteræ gentes*. In Gruteri codicibus & nostris scribitur *alteræ gentes*, aut *ultra regentes*; unde suspicatur Grævius Ciceronem scripsisse, *quem ultimæ gentes*.

318, 8. *Temporis magis hujus vitio, quàm hominis; neque ego de tam iniquo genere judicii plura dicam*. Ita locum se restituisse ait Hottomanus e. mss. nam Manutii & Gruteri codices, ut & nostri corruptè habent *temporum magis: ego non hujus, inquam, genere judicii plura dicam*.

323, 16. *Quorum jus & fortunæ conditio*. Deest copula in plerisque codicibus, unde Guilielmus

lielmus malebat, *quorum vi fortunæ conditio infima est.* Jus autem & vis eodem ferè modo scribuntur in mss. & ideo frequenter permutantur.

329, 13. *Aut obtestatione & consecratione legis aut pænæ.* Locus mendosus. Videtur legendum cum Pantagatho & Ursino, *ut obtestatione legis & consecratione pænæ.* Nihil variant codices nostri.

Ibid. 22. *Neque legem, neque pænam latam esse.* Hæc verba, tamquam ineptum glossema, rectè delet Manutius.

330, 11. *Fædus fecisse.* Ita Græviani codices & nostri. Vulgò *fædus icisse* aut *inisse.*

337, 10. *M. Annium Appium.* Quum *Appius* prænomen sit, Manutius censet reponendum esse *Papum*, aut aliud simile.

338, 16. *Quem quum L. Antistius accusaret.* Addunt editi *Spoletinus*, sed codices nostri habent *Spoletinum*, errore non insolito librarii aberrantis, qui scriptam non suo loco vocem delere noluit. *Non dixit.* Omissam a librario negationem, quam sensus requirit, cum Pantagatho & Ursino reposuimus.

339, 28. *Idem heros.* Vox corrupta. Ursinus e veteri libro reponebat *idem prætor.*

340, 16. *Mamertinos Ovios.* Ita Buchananus conjecturâ certissimâ. Oviorum familia in primis clara erat apud Campanos: Mamertini autem oriundi e Campania. Vulgò *Mamertinos obvios*, quæ vox locum hic non habet.

Ibid. 31. *Cujatis siet: id habent omnes leve.* Ita codices nostri, ut edidit Manutius & Lambinus. Vulgò, *cujatis: etsi id habent hoc leve.*

345, 27. *In ruinis nostris vestrisque discordiis.* Ita cum Lambino duo e nostris mss. Vulgò, *in ruinis vestris nostrisque discordiis.*

346, 27. *Ita enim contendere de republica, quum id defendas...& fortium &c.* Ita liber Ursini & duo e nostris, & sic dedit Grævius. Vulgò, *id enim contendere mihi videtur e republica, quum id defendas...& id fortium &c.*

355, 10. *Scelus imperatoris in pœnam exercitûs expetitur esse.* Vox ultima sumitur activè, pro *recidisse*. Ita Gruterus & Grævius e suis codicibus, & sic unus e nostris. Priùs vulgabatur, *indignissimum scelus, is imperator in pœnam exercitûs expetitur esse videatur.*

360, 22. *Rempublicam bene gestam, & paulò post, bene rempublicam geri.* Ita codices nostri & edii veteres. Primus mutavit Lambinus, deditque *rem bene gestam, & bene rem geri.*

363, 12. *An Tib. Gracehus.* Hic Gruterus & Lambinus negantem particulam inferuerunt, quam ignorant Græviani & nostri codices, & sensus respuit.

365, 8. *Exstinxit respublica dignitasque ipsorum.* Ita Grævius e codice Erfurtensi, cui accedit unus e nostris, pro vulgato, *exstinxit reipublicæ dignitas & ipsorum.*

368, 2. *Decem dierum.* Ita ex præcedentibus reponendum esse duximus cum Grævio. Vulgata lectio *dierum duodecim* aut *xy.* ut habent codices nostri, stare non potest.

374, 10. *Quàm ut, qui consul...is ut eam &c.* Locus contaminatus. Sensus constabit, si cum Grævio legeris, *quum qui consul...is eam desponsam &c.* Nihil variant codices nostri.

Ibid. 31. *Quòd ita meritis erat, grati.* Ita cum Grutero & Grævio dedimus: Vulgati nullo sensu, *quòd ita meritis erat, gratis.*

377, 5. *Quinqueviratum.* Legendum videtur ex historia, *vigintiviratum.*

385, 12. *Atque existimare.* Deest in vulgatis copula, quam e nostris & Grævii codicibus restituiamus.

391, 27. *Scelere etiam, si opus esset audaciâ.* Vulgò; & *audaciâ*: sed deest in mss. copula.

393, 27. *Tamen est ejus omnino cupiditatis.* Ita disertè Memmianus codex, & eodè alludit optimus e Grævianis, meliùs quàm in vulgatis, *tamen est ejusmodi cupidinis.*

399, 20. *Aut quibus necesse est idem dicere.* Locus non videtur mendo vacare. Ant. Augustinus legebat, *aut quibus nec esse ibidem liceret*, idque probat Ursinus.

Ibid. 30. *Timere videatur.* Reponit Hotomanus, *videantur*; sed tunc delenda conjunctio *si*, legendumque, *ut, ne quis id fortè nesciat, timere videantur.*

402, 1. *Quæ in hunc nondum.* Vox ultima nec in mss. nec in editis ante Gruterum visitur. Eam igitur cum Grævio delevimus.

405, 16. *Quæ in sororem tuam moliris.* Voces, *in sororem tuam*, addidit Gruterus, quas ignorant duo e nostris mss. & meliùs abesse existimavimus.

406, 13. *Pepulerunt.* Ita duo e nostris & unus e Grævianis mss. Vulgò *perpulerunt*, aut *perculerunt.*

407, 7. *Dide ac dissice.* Vulgò, *dede te ac disjice*: emendarunt Lambinus & Puteanus e vestigiis mss. qui plerique hoc loco corrupti.

Ibid. 21. *Filii causa.* Vulgò *Cælii causa*: sed nostri & Græviani codices id habent, quod dedimus.

415, 12. *Ad hospitem domi necandum.* Ita codices nostri. Quidam malunt, *ad hospitem domini necandum.*

417, 20. *Tentatum esse*. Vocolam *esse* Grævius omisit, quam servant codices.

421, 4. *Ad memoriam reipublicæ revocabat*. Vulgò *reservabat*, & id quidem habent codices nostri: sed Rubenius in electis testatur in veteri codice legi *revocabat*, quæ vox de homine semianimo meliùs dicitur.

422, 5. *Ad balneas Senias*. Ita Gruteri codices & nostri, pro vulgato *Xenias*.

423, 8. *Quadrantariâ illâ permutatione*. Narrat Plutarchus quemdam adolescentem in Clodiæ loculos pro nummis argenteis quadrantes æreos, stupri mercedem, misisse.

424, 17. *Quàm si tradidisset*. Ita cum duobus Grævii codicibus unus e nostris. Vulgò, *quàm si non retraxisset*.

427, 12. *Aut quæstio sublata*. Quæri enim de servis manumissis non licebat. Sic habet codex e nostris optimus, ut voluit Manutius, pro vulgato *sublevata*.

436, 10. *Quibus eras ignotus*. Vitiosè vulgati, *quibus erat ignotus*.

438, 21. *Quam cum Antonio communicavi*. Ita quidem libri veteres: sed Hotomano non displicet Lambini conjectura, *commutavi*.

443, 23. *Æquatum....cōsulatum*. Displicet vox *æquatum*; quid si legamus *æquum*, hoc est, commodum & faventem in omnibus.

447, 11. *In hoc majali*. Ita ex Isidoro hunc locum citante reposuit Gruterus, pro vulgato *in hoc animali*.

448, 5. *Barbaro Epicuro*. Ita Memmiani codices, idque rectè præfert Lambinus Faerni conjecturæ, *barbaro Epicureo*.

449, 20. *In toga prætexta*. Ita Turnebus. Vitiosè vulgati, *in toga & prætexta*.

452, 19. *Lutulente Casoni*. Ita Victorius & Turnebus. Alii *Casonine*.

453, 29. *Qui rempublicam senatûs auctoritate servarat*. Ita codex e nostris optimus, ut voluere Gulielmius & Gruterus. Pro *idemque in Italia*, ut habent nullo sensu codices, dedimus ex emendatione Manutii, *is neque in Italia*, nimirum Cicero. Quæ sequuntur, pertinent ad Pompeium.

456, 30. *Consentiente populi Romani... voce*. Ita Gulielmius, & firmat codex unus e nostris, in quo scribitur litteris initialibus *P. R.* Vulgò, *Populo Romano*, quas voces debebat Lambinus, sensu reclamante.

458, 12. *Tabellarum*, & folio sequenti 26. *tabellas*. Sic dedimus ex mss. Turnebi, Faerni & nostris. Vulgati habent *tabularum* & *tabulas*.

460, 6. *An amicos tuos*. Voculam *an*, quæ sensum turbat, natam ex initio vocis sequentis, cum Grævio delevimus.

461, 21. *Ex fama*. Scil. laceratione. Ita codices, ut edidere Manutius, Lambinus & Grævius. Alii *ex infamia*.

463, 18. *Absens*. Huic voci locus hic non est. Legendum videtur cum Manutio & Grævio, *ab senatu*.

471, 14. *Sed proditæ*. Ita cum Turnebo dedimus, pro vulgato, *sed perditæ*, quæ vox huic loco minimè congruit.

Ibid. 30. *Per te*. Has voces, quas omittunt vulgati, servant Faerni & Grævii codices, & nostri.

473, 7. *Videbit iratos*. Ita omnino legendum cum Lambino, non ut vulgò, *videbis*.

476, 28. *Cum patribus conscriptis*. Editio princeps, & duo codices e nostris habent litteris ini-

tialibus *cum P. C.* quod a nonnullis haud rectè videtur explanatum *cum P. Clodio.*

477, 27. *De folio.* Ita quidem Grævius e mss. & editis ferme omnibus, & *folium* hoc loco putat esse lectum vel *sellam*, in qua Piso solus sederit. Sed Ernesto placet conjectura Ant. Augustini legentis, *de dolio*, hoc sensu: *Bibitur usque eò, dum vinum diffusum & vetus exhaustum sit, & vinum recens, doliare, ministretur.* Vide Turnebi advers. libro I, 1.

479, 4. *Epicurum disertim dicere. Est tamen: dicit ut opinor.* Ita e mss. Faernus, Manutius, Gulielmius, quos sequitur Grævius. Mendosè vulgati, *Epicurum disertum decernere; & tamen dictum opinor*, nullo sensu.

490, 25. *Quid quæstor ædilitius rejeçtus? præpositus legatorum tuorum &c.* Vel cum Lambino legendum, *præpositus homo turpissimus?* vel delenda vox *præpositus*.

491, 10. *In villa Leucadia, quæ fuit uxoris Ægistii.* Ita Turnebus & Lambinus. Alii legunt, *in villa Eucadia, quæ fuit uxor Exegisti.*

492, 23. *Quàm numerum militum...cognoscere.* Videtur legendum *cognosci.*

494, 16. *Ad simultatem.* Vulgò *ad simulationem.* Lambinum sequimur.

503, 5. *Hujus dignitatis.* Legendum videtur cum Gronoviis, *huic dignitatis jactura facienda est.*

Ibid. 21. *Quid tu? an dignitatis &c.* Ita Grævius e suis mss. Alii, *quid? tu non dignitatis &c.*

505, 20. *Ut fueris dignior.* Ita Grævii codex Erfurtensis, & duo e nostris; & sic legendum esse patet ex repetitione eorundem verborum in-

riam, tam novam in omni genere voluntatem, impudentiam, audaciam, cupiditatem, comprobabitis? Pontifex, inquit, affuit. Non te pudet, quum apud pontifices res agatur, pontificem dicere, non collegium pontificum affuisse; præsertim quum tribunus plebis, vel denunciare potueris, vel etiam cogere? Esto: collegium non adhibuisti: quid? de collegio quis tandem affuit? posuerat enim auctoritatem in uno, quæ est in his omnibus; sed tamen auget & ætas, & honos dignitatem: opus erat etiam scientiâ; quam etsi omnes consecuti sunt, tamen certè peritiores vetustas facit.

118. Quis ergo affuit? Frater, inquit, uxoris meæ. Si auctoritatem quærimus, etsi id est ætatis, ut nondum consecutus sit; tamen quanta est in adolescente auctoritas, ea, propter tantam conjunctionem affinitatis, minor est putanda: sin autem scientia est quæsita; quis erat minùs peritus, quàm is, qui paucis illis diebus in collegium venerat? qui etiam tibi erat magis obstrictus beneficio recenti, quum se, fratrem uxoris tuæ, fratri tuo germano antelatum videbat. Etsi in eo providisti, ne frater te accusare posset. Hanc tu igitur dedicationem appellas, ad quam non collegium, non honoribus populi Romani ornatum pontificem, non denique adolescentem quemquam, quum haberes

frà , *sed* , *ut fueris dignior*. Haud rectè vulgati , *at fueris dignior*.

Ibid. 29. *Quid cuique ipsi debeant*. Vulgò , *quid denique ipsi debeant*. Præstat lectio , quam servant Grævii codices , & plures e nostris.

507 , 9. *Cn. Manlium*. Hic & pro Murena 36. Manutius reponit *Mallium* , quia Manliorum nota nobilitas.

Ibid. 29. *Iidem mihi sunt grati*. Ita Grævius. Codices , quos excussimus , corrupti hoc loco , ut alii plerique. Gruterus dedit , *idem mihi sunt iudices parati* , obscuro , aut nullo sensu.

508 , 18. *Simul ut qui sint professi videro , dicam*. Ita Grævius , sensu aperto , pro vulgato , *simul ut qui sint professi , video quid dicam*.

511 , 11. *Tot e reliquis*. Vulgò *quot e reliquis*. Correxerit Grævius e suis mss. quibus accedunt etiam nostri.

515 , 23. *Votis , ominibus , lacrymisque*. Ita Grævii codex Erfurtensis , & unus e nostris , idque præstat vulgato , *lacrymis votisque omnibus*. Ex iisdem codicibus dedimus infra , *ut haberent quem reducerent* , ubi malè vulgati , *ut haberent quod reducerent*.

516 , 11. *Qui si adesset*. Ita codices nostri , ut voluit Ursinus , pro vulgato , *quod si adesset*.

520 , 19. *An quod rejectæ auctiones essent ? Immo verò , inquit , quod legationes*. Ita ex optimo codice Turingico locum emendavit Grævius. In vulgatis legitur nullo sensu , *an quod auctiones essent ? Immo verò inquit , quod legiones*.

522 , 13. *Ulla in re*. Ita cum Manutio codices nostri. Vulgò , *nulla in re*.

Ibid. 17. *In ipso denique ambitu , rejectionem fieri voluerit iudicum alternorum*. Ita Grævius lo-

cum emendavit, qui in vulgatis sic legitur nullo sensu, *de ipso denique ambitu, de rejectione fieri voluerit iudicium alternorum*. Vide in Vatinius n. 27.

Ibid. 27. *Et per consensionem magistratuum, quæ honestè sodalitas nominaretur*. Hæc quo sensu dicantur, obscurum est: itaque cum Grævio lectionem codicis Erfurtensis admisimus.

525, 26. *C. Flavium*. Ita quæsitior hic a Laterensi editus vocatur infra n. 104. nec verisimile est *C. Alphium*, ut habent vulgati, qui hoc anno prætor fuit, editum quæsitorem fuisse.

526, 24. *Conficere*, id est, conciliare amicis suis *suam tribum*. Vulgò, *reficere*. Correxerit ex optimo codice Erfurtensi Grævius, & sic habent duo e nostris.

529, 30. *Sed comitia... fuerint prærogativa*. Vulgò *prærogata*. Id dedimus cum Grævio, quod habent codices nostri.

536, 26. *Non te id quod multi invideant...* Vide in Sextiana n. 102.

537, 28. *Profers triumphos Titi Didii*. Cujus triumphus ex Macedonia in Pisoniana n. 61. Didii numerantur inter homines novos pro Murena n. 17. Erfurtensis igitur codicis lectionem prætulimus vulgatæ *Tib. Gracchi*, quæ nata videtur ex mera alicujus conjectura: nam codices nostri nomen omittunt, scribuntque *T.... & C. Marii*.

Ibid. 31. *Magistratus ceperint, quod triumpharant*. Ita disertim duo codices e nostris, quibus proximè accedit Erfurtensis, qui habet, teste Grævio, *magis ceperint*. Huic loco minimè satisfacit vulgata lectio, *magis laude fuerint digni, quod triumpharunt*, nec sanè in ea Tullii manum agnoscas.

539, 7. *Nisi eum...putabis fuisse.* Verbum *putabis*, aut *putabit*, ut habent quidam codices, rectè deletat Gulielmius.

544, 19. *Quod fuit ullorum.* Addunt vulgati, *tantum? requiro, utrum putes odium.* Quas voces e versu superiori malè iteratas erasimus. Has duo codices e nostris, pluresque alii non agnoscunt.

546, 27. *Propter rei magnitudinem.* Ita e mss. Gulielmius & Grævius. Vulgati mendosè, *propter ejus magnitudinem.*

547, 12. *Et mihi dices.* Ita Grævius e mss. in quibus, ut in optimo e nostris, scribitur *infra contenderim*, non, ut vulgò, *contenderis.*

548, 24. *Et injuriam pratoris.* Vulgò *populi Romani*, sed Gruteriani codices & nostri scribunt *p. r.* unde, ut innuit Gulielmius, fieri potest *pratoris*, potiùs quàm *populi Romani*: tunc enim iidem codices scribunt *ppli R.*


550, 3. *Salutem...abjecero.* Ita codex Erfurtensis Grævii, meliùs quàm vulgati, *objecero.*

551, 30. *In ludos*, nimirum Circenses, in quibus thensæ, seu sacra quædam vehicula, a signo Vertumni in circum maximum ducebantur, onusta deorum imaginibus: ædilium autem erat thensarum & pompæ illius viam curare. Vulgati mendosè *in locos.* Ursini & Turnebi codices sequimur cum Grævio. Unus e nostris mendosè *illusos.*

563, 20. *Te tamen, exsurge, quaeso, retinebo.* Ita Grævii codex Erfurtensis, & duo e nostris, idque præstat vulgato, *huc exsurge tamen quaeso. Retinebo.*

FINIS.









*image
not
available*